

Donación de D. Joaquín Ruiz  
del Portal. — Sevilla 1.983



FR 1696

Donación de D. Joaquín Ruiz  
del Portal. — Sevilla 1.983



INSTITUTIONUM  
ELEMENTARIUM

PHILOSOPHIÆ

AD USUM STUDIOSÆ JUVENTUTIS

AB ANDREA DE GUEVARA

ET BASOAZABAL,

GUANAXUATENSI PRESBYTERO.

TOMUS PRIMUS.

COMPLECTENS

HISTORIAM PHILOSOPHIÆ ET ELEMENTA MATHÉSEOS.



MATRITI

EX TYPOGRAPHIA REGIA.

1829.



## PRÆFATIO.

**P**RIUSQUAM hujus opusculi rationem, atque ordinem, ut plerumque solent auctores, prænuntiem; operæ pretium credidi, ad publicum sapientum tribunal me sistere, ut excusationem præmittam, quod eruditis hisce temporibus consilium susceperim scribendi philosophiam. Accusabor enim, et quod actum egerim, ac frustra tempus consumpserim, cum philosophici libri magna jam copia conscripti sint, perque orbem universum disseminati; et quod temerè putaverim, aliquid esse me, quum autem crambem recomere. Quamvis sapienterunt argumentum in me ætatis, Mussembroekius, Burghartius, Sagner, Genovesius, Hauserus, natus Brixiensis, Monteirus, Vernejus, vathus, Makus, Corsinus, Jacquier, Tamna, Para, Bergerus, Torrius, alique benè multi, qui jurè numerantur in sapientibus, et quorum nomina sunt in philosophiæ scriptoribus illustrissima. Quid ego irrepere tentem in hos viros tantæ magnitudinis? Quid doctrinarum afferam, quod illi non exhausterint? Quid



superbè pollicear, traditurum me philosophicas disciplinas aut elegantiori stilo, aut clario-  
ri ordine, majore perspicuitate, quàm tot tan-  
tosque ante me fecisse nemo non audit? Equi-  
dem fateor, hæc animo sæpe, ac serio quum  
tacitus agitaverim, arreptum calamum semel,  
et iterum deposuisse, ac penè à proposito de-  
fecisse; nimirum meo timentem nomini, quod  
Sibilis posset excipi, aut certè fastidio.

Ceterum ita deficientem, languentem, ac  
territum duo me semper confirmarunt, atque  
impulerunt, ut institutum laborem non desi-  
nerem. Et primum quidem, quia maximopere  
desidero patriæ juventuti, quaqua possum  
ratione, tam longè ab ea positus, inservire.

endi bono juvenum, quos  
des. defuere laudando  
æ sequer. r: Horvathus enim, et  
a Germanorum, Monteirus, et Ver-  
Lusitanorum suorum eruditionem po-  
jaculati sunt, cum scripta sua phi-  
losophica divulgarent. Et certè spero, Mexi-  
canos adolescentes, quum intellexerint, philo-  
sophicas lucubrationes elaborasse Mexicanum  
hominem, qui hoc sanè studio non sibi nomen  
quæsit, non gloriam, non quodvis aliud in-  
humanis emolumentum, sed eorum tantummo-

dō bonum respexit; spero, inquā, ingenuos  
 illos, et optima natos indole, ad amorem phi-  
 losophiæ facili exsuscitandos. Et hæc mihi  
 proposita meta satis videtur à temeritatis no-  
 ta excusare scribentem philosophica; quam-  
 quam idem fuerit plurium, et quidem sapien-  
 tissimorum, argumentum: quemadmodum ne-  
 mo dixerit, modestissimum Monteirum, ejus-  
 que similes, ab sua temperantia defecisse, quo-  
 niam doctrinas, ab innumeris philosophiæ Doc-  
 toribus agitata, ipsi rursus agitarunt. Alte-  
 rum autem vehementius me commovit, ut to-  
 tis conatibus perficerem, quod opus inceperam;  
 nimirum ut omnino corruat, et funditus era-  
 dicetur præjudicata opinio, quæ quondam apud  
 nonnullos in maximam litterarum perniciem  
 invaluerat, quod scilicet <sup>re</sup> <sup>quam;</sup> <sup>sop</sup> <sup>ua</sup>  
 sensim inducit in irreligi- <sup>me</sup>  
 que propterea cultores objiciunt <sup>per</sup>  
 periculo, religioni catholice tergo-  
 Summa quidem cum voluptate inte-  
 tidie magis in meis <sup>civibus</sup> hunc paucō <sup>me</sup> <sup>er</sup>-  
 rorem everti, et profligari. Quod si quis adhuc  
 remaneat, cui tenaciter insederit hæc nihil  
 consona rationi opinio; animadvertat, quæso,  
 in hac urbe amplissima, cui præsidet Christi  
 Vicarius, Ecclesiæ Caput, publicè coli, et in

*scholis omnibus doceri recentiore hanc philosophiam; in eademque religionis Catholicae magnifica sede institutiones istas philosophicas typis esse mandatas. Plures profectò ex recentioribus philosophis in errores di generis inciderunt; sed inciderant pariter plures ante philosophiae instaurationem: nec est, cur doctrinis de re physica tribuantur crimina, quæ cordis corrupti sunt.*

*Quod autem est de ratione, ac distributione operis, quatuor dumtaxat constabit voluminibus; quæ nec erunt aut assiduus auctorum appellationibus, aut annotationibus referta, nec in magnam molem excrescentia; sed studiosorum usibus omninò commoda. Quin et cor-  
di mihi fuit rem totam ita temperare, ut triennii spatium ad philosophiæ dari solet, ea quatuor volumina sedulus Magister facile discipulis explicet, atque enucleet. Primum hoc historiam philosophiæ brevissimo narrat compendio, inde verò matheseos elementa complectitur, quorum notionem ceteris philosophiæ partibus, certè physicæ, præmittendam existimamus: alterum in dialectica ac metaphysica totum erit: tertium generalia physicæ rudimenta, quibus propterea nomen est physicæ generalis, dilucidabit: quartum denique de pecu-*



liaribus aget naturæ phænomenis, quæ certis jam definita sunt legibus, ac physica particularis in scholis apellantur. In hæc autem adedò varia tractando argumenta, totis fui conatibus, ut, qui juvenis ea condidicerit, planam sibi, et constrictam reperiatur viam ad majoris momenti scientias, et munera; vel ad altaria postmodum, vel ad forum, vel ad togam, vel ad militiam, vel ad mercaturam vocetur. In dialecticis quidem, et metaphysicis non planè jejuno, ac presso sunt stilo, qui penitus amœnitatem excludat; sed tamen ab scholasticorum more vix paulum recedo, tum patriæ serviens consuetudini, tum etiam ne desit locus tam privatis, quam publicis concertationibus, quæ mentem adolescentium excuunt, eorundemque profectui quam utilissimæ sunt, ut longo nobis experimento notum est. In physicis autem, ut alia prorsus est, atque oppidò jucundior natura rerum, quæ tractantur; de scholæ severitate liberius puto remittendum. Elocutionem adhibeo, non eam planè barbaram, incultam, atque horridam, quam usurpabant olim, qui se dicebant Aristotelicos; neque tamen latini sermonis puritati tam religiosè adhæreo, ut ea credam respuenda verba, quæ longo jam usu sapientes

*in quæstionibus philosophicis consecrarunt. Primam autumo scribentis esse gloriam in limpida perspicuitate; quam ita sequi animus est, ut velim potius inuri nota minus venustè scribendi, quam quod videar me quærere, nec indolem juventutis intelligere.*

*In hac etiam præfatione ad philosophica scripta præterire non licet, quod perperam nonnulli crediderunt, recentiore philosophiam ætatis teneræ captui parum convenire, atque experimento jam esse comprobatum, majorem ab ea veteri, quam ab instaurata philosophia profectum juvenes derivasse. Non est hujus loci cum præjudicatis opinionibus colluctari; sed brevi liceat enodare difficultatem. Hodierni philosophi stilum amant cultiorem, et venustè concinnum, qui et mirificè delectat animos, et scientiarum imagines amabiliore specie repræsentat: quare si ad eodem auditor venerit, qui Magistrorum linguam non intelligat, nemini profectò mirum esse debet, si vel parum, vel omninò nihil proficiat. Quid scitè velis pulsare lyram, nisi musicas notas, quæ sunt artis linguæ, condidiceris? Quid opus fabrilis aggrediaris perficere, nisi prius fabrorum voces, et prima opificii rudimenta intellexeris? At nescio quo malo consilio in re-*

gionibus, ubi Magistri latinè tradunt, venire solent ad philosophiam juvenes, quin prius in grammaticis perficiantur. Et hinc malum est gravissimum, quod nonnulli ad philosophiæ studium evehuntur, quibus nisi converteris in patrium sermonem latinos Magistri codices, perindè illos, atque Aristotelis græcos intelligant. Nimirum quidam sunt, qui paterno prærepti amore, filium penè infantem in scientiarum palæstram immittunt, et exacto triennio, vix balbutientem in grammaticis ad philosophicum lycæum immaturè deferunt, festinatione nimis propera volentes, lauro puerum coronari, quæ non convenit, nisi ætate firmioribus. Et fortassè arbitrantur filium suum, anticipatis litterarum luminibus, brevi fore familiæ gloriam et columen: sed vereantur potius, ne tenellas adhuc, nec satis robustas mentis fibras, tam gravent ejusmodi anticipatione, tam onerent, tam enervent; ut ad debitam fortitudinem opportuno postea tempore non possint ultra componi. Newton quidem duodecimo ætatis anno, quod ajebat Lockius, nondum prima grammaticæ attingerat rudimenta: et tamen eo pervenit, ut philosophos, quot quod ad ejus ætatem fuerant, vel superaverit, vel saltem clarissimos omnium exæ-



*quaverit. Quod si ad litterarum sudorem ante maturam tempus accessisset, fortassè difficultatibus, quæ sæpissimè parantur pueris, obrutus concidisset; nec tam robustum habuissent Cartesiani vortices eversorem.*

*Unum superest, ut præmoneam, qua de causa notiones algebraicas in hoc primo institutionum volumine intersuerim. In diversas enim hodierni philosophi scinduntur opiniones de tradenda juventuti geometria: maxima profecto illorum pars auditoribus consuevit proponere, ferè quidquid ea scientia complectitur: alii verò totis propugnant conatibus, adolescentium ætatem satis quidem esse ad utilissima quædam ejusdem rudimenta, quæ labore modico demonstrantur; minimè autem ad eam mentis intentionem, sublimioremque volatum, quem algebraicæ, ac trigonometricæ notiones expostulant. In his postremis video Monteirum, et Vernejum, quorum primus ait, plurium annorum experimento in eam sententiam venisse; alter diversè judicantes acerrimè insimulat, eorumque opinionem pedantissimum calculi appellare non dubitat. Et utique fateor, parum abfuisse, quin recentioribus his clarissimis litem adjudicarem; quoniam et ego vidi juvenes nonnullos, quorum fuerat ins-*

titutio meæ curæ comissa, maximoperè adlaborantes, ac desudantes in elementis algebri-  
cis, tamquam in re captui non pervia, tametsi alioquin essent ingenio satis claro, et aperto. Ceterum quum animadverterem, hominum ingenia diversis ornata dotibus ab supremo rerum artifice, nec admodum pauca reperi, quæ à primis ætatis initiis idonea videntur ad calculum; consultius mihi visum est, tam his, quam aliis prospicere, totiusque geometriæ scribere compendium, his tantummodò prætermittis, quæ summum possent negotium facessere. Præceptoris erit, qui administrat adolescentium ingenia, singulorum vires perpendere, partemque cuilibet suam ad prudentiæ leges dispensare; ne vel alter concidat sub onere sibi gravissimo, vel alteri desit, quod habere oportuisset. Siquis tamen præceptor in faciliorem puerorum eruditionem satius arbitretur, hæc prorsus omittere, nihil idcirco timeat ad physicæ tractatus accedere; quos ita componere conatus sum, ut prodesse possint tam algebram nescienti, quam desideranti. Utinam omnia cadant in Mexicanæ, ac studiosæ pubis utilitatem!

---

---

Sin autem quis requirit, quæ causa nos impulerit ut hæc litteris mandarem, nihil est quod expedire tam facile possimus. Nam quum otio langueremus... primum ipsius reipublicæ causa philosophiam nostris hominibus explicandam putavi, magni existimans interesse ad decus et ad laudem civitatis... Hortata est etiam, ut me ad hæc conferrem animi ægritudo... cujus si majorem aliquam levationem reperire potuissem, non ad hanc potissimum confugissem. Ea verò ipsa nulla ratione melius frui potui, quam si me non modò ad legendos libros, sed etiam ad totam philosophiam pertractandam dedissem.

*Cicero de Nat. Deor. Lib. 1, cap. 4.*

---

---



---

# DE PHILOSOPHIÆ

## VICISSITUDINIBUS.

### BREVIS NARRATIO.

**P**rofectò non aliud sub cœlo est, quo certius, et solidius confirmetur, ad grandia, et sublimia natum esse hominem, quam nobilissimum desiderium, quo trahitur, impellitur, agitur, et urgetur ad scientiam. Nullo non fuerunt tempore illustres ingenio viri, qui laudabiliter conantes, ac nulla penè intercapedine desudantes, gloria litterarum excellenter; qui per invia, per prærupta, per tenebras, una ducementis dexteritate, ad rerum intelligentiam adreperent; qui sapientiæ vestigiis insistentes, et maria tranarent; et in diversas orbis partes discurrerent, et longo vitæ spatio peregrinarent; qui denique quidquid potest mortalis infirmitas, totum adhiberent, ut ab silente, ac penè obluctante natura, secreta id generis extorquerent. Hi certè sunt homines, quorum opera dixeris humani generis gloriam, et ornamentum adolevisse, qui planè noverunt, se homines esse, nec eatenus natos, ut fruges consumerent, ut inanibus oblectamentis conescerent; sed ut principem sui partem inquisitione pulcherrimæ veritatis excolerent. Utinam id satis caperent adolescentes quidam,

qui tanto publicæ rei detrimento, tantoque humanitatis dedecore sese voluptatibus dedunt, nullo termino definentes otio, diù, noctuque, privatim, et publicè oscitantes, et socordia incredibili torpescentes! Utinam intelligerent, vix dignos esse hominum societate, qui, quum facile possent, discere tamen contemnunt, quo potissimum differant ab aliis animantibus rationis expertibus, nec umquam experiri conantur, qua sint mentis magnitudine comparati! Nimirum colluctatur in homine sciendi aviditas, quam habet ingenitam à natura, cum voluptatum illecebris, et sæpè delusi falsa rerum specie, in pejora spontè prolabimur.

Neque verò tantus esse locus errori posset, si seriò et accuratè perpenderemus, quam suaviter, quam tranquillè, quam jucundè vitam agunt, qui litterarum studiis immerguntur. Equidem nihil tam vellem, quam vos, adolescentes Mexicani, quos in hac à patrio solo distantia sæpissimè repeto memoria, quos ex animo nunc alloquor, et quorum præsertim bonum cordi mihi est, quam vos, inquam, deponere præjudicatam opinionem, quæ perperam invaluit; quod videlicet philosophici sudores valetudini noceant, vitam brevient, morosumque reddant hominem, in humana consuetudine difficilem, pertinacem aliorum contemptorem, vanè intumescensem. Quod afflictæ valetudinis, et vitæ brevioris est, Tullius, Lucianus, et post multa sæcula Feijovius, longam contexuere clarissimorum virorum seriem, qui quum nihil interruptè in litteris ætatem po-

suissent suam, ad octogesimum annum, ad nonagesimum, ad centesimum etiam, eoque amplius, robustis viribus pervenerunt. Et plures adjicere possemus recentioris ætatis, quorum alios audivimus, alios vidimus, in his laboribus longissimè vixisse, quin ullo possit asseri fundamento, quod ipsis litterarum defatigatio jacturam valetudinis importaverit. Quod autem attinet ad vitia, quæ litteratis tamquam peculiariora maligni calumniatores objiciunt, animadvertite, adolescentes, non hæc litterarum, sed miseræ mortalitatis esse vitia. Quodnam, quæso, est vitæ genus, quodnam à Numine donum, quodnam à natura beneficium, quodnam ab amicis obsequium, quo, quum volueritis, abuti facilè non possitis? In id vestros intendite conatus, ut, quam mentem ab supremo rerum Opifice liberaliter accepistis, pro viribus perficiatis; ut veritatis indagatione thesaurum vobis nobilissimum comparetis, ut scientiarum viam, initio quidem ingratham, et spinosam, ingredientem, ad temperantem modestiam animum componatis; omninò ut prudenter, humanè, sobriè sapiatis: et polliceri non dubito, vos olim summam suavitatem in eruditæ lucubrationibus gustaturos, vos ad sapientiæ fastigium concensuros, vos patriæ decus, et ornamentum futuros.

Sed ad propositum veniamus de historico philosophiæ compendio. Rectè quidem philosophiam appellavit Tullius vitæ ducem, virtutis indagatricem, vitiorum expultricem, quæ peperit urbes, quæ dissipatos homines in so-

cietatem vitæ convocavit, quæ ipsos inter se primò domiciliis, deinde conjugis, tum litterarum, et vocum communione junxit, legum inventrix, magistra morum, et disciplinæ: rectè, inquam, quum ab amore sapientiæ, hominumque conatibus, ut ipsam acquirant, innumera bona humanæ societati nata sint. Neque mirum alicui debet esse, quod in hac obtinenda laude tot jam sæcula desudaverint, præstantissima ingenia, quin convenire potuerint in unitate doctrinæ: sunt enim humanæ mentes ad diversam armoniam temperatæ, prout diversa sunt organa, quibus intelligunt et quemadmodum, pulsata chorda, ceteræ consonant, quæ sint ad eundem intentæ numerum; ita vibrata humani cerebri fibra, similis vibratio respondet in aliorum cerebrorum fibris, quas rerum omnium artifex ad eundem temperavit concentum. Et hinc repetenda videtur illa plurium inter se consensio in eodem opinandi modo, et ab aliis omnimoda dissensio. Loquimur autem de iis ingeniis, quæ seriò veritatem inquirunt, nec ultrò sese obcæcant, et voluntaria caligine involvunt: nam si errorem, in quem semel prolapsus es, totis tenere viribus obstinaveris; aut si partium favore subscripseris doctrinæ, quantumvis absurdam manifestissimè videas, longè admodum semper eris à vera philosophia, nec unquam in sapientibus numeraberis.

Sapientiæ quidem amor ab exordio fuit mundi, et primum philosophum dixeris primum hominem, qui justus prodiit è Creatoris



manu nec propterea circumvolutus mentis tenebris, quibus ab originis peccato deturpati sunt posteri: nescivit ille infantiam, vixque natus, adultam sensit rationem. Libenter superse-  
demus ab inutili quæstione: quò pervenerit Adami philosophia? quas habuerit notiones de physico rerum ordine? quò processerit in logicis, metaphysicis, ethicis, et politicis? Id enimverò certum est, quod confestim ab ortu constitutus est universi terrarum orbis Princeps, et Dominus; nec dignum esse supremi Auctoris providentia videtur, hominem, cui primas in creatione liberaliter detulit, et à qua sui generis notitiam derivaret posteritas, vel non excellere mentis acie, vel eam incultam desidiosè relinquere. Solet quidem Deus imbecilles administratores immittere, ut in criminisum populum animadvertat; sed non fuerant ante Adamum homines, qui peccarent. Ille certè tam animantia, quam plantas, et cetera suæ potestati subjecta, nomine quodque appellavit suo: in quo quidem munere tam sapientem, et naturæ peritum se probavit, ut in Cratylo suo fidenter asseruerit Plato, primarum nomina mirabiliter exprimere ipsarum rerum virtutes, nec appellari tam proprie res potuisse, nisi appellantis mentem regeret divina sapientia. Non audemus cum iis convenire, qui tantum extollunt primi hominis philosophiam ut planè judicent, ad similem postea pervenisse neminem; sed ab eo certè notiones acceperunt hæreditate posteri, quas multiplicatis postea sudoribus propagarunt; et sin minus

omnes, utique plures philosophiæ ramos jam ante diluvium perfecerant. Hæc autem doctrinarum studia non omninò periisse dicenda sunt in hac aquarum inundatione, qua totus ferè orbis interiit; sed qui supernatantis arcæ beneficio Noenum, ejusque filios à communi naufragio liberavit, in iis humani generis reliquiis conservari voluit, magna saltem ex parte, acquisitam ante hæc tempora philosophiam.

Noemus igitur, qui sex tota sæcula vixerat ante fatalem illam criminosi hominis ruinam; ultra tercentos adhuc annos in orbe instaurato, et aquis repurgato vivens, facile perpetuavit lumina de supremo rerum Domino, de prima humanæ gentis origine, de cœlorum, terrarumque fabrica, et plura id generis, quæ vel ad physicum ordinem, vel ad rationis usum, et perfectionem, vel ad artium industriam spectantia, tum ab aliis didicerat, tum suis ipse observationibus adinvenerat. Sedem sibi commorationis elegit Chaldaicas regiones, ubi ejus filii, nepotesque rapidissimè propagati sunt, in immensum crescentes populum; et post absurdos conatus extollendi turrim ad sydera, linguarum confusione puniti sunt, ac per diversas orbis partes disseminati. Atque ita quidem per universas ferè terras detulerunt pretiosissimum notionum thesaurum, quas à Noemo derivaverant. Sed non ubilibet æquè profundas egit philosophia radices, quinimò labente tempore, tam adolevit ignorantia, ut, si Chaldæam exteperis, non alibi remanere visa sint, nisi deformia commenta, quasi vestigia

quidem veritatis ab antiqua Noemi doctrina, quam hominum somnia turpissimè adulteraverant. Quidquid alii decertaverint de sapientiæ primatu in notionibus, num Ægyptiorum Sacerdotes, num Persarum Magi, num Indorum Gymnosophistæ, num Gallorum Druides, primi philosophiam tradiderint; nos quidem libenter subscribimus Tullio dicenti: *Suntque Chaldæi antiquissimum Doctorum genus.* Et quidem Berosus asserit, Chaldæum quemdam remotissimis vixisse temporibus, à quo prima fuerunt Astronomiæ lumina. Flavius autem Josephus affirmatè propugnat, Chaldæum hunc fuisse Abrahamum, qui et suis peregrinationibus per Phœnices, Ægyptiosque, primus ad eas regiones intulit arithmeticam, et astronomicam scientiam. In hac sententia conveniunt Eupolemus, Eusebius, et Augustinus, qui duodevicesimo libro de Civitate Dei palam inficiatur, coli ab Ægyptiis philosophiam ante Abrahamum cœpisse. Scientias verò, quarum donum habuit Ægyptus ab hoc Hebraicæ gentis Parente, post annos plures instauravit, et mirificè propagavit ejusdem pronepos Josephus, quo tempore in Ægyptiis prima post Regem fuit potestate: à quo sanè benefico Ministro traditam iis gentibus geometricam doctrinam, in laudato Flavio comperimus. Ægyptiis postea litteris eruditus fuit Moses, non quidem inanibus illis, quæ dæmonum invocatione, infandisque incantationibus constabant; sed quas ab hebraicis Magistris quum primum audiissent, institutis ipsi defatigationibus perfecce-

runt. Hunc enimverò Dei populi Ducem oppidò excelluisse mentis claritudine, miramque habuisse tum naturæ cognitionem, tum scribendi elegantiam, et sublimè cogitandi facultatem, extra omnem dubitationis aleam erit Divinos legenti libros, qui ab ejus calamo sunt.

Per eadem ferè tempora vixisse creditur Jobbus, cujus nomine inscriptum legimus Codicem in Divinis annumeratum. Contendunt quidem eruditi, quonam ille prodierit auctore, num Mose, num Jobbo ipso, num fortè alio, cujus nomen injuria temporum interierit. Sed pro re nostra parum refert, auctorem non noscere; quum in eo libro, et plura certè signa sint remotissimæ antiquitatis, et poesim perspicuè legamus, non quidem ligatam numeris, in qua tamen elucet profunda morum philosophia, erudita mundanæ fabricæ cognitio, mirastili sublimitas, robustissima gravitas, pulcherrima imaginum efficacia, eaque dicendi vis, ac nobilitas, quibus Homeri, et Virgilii nomina tam clara fuere posteritati. Floruerunt postmodum in Hebræis Doctores, qui Mosi successerunt, ejusque philosophiam perpetuarunt: in iis autem excelluere David, et Salomon; David quidem à famosis carminibus, in quibus ea supereminet verborum, et sententiarum vis, ac majestas, tam certa, et profunda cordis humani scientia, mundanæque machinæ tam sublimis cognitio, ut nationes omnes communi suffragio dixerint, ab auctore sapientissimo hæc fuisse poemata. Salomoni autem facilè primum conceditur nomen in illustrissimis toto orbe



philosophis, qui nimirum et Proverbia, et Ecclesiasten, et Cantica Canticorum, uberri-  
mos mirificæ doctrinæ fontes, conscripsit; et  
alia plura sapientiæ monumenta reliquerat pos-  
teris, quorum magna pars incendio periit Eze-  
chiæ Regis ætate, in quibus de plantis omni-  
bus, de terræ bestiis, de cœli volucribus, de  
reptantibus, de piscibus, quorum omnium no-  
vit naturam, et proprietates, disseruisse intel-  
ligimus.

De celebrioribus quidem philosophis, qui  
floruerunt ad Ægyptios, ad Phœnices, ad Per-  
sas, ad Indos, ad Atlanticos, ad Thraces, ad  
Gallos, immensam operam posuere Critici, ut  
opinionēs conciliarent tam de Mundi ætate,  
qua vixerunt, quam de doctrinis, quas singuli  
tradiderunt. Utique liquidum videtur, ab anti-  
quissimis temporibus veneratione prosecutos  
philosophiam Ægyptios, qui ex philosophorum  
numero Sacerdotes, Regem et Sacerdotibus  
eligebant. Ita pervenit ad Ægyptium regnum,  
quod et summoperè decoravit, Trismegistus  
ille, in Sacerdotum collegio summus, clarissi-  
mus in philosophis. Et nemo certè denegavit  
Ægyptiis hanc gloriam, quod ad eosdem con-  
tenderint Solon, Thales, Pythagoras, Demo-  
critus, Plato, idque generis præclarissima in-  
genia, ut in famosiori tunc temporis fonte bi-  
bentes, doctrinarum thesaurum attingerent.  
Laudantur ab Lucano Phœnices, quod litteras  
primi excogitaverint; et à Plinio, quod navi-  
gandi artem invenerint, quæ si minus compro-  
bant Phœnicum philosophiam, ad eos profectò,

quemadmodum ad Ægyptios, ibant Græci scientiarum, et artium avidissimi, ut in earundem perficerentur notionibus. De Persiæ Magorum sapientia, deque ipsorum principe Zoroastro narrantur innumera; sed quæ non modicis intermixta fabulis, libenter prætermittimus; quamquam planè fatendum sit, philosophiam coluisse Persas, ad quos etiam exteri hac de causa peregrinabantur. Indorum Gymnosophistæ magnum sapientiæ nomen sibi compararunt, quos et Pythagoras, et Democritus et Anaxarchus, et alii prima dignitate philosophi, audire discipuli. Triginta septem annos consume-  
bant Gymnosophistæ in placida solitudine, ac litterarum otio, nec ante confectum hoc privati recessus, et studiorum curriculum, ad docendi munus evehebantur. Cum laude memorat Augustinus Atlanticos, quibus fuit nomen ab Atlante Mauritaniæ Rege, quem ferunt oppido famosum tam ab assidua cœlorum contemplatione, quam ab sphæræ illius inventione, qua siderum motus describuntur. Et Virgilius, et Plinius eundem extollunt ab astronomicis cognitionibus. A Zamolxi, et Orphæo Thracibus jactabat Thracia philosophorum suorum antiquitatem, et sapientiæ culturam. Gallorum Druides, quorum opera cives illi ad mentis, et religionis disciplinas erudiebantur, apertè commemorant Aristoteles, Cæsar, Strabo, Tullius, et Ammianus Marcelinus, eorumque prædicatur doctrina, et excellentia tam in scientiis profanis, quam in religiosa, et morali.

Sed hactenus dictum est de remotissimorum

temporum philosophia; quam idcirco rapidissima festinatione percurrimus, quia, si divinos libros exceperis, perpauca supersunt earum ætatum monumenta quibus inniti possit historicus libero ab erroribus calamo. Antiquissima est Græcia, cujus philosophi sapientiam suam innumeris profusam libris posteritati reliquerunt. Græcia profectò novum philosophiæ splendorem attulit, ut ferè dici possit philosophorum seminarium; non enim, ut ad eam ætatem alibi, dumtaxat unus, alterve fuere, qui diversis perspersi religionibus, lentos fecerint, quamquam felices, conatus; et suorum scriptorum auxilio, bonoque ingenii nomine philosophiam extulerint, et communicaverint quidem non mediocria lumina, sed instar fulguris rapida, et brevi peritura. Singulare videtur à coelo habuisse Græcia privilegium, ut longa sæculorum serie generaret, aleret, conformaretque ingentem sapientum copiam, quam fermè dixeris philosophorum nationem, qui totis essent viribus in veritatis inquisitione, qui majorum notiones indefessis laboribus adaugerent, qui sapientiam comparaturi nihil dubitarent, et tranquillum otium et paterna bona, et charos cives, et dulcissimam patriam deserere, qui profundè cogitando, arcana rimando, naturam contemplando, eventus eventibus conferendo, contemptis rebus ceteris, incanescerent. Antiquitate primum in his doctissimis Græcis Thaletem apellamus, qui mirabili donatus ingenii facilitate, summaque flagrans cupidine ad scientiarum fastigium perveniendi, nihil gravatus est ad Cretenses, Phœ-

nices, Ægyptiosque iter arripere, ubi consummatus audivit astronomiæ, geometriæ, aliarumque partium philosophiæ Doctores; ac parvo tempore discipulus, cum fœnore Magistris reddidit, quod bonum acceperat; ipsosque docuit rationem, excelsas Ægypti pyramides ad certissimum calculum dimetiendi. Bona tandem Græcorum fortuna Thales in patriam restitutus est, ubi summis ardoribus deditus naturæ studio, in tranquila solitudine conclusus, nec omninò patens, nisi volentibus ab eo derivare philosophica lumina; Mileti primus instituit scholam publico civium emolumento; quam Jonicam, et omnium antiquissimam nuncupant eruditi. Vita functus est Thales nonagesimo secundo ætatis anno, et post eum, nulla jam intercapedine, florere in Græcis famoso nomine philosophi; atque institutam scholam Anaximander, Anaximenes, Anaxagoras, Archelaus, Socrates, aliique summi viri administrarunt.

Socrates autem, qui Mileto Athenas ab Anaxagora translata scholam ad honoris culmem perduxit, et patriæ nomen illustrissimum reddidit; docendi rationem non modicè immutavit, et quod ajebat Tullius, *primus philosophiam devocavit è cælo et in urbibus collocavit, et in domos etiam introduxit, et coegit de vita, et moribus, rebusque bonis, et malis quærere.* Ille quidem arte cælandi admodum excelluit, ac Diogenis Laertii ætate manebant Athenis Gratiarum statuae, quas insculpserat Socrates. Excelluit pariter eloquentiæ robore, quam tantoperè formidarunt Atenarum tyranni, ut inter-



dictum ei fuerit, ne rhetoricam Atheniensibus traderet. Excelluit demum, quod in Platone sæpè legimus, tam geometricis, quam astronomicis, aliisque sublimibus doctrinis, in quas ea ætate sapientes animum intendebant. Sed mirifica natus gravitate, atque hominum cognitione supereminens, potissimos exeruit conatus, non tam ut mentem, quam ut animum cives excolerent. Morum itaque scientiam et præceptis et exemplis tradere præcipuum fuit Socratis ad plures annos magisterium. Iniquorum judicium sententia morti traditus, intrepido conspexit ore fatalem horam, et vitam posuit ætatis anno septuagesimo.

Post hunc insignem Doctorem innumeros vidit Græcia summæ celebritatis philosophos, quorum plures, ut humana inter se discrepant ingenia, in varias ivere sententias, et scholas diversi nominis condidere, *quam tamen*, ut ait Tullius, *omnes se philosophi Socraticos, et dici vellent, et esse arbitrarentur*. Ne verò in immensum abeat hoc historicum compendium, liceat hic raptim memorare scholas, Cyrenaicam, Megaricam, Eliacam, et Eretricam; quæ tametsi Aristippum, Euclidem, Phædonem, et Menedemum, præclaræ mentis auctores habuerint; parvo tamen in honore fuerunt posteritati. Longè celebrius comparaverunt sibi nomen Academici, qui Platonem, Socrati charissimum in primis discipulum, ejusque sapientiæ propiorem, audierunt Magistrum. Ingenio quidem ille facili, profundo, robusto, et ad grandia conformato natus, ita eminere cœpit à

teneris dicendi genere, ut eum ab eloquentia suavissima dulcedine apim atticam appellaverint, et Socrates ipse, scholæ cygnum. In grammaticis, musicis, poesis et pictura primam cum summa laude posuit adolescentiam, et vicesimo ætatis anno ad Socratis auditores annumeratus, vix elapsam fuerat lustrum, jam in sapientibus primi nominis habebatur. Postquam invidi civis mortem Socrati maturarunt veneno, eruditæ expeditionibus Plato vacavit, primum ad Megarenses, indè ad Cyrenaicos, ubi sub Theodoro, mathematicis disciplinis consummato Magistro, totis conatibus desudavit ut nihil sibi deesse in hac nobilissima philosophiæ parte videretur. A Cyrenaicis transmigravit in Ægyptios, quorum sapientum, eo jam rerum suarum statu discipulus esse non erubuit; ab iisque plura dogmata, variarumque scientiarum doctrinas avidissimè derivavit; ibidemque loci, ut fertur, Mosaicos Codices, aliorumque sacrorum auctorum vaticinia novit, ac didicit magnificare. Percurrit etiam per eam Italiæ partem, quæ magna Græcia dicebatur, ut ibi cum Philolao, Archita, et Eurito celebri nomine Pythagoricis, consilia communicaret, ac sese invicem doctrinarum notionibus illustrarent. Semel iterum, tertio, sæpius vocatus ad Dionysium juniorem, Syracusæ dominantem, ad Siculos tandem profectus est; undè tamen post aliquod temporis intervallum exiit, eo confectus dolore, quod ingentes perdidisset conatus, nec omninò potuisset hominem relinquere, quem tyrannum invenerat. Ad suos demum redditus, publicus

Magister, nullo quidem pretio, professus est philosophiam, cujus partibus miro digestis ordine harmonicèque dispositis, Heraclito subscripsit in physicis, Pythagoræ in metaphisicis, in moralibus autem Socrati. In politicis etiam prudentissimè constituendis, et ratiocinandi arte perficienda, felicissimè adlaboravit. Quamplura de his omnibus monumenta supersunt in ejus operibus, quæ tum ab stili elegantia, tum à verborum proprietate, tum ab ratiocinandi efficacia, tum præsertim ab sententiarum splendore, ac nobilissima excogitandi ratione maximo-perè laudantur. Neque verò est animus, immunem ab erroribus prædicare Platonem: sed certè fuit insigni merito philosophus, princeps academicæ scholæ, sic appellatæ ab horto, quem ipsi pro ludo litterario pecuniosus Atheniensis, nomine Academus, concessit. Altero, et octogesimo ætatis anno mortalitatem Plato deposuit, relicto in patria sui desiderio, et sapientissimi viri nomen tributum illi est, atque ad posteros perpetuum.

In binas discissi sunt scholas ejusdem discipuli, quorum alteri ad Lyceum translati, Peripatetici dicti sunt, Aristotele præside, quem postea memorabimus; alteri locum, et nomen Academicæ retinuerunt. In iis fuere Speusippus, Xenocrates, Polemon, Crates, et Crantor, qui Platoni succedentes, unus ex alio nihil ferè immutarunt in Principis Academicæ doctrina; nisi quod Xenocrates pauca immiscuit ab Aristotele desumpta. Et fuit Xenocrates castigatissima vita, integritate mirabili, certissima pru-

dentia in conformandis adolescentium moribus,  
 et summa solitudinis, ac defatigationis in stu-  
 diis cupidine, in qua laboriosissimæ vitæ serie  
 ad ætatis annum secundum, et octogesimum  
 pervenit. Arcesilas autem in Magisterium ali-  
 quandò suffectus, à Platone defecit, et quasi  
 novam condidit Academiam, quam postmodum  
 dixere mediam. Et hic est de quo pulchrè Tul-  
 lius: „Ut in optima Republica Tiberius Grac-  
 cus, qui otium pertubaret, sic Arcesilas, qui  
 constitutam philosophiam everteret.” Enimverò  
 ingenii claritudine, perspicuisque naturæ doti-  
 bus, quibus admodum excelluit, perperam usus  
 est ad constabiliendum dogma de omnimoda hu-  
 manæ mentis ignorantia: nihil enim, aiebat, sci-  
 mus, nihil scire possumus; nec etiam, quod  
 unum Socrates excipiebat, nimirum *se nihil scire*:  
 quo sanè dogmate, non aliud fortassè absur-  
 dius, nec aut rationi magis dissonum, aut mori-  
 bus magis periculosum philosophi excogitarunt.  
 Quam aliam animi demissionem sectantur, qui  
 catholicè sapiunt! Et tamen sectatores habuit  
 Arcesilas, eandemque post eum doctrinam  
 Lacydes, Evander, et Egesimus tradiderunt.  
 Quartus ab Arcesila rexit Atheniensem hanc  
 scholam Carneades, qui recentioris Academia  
 Princeps idcirco appellatur, quia paullulum  
 temperavit absurda doctrinæ: non enim, ut Ace-  
 demici medii, veritatem omnem inficiabatur  
 sed acriter propugnabat, tam obscuris involuti  
 esse tenebris, quæcumque vera sunt, ut huma-  
 næ mentis non sit veritatem attingere; quam  
 quam plura noscantur probabilia, quorum vis



insigni, et illustri, ut ajebat Tullius, vita sapientis regi possit. Quam hæc inania! quam parum digna viro clarissimo, et qui tam avidè vacabat studiorum commentationibus, ut omnem corporis curam negligeret ac sæpè pro prandio sedens, nihil vesceretur nisi servula cibos in ejus manum, et interdum in os intromitteret! Ad annum nonagesimum operosam vitam produxit, ejusque locum occuparunt ordine Clitomacus, Philo, et Antiochus: hic autem postremus cum primum Philonis Magistri doctrinam totis viribus defendisset, acriter postea in eandem insurrexit, et Academiam veterem instauravit. Et fuit Antiocho summa gloria, quod in suis auditoribus numeraverit illustriora Romanorum nomina, quorum erat tunc temporis consuetudo, iter arripere in Græciam, et Athenis commorari, ut ad optimum philosophiæ saporem conformarentur. Ita vidit apud se considentes, eruditionis cupidos, Varronem, quem Romanorum dixere sapientissimum, Lucullum quem magnificentissimum, et Tullium, quem eloquentissimum. Et ab his Romanis peregrinantibus, et à Polybio, Pannatio, Carneade, Philonæ, Antiocho, aliisque doctissimis Grecis, qui diversis temporibus Romæ commorati sunt, utraque Græcorum Academia, et philosophica lumina, ut suo dicemus loco, per universum Romanorum Imperium disseminata sunt.

Altera schola, quam diximus à Platonis nam discipulis, Peripatetica dicta est, et principem coluit Aristotelem. Et fuit hic ex iis vi-

ris illustrissimis, utraque parte famosis, in quos innumeræ laudes, innumera pariter mala congesta sunt. Mediam teneamus viam, quæ solet esse ab scopulis remotior. Natus Aristoteles ingenio certè vastissimo, foecundissimo, et facilitate ad omnia mirabili, singularem prorsus et penè incredibilem in studio constantiam adjunxit. Ætatis anno decimoseptimo ad Platonis discipulos cooptatus, quatuor tota lustra sub tanto duravit Magistro, qui et ipsum Academiae suæ gloriam, et animam appellabat. Platone vita functo, apud Hermiam in Mysia commorantem secessit; undè post annos aliquot Philippo Macedoniae Rege vocatus, et Magni Alexandri præceptor dictus est. Charissimum tanto Principi, cujus mentem, et mores diligentissimè conformavit, noluit postea, jam Regem, ad belli strepitus proficiscentem, comitari. Quare rediens Athenas, Academiae præceptore Xenocrate, alteram instituit in Lyceo scholam, quam à verbo græco dixerunt Peripateticam, quoniam obambulans docere solitus est Aristoteles. Mirabilem reliquit scriptorum copiam, quæ ad Tullii et Quintiliani etiam ætatem perveniunt, magna saltem ex parte, genuina pervenisse. Tullius quidem in suis philosophicis libris, non semel aut iterum, sed sæpius, et penè ad fastidium, perfundit laudes huic sapienti, cujus appellat ingenium propè divinum, eloquentiam nervosissimam, flumen orationis aureum, stilum limpidum, et perspicuum, cujus philosophiam omnino singularem fatetur, quem rationis et inveniendi, et judicandi præ-

cipem dicit; quod denique doctiorem, acutiorem, in rebus vel inveniendis, vel judicandis acriorem, palam testatur fuisse neminem. Quintilianus autem, prudentissimo vir judicio, asserere non gravatus est, nescire se, quid magis in Aristotele admiraretur, num vastam, et profundam eruditionem, num prodigio similem scriptorum copiam, num stili jucunditatem, num excelsæ mentis acumen, num operum propemodum infinitam varietatem: et addebat, credi fermè posse, quod plura sæcula in studio posuerit, ut sapientiæ suæ vastitate comprehenderet, quidquid philosophorum, quidquid oratorum, quidquid animantium, quidquid plantarum est, quorum omnium naturam, et proprietates mirabiliter extricavit. Et nos quidem putamus, multum essetribuendum horum Romanorum judicio de sinceris tanti philosophi scriptis: quæ verò nunc dicuntur Aristotelis opera, tametsi laude non omninò careant, non tamen esse summi meriti, existimant eruditi. Et liquidum profectò est, Teophrasto charo discipulo, et in Magisterio successori, Aristotelem hæreditatem reliquisse, quæcumque scripserat: hæc autem scripta processu temporum in varias incidisse vicissitudines, donec eorum exemplar et ab interpretibus, et ab librariis malè corruptum, in potestatem fortè venit Arabis Averrois, à quo fuerunt penitus immutata, contrita, et deturpata, et qui ad libitum innumera superadjecit inania, quæ certè non fuerunt ab auctore. Quod in pluribus erraverit Aristoteles, quod immiscuerit multa parvi mo-

menti, multa insulsa, multa prorsus inutilia, nemo certè in sapientibus mirabitur: homo enim erat, plura scripsit, innumera insecutus est, viam sibi sæpè stravit per hactenus inaccessa. Sed quod Aristoteli tribuatur, quidquid longa sæculorum serie peccarunt in philosophicis homines, qui suas delirationes ut constituerent, tanti Sapientis nomine abusi sunt, profectò non est id philosophi sanæ mentis, non est inquirentis veritatem nullo partium favore, non est judicantis ad rationis leges. Depone insanos livores, si vis esse philosophus. Utinam liceret in his diutius immorari!

Aristotele maturè prærepto, quum vix numerasset ætatis annum tertium et sexagesimum successit in Lycei magisterio vir summus, quem in suis discipulis ipse legerat, et quem à delicatissimo eloquentiæ sapore dixerunt Theophrastum. Magistro certè fortunatior, numeravit auditores ad duo mille, in quibus eminuere Demetrius Phalereus, et Strato. Posteritati dedit libros de plantis, de civitatum omnium legibus, de vera vitæ beatitate, de rhetorica, de variis hominum *characteribus*, aliosque plures; quorum tamen pauci pervenerunt ad nos. Annos vixit saltem octoginta quinque; nec desunt, qui asseverent, ætatis anno undecentesimo scripsisse *Characteres*. Post hunc in Lyceo docuerunt Strato, summoperè commendatus à physicis rerum notionibus; Lycon, ad annos quadraginta manens in magisterio, et à docendi suavitate Glycon appellatus, Aristo Ceus de quo solum novimus magno fuisse nomine



in philosophicis, et Glyconi successisse; Critolaus quem cum Carneade, Diogeneque missum ab Atheniensibus Romam in famosa illa legatione, fuisse Tullius ait ex nobilissimis illius ætatis philosophis; et Diodorus, quem dixere Dialecticum, et postremum nominant in Lycei Doctoribus, quamquam alii dicant, tam longè fuisse ab Aristotelis doctrina, ut peripateticus dici non possit. Post hæc tempora magnum fuit de Aristotele silentium, nisi quod Sylla, captis Athenis, Romam transtulit ejus opera; quorum postea variam delibabimus fortunam, cum sermo nobis erit de corrupto sapore in philosophicis disciplinis.

Principem Cynici noverunt Antisthenem, qui pretium divenditi patrimonii civibus elargitus est; ut voluntaria vivens tenuitate, Socratem audiret; à quo postea recedens, tam impudentem, tantaque mordacitate horridam fundavit scholam, ut erubescere debeat humanum genus hujusmodi homines dixisse philosophos. Non certè inficiamur, ingeniosissimum quemque, plurimisque doctrinis clarissimum, posse quidem pessimis esse moribus: attamen schola, cujus unicum sit institutum, mores hominum componere, cujus vera principia certissimè jaculentur ad effringendum pudorem, ad cor tumidum creandum, ad sui similes contemnendos; hæc, inquam, schola tam esse debet absurda, quam Scholasticorum chimæra. Dialecticam, physicam, geometriam, et præterea liberales artes repudiabant omninò Cynici, et unam profitebantur morum scientiam; quos ta-

men à primis doctrinæ fundamentis incredibiliter deturpabant. In præcipuis Antisthenis asseclis numerantur Diogenes, Crates, Hipparchia, et Peregrinus. Cratem audiit Zeno decem annos, totidemque alios modò Stilponem, modò Xenocratem, modò Polemonem: et planè rejecta Cynicorum impudentia, nec omninò probatis aut Megarensis, aut Academicorum doctrinis, novam Athenis condidit scholam, ejusque discipulos ab loco, ubi Magister docebat, Stoicos appellarunt. Dialecticam singulari conatu professus, acriter opugnavit novos Academicos, verum à falso dignosci posse inficientes. In moralibus autem hæc erat Stoicorum præcipua doctrina: Summum bonum esse virtutem: Sapientem semper esse beatum; quæ ferè naturæ bona dicuntur ab hominibus, tam non esse bona, quam dolores, cruciatus, et adversa quævis dici mala non posse; virtutes omnes esse pares, paria similiter vitia; condolescere, concupiscere, extimescere, lætitia efferri, ceterosque animi motus in sapientem virum non cadere; virtutem acceptam Deo retulisse neminem; fortunam à Deo petendam; ab se ipso sumendam esse sapientiam; Deum natura, sapientem virtutem sua non timere. Quam ampullantes delirare solent homines! Zeno certè numquam fuisse dicitur tentatus valetudine, ac feliciter pervenit ad annum duodecentessimum. Ejus gloriam cumularunt complures famosos nomine sectatores, in quibus illustrissimi fuerunt Leucippus, Cleanthes, Chrysippus, Diogenes babylonius, Antipater, Panetius, Posidonius,

Epictetus, Stilpo; et in Romanis Cato, Brutus, Seneca, Thraseas, Poetus, Helvidius Priscus, et Marcus Aurelius Antoninus.

Pyrrhonem omittere non licet in historia philosophiæ: non certè quia magni meriti habeatur, vel quia novum quid excogitaverit, quo notionum thesaurus adaugeretur; sed quoniam Arcesilæ dogmata de nulla veri, aut vero similis cognitione, tenacissima dementia persecutus est; et plura de his impudenter effutens, exemplo est philosophis, quam simus ridiculum mundo spectaculum, quum in humanis quæstionibus, posthabita, neglecta, et penitus calcata ratione, audemus philosophari. Aiebat Pyrrho, debere semper hominem inquirere veritatem; et ab hac inquisitione perpetua dixere Scepticam ejus philosophiam: sed quidquid quæsieris, addebat, quidquid operosis lucubrationibus desudaveris; nihil certi pronunciare, numquam tibi licebit asserere. Si opponeres, te videre, te cogitare, te esse; planè respondebat: equidem nescio lumen, nescio sensus, nescio mentem, nescio me esse, nihil omninò scio: id tamen, quod nesciam, non tamquam asserens, sed tamquam dubitans pronuncio. Et ab hoc æterno de omnibus dubio in pestiferam illam doctrinam Pyrrho incidit, nihil esse in rerum natura vel honestum, vel turpe, nisi vel ab humana lege, vel à præjudicata opinione. Pudet certè in hæc tam inania, quam putida calamum offendere. Nonagesimo ætatis anno vitam posuit.

Fuerunt et celebri nomine philosophi Xe-

nophanes, Democritus, et Heraclitus, Academicis antiquiores; quos non hactenus memoravimus ne primam eorum seriem, qui ab Socrate venerunt, abrumperemus: eosque tamen præterire non licet, tametsi nulli prorsus adhæserint Magistro, nec multitudine discipulorum admodum floruerint. Xenophanes Colophonius, in astronomicis oppidò versatus, plures esse mundos propugnavit; physica diligenter persecutus, de iis, quæ in sublimi aeris parte generantur, tractavit: in poetis etiam clarus, celebrato poemate Colophonem laudavit. Democritus patria Milesius, quem ab longa in Abderitis commoratione Abderitam dixerunt, natus est ingenio feracissimo, et studiorum defatigationis tam fuit tenaciter avidus, ut liberius, et ab omni strepitu remotius commentandi gratia, sese in subterraneis locis occuleret. Patrimonium negligere, agrosque suos deserre incultos nihil dubitavit, ut scientiam quæreret in Ægyptiis, Chaldæis, et Persis. Abderæ postea domicilium fixit, ibique librum edidit, in quo mundi fabricam eruditè descripserat: quem librum tam probarunt Sapientes urbis, ut statuat publicè dicendam auctori decreverint. Tam morali doctrina, quam physicis, mathematicis, astronomicis, politioribus litteris, et liberalibus artibus excelluit: à qua scientiarum vastitate Aulus Gellius Democritum philosophorum nobilissimum appellavit. Post vitam eleganter actam in philosophico risu de inani- bus hominum curis, de vulgi gaudiis, et lacrymis, decessit ætatis anno supra centesimum

nono. Sed ne quid desit in historia mortalium; ut ridebat ferè semper Democritus, ita ferè semper illacrymabatur Heraclitus. Hunc Ephesi natum, ingenio ad tetra quævis maximoperè prono, tenebricosum dixere philosophum ab summa stili obscuritate. Plurimum fuit auctor operum, inter quæ celeberrimum illud habebatur, cujus erat inscriptio *de Natura*; in quo, tamquam compendio, dedit posteris philosophiam suam de igne mundi principio, ac de ipso mundo flammis perituro. Librum hunc Euripides cum immisisset Socrati, respondisse fertur gravissimus iste philosophus: valde probari sibi, quæ capere potuerat; et ab iis credere, laudabilia pariter esse, quæ non intellexerat. Eundem librum Darius Persarum Rex quum legisset, ita magnificè auctorem, ut elegantissimas litteras ad eum dederit, ipsumque beneficiis, et honoribus cumulandum in suam Regiam invitaverit. Negavit Heraclitus, convenire sibi commercium cum hominibus, in quibus improbitas, dolus, avaritia regnabant. Potuisset torvus Philosophus officium Principis recusare, sed modestioribus, et urbanioribus verbis. Ab hoc libro *de Natura* Plato desumpsit, quæ de physicis multa tractavit. Hydrope laboravit Heraclitus, et sexagesimo ætatis anno fatalem horam subiit, serius fortassè, quam polliceri poterat morosissimum ejus ingenium, odiumque in homines, quo gratis consumebatur.

Non plures admodum numerabat annos Jonica schola, quum Thales, quem ejusdem Condito-rem demonstravimus, auctor fuit Pythago-



ræ, tunc ætate florido, ut ad Ægyptios peragrar-  
 ret, in illis exculturus, et perfecturus mentem  
 omninò natam ad philosophica. Nihil distulit  
 juvenis obedire sapienti seni, et totos annos  
 viginti duos commoratus est in Ægypto, litte-  
 ras dumtaxat cogitans, assiduus ad Sacerdotum  
 Collegia nunc Memphi, nunc Thebis, nunc  
 Heliopoli. Duodecim etiam annos posuit Baby-  
 lone, à Magis eruditionem hausturus; et ab  
 his ad Æthiopes, ad Arabes, ad Indos, ad Cre-  
 tenses transivit, ubilibet sapientiam quærens,  
 undelibet desumens quidquid utile arbitrabatur  
 ad excelsam philosophiæ fabricam, quam animo  
 cogitabat. Assiduo tot Sapientum commercio  
 quum mentem, natura clarissimam, mirabiliter  
 illustrasset, pretiosa refertus merce in patriam  
 rediit, quæ Samus erat, Icarii maris insula;  
 quam tamen post modicum deseruit tyrannidis  
 impatiens, quam ibi gentium agebat Polycra-  
 tes. Bona Italorum fortuna in eam Italiæ par-  
 tem se recepit, quæ magna Græcia dicebatur,  
 et Crotone domicilium fixit apud Milonem Ath-  
 letam, ubi celeberrimam instituit scholam,  
 quam Italicam nuncuparunt. Primus fuit Pytha-  
 goras, cui visum est fastosum admodum, su-  
 perlatum, et planè superbum sapientis nomen,  
 quod sibi tribuebant, qui vel castigato vivendi  
 genere, vel naturæ notionibus eminebant: un-  
 dè se modestius appellavit philosophum, quod  
 græcè sonat sapientiæ cupidum; et hoc post-  
 modum nomen in quærentibus veritatem inva-  
 luit. Brevi disseminata est per universam Ita-  
 liam tanti Magistri fama, numeravitque disci-

pulos paucò tempore ferè quingentos. Accuratissimam adhibebat diligentiam in iis ad rectos mores conformandis, et tacitus observabat eorum sermones, risum, incesum, et quidquid ad privatæ vitæ consuetudinem attinet; ut ad uniuscujusque naturam prudentius dispensaret præcepta. Quam hæc digna sunt homine, cujus in officiis est alienos mores ad virtutem componere? Discipulis præcipiebat, ad biennium saltem silere; ut audiendi exercitatione rectè loqui condiscerent; ii autem, quos loquaciores animadverteret, ad totum quinquennium protrahebat silentium. Auctoritatem apud eosdem tantam sibi conciliavit, quanta ferè potest esse in mortalibus; et sententiæ cuilibet ut subscriberent, unum satis erat dixisse Pythagoram. Si Justino, Senecæ, ac Valerio Maximo fidem habeamus, quotquot incolebant Crotonem, Magistrum hunc audiebant in moralibus, ejusdemque præceptis tam aliam sese tota civitas admirata est, ut quos in adventu suo cives reperit deliciis, et voluptatibus indulgentes, ad mirum frugalitatis usum revocaverit. Seorsum à viris foeminas, puerosque seorsum à parentibus erudiebat, ut peculiaria sexus, ætatisque vitia liberius increparet; nec aut hi parentum, illæ virorum conspectum formidarent, aut alteri tempus frustra consumerent, in iis audiendis, quæ sua non attinent. Nec dumtaxat Crotone in redigendis ad meliorem frugem civibus intendebat; sed ab aliis etiam Italiæ urbibus vocatus, et multis precibus conquisitus, non recusabat operosis expeditionibus vacare, ut ad

rationes legem vivere mortales doceret: ac præter alia saluberrima præcepta, ubique audiebatur exclamare, bellum dumtaxat inferendum perniciosis quinque hostibus, quos ita designabat, corporis ægritudinem, mentis ignorantiam, incompositos animi motus, populorum seditiones, familiarum discordias. Hæc, et similia de morum doctrina tam privatim ad discipulos, quam per urbes publicè profundeabat: intra domesticos autem scholæ parietes multis contendeat sudoribus, ut mentes auditorum excoleret. Arithmeticam, et geometriam existimabat ille scientias omninò necessarias, ut justum in omnibus ordinem sequi assuescerent ingenia juvenum, et ad sublimiorum studia compararentur. In musicam pariter volebat incumbere suos, et, quod meminit Quintilianus, animos ad lyram excitare, dum evigilassent; quum autem somnum peterent, ad eandem se componere, si quid interdium fuisset turbidiorum cogitationum. Quæcumque sunt in orbe phænomena, sic explicabat, ut procederent à mente suprema, quæ dirigit, et vim motricem, et materiem nihil intelligentem, et cui natura sua nec ullus motus est, nec ulla forma. Mentem illam supremam asserebat esse universi orbis animum, ejusque particulas humanos animos. Mirum staturabat consensum inter omnes mundanæ fabricæ partes, et mundum ipsum harmonicè continentem. Transmigrare dixit animos à primo in alterum, tertium, et plura corpora: de quo ridiculo transitu tam insulsa narrabat, ut jurè Lactantius eum appellaverit vanum senem, qui.

sibi tam petulanter mentiendi licentiam vindicavit. Quem non errorem excogitare philosophi, etiam doctissimi, quum sobriè sapere neglexerunt! Rotundam esse Terram, et esse Antipodas propugnavit. Primus omnium agnovit, obliquam esse illam in cœlo Zonam, quam Zodiacum appellamus; ut primus dicitur perfectam habuisse notionem viæ, quæ toto anni spatio describitur à globo se movente. Omnino demonstravit, opacum corpus esse Lunam, cui lumen non est, nisi ab sole derivatum; cælestem arcum non aliud esse, nisi lucem ab recta linea deflectentem; Venerem, planetam illum, qui vespere Solem subsequens, Vesper dicitur, eundem esse Luciferum, qui manè Solem antegreditur. Et super hæc, aliaque Pythagoræ adinventæ Physici, et Astrologi facilius postea in lucubrationibus id generis laborarunt. Geometria pariter adaucta est non modicè ab hoc insigni philosopho, qui primus demonstravit famosum illud problema, hypotenusæ quadratum in triangulo rectangulo, æquale haberi summæ quadratorum ex binis cathetis. Cujus demonstrationis utilitatem in mathematicis planè intelligens, grato in Deos animo litasse dicitur hecatombem; vel saltem, quod in Tullio legimus, bovem. Quodcumque autem dicatur fuisse sacrificium, videtur prorsus alienum ab homine, qui nihil tam horrebat, quam interfici animantia; et vesci carnibus, ea de causa discipulis interdixerat. Non liquidò constat quo loco ac tempore illustrissimus hic philosophus vivere desierit, sed ferè creditur, tranquillè obiisse

sibi tam petulanter mentiendi licentiam vindicavit. Quem non errorem excogitare philosophi, etiam doctissimi, quum sobriè sapere neglexerunt! Rotundam esse Terram, et esse Antipodas propugnavit. Primus omnium agnovit, obliquam esse illam in cœlo Zonam, quam Zodiacum appellamus; ut primus dicitur perfectam habuisse notionem viæ, quæ toto anni spatio describitur à globo se movente. Omnino demonstravit, opacum corpus esse Lunam, cui lumen non est, nisi ab sole derivatum; cælestem arcum non aliud esse, nisi lucem ab recta linea deflectentem; Venerem, planetam illum, qui vespere Solem subsequens, Vesper dicitur, eundem esse Luciferum, qui manè Solem antegreditur. Et super hæc, aliaque Pythagoræ adinventæ Physici, et Astrologi facilius postea in lucubrationibus id generis laborarunt. Geometria pariter adaucta est non modicè ab hoc insigni philosopho, qui primus demonstravit famosum illud problema, hypotenusæ quadratum in triangulo rectangulo, æquale haberi summæ quadratorum ex binis cathetis. Cujus demonstrationis utilitatem in mathematicis planè intelligens, grato in Deos animo litasse dicitur hecatombem; vel saltem, quod in Tullio legimus, bovem. Quodcumque autem dicatur fuisse sacrificium, videtur prorsus alienum ab homine, qui nihil tam horrebat, quam interfici animantia; et vesci carnibus, ea de causa discipulis interdixerat. Non liquidò constat quo loco ac tempore illustrissimus hic philosophus vivere desierit, sed ferè creditur, tranquillè obiisse



42 DE PHILOSOPHIÆ VICISSITUDINIBUS.  
anno ætatis completo nonagesimo.

Pythagoræ memoriam summis plausibus excepit posteritas: et præter eximiam discipulorum reverentiam, quæ tum in schola, quam ipse instituerat, tum in famosioribus Romanæ Reipublicæ litteratis ad longissimam annorum seriem perpetuò florida vixit, etiam à Flavio Josepho, à Clemente Alexandrino, ab Ambrosio Mediolanensi Pontifice, à Theodoretò, ab aliisque posterioris ævi Sapientibus, philosophum hunc magnificis laudibus cumulatum comperimus. Non certè quod vel animos transmigrare in nova corpora, vel auræ Divinæ particulas esse, vel alia id furfuris commenta catholici Doctores probaverint; sed quia vel, demptis erroribus, laudarunt auctorem cetera doctissimum, et benè de philosophia meritum; vel quia quum ageretur de homine, qui morum præcepta sæpè tradebat per obscurissima ænigmata, doctrinas ejus, etiam quæ sonant errorem, excogitato quodam recto sensu posse intelligi crediderunt. Similiter dixeris de pluribus Ecclesiæ Patribus, vel Platonis, vel Aristotelis doctrinam, et magisterium extollentibus. In asseclis Pythagoræ nomen habuit celeberrimum Agri-  
gentinus Empedocles, quem alii dicunt ejus discipulum: Suidas verò tradit, Empedoclem ab Academico Parmenide transiisse ad Telaugem Pythagoræ filium, et in Crotoniensi schola successorem. Pro civium emendandis moribus, et pacandis intestinis urbis tumultibus, incredibiliter adlaboravit; nec pepercisse dicitur aut conatibus, aut sudoribus, aut enixis precibus, aut

liberalibus donis, ut Agrigenti faceret, quod Crotone Pythagoras. Philosophus, poeta, historicus, medicus, et in omnibus his laudibus admodum supereminens, ad plures doctrinarum ramos magisterium suum extendebat. Tam beneficum, et sapientem civem sexagesimo ætatis anno vita functum Agrigentini lacrymati sunt.

Postremum, memoramus in Græcis Doctoribus Epicurum, Gargettii natum in Attica, et Sami educatum; cui doctrina Pythagoræ præ Platonica, et Aristotelica quum placuisset, ad ætatis annum trigesimum sextum perpetuò peregrinatus est; donec restitutus in Græciam; Athenas elegit, ubi novæ scholæ Princeps in quodam horto philosophiam suam disseminaret. Innumeræ confluxere gentes ex tota Græcia, ut ex Asia, et Ægypto peregrini, qui Epicurum audirent. Nemo fuit eo solertior in scholarum Principibus, nemo laboriosior, nemo, qui plura scripserit, nemo, cujus asseclarum tanta prædicetur constantia in Magistri veneratione. Rhetoricam neglexit, dialecticam planè contempsit; harum autem scientiarum vice commendabat perspicuitatem, et ordinem; easque laudes, Tullio si credimus, ipse profectò in scribendo assecutus est. Ex tot ejus operibus ad nostram ætatem dumtaxat pervenerunt tres epistolæ, quas in ejusdem vita Diogenes Laertius ab injuria temporum vindicavit: quarum prima compendio persequitur, quæ de physicis; altera singillatim, quæ de meteoris; tertia, quæ de morum scientia philosophus iste tradidit. Leucipii, et Democriti doctrinam de universo mundo ex

atomis fortuitò adhærentibus conformato, miris conatibus adoptavit Epicurus: hoc tamen discrimine, quod atomos dixit, ut corporis est natura, suo deorsum pondere ad lineam deduci; non quidem omninò ad lineam, sed minimo declinantes intervallo, quantum satis est, ut ex earundem complexionibus, et copulationibus, nulla data causa contingentibus, quidquid tam mirabile cernitur in universa rerum fabrica, efficeretur. Omnes corporis sensus tam verituntios asserebat, ut Soli, et Lunæ tribueret eam ferè magnitudinem, qua videntur esse nostris oculis. Animum hominis volebat esse materiam: aliter enim, aiebat, nec agere posset, nec sentire. Deum sibi finxit, æternum quidem illum, et beatum; sed otiosum, desidem, atque ita vacantem beatitati suæ, ut omninò nihil curet, quæ aguntur in mortalibus. Extremum hominis bonum propugnavit in voluptate situm esse. Nec ignoramus perniciosum hoc, et absurdum uberrimum dogma, benignè fuisse à compluribus explicatum: nam præter Divum Hieronymum, qui multis laudibus effert Epicuri temperantiam, Stoicus etiam Seneca magnificet ejusdem præcepta; et post multa sæcula dixit Petrus Gassendus, clarissimo vir ingenio: „Quod  
 „ad mores attinet, Epicurum maximè et sobrium, et continentem extitisse, ac sectam nullam philosophorum illius secta fuisse sanctionem.” Unde ferè interpretantur, non vitiosam sensuum, sed purissimam, et sanctissimam animi voluptatem Epicurum intellexisse. At Tullius Epicureos urgebat, nec ii negare in dispu-

tatione ausi sunt, eorundem magistrum testificatum fuisse: „Ne intelligere quidem se posse ubi sit, aut quid sit ullum bonum præter illud, quod cibo, aut potione, et aurium delectatione, et obscœna voluptate capiatur.” Satis hæc pauca sint de hortulis Epicuri, quorum esse posset amplissimum argumentum; sed non est historici compendii singula philosophorum dogmata minutatim evolvere.

Hactenus de Græcis aliisque Sapientibus, qui Græcos hac laude antecesserunt; brevissimè nunc de Romanis, qui longo tempore nescierunt pulcherrimæ philosophiæ delinimenta, et illecebras; imò conantem illam irrepere in Reipublicæ sinum, interposita vi repulerunt, eique fores incondita rusticitate occluserunt. Nimirum homines, qui sine litteris ad canos pervenerant, et quorum tota fuerat in armorum strepitu gloria, expalluerunt ad sapientiæ veneres, timueruntque Reipublicæ, si litterarum studio rapti, et immersi juvenes, arma contemnerent. Quasi laurus, et oliva non possent eandem frontem ornare, ac circumcingere. Nulla quidem est immortalibus vitæ conditio, cui litteræ non sint utilitati, et adjumento. Et profectò nihil potuit Romani Senatus decretum impedire, quominus primò clanculum, indè palam cives philosophiam persequerentur, et processu temporum ad græcæ philosophiæ fastigium, Athenarum æmula, Roma consurgeret. Paulus Æmilius ex nobilissimis Romanorum familiis, qui post domitos bello Macedones, tam magnanimum se gessit, ut imensos Persei thesauros nec atti-

gerit, nec saltem viderit, sed Quæstoribus illi-  
cò tradiderit, in ærarium Reipublicæ deferen-  
dos; regiam duntaxat bibliothecam liberis desig-  
navit suis, eumque sibi dulcissimum tantæ vic-  
torię fructum credidit, quod ab Atheniensibus  
obtinuisset Metrodorum, egregio nomine philo-  
sophum, quem prædictorum filiorum institutio-  
ni litterarię præponeret. In his Pauli filiis fuit  
Scipio Africanus junior, cui tot, tantaque in bello  
facinora nomen pepererunt nullo intermoritu-  
rum tempore; sed quem ad litterarum amore for-  
tassè justius laudavit posteritas. Opulentissimus  
hic Romanus, *quo non quisquam elegantius*, ait  
Vellejus Paterculus, *intervalla negotiorum otio*  
*dispunxit, et qui semper inter arma, et studii*  
*versatus, aut corpus periculis, aut animum dis-*  
*ciplinis exercuit*; non solum facilem ad se per-  
mittebat sapientibus aditum, sed eos diligenter  
quærebat, eorundemque tum amicitias mendi-  
cabat, tum necessitatibus liberaliter providebat.  
Polybium, et Panætium græcos philosophos,  
doctrinarum excellentia illustrissimos, tam cha-  
ros habuit contubernales, ut vel in privata vitæ  
officiis, vel in rumoribus belli, vel in splendoribus  
legationum, saltem ab alterutro num-  
quam divelli permetteret. Terentium Afrum, ab  
liberali famosum ingenio, habuit in familiaribus;  
ejusque opera, summo prætio Romæ tunc  
habita, et nunc etiam eruditibus probata, magna  
saltem ex parte deberi aiebant elegantissimo Scipio-  
nis calamo. Sed nihil in hoc viro tam me-  
moriam dignum, quam amicitia cum Lælio, Ro-  
mano eruditissimo, et castigatis moribus laudat



tissimo, qui cum illi erat una domus, idem victus, opinandi consensio, communis militia, peregrinationes, rusticationes, et studia semper aliquid discendi, semper nova cognoscendi; quibus in studiis otiosum omne tempus utilissimè conterebant. Quid amicitia id generis dulcius? Utinam et similes colerent in omni benè constituta gubernatione nobiles, et pecuniosi viri! atque utinam similiter ætatem impenderent, qui funestissimum sequentes otium, lacrymabili tædio, ac displicentia sui consumuntur!

Post memoratum Romani Senatus decretum, quo jussi sunt philosophi Romam deserre, scientiarum amor increvit, et magis, magisque litteræ coli cœperunt. Postremis verò Reipublicæ temporibus ad summum honoris fastigium philosophia pervenerat. Parentum accuratio, ut litteris erudirentur ab exordio vitæ liberi, generabat patriæ copiam virorum innumeram, qui in oratoribus, in jurisperitis, in philosophis excellebant. Præjudicatam deposuerant opinionem, quod iis nationibus derelinquendum esset scientiarum studium, quæ non in armorum furore, sed in togæ tranquillitate vitam agerent. Et hinc prima patriciorum liberos educantium cura in id jaculabatur, ut illi à teneris tam latinam patriam, quam eruditam Græcorum linguam perfectè condiscerent; indè verò ut assuescerent venerari sapientes, eorumque consuetudine delectari. Atque ab hac excellenti educatione quum penè ante depositam infantiam saperent, prius postmodum erant in

philosophicis notionibus, qui primi cives in patria, primi in Senatu, primi in Magistratibus habebantur. Pompeji nomen, et scientiarum amor meritò celebrantur, quoniam à Mithridatico rediens bello, ingentium victoriarum pondere gravis, militari lauro decoratus, et solenni triumpho proximus, ad Rhodios diver-  
 tit, tantummodò ut viseret, atque inter discipulos audiret philosophum Posidonium. In avita claritudine, amplissimoque fortunarum splendore delicatè transegit pueritiam, et adolescentiam Lucullus, ejusque postmodum gloriam tum vitæ magnificentia, tum egregia in bello facinora cumularunt. Quam autem illustrius habuit nomen ab assiduis conatibus, ut scientiarum ornamento mentem perficeret! Non enim in otio tantum domestico litteris delectabatur, sed in operosis Magistratum officiis, in publicorum negotiorum æstu, in ipsis belli angustiis, quum, ut ajebat Tullius, *non multum Imperatori sub ipsis pellibus otii relinquitur*, brevissimam quamvis temporis particulam, quæ fortè supererat, in studiis impendebat, et cum philosopho Antiocho, quem semper voluit sibi comitem, eruditè congregiebatur. Quam docta, quam urbana, quam jucunda inter homines in tanto amore litterarum educatos colloquia! Quid autem si ad liberos, familiaresque sermones congregarentur Hortensius, Tullius, Cotta, Cæsar, Pompejus, Cato, Brutus, Atticus, Varro, Lucullus, et similes ejus ætatis Romani, qui ut erant præcelso, ex exercitatis-  
 simo ingenio viri, convenire certè non pote-

rant quin eas, quibus quisque abundabat, omnis generis doctrinas urbanè profunderet?

Sed liceat ab reliquis distinguere, seorsumque commemorare in ea docta turba præstantissimum Tullium, quo nemo in philosophis urbanior, nemo suavior, nemo eruditior, nemo eloquentior, nemo patriæ observantior, nemo fortè, cui plus deberent sui cives, nisi casu vixisset, quum in postremis jam erat suspiriis convulsa Respublica. Nec profectò vidimus, nec audivimus umquam litterarum aviditatem ea majorem, quam orator iste philosophus in suis commonstrat operibus. Nec omnino intellexeris, quo potuerit ille pacto in vita tot plena tumultibus, tot referta negotiis, tot occupata Magistratibus, tot misera publicis calamitatibus, tot vexata privatis inimicitiis, tot laboriosa in foro ad Quirites, in Senatu ad Patres, in gravissimo tribunali ad Judices orationibus: quo, inquam, potuerit pacto tam profundè cognoscere, tam eleganter describere, tam minutatim, et fideliter extricare, quidquid difficilium quæstionum ad eam ætatem agitarant philosophi. Supremi Numinis beneficio, quo certè consuli scientiarum bono, et incremento, plura tanti viri supersunt opera; quamquam non pauci ejusdem libri lacrymabili jactura perierint. Ex iis, qui pervenerunt ad nos, excelsa hujus philosophi magnitudo abundè manifestatur. Et quod admodum miraberis: vir tam eminenti doctrina, et qui non solum in nullo scientiarum ad ea tempora notarum genere peregrinus erat, sed quidquid

tractaret calamo, tamquam in provincia sua videbatur; hic, inquam, vir tam urbanè, tam scitè, tam eleganter fuit philosophus, ut, una sibi proposita meta, veritatem inquirere, neminem suæ sententiæ adversantem voluerit offendere. Quonimò ut tranquillo in veritatem contenderemus animo, palam agebat: "Male-  
 »dicta, contumeliæ, tum iracundiæ, contentio-  
 »nes, concertationesque in disputando pertina-  
 »ces, indignæ mihi philosophia videri solent....  
 »Nos et refellere sine pertinacia, et refelli sine  
 »iracundia parati sumus." Amabilem certè doc-  
 tissimi viri philosophiam! á cujus imagine ma-  
 num tollere sine dolore non possumus. Opor-  
 tet tamen, ne breves instituti compendii ter-  
 minos ultra modum transire videamur.

Post eversam Romanorum Rempublicam, alia surrexit schola, quam appellarunt Eclecticam, et quam jurè dixeris rempublicam philosophorum; neminem enim agnoscebat principem; neminem, in cujus verba juraret; neminem, qui opinandi libertatem opprimeret; sed quidquid vel Pythagoras, vel Socrates, vel Plato, vel Aristoteles, vel alii paris magnitudinis Doctores asseverassent, ad justam amussim pensabatur; nec omninò probabantur dogmata, nisi rationi consona viderentur. Primus dicitur Potamon Alexandrinus qui Augusti vixit ætate, in hoc fuisse philosophandi genere; quamquam antiquiores novisse, id maxime decere philosophum, satis confirmetur ex trito illo Platonis effato. *Amicus Socrates, sed magis amica veritas.* Et quod de Socrate Plato, de Platone

ingeminabat Aristoteles. Tullius etiam non tam fuit Academiæ fidelis, ut apertè non dixerit: *Non tam auctores in disputando, quam rationis momenta quærenda sunt.* Profectò dignam homine libertatem, quæ recta ducit ad veri cognitionem, quod supremus naturæ Artifex nobis investigandum concessit! Hæc autem libera opinandi facultas tum solummodò tibi licet, quum post accuratam in litteris assiduitatem rectè uti ratione tua condidiceris: nam si nullo doctrinarum præmunitus adminiculo sis, et tamen obstinabis animo, nullius auctoritati cedere, profundum patet errorum pielagus, in quod præceps facilè collabaris. Nullam dicitur Potamon administrasse scholam, quæ peculiaribus ab eodem excogitatis distinguerentur doctrinis: nemo tamen dubitat, en ejus ætatis fuisse Sapientibus, et ipsius exemplo servile jugum auctoritatis dejecisse plures insigni nomine philosophos, unam sequi rationem profitentes, et instituto severo examine, id seligentes ex unaquaque schola, quod cum veritate constare videretur. Hæc opinandi libertas ad tantum pervenit honoris culmen, ut doctissimorum hominum philosophiam appellarent Eclecticam. Et processu temporis ex antiquissimis Ecclesiæ Catholicæ Doctoribus ad Eclecticos annumerati sunt tum Clemens Alexandrinus, qui philosophiæ nomine dignam judicabat, non eam quidem, quæ natam se dicere à Platone, ab Aristotele, à Zenone, ab Epicuro, vel quovis alio simili; sed quæ carpit ex singulis præstantiora: tum Origenes, qui Principum



omnium doctrinas percurrerebat, inter se conferebat, minutatim examinabat, priusquam alicui subscriberet: tum Lactantius, qui subscripturum se dicebat philosopho, *qui sparsam per singulos veritatem, per sectasque diffusam, in unum colligeret, atque in corpus redigeret.*

Sed jam per hæc tempora multis afflicta fuerat vicissitudinibus philosophia. Cajus Caligula, insignis litterarum osor, enormiter vexarat philosophos; quos et postea Nero jussérat exulare Roma, et ab omnibus Italiæ finibus Domitianus. Instaurati sunt litteris honores, quo tempore ad Romanorum Imperium Adrianus conscendit, studiis maximoperè deditus, in quibus et aliquam meruit laudem, quamquam famosæ gloriæ plus justo cupidus, perperam voluerit in eorum Sapientum haberi numero, ad quos ingenii sibi dati viribus pervenire non poterat. Ad summum gloriæ fastigium philosophia rediit, imperante Marco Aurelio Antonino, qui et ipse, prætextatus adhuc, incedebat Romæ philosophus habitu, doctrina, moribus: habitum postea cum imperatorio commutavit; doctrinam ætate adauxit, mores philosophicos intulit in sepulchrum. Philosophiam appellabat matrem, aulam vero novercam, et sæpius in ore habebat illud Platonis effatum: *Beatos fore populos, in quibus aut philosophi regnarent, aut Reges philosopharentur.* Hujus viri sapientiam probavit erudita posteritas in famoso ejusdem opere, græcè scripto, quod mirabili rerum prudentia, et venusta simplicitate præcepta morum dilucidat.

In eo sæculo, quod fuit ætatis christianæ secundum, florere Plinii, Dion Chysostomus, Quintilianus, Plutarchus, qui summo cum honore sapientiam prosequuti sunt: ut etiam eminuerit litteris Epictetus, Arrianus, Galienus, Diogenes Laertius, Maximus Tyrius, Diognetes, Crescentius, Celsus, quem Blanconius ad Augusti sæculum refert, haud renuente postea Tiraboschio, qui prius Blanconium impugnauerat, aliique plurimi, quorum nonnulli philosophiam suam in sacra Christianorum dogmata et ritus converterunt. Sapientissimi verò philosophi non defuerunt in Catholicis, Iræneus, Justinus, Teophilus, Athenagoras, Ermiyas, Clemens Alexandrinus, et ferè initio sæculi sequentis Origenes, ejusdem Clementis discipulus, et in scholæ gubernatione succesor, dictusque Adamantinus ab indefessa in litteris assiduitate; qui sanè omnes elegantissimis, et profunda doctrina conscriptis operibus, de Christiani nominis osoribus gloriosè triumpharunt, eosdemque calumniatores æterno inustus dedecore ad silentium redegerunt. Indè autem nihil interrupta serie numeravit Ecclesia Catholica Doctores moribus gravissimos, et doctrina supereminentes, Cyprianum, Athanasium, Basilium, Gregorios, Ambrosium, Hieronymum, Cyrillos, Chrysostomum, Augustinum, aliosque innumeros, quos tanta copia videtur Deus in orbem immisisse difficillimis Ecclesiæ temporibus, ut philosophantibus in sanctæ Fidei dogmata, et erroribus ubique serpentibus, ingenii sublimitatem, heroicam for-

titudinem, et indefessam defatigationem. opponerent. Sed operosissimis implicati disputationibus, quum vitam agerent longa calamitatum serie prorsus difficilem, totos ferè nervos animi contenderunt in scientias primæ necessitatis, nobilitatis, et magnitudinis, theologica nimirum, et moralia; nec omninò nisi obiter, aliis doctrinarum ramis, quos hactenus agitant philosophi, vacare potuerunt.

Postea verò in Hispaniam, Italiam, Africam, Galliam latè irruit barbarorum turma, quæ more fulminis omnia rapidè vastavit, inconditè perdidit, miserabiliter conturbavit. Et quid sperare scientiæ poterant in tanto rerum tumultu? Quid viverent inter gladios ubiquè strictos, in eorum qui sapuerant, perpetuo gemitu, et iis jam dominantibus, quibus erat in pretio furor, et ignorantia? Profectò in hoc barbarorum impetu collapsum est Occidentis Imperium, eisdemque corruit involuta ruinis litterarum Respublica. Non certe quod nasci præstantissima desierint ingenia: quinto enim post Christum sæculo Romæ sedit Pontifex Leo, cui Magni nomen tributum est non minus à doctrinæ amplitudine, quam ab elegantissima diligentia in difficillimi Pontificatus muneribus. Romanam pariter Ecclesiam sequenti sæculo gubernavit Gregorius, Magnus etiam dictus, et quidem meritò, si quis alius; quidquid somniatores quidam, et maledici sycophantæ contra effutierint. Ingentes posuit sudores in litteris, et plura scripsit, quæ temperanter sapientibus nunquam non erunt monumenta,

quam benè de scientiis meritis fuerit supremus hic Pontifex. Latine dicentis oratio venustissime fluebat; quamquam non omnino coluerit, aurei sermonis puritatem: et quidem Erasmus, quem hac in laude peregrinum nemo dixerit, in Gregorii scriptis legi credidit Tulliano proximum stilum, à quo ceteri ejusdem ætatis auctores longè aberant. Isidorus etiam, Hispalensis Pontifex, per ea vixit tempora; quem nec morosiores ætatis nostræ Aristarchi deturbare audent è philosophorum numero: porro scripsit innumera, non solum de Divinis, quæ in præcipuis habuit amoribus, verum etiam de dialecticis, de physicis, de astronomicis, de mathematicis, quorum plura certissimum saltem auctoris judicium, et immensam eruditionem confirmant. Magnus Aurelius Cassiodorus natione Calaber, patricius Romanus, postquam sub Theodorico, novo Italiæ Rege, tribusque ejusdem sucesoribus, primas gessit summo cum plausu dignitates, in Calabriam se recepit, ubi philosophiam cumulavit suam monastico cucullo, quem induit in amplissimo suis expensis condito cœnobio, adjectaque bibliotheca, quam suis etiam operibus, copioso et pretioso fructu desudantis ad plura lustra ingenii, nobilitavit. Nec modica tanti viri laus est, quod in familiaribus ad contubernales colloquiis, eos identidem cohartabatur, enixè rogabat, et multis rationibus urgebat, ut, quidquid superesset à cœnobii constitutis, in studiornm oblectamento consumerent. Et ab his tan magnanimis Cassiodori conatibus, ut, qui congregati secum

erant, doctrinis mentem excolerent, repetendum videtur, quod tam Cœnobitæ Vivarienses, quos ille instituit, quam eorum exemplo plures alii per Italiam, Galliam, Hispaniam, Germaniam, Angliam latè conspersi, totam posuerint operam in scientiarum conservatione: ut ferè Cœnobitis deberi, quod infelicissima illa plurimum sæculorum ætate, quam appellant ignorantia regnum, litterarum memoria non omninò deleteretur.

Utiquè non defuerunt, etiam extra cœnobia, viri doctrina clarissimi, quorum paucos jam attigimus, alios prætermittimus, quia recensere singulos, institutæ brevitatis non est. Sed profectò Sapientium ejus ætatis numerus admodum fuit parvus, et quasi nihilo habendus, contra immensum barbarorum, barbarosque mores imitantium exercitum. Et præterea negari planè non potest, eos etiam paucos, qui tunc doctrinis excelluere, prorsus immunes non fuisse à vitiato quodam in litteris ac depravato sapore, quem ab ætatis derivari moribus, primum erat. Sæpius exagitata est ab recentioribus eruditis quæstio: quæ tan valida pestis per ea sæcula orbem afflixerit, ut vix vestigia litterarum, eaque inter paucos, et quasi tenebris conclusa, restiterint? Sed quidquid garrere libeat nonnullis contra Pontificem Gregorium Magnum, contra Gallorum Regem Carolum, etiam Magni nomine appellatum, contra omnes illos, qui sacris ministeriis addicebantur; depositis tamen livoribus, qui mentem miserabiliter obæcant, non alia videtur idonea



causa designari posse, nisi et in morum ferocitas à barbaris inducta, et in composita, prorsusque indigesta plurimum nationum congeries, quæ summè inter se distabant natura, educatione, consuetudine, lingua, nec aut frænabantur sacra legum communione, aut alio vinculo tenebantur; et perturbata rerum omnium facies, et odia, cædes, rapinæ, conculcata universa jura, Divina, politica, civilia. Quid vacare poterat, ut in naturæ arcanis investigandis, in cursu siderum contemplando, in lineis, et angulis dimetiendis, in eloquentiæ veneribus conquirendis, occuparentur miseri mortales, qui tam ægrè vitam sustentabant, quibus vivere vix licebat, quibus tot inter mala nasci, adolescere, ad postremos canos pervenire contigerat? *Nunquam*, quod agebat Tullius, *cum sapientia temeritas commiscetur*. Et sedatum quidem, tranquillum, sibi vacantem animum amant litteræ, nec unquam in calamitoso effervescentium tumultuum æstu germinare scientiæ visæ sunt.

Ætatis Christianæ sæculo decimo, cum densissimæ obscurabant Europam tenebræ, in Arabiam se recepisse litteræ videbantur, in quibus floruerunt famosissimus à doctrinæ universitate Alfarabius, Albumazar, Avicenna, et plures alii, qui philosophiæ tamquam sequestri, comparata lumina, suo postea tempore cum Europæis communicarunt. Sequenti sæculo disseminarunt eruditas academias per eas Hispaniarum partem ab ipsis occupatam; in quibus perquam celebre fuit nomen Aver-

rois, Arabis origine, patria Cordubensis, cujus calamo præter opera, *de natura orbis, de re medica, de theriaca*, et alia quædam, Aristotelem habemus arabicè loquentem, sive omninò illum convertere, sive tantummodò explanare tentaverit. In hoc autem opere sua potius excogitata, quam Aristotelis philosophiam orbi litterario reddidit. Unde aiebat Divus Thomas: *Averroes non tam fuit peripateticus, quam philosophiæ peripateticæ depravator.* Hæc Arabum in fovendis doctrinis defatigatio fortassè dici potest quædam velut aurora, longè quidem adhuc lucescens, quæ tamen viam paravit ad litterarum instaurationem. Utiquè non inficiamur, Aristotelis textum, qui jam ad Arabes vitiatum pervenerat, ab eisdem fuisse magis, magisque conjectura, et interpretatione corruptum; ut etiam, Sapientes ejus nationis in philosophiam induxisse disputationes innumeras, quæ totæ sunt in subtilitatibus, quæ memtem inutiliter onerant, quas nemo sanæ mentis dixerit ad notiones philosophicas pertinere. Sed tamen benè de scientiis meritos arbitramur, quia difficillimis illis Europæ temporibus litteras magnificerunt, academias instituerunt, ultra patrium solum propagarunt, ingeniaque alibi nascentia, quæ multiplicatis calamitatibus oppressa dormierant, exsuscitarunt. Aristoteles igitur, expletis ad hominum arbitrium lacunis, quæ vitio temporum in ejus operibus factæ fuerant, et innumerorum interpretum inventis pessimè deformatus, initio sæculi tertii decimi ad Gallos introgressus est; sed tam

alius à philosopho Athenas docente, ut si ei daretur è sepulchro exurgere, vel indignatione, vel cachinnis exciperet commendatam suo nomine philosophiam. Hæc fuit anno millesimo ducentesimo nono Lutetiæ Parisiorum incendio damnata, ejusque lectio Catholicis vetita. Sexto post anno permissa ejusdem dialectica, in præfato interdicto physica, et metaphysica remanserunt. Inde autem Romanus Pontifex Gregorius Nonus anno millesimo ducentesimo trigesimo primo, Aristotelem legi prohibuit, donec ab erroribus in sanctam Fidem purgaretur. Post annos centum triginta quinque Purpurati patres ab Urbano V. Legati, ut Academia Parisiensis in pristinum splendorem restitueretur, Aristotelis opera, dumtaxat exceptis physicis, commendarunt. Sequenti sæculo tam in honore jam erat Aristoteles, ut regio Francisci primi decreto damnatus fuerit Auctor, qui hunc peripateticorum principem oppugnavit; eidemque injunctum, ne ipsum auderet ultra maledictis incessere. Sed numquam tam sublimi fuit Aristoteles gloriæ fastigio, quam ineunte sæculo decimo septimo, quum Academia Parisiensis induxit, legi, et doceri posse, quidquid philosophicum erat Aristotelis nomine.

In hac pro diversis temporibus diversa nominis Aristotelici fortuna, primi magnitudinis viros in suis cultoribus litteræ numerarunt; quorum tamen comparatam ætate illa famam, non omnium æquè justam existimarunt posteri Sapientes. Et sæculo quidem decimo tertio. Al-

bertus Magnus, Thomas Aquinas, Alexander Hales, Bonaventura, Joannes Dunsius, Rogerus Bacon, Raymundus Lullius, Alphonsus X Castellæ, ac Legionis Rex, Fridericus II, Germanorum Imperator, alique viri excellentes, non parvo jam numero, novos attulere conatus ad magnum opus philosophicæ instaurationis. Non tamen plenus adhuc dies illuxerat litteris: non enim vapularant, expunctæque ab hominum memoria fuerant inutiles, vanæ, barbaræ quæstiones, quas aut intelligere, aut ignorare, nihil omnino refert philosophi: quinimò pluribus arabico sapore jam inventis, aliæ tunc ejusdem furfuris adjunctæ sunt, quæ frustra tempus consumeabant; quæ patientiam hominum tyrannicè divexabant, quæ miro utrinque furore, ac pertinacia, quasi res essent maximi momenti, propugnabantur. Undè non tam uberes philosophia collegit fructus, quam polliceri sibi poterat à viris tam excelso donatis ingenio; qui si quarto post sæculo vixissent, cum Cartesiis, et Newtonibus fortunatius adlaborassent in ædificio scientiarum ad sublimitatis apicem elevando. Et certè Thomas Aquinas, quem dixere quidam tam benè de Theologicis meritum, quam decimo septimo sæculo Cartesius fuit de philosophicis, nullo postea tempore non magni est habitus ab sapientibus, quod profundissimè cogitaverit, quod solidè doctrinas constabilierit, quod mira efficacia ratiocinatus fuerit, quod modestissimè sapuerit, quod simpliciter, et perspicuè scripserit, quod ordinem adamaverit. Et eo jam tempore phi-

losophiæ nomen coarctarant homines angustissimis terminis; nec ferè philosophos appellabant, nisi logica, physica, et metaphysica tractantes. In iis autem litterarum ramis profectò nihil extricasse videtur tertium decimum sæculum; quia cæco quodam favore in ejus Aristotelis, quem confixerant Arabes, jurabatur verba, nec erat fermè, qui auderet contra jam cogitata dicere, novas rerum causas quærere, in secreta naturæ laudabiliter curiosius ingredi; ne scilicet tanti Magistri, quem omnes credere videbantur ab errore immunem, offenderetur auctoritas. Acria certamina et contentiones, quæ scholas inter se dissecabant, plerumque vertebantur in quavis floccifienda subtilitate, singulis conantibus, et fluctus insimpulo excitantibus, ut id evincerent, favere sibi Aristotelem. Et hæc imperiosa tyrannis perpetuata est toto etiam sæculo decimo quarto; quamquam in eo vixerint ad Italos, ad Gallos, ad Hispanos, ad Germanos, ad Britannos illustrissima ingenia, quorum auctoritas potuisset subjugatas hominum mentes in libertatem asserere. Aliquantò feliciores visi sunt decimi quinti sæculi conatus, quum ad Italos transierunt Græci, Bessario Nicenus Pontifex, Joannes Argiophilus, Theodorus Gaza, Georgius Trapezuntinus, et plures alii præclaro in literis nomine, qui et publicè in scholis, et privatim in eruditis colloquiis doctrinam uberriam effundentes, exacuerunt Occidentis ingenia jam ultrò adnitentia in optimum scientiarum saporem. Et quidem obtentum est, ut



plures insurgerent, qui, mentem humanam injustè oppressam esse, vehementissimè declamarent. In his autem declamationibus, quidam sincerè descripserunt scholæ vitia; quidam verò audacissima fronte plus justo latrarunt contra eos, qui Scholastici appellabantur. Decimo sexto sæculo, sapientissimo quidem illo tum in re Theologica, tum in morum scientia, tum in politioribus litteris, nondum tamen suo potui explendori philosophia restitui: quum enim, ut in præcedenti, plures lacrymarentur, in philosophia tunc tradita philosophiam desiderari, nec tamen aliam humano digniorem ingenio sufficerent; in tanta sæculi luce nemo fuit, qui jugum servitutis excuteret.

Renato Cartesio, philosopho Gallo, reservatus erat hic triumphus. Quarto natus anno, decimum septimum ingressus est sæculum, illustris genere, longè illustrior nobili opinandi de mundanis libertate, beneficisque sudoribus quibus philosophiam aut magna ex parte penè creavit, aut certè splendore, ac dignitate magnificentissimè cumulavit. Neque verò debita fraudandus est laude Galileus de Galileis, famosus quidem imprimis, Florentiæ natus triginta duos annos antè Cartesium: qui Galileus ab summa eruditione in geographicis, ab ingeniosissimis inventis in re mechanica, et præsertim ab astronomicis notionibus, magnos ætate sua de se rumores excitavit, et summam sui celebritatem posteritati reliquit. Galilei super floruit in Anglis Franciscus Bacon, Verulamii Dynastes, qui agitavit quidem magna, et

sublimia, ut instauratio litterarum aliquando perficeretur; quarum bono libros conscripsit oppidò celebratos de humanarum notionum incremento, ac dignitate, de novo scientiarum organo, de universi orbis phænomenis, et plures alios primæ utilitatis, atque amplitudinis, quidquid maligni quidam Britanicæ laudis invidi oblocuti sint. Petrus etiam Gassendus, excelso vir ingenio, natus in Galliis anno ante Cartesium quarto, per eadem ferè, atque ille, tempora Peripateticos conturbavit, Leucippi, et Democriti vacuo, et atomis instauratis. Qui verò totam philosophiæ faciem immutaverit; vetustissima dominationis vincula generosè fortis diruperit; libero, ac robusto ingenio præjudicatas opiniones concusserit; contra formidabilem scholarum omnium impetum solus pugnare ausus fuerit; philosophicas omnes quæstiones habuerit suspectas, donec ad severi examinis trutinam appenderentur; humanæ auctoritati rationem, veritatem novè cognitam incanescenti præjudicio antehabendam exclamaverit; primus utiquè dicitur fuisse Cartesius. Profectò liquidum est, philosophum hunc fervidissimo ductum ingenio, veras causas, undè ad explicanda naturæ phænomena descendit, non tam semper attigisse, quam gratis asseverasse ab se repertas: ceterum subvertit ingentem philosophiæ tunc regnantis colossus, quo quidem incolumi, lux veritatis oboriri non poterat; et jactis novo philosophandi generi fundamentis, viam facilè constravit, ut, quoad licet mortalibus, ex purissimo rationis fonte veritas

hauriretur. Et quantus ille fuerit in audacter excogitando, et quò processerit indole fervida, et mirabiliter inventrice, satis eruitur ex ejus operibus; in quibus præcipua sunt, Methodus ducendi mentem ad verum, Meditationes metaphisicæ, Elementa Philosophiæ, Dioptrica, Mechanica, Geometria, Algebra, et libri de homine, de mundo, de internis animi motibus, de meteoris, et plures epistolæ, quarum totum est de philosophicis argumentum. Famosi vortices particularum, materiæ perpetuò sese in orbem agentium, tam circa proprium axem, quam circa commune centrum; elementa illa tria, quæ fricantibus inter se particulis nascuntur, materia nimirum subtilis, globuli, et partes ramosæ, ac duriores; bruta se moventia mechanicis tantum legibus, et mera, quod ajunt, automata; hominis anima tertium inter et quartum cerebri ventriculum sita, ubi glandula est, quam à figura *pinealem* appellavit, aliaque id generis prorsus nova, et sin minus vera, saltem acutissimo conficta ingenio, in philosophicis fuere Cartesii doctrinis.

His penitus oppositas excogitavit Isaacus Newton, vir planè maximus, Britanorum decus, ornamentum proximè lapso, et præsentis sæculo. A Keplero, et Cartesio prima derivavit lumina de geometricis, et mathematicis, in quibus viginti quatuor natus annos ea jam primus invenerat, quæ postea Sapientes cum admiratione legerunt in famosis ejusdem operibus de optica, et de philosophiæ naturalis elementis. In phy-

sicis, et metaphisicis probavit ingenium, probavit etiam fortitudinem, quam præjudicatis philosophorum opinionibus Cartesius opposuit; non tamen credidit, subscribere se posse conjecturis, quibus ille innixus, novæ philosophiæ fabricam ædificavit. Quare operæ pretium censuit philosophus Anglus, experimentis, et geometricæ normæ subicere physicam. Primus invenit infiniti calculum, et ordinem progressionum sine numero; quæ sanè inventa maximè fuere momenti, tam ad geometricæ sublimia, quam ad innumera explicanda naturæ phænomena. Primus fuit lucis quasi anatomicus, quam mira dissecuit arte, septemque radiis conflari monstravit. Loquebantur de luce ante Newtonem philosophi: sed nemo noverat, quid illa esset; nec ullus in tot Sapientibus fuerat, qui penitissimè rimatus intimam ejus naturam, septemPLICEM in ea radium, et primigenios totidem colores vidisset. Primus docuit, indè repetendum phænomenon, quod omnes in sua planetæ constant orbita; quia supremæ legi obediunt, quod sese mutuò trahant omnia corpora. Et hæc vis trahendi, quam summus rerum Artifex inseruit corporibus, et quam Newton *attractionem* appellavit, potissimum totius Newtonicæ philosophiæ fundamentum est. Hanc autem attractionis generalem legem in duas divisit: nimirum prima est, si corpus quantitate sit quater majus altero, vi quater majori major quantitas trahet minorem, quod geometricis verbis dicitur, attractionem esse in directa massarum ratione. Quare si hæc duo corpora, cer-

ta inter utrumque posita distantia, mutuæ relinquerentur attractioni; minus illud tantò festinantius viam perficeret, ut cum majori conjungeretur, quantò ab hoc excéditur quantitate; quod geometricè dicitur, velocitatem corporum esse in inversa massarum ratione. Altera lex est: si bina corpora inter se distent ad tria milliaria, trahendi vis in majori quater major est, quam si ad sex milliaria distarent: sive ut geometræ loquuntur, semper sequitur attractio rationem inversam quadratorum à diversis nascentium distantis. Et quod mirum est, his tantummodo legibus, non quidem positis ad arbitrium, sed geometrica ratione, atque ordine confirmatis, ferè quidquid est in naturæ phænomenis, Newton dilucidavit. Quintum et octogesimum agebat annum, quum è vivis abiit, et parentatum illi est ferè quasi Regi, et magnifico in ejus honorem erecto mausoleo apposita est inscriptio in hæc desinens: "Gratulentur sibi mortales, tale, tantumque extitisse humani generis decus."

Dedit etiam Germania præstantissimum elapso, et nostro sæculo philosophum, cum Cartesio, et Newtono jure comparandum, Gottfriedum Gulielmum Leibnitium. Lipsiam habuit patriam, ingenium sortitus feracissimum, et quod agebat de Catone Livius, ad omnia versatile, ut natum ad id unum diceres, quod agebat. Pretiosam à patre accepit hæreditatem, bibliothecam scilicet innumeris libris omnes ferè scientiarum ramos agitantibus refertam: et quum pretiosius illo donum habuisset à na-



tura, summam sciendi cupidinem, et incredibilem in sudoribus litterarum constantiam; orator, historicus, poeta, jurisperitus, theologus, philosophus, mathematicus, et in singulis eximius dicitur evassise. Quidquid verò sit de hac scientiarum universitate, dumtaxat ejus philosophiam, quæ nostri est instituti, nec eam totam, sed præcipua capita memorabimus. Platonem et Aristotelem, ipsorumque ordinem, et concinnitatem impensè laudavit; sed viam longè ab iis aliam tenuit in natura rerum explicanda. Univerſa, quæ sunt, conflari voluit *monadibus*, quarum nomine intelligebat substantiam simplicem, cui nec pars est, nec figura, nec locus, nec extensio, nec aut tangi, aut generari, aut corrumpi, aut solvi potest, nec omninò esse, nisi ab summo creetur Artifice; aut mori, nisi ad nihilum redigatur. Omnes, agebat, monades inter se sunt dissimiles, et quadam vi donatæ, qua invicem altera in alteram agunt; præter hanc autem intrinsecam vim agentem, et moventem, est in individuis monadibus interna forma singulis propria. Ejusmodi simplicissimæ substantiæ, nulla compositæ parte, nihil extensæ, rerum omnium elementa sunt; sed pro suo quæque ordine diversis rebus inserviunt. Omnes quidem quasi centrum, et speculum, et via orbis universi sunt; sed aliæ confusissimè repræsentant, nec in iis vis est, nisi movendi; et hæ sunt monades, quibus corpora componuntur: aliæ paulò clarius; et ex iis brutorum animæ consurgunt: tertii sunt ordinis, in quibus facillè, perspicuè,

miroque ordine universitas rerum repræsentatur; et ex iis nobilioribus humana est anima. Monas verò est quartum ordinem una efficiens, æterna rerum origo, suprema monadum omnium ratio, quæ videt, cognoscit, repræsentat; quidquid aut est, aut esse potest; et hanc monadem Deum Optimum Maximum appellavit. Si quæsieris: qui possint, quibus extensio non est, extensum producere? Id esse, ait, ex conjunctis monadibus necessario nascens phænomenon; perfectissima enim illa monas cum ceteras creavit, eam præstituit rerum harmoniam, ut monas unaquælibet sibi datis legibus obediens, peculiaribus aliarum monadum legibus obnoxia videatur, quamquam inter hanc, et illas nullum sit omnino commercium. Ita quidem animus Leibnitii, nihil prorsus obnoxius corporis organis, tot nova excogitavit in philosophicis; et videbatur corpus ea scribere, quæ dictabat animus: quemadmodum autem animus ad ea excogitanda præstitutus, excogitasset etiam longè à corpore; ita corpus harmonicè creatum ad ea scribenda, scripsisset longè ab animo. Nihil prorsus aut animus à corpore, aut corpus ab animo dirigitur, excitatur, impellitur; quamquam ab harmonia præfinita videantur sibi invicem respondere: monades ergo sunt *ratio sufficiens* rerum omnium, quæ possunt contingere: quumque nullum planè, vel minimum, sit spatium monadibus vacuum, non potest una in aliam agens moveri, quin rerum universitas commoveatur, et nova orbis facies repræsentetur. Hanc ergo præfinitam rerum

harmoniam qui animadverterit, mirari non debet quod ex monadum conjunctione, non quidem extensarum, sed harmonicæ tamen legi obedientium, nascatur extensum. Et ex iis regulis faciliè deducitur, monadem illam creatricem, quidquid umquam fecerit, *ratione sufficienti* ductam fecisse, ac proinde perfectissimè: quumque non aliter omninò possit, dicenda est teneri ad optimum in suis externis operibus; quod nimirum sit optimum, non singulari perpenso bono, sed orbis universi perfectione. Sunt hæc in Leibnitii doctrinis; in quibus utiquè admirationi patet sublimitas ingenii liberrimè volantis, novorum inventrix, et amatrix indoles, et non hactenus audita philosophia. Sed num ea sibi constent, non est historicè narrantis examinare.

Fuerunt etiam hoc duodevicesimo sæculo, litteris aureo, Malebranchius, Clarckius, Wolfius, Maupertuisius, et novissimè Boschovichius, Eulerus, Alembertus, Bonnetus, alique plures, quorum et supereminuerunt ingenia, et oppidò laudabiles fuerunt ingentes conatus in adaugendis philosophiæ luminibus, eaque quotidianis incrementis ad saporem optimum conformanda. Sed nec videntur novas omninò trivisse vias in phænomenorum explicanda universitate; nec in brevi compendio licet singulos, qui excelluerunt commemorare. Unum superest, ut vos iterum alloquens, Mexicani juvenes, multis precibus obsecrem, impellam, exsuscitem, urgeam, ut litteras habeatis in amoribus, ut ex animo colatis philosophiam; quæ

sivè fortuna vobis arriserit, sivè adversa contigerint, sivè Theologiam prosequimini, sivè Jurisprudentiæ vacabitis, sivè togam olim induetis, sivè militari gloria rapiemini, sivè ad Dei ministros adscribemini, sivè pecuniosi, sivè pauperes eritis, sivè domi latebitis, sivè publicè incessetis, sivè in urbe vitam agetis, sivè rusticabimini, sivè cum cive, cum extero, cum sapiente, cum hebetè sermonem conseretis, sivè aliquandò profecti patria, mundi remotissima peragrabitis; numquam non vobis erit eruditum otium, numquam non in miseris casibus perfugium, numquam non utile, suavissimumque oblectamentum. Sed per Deum immortalem! discite judicare inter ingenium, et ingenium; discernite sobriè sapientem ab impio tumidè philosophante; cavete à captiosis quòrundam illecebris, qui postremis hisce temporibus perperam se dixerè philosophos; non certè quia novum aliquod lumen in philosophiæ instaurationem attulerint, sed quia multis eloquentiæ veneribus ornati, nihil non temerè audent, errores faciliè disseminant, mores corrumpunt, pertinaciter garriunt, fidentissimi pronunciant, humanam rationem volunt supremam omnium judicem, etiam adversus dogmata, quæ vel Deus ipse liquidè manifestavit, vel supremi Ecclesiæ Pastores legitime definierunt, vel catolici Patres, omnes quidem, ubiquè, semper, quæ divina est traditio, propugnarunt. Et profectò si ejusmodi philosophorum errores pulcherrimè comptos legeritis, quin mentes vestras

et longa rerum experientia, et doctrinæ ubertate præmuniatis; dulcissimi sermonis aureo poculo venenum incauti devorabitis.



---

# ELEMENTA MATHESEOS

## PROLEGOMENA.

1 **M**athesis est (\*) scientia quantitatis, vel magnitudinis. Quantitas autem *continua* est, aut *discreta*: *Continua* dicitur quæ partibus simul cohærentibus constat; cujus notio ubique in omnibus corporibus nobis exhibetur. *Discreta* verò ea dicitur, cujus partes disjunctæ sunt, puta hora, dies, annus, frumenti, aut arenæ cumulus, atque alia omnia, quæ *tota per aggregationem* vulgò audiunt in scholis.

2 Quod si distinctè magnitudinem aliquam velis concipere, necesse est illam cum alia comparare. Sic numeri cujuscumque ideam perspicuam habebis, illum cum unitate conferendo, dum, quoties illam, vel ejus partes contineat, perpenderis. Similiter notionem ulnæ, aut pedis, à palmi, et pollicis, aut lineæ cognitione deduces. Quantitas ergo in rebus sine medio assumpto dari, minime tamen concipi potest.

---

(\*) Μάθησις à μαθητῶν disco, unde μάθηλαί μαθητῆς disciplina, μαθητής discipulus. Non rectè aliqui proferunt *Mathesis* breve, quum etha græcum natura longum sit.

3 Jam verò si quantitatem veluti partium congeriem consideraremus, nullo ad earum nexum habito respectu, *arithmetice* illam tractamus. Quando autem veluti continuam, sive partibus conjunctis compositam attendimus, *geometricè* operamur. Quare quantitas discreta *Arithmetica*; continua vero *Geometriae* objectum est.

4 Porrò numerus, aut magnitudo quævis, non in aliqua specie determinata consideratus, sed generatim, aut veluti abstractim, *mathesis pura* dicitur: quum verò aliquibus rebus hunc mundum componentibus applicatur, *mathesis mixta* est. Mathesis puræ elementa, quæ tiro- ni philosopho necessaria sunt, hoc volumine complectimur: mixtam in Physica tam genera- li, quam particulari passim adhibemus.

5 Methodus mathematica est ille ordo, quo mathematici ad proponendas veritates utuntur. Plerumque à *definitionibus* incipiunt; progre- diuntur, si opus fit, ad *axiomata, et postu- lata*, sive veritates evidentes, quæ nulla in- digent demonstratione. Nonnumquam *lemma* præmittitur: propositio nimirum, quæ ideò de- monstratur, ut ad alias sequentes viam ster- nat; deinde *theoremata*, aut *problemata* pro- ponunt, in quibus aut veritas aliqua demons- tratur, quod theorematibus fit; aut aliquid fa- ciendum præscribitur, et hoc *problema* nun- cupatur, cujus solutione modus operandi do- cetur, ac postea si opus sit, demonstratur. Nonnumquam *corollaria* post theoremata, aut problemata subnectunt; ex his alias veritates

deducendo, quæ ex demonstratis facile derivantur. *Scholia* vocant quasdam annotationes, quibus plurima præoccupantur, quæ alioquin novis theorematibus, aut problematibus exponi debuissent.

---

# TRACTATUS I.

## ARITHMETICA NUMERALIS.

---

### CAPUT PRIMUM.

#### *De natura numerorum.*

6 **D**efin. Quælibet res seorsim considerata una est, atque adeò unitatis notio ita omnibus est perspicua, ut nulla definitio ad eam concipiendam necessaria sit. Res et unitates tum dicuntur *æquales*, quum magnitudine non differunt, *similes* verò, quando in omnibus notis conveniunt, quamvis alioquin magnitudine differant. Sic duo juvenes æquales dicuntur, si eandem staturam, aut ætatem habeant: similes autem, quum in omnibus corporis, lineamentis conformantur, quantumvis magnitudine dissentiant. *Numerus* est congeries unitatum: quæ quidem, si ejusdem speciei sint, numeros faciunt *homogeneos*: secus, *heterogeneos*. Sic tres, quinque, duodecim horæ, numeri sunt homogenei, pes autem et annus, heterogenei.

7 Schol. 1. Numeri heterogenei in unum numerum coalescere non possunt, neque operationibus arithmeticis subjici. Decem regalia, et tres aurei, nunquam in unam summam colliguntur, nisi prius ad eandem speciem reducantur: puta aureos ad regalia traducendo:

tunc enim ejusdem speciei unitatibus summa coalescit.

8 Schol. 2. Scientia numerum (3), quam arithmetica appellant, duplici modo tractari potest: aut signis vulgaribus, quod fuit Arabum perutile inventum, aut litteris alphabeticis, quæ recentioribus Geometricis, à Francisco Vieta, methodus est familiarissima. Prima *Arithmetica vulgaris dicitur*, secunda autem *speciosa*. Porro ad exprimendum quemcumque numerum, decem tantum signis utimur, omnibus notissimis, 0, 1, 2, 3, 4, 5, 6, 7, 8, 9; quando autem ad denarium pervenimus, eorundem signorum conjunctione insignes etiam summas compendio exprimimus, quæ quidem adeò omnibus nota sunt, ut ab his explicandis superseadeamus. Tantum quæ negotium facessere in complicatoribus summis colligendis tironibus possunt, sequenti problemate dabimus.

9 Probl. Numerum scriptum dilucidè exponere. Solutio. Dividatur à dextra versus sinistram, ita ut singulæ tres notæ virgula dividantur; existantque plura membra, quorum ultimum una, aut duabus tantum notis constare potest. Ut autem *milliones*, *billiones* etc. ritè dignoscantur, lineolis superius post sex quasque notas indicentur. Exemplo res clarescet: 4<sup>4</sup>, 365, 294<sup>4</sup>, 783, 468<sup>4</sup>, 256, 935 sic enuntiabis quatuor trilliones, ter centum sexaginta quinque mille, bis centum nonaginta quatuor billiones, septies centum octoginta tres mille, quater centum sexaginta octo milliones, bis centum quinquaginta sex mille, novies centum triginta



quinque unitates. Satis manifestum est, primam notam à dextra versus sinistram continere unitates, secundam decades, tertiam centenaria, quartam unitates millenariorum, quintam decades millenariorum, sextam centenaria ejusdem numeri, septimam unitates millionum, et sic deinceps.

Schol. Barbarè quidem dicitur *millio*, *billio*, *trillio*, quemadmodum alia plurima; quæ tamen jam frequenti usu in omnibus disciplinæ recepto, latinitate donata sunt. Operosum enim, atque ambagibus pronum est, ne dicam captu difficillimum, enuntiare decies centena millia, millies millies millia, ut *millionem*, ac *billionem* indicarem, romanorum more. Sed jam ad operationes, quæ numeris exerceri possunt, properemus. Ad quatuor autem reducuntur; nimirum Additio, Subtractio, Multiplicatio, et Partitio, quarum usus in humano commercio frequentissimus est. Tirones assuescant calamum nocturna, ac diurna versare manu, ut arithmeticæ regulas ad praxim deducant. Parum namque proficient, nisi distinctas notiones, quas studio comparaverint, continenti exercitatione repetere conabuntur.

## CAPUT SECUNDUM.

*Arithmeticae operationes in numeris arabicis.*

## §. I.

*Additio.*

**D**efin. *Additio* vocatur ea arithmetica operatio, qua plures numeri in unum colliguntur: qui numerus compositus, ab omnibus, dicitur *summa*. Signum additionis est  $+$ , atque exprimi solet vocabulo *plus*: sic  $4 + 3$  enuntiat; quatuor plus tribus. *Aequalitatis* signum est,  $=$ , quod enuntiat *æquale*; unde  $4 + 3 = 7$ , sic leges; quatuor plus tribus, æqualia sunt septem. Ut autem excessum unius præ altero indicemus, hac nota  $>$  utimur; quæ hoc modo  $<$  inversa contrarium indicat: unde  $6 > 3$  significat numerum 6 majorem esse altero; contra verò  $3 < 6$ , primum altero esse minorem. Additionis operatio hoc principio innititur: *Totum est æquale suis partibus*: quare  $4 + 3 = 7$  nam quatuor, et tres sunt partes componentes numerum septem. Hinc additio numerorum simplicium nulla indiget ulteriori explicatione. Ad numeros compositos accedamus.

12 Probl. *Numeros compositos homogeneos addere*. Solut. 1. Numeri addendi ita scribantur, ut unitates unitatibus, decades decadibus, centenaria centenariis etc. sibi respondeant in unaquaque summa addenda. 2. Singillatim addantur unitates, quæ si novenarium excedant, ad decades rejiciantur, subter lineam scriptis

tantum unitatibus. Similiter in decadibus, si denarium numerum excedant, ad centenaria referendæ sunt, retento numero decadum, quæ ad decem non perveniant. Exemplo clarior res fiet. Sint addendi sequentes numeri.

Exemplum

2369

405

20

6

---

2800

Quoniam in prima serie à dextris versus sinistram viginti unitates reperiuntur, quæ duas decades justè complent, nulla superest unitas; unde cyphra, seu *zero* notatur, nullam adesse unitatem. Duabus autem decadibus cæteris secundæ seriei adjunctis, planum est cum aliis octo decem conficere, quæ quidem decem decades jam centenarium conficiunt. Nulla igitur restat decas subscribenda, quum omnes ad centenarium rejætæ sint: *zero* itidem hoc notandum est. In tertia serie septem centenaria inveniuntur, quæ cum alio ex decadibus collecto, octo centenaria fiunt: quum verò ad decem centenaria non perveniant, transferri non debent ad milliaria. Scribenda itaque sunt sub serie centenaria continente. Denique milliaria collige sub serie milliariorum; invenies summam integram ex quatuor summis partialibus constantem. *Demonstr.* Tali modo operandi colliguntur tot unitates, decades, centenaria, milliaria etc., quot in summis partialibus inve-

niuntur: totum autem æquale est suis partibus simul sumptis: igitur summa inventa continet omnes numeros in seriebus contentos.

13 Schol. Additionis probationes plurimæ adhibentur, quæ ad subtractionem referuntur. Satiùs erit operationem denuò instituere sensu inverso ab eo, quo primum facta est. Si descendendo summa collecta est, ascendendo denuò colligatur. Difficile enim idem error operatione inversa repetitur. Quod si summæ collectæ dissentiant, signum est errorem irrepsisse; sin verò conveniant, manifestum est, operationem rectè institutam; quum eadem summa debeat emergere, quocumque modo colligatur.

§. II.

### Subtractio.

14 Defin. Subtractio est operatio, quæ numerus à numero detrahitur, ut eorum differentia innotescat, quæ dicitur etiam *residuum*. Numerus major appellari potest *minuendus*, minor *subducendus*. Signum subtractionis est lineola —, quæ enuntiatur verbo *minus*. Sic  $8 - 6 = 2$ , enuntiatur; octo minus sex æqualia sunt duobus. Hæc est subductio numerorum simplicium, quæ nullo negotio perficitur. Jam ad compositos.

15 Probl. Numeros compositos à se invicem subducere. Solutio.

Exempl. Minuendus sit 1904657

Subducendus 0429593

---

Residuum 1475064

1. Subscribatur minuendo subtrahendus, ut in exemplo, ita ut unitates unitatibus, decades decadibus etc. respondeant; linea subscribatur. 2. Subducantur unitates ab unitatibus, et subscribatur residuum uniuscujusque seriei sub linea in serie respondente. 3. Quod si numerus superior inferiore minor sit, à serie proximè sequente decas mutuetur, sive unitas, quæ pro ordine numerorum erit computanda aut decadium, aut centenariorum etc., et sic poterit subductio fieri. Series vero sequens debet ea unitate mulctari, quæ jam computata fuit in serie subducta. Sic in exemplo, 9 à 5 subtrahi non possunt: addita verò unitate fiunt 15, scilicet decades, à quibus subducendæ sunt novem decades. 4. Quum verò jam centenarium à classe superiore detraxeris, nam quinque decadibus decem addidisti, quæ sunt unitas in centenariis; non amplius remanent sex, sed quinque tantum centenaria. Idem recurrit in quarta serie millenariorum. 5. In quinta verò, quæ decades millenariorum continet, nova occurrit difficultas. Nam 2 à 0 detrahi non possunt; quare à serie proximè sequente deme unitatem addendam huic seriei, quæ cum 0 facit 10. Memineris tamen ex hac decade jam detraxisse unitatem, quam millenariorum classi adjunxisti. Non igitur 2 ad 10, sed à 9 debes subducere. *Dem.* Hac operatione detrahuntur tot partes in minuendo, quot indicat subtrahendus; nempe unitates ab unitatibus, decades à decadibus etc. Ergo etiam totus subducendus à toto minuendo subtractus est.



16 Schol. Examen subtractionis est additio. Nam si subducendo addas residuum, minuendus debet restitui. Si aliter eveniat, operatio errore non caret, ideòque iteranda erit.

### §. III.

#### *Multiplicatio.*

17 Defin. Numerum per numerum multiplicare est toties sumere *multiplicandum*, quoties indicat *multiplicator*. Appellari etiam solent *factores*, et coefficientes: quia uterque numerus facit, aut coëfficit novum numerum, qui *productum*, vel *factum* dicitur. Signum multiplicationis est crux Sancti Andreæ sive decussata  $\times$ . Alii verò puncto intermedio multiplicationem indicant. Ita  $4 \times 5$  aut  $4 \cdot 5 = 20$ , sic lege: quatuor ducta in quinque, æqualia sunt viginti. Patet multiplicationem esse iteratam additionem. Nam idem est 4 multiplicare per 5, atque quatuor quinquies addere. Verum hæc additio nimium operosa foret, adeòque multiplicationis compendio brevior fit.

18 Schol. Pro faciliiori multiplicationis praxi inventa est tabula, sive abacus pythagoricus in sequenti schemate subjectus.

A	1	2	3	4	5	6	7	8	9	B
	2	4	6	8	10	12	14	16	18	
	3	6	9	12	15	18	21	24	27	
	4	8	12	16	20	24	28	32	36	
	5	10	15	20	25	30	35	40	45	
	6	12	18	24	30	36	42	48	54	
	7	14	21	28	35	42	49	56	63	
	8	16	24	32	40	48	56	64	72	
C	9	18	27	36	45	54	63	72	81	D

Usus tabulæ notissimus est. Ut invenias cujusvis numeri per alium multiplicati productum, quære utrumque in serie verticali, et horizontali; numerus inter utrumque interceptus erit productum: e. g. vis scire productum ex  $6 \times 5$ ; quære in columna verticali AC numerum 5 aut 6, alterum autem in serie AB; invenies ab ipsis interceptum numerum 30 productum ex  $5 \times 6 = 30$ . Facili negotio abacus infinite continuari posset eadem methodo, progrediendo semper eodem augmento, ut in numeris minoribus peractum vides quod quidem, pro privato adolescentium usu, ut sibi quisque proprio Marte abacum ampliorem elucubraret, auctor essem.

19 Probl. *Numeros compositos multiplicare.*

Solut. Exempl. Multiplicandus 93406782

Multiplicator 34

373627128

280220346

Productum 3175830588

1. Multiplicandum, et multiplicatorem scribe, ut in exemplo, linea subducta. 2. Incipe multiplicare á dextris, singulos multiplicandi numeros per primam multiplicatoris notam ducendo: quatuor ducta in duo, producent 8; quæ subscribe sub unitatibus. Deindè ad secundam notam progredere;  $4 \times 8 = 32$ : subscribe duo sub decadibus: et 3 retine adjungendum sequenti producto. Itaque dices:  $4 \times 7 = 28 + 3 = 31$ : scribe igitur 1, et retine 3 adjungendum sequenti producto, ut nunc peractum est. Eodem modo operare cum reliquis notis usque ad ultimam, cujus productum integrum subscribes, quum nulla alia restet nota multiplicandi cui adjungatur. 3. Quod in prima nota multiplicatoris peractum est, iterari debet cum qualibet ex sequentibus; ita tamen ut producta scribantur sub notis ipsis respondentibus. Nam secunda nota, quum contineat decades, productum ipsius debet subscribi sub serie decadum: aliter scriberes decades subter unitates, centenaria subter decades, atque adeò summam colligeres minorem vero producto. Nam 4 post rite peractam multiplicationem omnium notarum multiplicatoris, debent omnia producta in unam summam colligi, ea addendo eo modo, qui in additione jam indicatus est: summa hæc erit productum totale. *Dem.* Manifestum est ex modo operandi, unumquemque numerum toties sumi, quoties indicant singulæ notæ multiplicatoris: et quoniam hæc producta deindè in unam summam rediguntur, summa totalis erit produc-


tum integrum omnium notarum multiplicandi ducti in multiplicatorem.

20 Schol. 1. Si in decursu operationis cyphram inveneris, scribe sub numero respondente *zerum*: nam hæc nota non multiplicat. Quod si ex antecedentis numeri multiplicatione aliquid retentum fuit, hoc scribatur, ut in quinta multiplicandi nota peractum vides, ubi *zerus* scribi deberet, nisi nota 2 ex antecedenti operatione retenta fuisset.

21 Schol. 2. Quum adsunt plures *zeri* in fine unius, vel utriusque factoris, illis rejectis, ceteri numeri de more multiplicentur: deinde in fine producti tot scribantur *zeri*, quot ablati sunt: v. g.  $60000 \times 300$  duc 6 in 3, et producto 18 adijunge tot *zeros*, quot in utroque factore inveniuntur, et peracta est multiplicatio: productum erit 18000000. Hujusmodi operatio in fractionibus decimalibus sæpius occurrit, de quibus postea.

22 Schol. 3. Examen multiplicationis est divisio, de qua statim. Aliæ etiam regulæ pro examine adhiberi solent. 1. Est commutare factores; ita ut quem prius multiplicatorem habuisti, pro multiplicando accipias, et hunc pro multiplicatore: quod nihil est aliud quam iterare operationem: si idem productum eliceris, signum est, ritè multiplicationem institutam fuisse. 2. Fiat additio notarum multiplicandi, atque ex summa novenaria aut quavis ex numeris simplicibus, ut quinquenaria etc. detrahantur; residuum scribatur ad caput cru-

cis: Eadem operatio in multiplicatore iteranda est, cujus residuum è regione alterius collocandum est: deinde ducenda inter se residua, ex cujus producto pariter rejicienda novenaria, aut numerus pro arbitrio sumptus, et residuum scribendum super aliud latus crucis. Demum ex summa notarum producti novenaria pariter rejicienda; cujus residuum æquale debet esse alteri residuo ex multiplicandi, et multiplicatoris summa collecto. Exemplum.



Collige 1. summam multiplicandi  $1+2+3+4=10$ : detractis novenariis remanet 1: nam  $10-9=1$ . Scribe 1 supra extremitatem crucis. 2. Idem in multiplicatore perages  $5+6=11-9=2$ ; quod pariter scribe è regione primi residui. 3. Multiplica inter se ambo residua:  $2 \times 1=2$ : quum nullum adsit novenarium rejiciendum, scribe 2 ad aliam crucis extremitatem. Demum collige summam numerorum producti  $6+9+1+0+4=20$ , ex qua detractis novenariis remanent 2; quod scribe ad brachium crucis. Ut vides hæc duo residua conveniunt: igitur operatio ritè per-



acta est. Nonnumquam error subesse potest, quin detegatur hujusmodi novenariorum rejectione; v. gr. si error sit in uno aut pluribus novenariis in multiplicatione abjectis, vel adjectis, aut notæ perverso ordine scriberentur, aut unus vel plures *zeri* adjungerentur, seu omitterentur. Ceterum quum hic sit operantis error, non regulæ fallacia; et rarò hujusmodi errores in operationem irrepant: pro examine quatuor regularum ab auctoribus proponi solet hujusmodi methodus rejectionis novenariorum, aut alius numeri simplicis, ut 5, 4, etc.

## §. IV.

*Divisio.*

23 Defin. Numerum per numerum dividere, est quærere, quoties major minorem contineat. Ille dicitur *dividendus*, hic *divisor*: numerus inventus dicitur *quotus*, quia indicat, quoties unus alterum contineat. Signum divisionis esse solet linea interposita inter dividendum, et divisorem sic:  $\frac{8}{4} = 2$ , quod sic leges: octo divisa per quatuor, æqualia sunt duobus. Ab aliis duo puncta usurpantur:  $8:4 = 2$ .

24 Schol. 1. Quemadmodum de multiplicatione jam diximus esse compendium additionis; ita de divisione dici potest esse breviam subtractionem. Si velim scire, quoties 8 contineat 2, operosiore methodo subductionis demum assequer: nam  $8 - 2 = 6 - 2 = 4 - 2 = 2 - 2 = 0$ : quater iterata subductio ostendit

8 quater 2 continere. Pariter si quæram, quoties 8 contineat 3:  $8 - 3 = 5 - 3 = 2$ ; unde liquet 8 bis continere 3 cum residuo 2. Quod si quotus per divisorem multiplicetur, iterum restitui debet dividendus, minus residuo, si quod remansit in divisione: nam  $3 \times 2 = 6 \times 2 = 8$ . Sic enim toties ponitur divisor, quoties indicat quotus: ac demum adjuncto residuo, summa dividendi restitui debet.

25 Schol. 2. Productum ex duobus factoribus, si per alterutrum ex illis dividatur, alter factor emergere debet in quoto;  $5 \times 7 = 35$ , hoc productum divide per 5; quotus erit 7; quod si per hunc diviseris 35, quotus erit 5. Planum enim est, toties unum factorem in producto contineri, quoties indicat alter; hoc enim est unum numerum per alium multiplicare (17). Rursus si totum concipias in quemvis numerum partium divisum; v. g. 30 in partes, quarum quælibet  $= 6$ : si 30 per sex dividas, quotus indicabit magnitudinem unius partis, scilicet 5: ad proinde totum æquale erit producto ex una parte in numerum partium:  $6 \times 5 = 30$ .

26 Schol. 3. Frequenti divisionis praxi, magis quam ulla methodo invenitur quotus in quolibet divisionis membro. Abacus tamen identidem suppeditare potest quotum. Sit dividendus 82, divisor 9; quære 9 in columna abaci AC; 82 aut numerum proximè minorem in serie respondente; supernè invenies quotum  $= 9$ . Porro quotus nunquam major 9 scribi debet: valorem enim justo majorem assig-

naret, si vel unica unitate excederet; quum quælibet nota pro loco respondente non absolutum valorem, sed relativum denotet (9).

27 Probl. 1. *Numerum compositum per simplicem partiri.* Solutio.

Exempl. Dividendus 23, 6, 5, 6, (Quot. 5914.

Divisor	4
	20
	36
	36
	<hr style="width: 50%; margin: 0;"/> 00
	5
	4
	<hr style="width: 50%; margin: 0;"/> 16
	16
	<hr style="width: 50%; margin: 0;"/> 00

1. Sit dividendus 23656, divisor 4 scribatur sub prima nota ad sinistram, aut si hæc minor sit divisore sub secunda, ut in schemate vides. 2. Quærat, quoties divisor inveniatur in prima, aut in duabus primis notis: in 2 non potest inveniri divisor 4, quum major sit; itaque quære quoties in 23 reperitur: invenies 5, quod scriptum in quoto, multiplica per divisorem; et productum 20 subscribe sub duabus notis divisoris, à quibus subtrahe: remanent 3; scribe ut in subtractione. 3. Residuo invento, adijunge notam sequentem 6 dividendi, fiunt 36. Iterum quære, quoties divisor 4 invenitur in 36: et quotum 9 scribe post primam notam jam inventam in quoto: duc 4 in 9, ac productum 36, scriptum sub

notis, à quibus quotum extraxisti, subtrahe nihil remanet. 4. Aliam dividendi notam scribe subtus notas jam operationi subjectas, atque insiste ut prius: 5 quoties continet 4? semel: scribe 1 in quoto, et multiplica per divisorem 4; productum 4 subtrahe à 5; remanet 1, cui adde ultimam notam 6. Eadem methodo iteranda est operatio; invenies quotum 4, quem prius scriptum in quoto, duc in divisorem, et productum 16 scribe ut prius, subtrahendum à notis, è quibus quotum eliciisti; nihil remanet: itaque divisio explicet.

*Dem.* Hac methodo invenitur, quoties divisor in quolibet membro dividendi continetur: nempe in decadibus millenariorum, in centenariis, in decadibus, in unitatibus. Hoc autem est numerum per numerum dividere (23): igitur 4 in 23656 invenitur 5914ies. Scilicet in 20 decadibus millenariorum 5ies mille: in 36 decadibus millenariorum noviescentum: in 5 decadibus cum sex unitatibus 14ies.

28 Probl. 2. *Numerum compositum per alium compositum dividere.* Solut.

Exemplum. Sit dividendus 69, 1, 0, 4. (Quotus

Divisor	56	1234
	131	
	112	
	0190	
	168	
	0224	
	224	
	0	

Praxis eadem est pro numeris compositis, ac præcedens pro simplicibus tradita. Consultò enim in præcedenti problemate, ommissa methodo breviorè, omnes operationes prosequuti sumus, ut problemati 2 viam sterneremus. 1. Quære, quoties in primo membro 69 divisor invenitur? Semel: scribe igitur in quoto; deinde multiplica per divisorem; subtrahe; atque operatio primi membri peracta est. Numerum sequentem in dividendo adijunge residuo; iterum inquire quotum, scribe, multiplica, et sic deinceps.

29. Schol. 1. Si aliquot residuum post peractam divisionem remanet, scribatur post quotum, ac linea interjecta scribatur subtus divisor, v. g. si dividendus fuisset 69108, quotus esset  $1234 + \frac{4}{56}$ . Hæc *fractio* dicitur, cujus notionem postea dabimus. Nimirum remanent quatuor dividenda inter 56.

30. Schol. 2. Si dividendus, et divisor in fine parem numerum cyphrarum habent; illis neglectis, operatio instituitur cum numeris præcedentibus: v. g. sit dividendus 4600 per 500: dividantur 46 per 5  $= 9 + \frac{1}{5}$ . Pariter si in divisore tantum occurrant plures *zeri*, detrahi possunt ex dividendo tot notæ à dextris quot *zeri* inveniuntur in divisore; postea adjungatur in modum fractionis residuum cum detractis notis, et divisor, v. g. sit dividendus 63492 per 300: rejice duas ultimas notas 92: divide 634 per 3; quotus erit  $211 + \frac{192}{300}$ .

31. Schol. 3. Nonnumquam evenit, ut residuum unius membri cum nota adjuncta pro



sequenti membro minus sit divisore: tunc scripto in quoto *zero*, alia adjungitur nota ex dividendo, atque operatio instituitur de more.

32 Schol. 4. Si in multiplicatione quoti per divisorem inveneris productum majus membro dividendo, signum est, te assumpsisse quotum justo majorem; adeoque unitate saltem minuendus est, atque operatio iteranda. Evidens enim est, majorem à minori summa subduci non posse; et productum ex divisore in quotum debere esse æquale, aut minus, numquam majus dividendo. De hoc enim inquiratur quoties contineat divisorem; adeoque si productum ex quoto in divisorem esset majus dividendo, containeret partes se ipso majores: dant enim productum majus.

33 Schol. 5. Examen divisionis est multiplicatio divisoris per quotum. Nam planum est, restitui debere dividendum, positis suis factoribus. Quod factum vides in exemplo: ubi dividendus est ipsa summa multiplicationis superius allata num. 22; quod consultò fecimus, brevitati ac perspicuitati servientes.

## §. V.

### *Numeri complexi.*

34 Defin. Numeri complexi dicuntur, qui plures quantitatum species continent: v. g. Annus, dies, horas, minuta: hexapeda, pedes, pollices, lineas: circulus, gradus, minuta, minuta secunda, tertia etc. In his distinguuntur *species superiores et inferiores*. Species superiores di-

cuntur quæ alias continent: inferiores, quæ in ipsis continentur.

35 Probl. 1. *Speciem superiorem ad inferiorem reducere.* Solut. Multiplica superiorem per numerum indicantem quoties continet inferiorem. Producto invento, adde inferiorem speciem, si qua simul data fuerit: ex. g. dies 10 reducendi sint in horas, ac minuta: duc 10 in  $24 = 240 \times 60 = 14400$ . Quod si insuper addendæ essent 3 horæ cum 40 minutis; 240 addere debuisse 3: deindè ducere in  $60 = 14580$ .

36 Probl. 2. *Speciem inferiorem reducere ad superiorem.* Solut. Pro divisore accipe numerum indicantem quoties inferior in superiore continetur: per hunc dividatur species reducenda: quotus dabit speciem superiorem. Residuum, si quod sit, erit speciei inferioris: ex. g. 2464 pollices reducendi sint in hexapedas. 1. Divide per 12; tot enim pollices pedem efficiunt: quotus  $205 + \frac{4}{12}$  dabit pedes biscentum quinque cum quatuor pollicibus, qui sunt adhuc speciei inferioris, quum pedem æquare non possint. Deindè divide 205 per 6: quotus dabit  $34 + \frac{1}{6}$ . Productum totale erit 34 hex. 1. p. 4. pol.

37 Probl. 3 *Diversas species ejusdem generis addere.* Solutio.

Exempl. 2 pond. 4 lib. 5 unc.

8	6	10	10
4	20	9	

15 pond. 6 lib. 8 unc.

1. Numeri ejusdem speciei sibi subscriban-



multiplicata per 12, dat productum  $= 12$ , quoties species inferior continetur in superiori: 12 adjunguntur numero 10, ac deinde procedit subtractio. 4. Memineris tamen, unitate minuisse summam pedum, adeoque non jam 4, sed 3 ped. computare debere. Unde mutuata, ut prius hexapeda, emergunt 9 pedes, á quibus 5 subtrahendi. 5. Demum à 24 hex. nam unam ad pedes remissisti, subducuntur, 20 et supputatio explicat.

39 Probl. 5. *Multiplicare numeros complexos.*  
Solut. Multiplicentur seorsim species per datum multiplicatorem: deinde productum inferioris speciei reducatur ad superiorem (36), atque ipsi addatur. E. g. 10 hor. 25 minut. 40 secunda: multiplicata per 3  $= 30$  hor. 75 minut. 120 sec.: deinde facta reductione. 1 dies, 7 hor. 17 minut. 0 sec.

40 Probl. 6. *Numeros complexos dividere.*  
Solut. 1. Reducantur omnes especies dividendi, ad infimam. 2. Quæraturn quotus, qui ad species datas denuò est reducendus. Ex. g. 2 hex. 3 ped. 5 poll. dividendi sint per 8. Reductione ad pollicem facta, erunt 185. poll. divid. per  $8 = 23 \frac{1}{8} = 1$  ped. 11 pol.  $+\frac{1}{8}$  poll. Quum verò numerum complexum per complexum dividere aut multiplicare oportuerit, uterque ad species infimas est reducendus: tum operatio instituenda, ac demum ad species proprias restituendæ iterum sunt (36).

## CAPUT TERTIUM.

## FRACTIONES.

## §. I.

*Fractionum notio.*

41 **D**efin. Quum aliquot totum in plures partes æquales dividitur, earumque una aut plures sumuntur, hæ partes relatè ad totum *fractiones* dicuntur. Duobus numeris supernè, ac infernè positis, ac lineola separatis scribuntur: quorum superior *numerator*, inferior *denominator* appellatur. Primus indicat partes ex toto desumptas, secundus in quot partes divisum sit. Ex. g. tres horas unius diei rectè scribes  $\frac{3}{24}$ ; in tot enim horas dies dividitur, cuius tres partes sumuntur.

42 Theor. 1. Quando in fractione *numerator*, et *denominator* æquales sunt, *fractio unitati æqualis est*. 2. Quod si *numerator* minor sit *denominatore*, *fractio pariter minor est unitate*. 3. Quum verò major est, *valor fractionis unitatem superat*. Dem. 1. Si uterque numerus æqualis est, tot continet partes *numerator*, in quot totum divisum est: ergo ipsi æqualis est. 2. Pariter minore existente numero partium, pauciores etiam continet: ergo minor est. 3. Demum *numérateur* excedente, plures continet partes, atque in toto contineantur; adeòque ipsum superat. Hæc tamen propriè *fractio* non est, quum integrum contineat cum fractione:



cujus valor numeratore per denominatorem diviso facile innotescit: v. g.  $\frac{12}{4} = 3 + \frac{1}{4}$  et  $\frac{5}{3} = 1 + \frac{2}{3}$ .

43 Schol. I. Fractiones propriè considerari possunt velut divisio numeratoris per denominatorem. Undè valor fractionis, est quotiens numeratoris per denominatorem divisi. Quotus enim exponit rationem, seu proportionem primi ad secundum. Tunc verò numerator consideratur velut datus numerus integrorum; denominator autem indicat qualis illorum pars sumi debet. Ex. g. valor  $\frac{4}{8} = \frac{1}{2}$ : hic enim est quotus numeri 4 divisi per 8. Evidens autem est, 4 esse dimidium 8. Pariter quatuor octavæ unius uncix idem valet, ac quatuor unciarum octava pars. Nam  $\frac{4}{8} = \frac{1}{2}$ ; 4 uncix  $= \frac{32}{8}$ , cujus octava pars  $= \frac{4}{8}$ .

44 Lemmata. I. Quantitas tum in plures, tum in pauciores partes dividi potest. Jam verò si magnitudinem cujusvis partis consideremus, magnitudo partis eo major erit, quo ad pauciores partes redigitur: contra verò minuitur, dum numerus partium augetur. *Dem.* Sit ex. g. pes in pollices dividendus: partes erunt 12. Sit dividendus in lineas: partes erunt 144: atqui linea est pars duodecima pollicis; ergo minores partes evadunt, quoties numerus partium augetur: majores verò, dum minuitur.

II. Quantitas genericè sumpta, in æquales partes divisa, augetur, dum majores, et plures partes habet: minuitur, dum minores, et pauciores. Hoc axiomatis loco haberi debet; res enim per se nota est.

III. Quantitas in æquales partes divisa, si eo modo ejus partes minuuntur numero, quo magnitudine augentur; aut inversè, eo sensu magnitudine decrescunt, quo earum numerus augetur; invariata manet. *Dem.* Augmentum in uno sensu est decrementum in altero, et vicissim: ergo tantum variatur expressio, intacta manente quantitate. Ex. g. Eadem remanet uncia, vel in quartas, vel in octavas, vel in decimas sextas partes ipsam dividas.

IV. Quod si numerum partium minus augeas, quin pari sensu magnitudinem minuas, quantitatem minorem effecisti. *Dem.* Augmentum in numero, et decrementum in magnitudine, pari passu debent currere, ut æqualitas servetur (supra 3). Rursus quantitas minuitur, quum pauciores et minores habet partes (supra 2): hoc autem fit in casu figurato: igitur decrescit.

V. Si verò augeas numerum, qui magnitudinem minuas, vel decrementum non sit æquale, quantitatem augeas. *Dem.* Eadem ratione innititur, quum sit inversa propositio precedentis.

## LIB. SEPTIMUS. CAP. II.

### Fractionum valor.

45 Theor. 1. *Fractio eo majores partes continet, quo minor est denominator: crescente autem denominatore, minores partes evadunt: numerus verò partium major, vel minor quas fractio continet, provenit à numeratore.* *Dem.* 1. Denominator exprimit in quot partes quanti-

tas divisa sit: verum quo minor est denominator, majores partes evadunt; crescente autem numero partium, decrescit magnitudo (44 lem. 1). Quare à denominatore sumitur inversa magnitudo partium; majores si minor, minores si major sit. 2. Numerator exprimit quot partes quantitatis sumantur (41): ergo quum major est, plures continet; quum minor, minorem partium numerum.

46 Theor. 2. *Valor fractionis eo major est, quo numerator est major, et minor denominator; et versa vice eo minor, quo minor est numerator, major denominator.* Dem. Numerus partium à denominatore desumitur, et earum magnitudo inversè à denominatore: quare majore existente numero partium, et magnitudine, valor fractionis debet augeri. Contra verò decrescente numero, et magnitudine; pro augmento denominatoris, ac decremento numeratoris, valor minor fieri debet.

47. Theor. 3. *Quum numerator, et denominator fractionis per eundem numerum multiplicentur, aut dividuntur, ejus valor non mutatur.*

Dem. In hoc casu tantumdem augentur, aut minuuntur numerator, et denominator: valor igitur idem remanet; quamvis expressio valoris mutetur (44 lem. 3). Multiplica numeratorem,

ac denominatorem fractionis  $\frac{1}{2}$ : per 5 fiet  $\frac{1 \times 5}{2 \times 5}$

$\frac{5}{10} = \frac{1 \times 50}{2 \times 50} = \frac{50}{100} = \frac{1}{2}$  etc. Divide numerator,

ac denominatorem fractionis  $\frac{50}{100}$  per 5: fiet  $\frac{10}{20} = \frac{1}{2}$  etc.

48 Corol. 1. Hinc sequitur infinitas dari fractiones ejusdem valoris, quæ nonnisi expressione differunt. Quamvis autem diversis terminis exprimantur, eundem valorem continent, qui divisione, aut multiplicatione ad eandem expressionem reduci possunt. Praxis ejusmodi vocatur fractionum transformatio: de qua in sequenti paragrapho.

49 Corol. 2. Si valores diversarum fractionum inter se compares, ex dictis facile colliges. 1. Quum fractiones eundem numeratorem habent, earum valores esse inversè juxta diversitatem denominatorum: v. g.  $\frac{2}{3}$  et  $\frac{2}{4}$  sunt inter se ut 4 et 3: valor tamen ejus, quæ denominatorem habet minorem, est major; quæ vocatur ratio inversa, ut infra, ubi de proportionibus. 2. Existente eodem denominatore in utraque fractione, variantibus numeratoribus, ab his dignoscitur valor fractionis. Ex. gr.  $\frac{2}{4}$  et  $\frac{3}{4}$  erunt ut 2 et 3. 3. Demum quum diversi sunt tam numeratores, quam denominatores, eorum valores erunt ut quotientes: sic  $\frac{3}{6}$  et  $\frac{6}{18}$  ut  $\frac{1}{2}$  et  $\frac{1}{3}$ ; aut etiam ut numeratores provenientes facta reductione ad eandem denominationem, ut statim exponemus.

### §. III.

#### *Transformatio fractionum.*

50 Defin. Fractionem transformare est illam in aliam ejusdem valoris mutare. Quum verò plerumque, non ad libitum, quod per multiplicationem, aut divisionem per quemcumque numerum obtineri posset (per præc.), sed ad

datam expressionem fractio reduci debeat: tum opus est inquirere numerum, per quem uterque numerus exactè dividatur. Hic dicitur *communis* utriusque *mensura*; atque etiam pars *aliquota*. Numerus quem nullus exactè dividit, dicitur *primus*. Interdum nulla invenitur communis utriusque numeri mensura; quivis enim numerus præter unitatem, illos dividit cum aliquo residuo; tum hi dicuntur *inter se primi*; et quicumque alius divisor *pars aliquanta* horum numerorum. Numerus *multiplus* est, quem plures alii præter unitatem dividunt.

§ 1. Probl. 1. *Invenire mensuras cujusvis numeri, si vè factores illum componentes.* Solut. Si numerus est par, dividatur per 2: si verò sit impar, dividatur per numeros impares 3, 5, 7, etc. Non obtenta divisione, numerus est *primus*, quem sola unitas metitur: vocantur etiam *surdi* et *irracionales* hujusmodi numeri. Jam verò si divisio procedit, ulterius progredi oportet, tentando divisionem per 2, 3, 5, etc. donec quotus sit unitas. Possunt etiam divisores simplices inter se multiplicari, et habentur compositi. Ex. g. quæruntur divisores num. 60: fiat  $\frac{60}{2} = 30$ ;  $\frac{30}{2} = 15$ ;  $\frac{15}{3} = 5$ ;  $\frac{5}{5} = 1$ . Divisores simplices sunt 1, 2, 3, 5. Compositi è binis 4, 6, 10, 15. E ternis 12, 20, 30. Numerus autem 60 ex quaternis resultat.

§ 2. Probl. 2. *Invenire maximam communem mensuram duorum numerorum.* Sol. Dividatur major per minorem; ac neglectò quoto notetur residuum; tum per hoc residuum dividatur numerus minor, et neglectò quoto, notetur resi-



duum: per hoc porrò residuum dividatur residuum præcedens, et sic deinceps, donec sine ullo residuo fiat divisio, aut residuum sit unitas. Ultimus divisor, qui sine residuo exactè dividit præcedentem, est maxima communis utriusque mensura. Ex. g. Inquirenda sit maxima mensura numerorum 96, et 44: primum per secundum dividendo, quotiens est 2. Hoc neglecto, per residuum 8 divido 44: residuum est 4: demum 8 divido per quatuor, exacta est divisio. Igítur 4 est maxima communis utriusque mensura. Si postremum residuum sit unitas, numeri sunt inter se primi, nec alium communem divisorem præter unitatem habent (50). Hæc enim minima est omnium numerorum mensura. *Dem.* 4 exactè continetur in 8: ergo etiam in 44. Nam dividendus est æqualis producto ex divisore in quotum plus residuo. Quum autem residuum fiat divisor, si hic exactè continetur in producto, contineri etiam debet in dividendo. Sic  $96 = 44 \times 2 + 8$ : atqui per 8 divisa sunt 44; ergo utrumque numerum exactè dividit. Nullus autem alius major 4 illos exactè metitur; alias non processisset divisio usque ad illum: ergo 4 est maxima communis mensura.

53 Probl. 3. *Fractiones ad minimos terminos reducere.* Solut. Quæratnr maxima mensura numeratoris et denominatoris: per hanc dividatur uterque: quoti erunt nova fractio ejusdem valoris ac prima, et minimis terminis expressa. *Dem.* Valor est idem, nam per eundem numerum dividuntur tam numerator, quam

denominator (47). Est etiam minimis terminis expressa, quum nullus alius divisor major inveniri possit (præced.).

§4 Probl. 4. *Fractiones ad eundem denominatorem reducere.* Solut. Multiplicentur tam numerator, quam denominator cujusvis fractionis per productum denominatorum aliarum fractionum: nova producta erunt fractio quæsitæ. Ex. gr. sint  $\frac{2}{3}$ ,  $\frac{3}{4}$ ,  $\frac{4}{5}$  reducendæ ad eundem denominatorem: duc tam numeratorem 2, quam denominatorem 3, in productum  $4 \times 5 = 20$ : emergit nova fractio  $\frac{40}{60}$ , deinde  $\frac{3}{4}$  in  $3 \times 5 = 15$ : erit  $\frac{45}{60}$ , demum  $\frac{4}{5}$  in  $3 \times 4 = 12$ : erit  $\frac{48}{60}$ . *Dem.* Valor uniuscujusque fractionis non immutatur; nam per eundem numerum multiplicatur tam numerator, quam denominator (47): ergo eundem valorem retinentes, in denominatore conveniunt.

§5 Probl. 5. *Integrum ad fractionem ejusdem denominatoris cum alia fractione reducere: aut integrum cum fractione in unam transformare.* Solut. Sit v. g. 4 reducendus in fractionem ejusdem denominatoris cum  $\frac{3}{5}$ : integrum in modum fractionis dispone subscripta unitate pro denominatore  $\frac{4}{1}$ : deinde duc utrumque in denominatorem alterius: erit  $\frac{4 \times 5}{1 \times 5} = \frac{20}{5}$ , nova fractio ejusdem denominatoris ac  $\frac{3}{5}$ . Deindè si utramque velis ad novam fractionem reducere æqualis valoris atque aliæ duæ, numeratores adde, ac nova emerget fractio  $\frac{23}{5} = \frac{20}{5} + \frac{3}{5}$ . Sed hoc jam ad additionem pertinet.

## §. IV.

*Quatuor operationes in fractionibus.*

56 Probl. 1. *Fractiones addere.* Solut. Si ejusdem sint denominatoris, numeratores in unam summam colligendi sunt; eodem subscripto denominatore, ut in præcedenti exemplo. Si vero denominatores sint diversi, ad eundem denominatorem prius reducendi sunt (54): deinde numeratores addendi, subscripto communi denominatore, ut prius. Pariter si integri, cum fractis addendi sunt, seorsim colligantur integri, et seorsim fracti. Demonstratio eadem est ac in numeris integris.

57 Probl. 2. *Fractiones subtrahere.* Solut. Quando ejusdem sunt denominatoris, differentia inter utrumque numeratorem scribitur pro novo numeratore, denominatore retento. Quando diversi sunt denominatores, ad eundem conversis, operatio eadem est. Quod si ab integris subducendi sint fracti, scribantur integri ad modum fractionis ut n. 55. ex g.  $3 - \frac{1}{4} = \frac{12}{4} - \frac{1}{4} = \frac{11}{4}$ . Quid si ab integro cum fractione, major fractio detrahenda sit? Respondeo, brevius te expedies unitatem ab integro mutuando, atque fractionem augendo: v. g. a  $6 + \frac{1}{4}$  subducendi sint  $5 + \frac{3}{4}$ : reduc  $6 + \frac{1}{4}$  ad  $5 + \frac{5}{4}$ , á quibus subtrahe  $5 + \frac{3}{4} = \frac{2}{4}$ .

58 Probl. 3. *Fractiones multiplicare.* Solut. Ducantur numeratores, et productum erit numerator novæ fractionis; eodem modo fit cum denominatoribus, et productum dat novum

denominatorem: ex. gr.  $\frac{2}{4} \times \frac{3}{4} = \frac{6}{12}$ . *Dem.* Multiplicare est toties sumere multiplicandum, quoties indicat multiplicator (17): quare multiplicare  $\frac{2}{3}$  per  $\frac{3}{4}$ , est ter sumere quartam partem duarum tertiarum. Quærenda igitur primum est quarta pars duarum tertiarum: hoc autem fit ducendo 3 in 4, ut fiat  $\frac{2}{12}$ . Nam 8 sunt duæ tertiæ 12, et 2, quarta pars 8. Deindè ducendo numeratores  $2 \times 3$ , ter sumitur 2, quarta pars 8: ergo factum est quod petebatur.

59 Corol. Manifestè deducitur ex hac demonstratione, productum in fractionibus minus esse factoribus: contra atque in integris evenit. Nam quum numerator in factoribus minor sit denominatore, per multiplicationem minus augetur numerator, quam denominator; ac proindè minus augetur ejus partium numerus: unde minus augetur numerus quam magnitudo minuatur (44 lem. 5); quod est fractionem minuire. Manifestius id fiet in multiplicatione fractionis per integrum. Nam si  $\frac{2}{3}$  in 3, aut 4 duceres,  $\frac{6}{3}$ , aut  $\frac{8}{3}$  prodirent. Multiplicatio enim sic procederet  $\frac{2}{3} \times \frac{3}{1} = \frac{6}{3}$ : aut ducendo in quatuor  $\frac{2}{3} \times \frac{4}{1} = \frac{8}{3}$  (55). In hac multiplicatione augetur numerus, retenta magnitudine partium: crescere igitur debet valor (46) ter aut quater. In alia verò magnitudo decrescit quater: igitur quater minor esse debet magnitudo partium, quin quater augeatur numerus, sed tantum bis. Hoc autem fusiore calamo ideò explicavimus, quia tironibus nimium quantum negotium facessit praxis hujus problematis, autumantes paradoxon pro veritate ipsis intrudi.

60 Schol. Quum factores sunt integri cum fractis, prius reducuntur integri ad fractionem ut supra; deinde operatio procedit, ut in problemate numeri præcedentis.

61 Probl. 4. *Fractiones dividere.* Solut. Divisio est operatio inversa multiplicationis. Undè si in multiplicatione numeratores, et denominatores invicem ducuntur, in divisione debent inversè multiplicari. Numerator igitur dividendi multiplicetur per denominatorem divisoris, et productum statuatur numerator novæ fractionis: tum denominator dividendi multiplicetur per numeratorem divisoris; et productum fiat novæ fractionis denominator, quæ erit quotus quæsitus: id quod ex eo apparet, quod nova fractio multiplicata per divisorem exhibet dividendum. En exemplum: ut  $\frac{3}{4}$  per  $\frac{2}{3}$  dividas, duc 3 in 3, et 4 in 2; erit  $\frac{6}{8}$  quotus quæsitus. *Dem.* Dividere est inquirere, quoties dividendus contineat divisorem: quod in casu figurato est investigare quoties  $\frac{3}{4}$  contineant  $\frac{2}{3}$ . Reducantur igitur ad eundem denominatorem: erunt novæ fractiones  $\frac{9}{12}$  et  $\frac{8}{12}$ : 9 continet semel 8, plus unitate: igitur quotus  $= 1 + \frac{1}{8}$ . Rursus  $\frac{2}{8} = 1 + \frac{1}{8}$ . Quotus igitur adamussim extrahitur, factores decussatim ducendo. Quod jam de multiplicatione animadversum est, productum minus esse factoribus; inverso modo ad divisionem est transferendum, scilicet quotum majorem esse dividendo: quod non minus paradoxon videtur, quam primum. Percepta autem demonstratione præcedentis problematis, ex ejus veritate veritas hujus manifestè eruitur.



Nam numerator dividendi multiplicatur per denominatorem divisoris, qui major est suo numeratore; et hic pariter multiplicatur per alterius denominatorem: ergo crescit numerator quoti, magis quam augeatur ejus denominator; valor igitur debet augeri (46). Quando occurrat integer cum fracto dividendus per fractionem, aut per integrum cum fracto; prius ad unam fractionem dividendus reducendus est, et similiter divisor (55); postea operandum ut supra.

62 Probl. 5. *Fractionem speciei superioris ad inferiorem reducere; sive illius valorem invenire.* Solut. Multiplica numeratorem per numerum indicantem quoties inferior continetur in superiore; deinde productum divide per denominatorem datæ fractionis: ex. g. sint datæ  $\frac{3}{4}$  unius pedis, cujus valor examinari debeat. Species proximè inferior pedis est pollex, qui 12es continetur in pede. Duc  $3 \times 12 = 36$ : divide per  $4 = 9$ . Igitur  $\frac{3}{4}$  ped.  $= 9$  pollicibus.

### §. V.

#### *Fractiones decimales.*

63 Defin. Fractio decimalis ea dicitur, cujus denominator est 10, 100, 1000 etc. Methodus fractiones decimales scribendi ea invaluit, ut omissis denominatoribus, numeratores scribantur, præfixis integris, si qui sunt, virgula interjecta, aut puncto. Sic ut scribas  $2 + \frac{35}{100}$ , signabis 2, 35. Integris deficientibus, cyphra scribitur loco integrorum: ex. g.  $\frac{289}{1000}$  ita exprimes: 0, 289; vulgò jam intelligitur denomi-

natores esse unitatem tot cyphris auctam, quot notas continet numerator. Quod si in numeratore partes decimæ desiderentur, replentur cyphris notæ deficientes, ut denominator discerni possit. Sic 0, 006 expriment  $\frac{6}{1000}$ . Diverso modo scribendi decimales nonnulli utuntur: ex g.  $\frac{5}{10}$  sic expriment  $5.0 : \frac{27}{100} = 37.00$ .  $\frac{304}{1000} = 304.000$ . Usitatio tamen methodus ea est, quam prius tradidimus.

64 Corol. 1. Fractionum decimalium utilitas præcipua est ad obtinendum quotum proximè verum, quando peracta divisione, aliquod residuum in quoto superest: ex. g. diviso 147475 per 362, quotus invenitur  $407 + \frac{141}{362}$ . Numeratori addatur 0; et 1410 per denominatorem 362 diviso, quotus erit 3 cum residuo 324. Iterum 0 adjuncto, dividatur 3240, ut supra; quotus erit 8 cum residuo 344. Operatione ut prius iterata, novus quotus emergit 9 cum residuo 182, et sic deinceps. Planum est quotum usque ad tertiam divisionem, scilicet  $407, 389$  captu commodiorem esse altero  $407, \frac{141}{362}$ . Posset etiam institui divisio adjectis tot cyphris, quot decimales extrahere oportet; eodem enim recidit praxis, utrolibet modo opereris: ex. g. loco 1410, scribe 141000, ac divisionem institue, ut supra: quotus erit idem 389, qui integris adjunctus dat 407, 389 ut prius neglecto residuo 182.

65 Corol. 2. Eadem erit methodus, ut fractionem vulgarem in decimalem convertas. Numeratori addantur tot cyphræ, quot volueris; deindè dividatur per denominatorem: quotus

erit decimalis quæsitæ: ex. g. ut  $\frac{3}{4}$  ad decimales transferas, numeratorem multiplica per 100 = 300: deinde divide per 4; quotus erit  $\frac{75}{100}$ , aut 0, 75 =  $\frac{3}{4}$ : nam 100 dividendo per 4, quotus est 25: proinde 75 sunt tres quartæ partes centenarii. Animadvertendum tamen, plerumque non exactè dividi posse numeratorem, utcumque cyphræ adjungantur: valor tamen propius accedet ad verum, quo pluribus cyphris augebitur; quod numero superiore ostensum jam est.

66 Schol. 1. Per augmentum prædictum cyphrarum, nullus fractionibus valor accrescit. Nam pari passu currunt incrementum numeratoris, ac denominatoris; adeoque valor retinetur (47). Si enim numeratori adduntur duæ cyphræ, aut quatuor; intelliguntur pariter adjunctæ denominatori: v. g. 2, 4 = 2, 40 = 2, 400 = 2, 4000. Idem enim est in casu, ac multiplicare utrum per 10, 100, 1000 etc.

67 Schol. 2. In fractionibus decimalibus solent partes nimium parvæ negligi; ex. g. 4, 364, si velis ad centesimas reducere, neglectis millesimis, debes ultimam notam 4 adjicere. Ut autem rectius procedas in figurato casu, quia 36 excedit quinarium, melius scribes 4, 37; quam 4, 36: secus autem si quinarium non superant. Ratio est quia tunc magis accedit ad justum valorem, aut minus abludit ab ipso. Evidens enim est ultra quinarium incipere excessum magis aproximari decenario, quam ab ipso recedere; secus est in numeris infra quinarium.

68 Probl. 1. *Fractiones decimales addere, vel subducere.* Solut. Operatio eadem est atque in integris.

Exempl. Additio  $4, 345$  Sub.  $4, 3509$   
 $0, 2$   $2, 4623$   
 $28, 75$   $1, 8886$

Notandum tamen, ut acuratè quilibet numerus integer, et fractus sub sibi respondente serie scribatur: integri sub integris, decimæ infra decimas, centenaria sub centenariis etc.; aliter valor minueretur, aut cresceret in summa, prout error in scribendo contingeret. In secunda linea additionis scriptum vides  $0, 2$ ; quæ decimalis respondet  $\frac{2}{10}$  63: idcirco sub decimis collocari debuit.

69 Probl. 2. *Fractiones decimales multiplicare.* Solut. Duc inter se omnes notas, perinde atque in integris fit. Deindè in producto tot decimales notandæ sunt, quot erant in utroque factore: ex. g.  $4, 25 \times 2, 34 = 9, 9450$ . *Dem.* Exprimantur valores ad modum fractionis vulgaris, erunt  $\frac{425}{100} \times \frac{234}{100} = \frac{99450}{10000} = 9, \frac{9450}{10000}$  (58).

70 Probl. 3. *Fractiones decimales dividere.* Solut. Divisio fiat more integrorum; deinde in quoto tot resecabuntur notæ à dextris, quot dividendus superabat divisorem. Ut divides  $9, 9450$  per  $4, 25$  more vulgari quotus erit  $234$ ; duobus autem notis dividendus superat divisorem: has itaque separa ad dextram virgula, ut fiat decimalis: erit  $2, 34$  quotus quæsitus. *Dem.* Hæc operatio est contraria præcedentis. Quum

verò in multiplicatione productum debeat continere tot notas decimales, quot in utroque factore inveniuntur, in divisione debent detrahi. Nam divisio per unum ex factoribus, dat quotum alterum factorem (25): ergo quum in dividendo inveniuntur decimales utriusque factoris, in divisione emergere debent notæ, quibus alter alterum superabat.

71 Schol. Nonnumquam integer per decimalem occurret dividendus; aut minor fractio per maiorem scilicet paucioribus notis expressa. Tunc addantur integro, aut fractioni minori, tot cyphræ, quot opus fuerit ut superet divisorem; atque operatio de more instituat. Sic ut 3 divides per 0, 25 fiat 300, dividendus per 25: quotus erit 12, quod brevius exprimeres  $\frac{300}{25} = 12$ .

72 Probl. 4. *Fractionem decimalem ad vulgarem traducere.* Solut. Multiplicetur decimalis per datum denominatorem; productum reiectis notis decimalibus, erit saltem proximè numerator, cui subscribatur denominator prædictus: ex. g. 0, 50 pedis, sive  $\frac{50}{100}$  pedis etc., debeant ad mensuram notam pedis reduci:  $50 \times 12 = \frac{600}{12} = \frac{6}{12} = \frac{1}{2}$ . Dem. Hic quæritur expressio adæquans verum valorem decimalis: evidens autem est 50 esse dimidium 100: igitur expressio  $\frac{6}{12}$  æqualis  $\frac{50}{100}$ . Cave autem credas, expressionem  $\frac{600}{12}$  continere sexcentas duodecimas partes pedis: continet enim, sive æquivalet huic valori  $\frac{600}{1200} = \frac{6}{12} = \frac{1}{2}$ .



---

# TRACTATUS II.

## ARITHMETICASPECIOSA, SIVE LITTERALIS, ALGEBRA VULGO NUNCUPATA.

---

### CAPUT PRIMUM.

#### *Notiones præviæ.*

73 **D**efin. I. *Algebra* est scientia quantitatis signis litteralibus expressa, quorum significatio à signis non determinatur. Jam usus obtinuit quantitates notas primis alphabeti litteris, ignotas postremis designare.

*Annotatio historica.* Diophantes primis æræ christianæ sæculis plurima ad analysim pertinentia in suis quæstionibus arithmeticis usurpavit. Non leve hoc fundamentum est apud Græcos. Diophantis ætate, jam notam fuisse *algebram*, à quibus Arabes hanc scientiam postea exceperint. Nonnullis tamen placet Arabes hujus inventionis auctores facere, antequam Græcis innotesceret. Quod verò apud omnes convenit, est, Arabes notis vulgaribus ab ipsis inventis, sive ab Indis mutuatis, quod aliis placet, in calculo usos fuisse. Franciscus Vieta Gallus; anno 1590, primus alphabeti litteras ad quantitates exprimendas invexit, eo successu,

ut ferè jam nullus ad Mathesim tractandam accedat, qui Vietæ vestigiis non insistat. Quibus verò hujusmodi ars Ægyptianis hieroglyphicis intricatior videtur, hi pari jure musicas notas inter Isidis, et Osiridis arcana collocent, necesse est. Sanè benè perceptis algebrae fundamentis, reliqua non majorem difficultatem habent, quam si arabicis notis pertractarentur. Quare præcipua nobis cura erit prænotiones algebraicas, quam dilucidè explanare, ut tiro-num mens ideas, ac distinctas concipiat, quibus, veluti face prælucente, tuto pede ad penitiora analysis arcana ingrediatur.

. 74 Defin. 2. *Terminus algebricus* est una, aut plures litteræ collectæ, sine ullo signo + aut — conjunctæ. Ex. g.  $a, b, ab, abc$ . *Termini positivi* sunt, quos præcedit signum +. Negativi, quos signum subtractionis — antecedit. Quum verò nullo signo afficiuntur, intelligitur habere signum positivum, ut plerumque initio fit. *Termini* similes dicuntur, qui iisdem litteris designantur: ut  $ab + 2ab + abc$ , primi termini sunt similes, tertius dissimilis.

. 75 Schol. *Quantitates oppositæ*, positivæ scilicet, et negativæ, sunt quantitates homogeneæ, quæ ita sibi opponuntur, ut una minuat alteram. Fac ex. g. te versus orientem centum passus fecisse, deindè verò, quoniam iter agere debuisses in occidentem partem, retrò per eandem viam 50 passus facere. Certum est, te 150 passus emensum, summa tamen itineris erit  $100 - 50 = 50$ . *Quantitas motus positiva* est: itineris tamen facti summa, partim positiva, partim negativa.

tim negativa. Hoc exemplo, autumo, terriculamentum quantitatis positivæ, et negativæ evanescet.

76 Defin. 3. *Terminus incomplexus*, sive *monomius* est quantitas solitaria, nulli alteri signo + aut — conjuncta; ex. g.  $a$ ,  $ab$ ,  $abc$ . *Complexus*, sive *polynomius* est quantitas pluribus terminis constans, signis interpositis: ut  $ab+abc-bc$ . *Binomia* dici solet quum duobus terminis constat; *trinomia*, *quadrinomia* etc. à numero terminorum componentium integram summam.

77 Nonnumquam in polynomiis post terminum positivum occurrunt plures negativi. Cave intelligas secundum negativum minuere primum: ex. g.  $20-5-3$  non denotat quantitatem 20 minuendam esse  $5-3$ , attamen 8 à 20 auferri debere. Pariter  $20-5+3$  indicat non tota quantitate 5, sed solum 2 minuendam esse: quare  $20-5-3=12$ : at  $20-5+3=18$ . Præsens canon claritatis gratia in numeris propositus ad quantitates litterales est transferendus. Nam  $a-b-c-d$  idem valet atque  $a$  minuta quantitatibus  $b, c, d$ . Pariter  $a+b-c+d$  tantum minuitur quantitate  $c$ : augetur autem  $b$  et  $d$ .

78 Defin. 4. Numerus, qui litteris præfigitur, earundem *coefficientens* dicitur. Hic autem indicat quoties eà quantitas sumenda est: ex. g.  $3a+2ab-6bc$ : denotat primam ter, secundam bis sumendas esse; minuendas tamen sexies quantitate  $bc$ .

79 Defin. 5. Numerus supernè litteris ad-

scriptus dicitur *exponens*. Denotat autem quantitatem multiplicatam per se ipsam bis, ter, quater etc. Sic  $a^2$  indicat  $a$  per se ipsam esse multiplicandam, sive productum  $a \times a = aa$ , sive  $a^2$ ; similiter  $b^3$  significat  $b \times b \times b = bbb$ , sive  $b^3$ . Animadvertendum tamen, non idem esse  $3b$ , atque  $b^3$ . Nam primum equivaleat additioni, secundum multiplicationi:  $3b = b + b + b$ . Quando verò scribitur  $b^3$  indicat productum  $b \times b \times b$ . Fac  $b = 3$ ; erit  $3b = 9$ ; in altero autem casu  $b^3 = 27$ . Nam  $3 + 3 + 3 = 9$ ;  $3 \times 3 \times 3 = 9 \times 3 = 27$ . Quando autem nullo exponente litteræ scribuntur, earum exponens est unitas, ut in coefficientibus  $a^1 = a$ .

Sæpè invenies scriptas quantitates parenthesi inclusas, aut linea supernè ducta notatas: ex. g.  $(a + b - c)(a + b)$ , aut  $a + b - c \times b$   $a + b$ : intellige notam primam quantitatem per secundam multiplicandam esse. His benè perceptis, reliqua planiora evadent.

## CAPUT SECUNDUM.

### *Operationes Arithmeticae in litteris.*

#### §. I.

#### *Additio, et Subductio.*

80 **P**robl. 1. *Quantitates litterales addere.*  
 Solut. Hoc fit quantitatum, sive terminorum conjunctione: ex. g. ut addas terminos,  $a$ ,  $ab$ ,  $bc$ , scribe  $a + ab + bc$ . Male autem scriberes

$aabbc$ , aut  $aab+bc$ . Jam enim monimus in his quantitatibus nullo signo conjunctis productum contineri, non summam. Demonstratio eadem est atque in numeris.

81 Schol. Si quantitates similes coefficientes habeant, eorum summa colligitur, atque in unum terminum coalescunt: ut  $2a+3a=5a$ ; compendii enim causa sic reducuntur. Pariter  $-ab-3ab=-4ab$ .

82 Probl. 2. *Quantitates litterales subducere.* Solut. Ut quantitates algebricas subducas, satis est in quantitate subtrahenda mutare signa in opposita, ipsam jungendo cum minuenda: ex. g. sit  $ab$  subducenda ex  $bc$ : erit  $bc-ab$ .

*Dem.* Quantitas à quantitate subducitur, quum à minuendo ea detrahitur: hoc autem fit in mutatione signorum subducendi; nam quantitas, quæ erat positiva, ipsi adscribitur ut negativa, aut contra; quare quantitas positiva subducitur, si sumatur negativè; negativa verò, eam convertendo in positivam. Quod si termini subducendi coalescant ex positivis, et negativis, ut si minuendus sit  $a+b$ , et subducendus  $c-d$ , residuum erit  $a+b-c+d$ . Nam à quantitate  $a+b$  non tollitur totum  $c$ , sed tantum pars, quæ non sit  $d$ : undè in residuo manere debet pars  $d$ . Exemplum in numeris.

$$\text{Min.} \quad 1+0-1-2-3$$

$$\text{Subtr.} \quad 1+1+1+1+1$$

---


$$\text{Res.} \quad 0-1-2-3-4$$

In minuendo una est quantitas positiva, sex negativæ: nimirum quinque negativæ, quum



positiva à negativa absorbeatur. Ab his quinque negativis quinque aliæ positivæ detrahi debent; quod fieri non potest, nisi augendo totidem negativis summam residui. In hac igitur decem negativæ inveniri debent, ut vides.

83 Corol. 1. Quando occurrunt termini similes in minuendo, et subducendo, delentur: ex. g.  $a - a$ ,  $ab - ab$ ; planum est, hujusmodi quantitates in summa esse superfluas. Quapropter operatione peracta, fit reductio terminorum, delendo, qui se invicem conficiunt; quod ad omnes algebraicas operationes extendendum est. Ex g.  $a - 2a + 4a - bc + 2bc$ , facta reductione scribitur:  $3a + bc$ .

84 Corol. 2. Coefficientes in subtractione algebraica tractantur, ut in numeris arabicis: ex. g. sit  $6a$  in minuendo, et in subtrahendo  $4a$ : scribe differentiam coefficientium  $= 2a$ .

## §. II.

### *Multiplicatio.*

85 Probl. *Quantitates terminis algebraicis expressas multiplicare.* Solut. Praxis eadem est ac in numeris. Quælibet quantitas multiplicatoris per omnes multiplicandi terminos multiplicatur, ac productum scribitur, postea in summam redigendum. Sic  $a$  multiplicandum per  $b$  dat productum  $ab$ : ita enim productum algebraicum scribitur; multiplicatum per  $bc$  dat productum  $abc$  etc. Unica occurrit differentia in signis: nam positiva dant productum positivum; negativum, et positivum dant negati-

vum: negativa autem dant positivum.

Exempl. Mult.  $3a+ab+bc-b$

Multiplicator.  $2a-b$

$$\begin{array}{r} 6aa+2aab+2abc-2ab \\ -3ab-abb-bbc+bb \\ \hline \end{array}$$

Productum

facta reductione  $6aa+2aab-5ab-abb+2abc-bbc+bb.$

*Dem.* Eadem est ac in numeris, quatenus producta factorum respicit. Difficultas maxima, quæ crux tironum dici potest occurrit in signis. Et 1. quod plus in plus det productum+, nihil negotii facessit. 2. Quod autem plus in minus ductum, det productum—, sic ostenditur. Quantitatem positivam per negativam multiplicare, est eam toties sumere, sivè addere, quot indicat altera; altera autem indicat subtrahendam, quum—signum sit subductionis: quare productum debet esse negativum; nam additio negativa est vera subtractio. Productum igitur debet esse negativum.

3. Caput difficultatis indè emergit, quod  $- \times - = +$ . Memini plus centies auditoribus demonstrasse hanc veritatem, quin demonstrationibus acquiescerent, aut quod idem est, eas dilucidè perciperent. Nonnumquam fulgore veritatis repente illustrati, cedebant; postea verò ad ingenium redibant, novis difficultatibus obtenebrati. Quamobrem, qua potero, maxima perspicuitate, ac brevitate me expediam. Quantitatem negativam per negativam multiplicare,

est eam toties sumere, sive addere, quoties indicat altera: altera autem indicat subtrahendam, quum signum — sit subductionis: quare productum debet esse positivum; nam quantitas negativa subducitur, eam convertendo in positivam: quantitatem igitur negativam per negativam multiplicare, est illam positivè ponere, aut sumere. Ergo  $- \times - = +$ . Vide dicta art. 82.

86 Schol. 1. Si quantitates affectæ sint coefficientibus, hi ducantur inter se, ac productum pro novo coefficiente scribatur in producto: ut in exemplo  $3a \times 2a = 6a$ .

87 Schol. 2. Si autem exponentes occurrant in litteris similibus, sumatur utriusque exponentis summa, eaque scribatur in producto: sic  $a^2 \times a^3 = a^5$ . Productum enim  $aa \times aaa = aaaaa$  (79).

### §. III.

#### Divisio.

88 Lemma. In partitione algebrica in dividendo delentur litteræ communes dividendo ac divisorì; seu quæ utrobique reperiuntur: residuæ sunt quotus. Sit

$\frac{ab}{b}$ ; hoc est  $ab$  dividendus,  $b$  divisor: quotus erit  $a$ .

Dem. Si factum dividitur per factorem unum, quotus est alter factor (25): at in partitione algebrica litteræ sunt factores, ex quibus emergit productum; diviso igitur facto per quasli-

bet ex litteris, quotus erit altera pars permanens, deletis utrobique communibus. Fac  $a$  esse  $\equiv 5$ ,  $b$  autem  $\equiv 10$ , erit  $ab$ , scilicet productum  $a \times b \equiv 50$ . Divide  $\frac{50}{10} \equiv 5$ .

Ergo  $\frac{ab}{b} \equiv a \equiv 5$ .

89 Probl. 1. *Quantitates incomplexas dividere per incomplexas.* Solut. Deleantur litteræ communes; reliquæ erunt quotus (per præc). Coefficientes autem, si qui sunt, et dividi possunt, tractentur ut in divisione numerorum. Signa mutantur ut in multiplicatione; similia dant quotum positivum, diversa negativum.

Ex. g.  $\frac{8abc}{2bc} = 4a$ . Pariter  $\frac{-bdb}{3d} = -2b$ : et  $\frac{-4abc}{-2ac} = +2b$ . Dem. Divisor ductus in quotum restituit dividendum: ducatur  $2bc \times 4a = 8abc$ : similiter  $3d \times -2b = -6bd$  demum  $-2ac \times +2b = 4abc$ .

90 Probl. 2. *Quantitates litterales complexas dividere.* Solut. Eodem modo tractantur litteræ ut in probl. præc. Divisio autem procedet ut in numeris, incipiendo à primo membro, quotum extrahendo, multiplicando per divisorem, subducendo: residuum iterum tractando, donec nullum supersit operationi subjiciendum.

Exempl. Divid.  $aa - ac + ab - bc$  (Quotus  $a - b$ )

Divisor.  $a + b$

Prod. quoti  $a$  in div.  $aa + ab$

Alterum mem.  $-ac - bc$

Divisor  $a + b$

Prod. quoti  $c$  in div.  $-ac - bc$

91 Schol. 1. Quemadmodum in multiplicatione exponentes adduntur, ita in divisione debent subtrahi, et residuum præbet exponentem quoti. Sic  $\frac{a^4}{a^2} = a^2$ . Idem enim exprimit,

$$\text{ac } \frac{aaaa}{aa} = aa = a^2.$$

92 Schol. 2. Quod si æquales sint exponentes, evanescunt, et valor quantitatis æqualis fit unitati. Sic  $\frac{a^2}{a^2} = a^2 - 2 = a^0 = 1$ . Fac  $a = 10$ : erit  $aa$  sive  $a^2 = 100$ . Jam si  $\frac{100}{100} = 1$ : valor igitur hujus quoti  $\frac{a^2}{a^2} = a^0 = 1$ .

93 Schol. 3. Si autem contigerit, exponentem divisoris majorem esse altero dividendi, exponens quoti erit negativus:  $\frac{a^2 - 2}{a^4} = a$ . Nam  $2 - 4 = -2$ . Quantitas verò exponente negativo affecta, veluti  $a^{-2}$ , valorem habet æqualem fractioni cujus numerator est unitas, denominator verò ipse exponens signo positivo affectus. Unde valor  $a^{-2} = \frac{1}{a^2}$ . Nam valor  $a^{-2} = a^{2-2} = a^0 = 1$ . Jam si  $\frac{a^0}{a^2} = \frac{1}{a^2}$ .

#### §. IV.

#### *Fractiones litteris expressæ.*

94 Defin. Fractio litteris expressa est quantitas à numeratore indicata, dividenda per de-



nominatorem. Undè quum divisio unius quantitatis per aliam prodere non potest; tunc ad modum fractionis scribitur. Ita  $\frac{a}{b}$  denotat quantitatem  $a$  dividendam per  $b$ , cujus quotus indicari non potest his litteris. Hoc pariter notavimus in fractionibus vulgaribus, à quibus desumendæ sunt regulæ pro fractionibus algebraicis.

95 Probl. 1. *Fractiones algebraicas ad eundem denominatorem revocare.* Solut. Multiplicentur tam numerator quam denominator cujusvis fractionis per productum denominatorum aliarum fractionum; nova producta erunt fractio quæsita (§4). Sint  $\frac{a}{b}$ ,  $\frac{c}{d}$  ad eundem denominatorem reducendæ; erunt  $\frac{ad}{bd}$ ,  $\frac{bc}{bd}$  novæ fractiones ejusdem denominatoris, et valoris ac primæ.

96 Probl. 2. *Fractiones algebraicas addere, aut subducere.* Solut. Ad eundem denominatorem (per præc.) quum reduceris, unam alteri signo additionis conjunge, si addendæ sint; aut subductionis, si subtrahendæ; subscripto communi denominatore. Sic in primo exemplo  $\frac{ad+bc}{bd}$  erit additio:  $\frac{ad-bc}{bd}$  erit subtractio.

97 Probl. 3. *Fractiones algebraicas multiplicare.* Solut. Ducantur invicem numeratores, et denominatores, producta dabunt fractionem quæsitam; sic  $\frac{a}{b} + \frac{c}{d} = \frac{ad+bc}{bd}$ .

98 Probl. 4. *Fractiones algebraicas dividere.*

Solut. Ducatur numerator dividendi in denominatorem divisoris; tum denominator in numeratorem. Primum productum erit numerator quoti; alterum denominator. *Dem.* Multiplicetur enim nova, quæ sic prodit, fractio per divisorem: clarum est proditurum esse dividendum: hoc ipsum in fractionibus vulgaribus supra art. 61 ostensum abundè manet.

### CAPUT III.

#### *Æquationes primi gradus.*

##### §. I.

##### *Prænotiones.*

99 **L**imina jam analysis attigimus, quam humani ingenii apicem jure meritò appellat Wolfius. Ea sanè est analysis mira inventio, ut vix quidquam ab humano intellecto felicius, utilius, atque elegantius excogitandum umquam concipi possit. Duplici methodo veritas aliqua inveniri potest, compositionis scilicet, et resolutionis: primam synthesim, secundam analysisim appellant. Utriusque frequens usus in mathesi: nam in geometria elementari synthesim, analysisim in sublimiori passim adhibemus. Quum ab una veritate cognita ad aliam gradum facimus, quasi à fundamentis ædificantes, synthesi utimur: dum verò quantitatem resolvimus, veluti partes segregando, analytica methodus dicitur, in qua ope æquationis veritas invenitur.

100. Defin. *Æquatio* est duplex ejusdem quantitatis expressio, quarum una alteri substituitur, ad detegendam quantitatem incognitam, sub alia expresione latentem. Hinc membra æquationis dicuntur expressiones signo æqualitatis conjunctæ: sic  $8 = 6 + 2$ , sunt membra hujusce æquationis: sinistri autem termini primum, dextri verò secundum æquationis membrum dicuntur.

101. Schol. 1. Ariadnes filo ad resolvenda problemata opus est; ne veluti in labyrintho Cretico errantes, nullum finem resolutioni imponamus. Hujusmodi fila sunt conditiones aliquæ, nexum cum quantitate incognita habentes. Hæ conditiones numeris, litteris, et signis exprimuntur; quibus positis, problematis *denominatio* fieri dicitur. Indè ex conditionibus, quippè inter ipsas, et incognitas, connexio intercedat, necesse est; veritas, sive *æquatio* eruitur, expressionum permutatione. Porro quum litteræ quantitatem incognitam exprimentes, nullo affectæ sunt exponente, æquationes primi gradus dicuntur; habent enim pro exponente unitatem: ex. gr.  $3y + a = b - 2y$ . Quando verò eo devenitur, ut in uno membro cognitæ, in altero incognitæ reperiuntur, operatio explicit: jam enim valor incognitæ elucet; ut in præjacto exemplo  $y = \frac{b-a}{5}$ .

102. Schol. 2. Problemata alia sunt determinata, in quibus tot conditiones sunt, quot incognitæ: alia indeterminata, quæ plures continent incognitas, quam conditiones. Problema

determinatum primi gradus unicam solutionem admittit; indeterminatum plures. Axiomata, quibus  $\alpha$ quationes innituntur, sunt sequentia.

1. Si  $\alpha$ qualibus addas  $\alpha$ qualia, summæ etiam erunt  $\alpha$ quales. 2. Si  $\alpha$ qualibus demas  $\alpha$ qualia, residua, sive differentia, remanent  $\alpha$ quales. 3.  $\mathcal{A}$ qualia per  $\alpha$ qualia multiplicata, aut divisa, dant producta  $\alpha$ qualia, aut  $\alpha$ quales quotos. 4.  $\mathcal{A}$ qualia pro  $\alpha$ qualibus semper substitui possunt.

§. II. *De  $\alpha$ quationum formatio et resolutio.*

103 Defin. 1.  *$\mathcal{A}$ quationis formatio* est algebraica problematis expositio, nempe litteris comprehendere quantitates, atque earum rationes, cognitæ ab incognitis rite discernendo, ac separando. Plura sunt, quæ usu magis, quam regulis addiscuntur. Exempla nimirum tironum oculis subjicient, quæ longa verborum ambage vix perciperent.

104 Defin. 2.  *$\mathcal{A}$ quationis resolutio* est valoris incognitæ inventio. Invenitur autem ex cognitarum ad incognitas relatione. Rationes autem hujusmodi inclusæ sunt, atque abditæ in ipsis quantitatibus, ex quarum commixtione, ac separatione erui debent; non secus atque in nucleo latentes fructus, cortice rupto, aut disjuncto, apparent. Methodus autem hujusce separationis est earundem quantitatum, sive expressionum transformatio, quæ multiplici modo fieri potest.

I. Separatur *additione* ipsi scilicet incogni-

12x, atque alteri membro æquationis aliam quantitatem addendo. Ex. gr.  $x - a = b + c$ ; ergo  $x - a + a = b + c + a$ ; et reductione facta:  $x = b + c + a$ . Hinc apparet quantitatem negativam ab uno ad aliud membrum æquationis traduci posse converso signo  $-$  in  $+$ , manente æqualitate (axiom. 1.).

II. *Subductione*. In exemplo allato si  $x + a = b + c$ , possum auferre utrimque  $a$ , eritque  $x + a - a = b + c - a$ , et reducendo  $x = b + c - a$ . Hæc est praxis inversa præcedentis: scilicet quantitas positiva à membro ad membrum traducitur, converso signo  $+$  in  $-$ , sivè subtractione (axiom. 2.). Utraque methodus dicitur *transpositio*.

III. *Separatur multiplicatione*: hæc praxis plerumque locum habet in fractionibus: nam fractio evanescit ceteros terminos in suum denominatorem ducendo si  $\frac{z}{a} = b$ ; duc utrumque membrum in denominatorem  $a$ , fitque  $\frac{az}{a} = ab$ , et facta divisione  $z = ab$  (ax. 3.).

IV. *Divisione*. Nam si quantitas quantitatem multiplicat, per illam dividendo omnes æquationis terminos, à multiplicatione liberabitur, ac solitaria remanebit. Ex. gr. in æquatione  $ab + c = bx$ , dividendo omnes terminos per  $b$ , habebitur:  $\frac{ab}{b} + \frac{c}{b} = \frac{bx}{b}$ , quod divisione facta dat  $a + \frac{c}{b} = x$  (ax. 3.).

V. *Valorem incognitæ sumendo*. Hoc impor-



tat aliam quantitatem æqualem in æquatione ipsi incognitæ substituere: ex. gr. si  $x = a + y$ , ipsi  $x$  substituo  $a + y$ , illiusque valorem sumo (ax. 4.). Hoc passim in operationibus algebricis occurrit. Problematum resolutione hæc omnia clariora evadent.

## §. III.

*Problemata.*

105 Probl. 1. *Quantitatem incognitam à cognita per additionem aut subductionem separare.* Solutio erit exemplum. Sit Andronicus 60. annorum, cujus filius Cajus 15 numerat. Quæritur quo anno, patris ætas dupla futura sit ætatis filii. Solut. Fiant  $60 = a$ , et  $15 = b$ : numerus annorum, in quibus conditio implenda erit  $= y$ . Hæc est problematis *denominatio*. Jam quum ex utraque parte numerus annorum  $= y$  debeat excurrere, ut ætas Caji æqualis sit dimidio ætatis Andronici; erit ætas Andronici in tempore, quo implenda est conditio  $= a + y$ : atque ætas Caji  $= b + y$ : quumque  $a + y$  sit duplum  $b + y$ ; ut fiat æquatio, erit  $a + y = 2b + y$ ; et reducendo  $a + y = 2b + 2y$ . Fiat *transpositio* incognitæ:  $a = 2b + 2y - y$  (per II. num. 104), et facta reductione  $a = 2b + y$ , iterum transponatur  $2b$ , eritque  $a - 2b = y$ . En jam incognitam in altero membro separatam, atque æquatam cum cognitis. Igitur problema resolutum est formula generali ad omnes casus similes applicabili. Substituantur numeri pro casu præsentis assumpti, Quum  $a = 60$ , ac  $b = 15$ ; erit  $60 - 2b = 60 - 30 = y$ . Jam  $= 60 - 30 = 30$ .

Igitur 90 ætatis anno erit Andronici ætas dupla ætatis Caji. Hic quidem tum habebit 45 annos, dimidium 90.

En typum calculi:

Ætas Andronici tempore implendæ conditionis  $= a + y = b + y + b + y$

Reducendo  $a + y = 2b + 2y$

Et transponendo  $a = 2b + 2y - y$

Et reducendo  $a = 2b + y$

Iterum transponendo  $y = a - 2b = 60 - 30 = 30$

Igitur  $y = 30$ , et  $a + y = 60 + 30 = 90$ .

106 Corol. Formula hæc œcumenica ad omnes casus est applicanda, in quibus similes conditiones proponantur. Nam si ætas filii dimidium ætatis parentis superaret; eadem æquatione  $a - 2b = y$  inveniretur utriusque ætas. Fac non 15, attamen 35 habere Cajum: quoto amborum anno ætas unius fuit alterius dupla? Quum  $a = 60$ , et  $2b = 70$ ; erit  $y = 60 - 70 = -10$ . Hoc est anno 60—10 adimpleta fuit conditio, anno scilicet 50 ætatis Andronici, et 35—10 ætatis Caji=25. Planum enim est 50, duplum esse 25.

107 Probl. 2. *Incognitam multiplicatione separare.* Exempl. *Alexander ad Darbellam exercitum Darii fudit: hujus quarta pars in campo jacuit; duæ quintæ partes captivæ remanserunt, ad quadraginta duo millia fuga subducti sunt. Quot militibus instructus Darius prælium commisit? Solut.* Fugitivos milites scilicet 42000 dico  $a$ , exercitum universum dico  $x$ : jam quum hujus quarta pars interierit, erit  $= \frac{x}{4}$ , captivi

erunt  $\frac{2x}{5}$ : quare denominatio problematis erit  
 $\frac{x}{4} + \frac{2x}{5} + a = x$ . Primam fractionem tollo mul-  
 tiplicando per denominatorem 4 omnes termi-  
 nos: eritque  $x + \frac{8x}{5} + 4a = 4x$ . Secundam etiam  
 pari methodo multiplico, ducendo omnes ter-  
 minos in denominatorem 5; fitque  $5x + 8x +$   
 $20a = 20x$ , et facta reductione  $13x + 20a = 20x$ ,  
 et transponendo  $20a = 20x - 13x$ , quod facta  
 reductione dat  $20a = 7x$ . En æquationem, quam  
 adhuc ad terminos problematis reducere oportet,  
 multiplicando  $a$  per 20, sive  $42000 \times 20 =$   
 $840000$ , dividenda per 7  $= 120000$ . Hic nu-  
 merus conditiones problematis implet.

Nam  $30000 =$  quarta pars  $120000$ .  
 $48000$  duæ quintæ partes  
 $42000$  fugitivi.

---

120000

Animadvertendum tamen in problemate non  
 ad finem historiæ, sed ad resolutionis commo-  
 ditatem militum numerum exactum esse.

108 Probl. 3. *Incognitam divisione separa-*  
*re.* Exempl. *Cæs. 11, et Drusus pecunia instructi,*  
*bibliopolæ officinam ingredientiæ. libros emp-*  
*turi, primus 26 aureos, alter ad 44 impendit.*  
*Domus pecunia residua numerata, Cæsar inve-*  
*nit, se quadruplo plus habere, quam Drusus.*  
*Queritur utriusque pecunia ante impendium.*

Solut. Quoniam aurei impensi in libros no-

ti sunt, unica incognita restat, numerus scilicet aureorum ante impendium; hunc voco  $x$ : erit igitur  $x-26$  pecunia Cæsaris: atque  $x-44$  residuum Drusi. Supponimus autem Cæsaris esse quadruplum alterius: habebimus igitur æquationem,  $x-26=4(x-44)$ ; et facta multiplicatione,  $x-26=4x-176$ . Jam transponendo fit  $-26=4x-x-176$ , et reductione facta  $-26=3x-176$ . Rursus transportatione fit  $176-26=3x$ : ac reducendo  $150=3x$ . Quare  $x=\frac{150}{3}=50$ . Eruitur jam residuum Cæsaris esse  $50-26=24$ . Supponitur autem esse quadruplum residui Drusi; erit igitur hoc  $=\frac{24}{4}=6$ . Addantur residua expensis, fitque  $26+24=50$ :  $6+44=50$ : adeoque benè procedit operatio.

109 Probl. 4. *Incognitas substitutione separare.* Exempl. Datis summa duarum quantitatum  $=a$ , earumque differentia  $=b$ , quantitates invenire. Solut. Ut facilius menti occurrat objectum determinatum, fac  $a=60$ , et  $b=8$ ; incognita autem major sit  $=x$ , minor  $=y$ . Erit igitur  $x+y=a$ , et  $x-y=b$ . Jam transponendo fiet  $x=a-y$ : hanc igitur substituo sibi æquali  $x$  (ax. 4, n. 102). Erit igitur in altera æquatione  $x-y=b$ ;  $a-y-y=b$ ; et reducendo  $a-2y=b$ ; et transponendo  $a-b=2y$ ; et dividendo  $y=\frac{a-b}{2}=\frac{60-8}{2}=\frac{52}{2}=26$ . Erit igitur  $y=26$ . Ex hac æquatione altera etiam quantitas innotescit: nam  $x+y=a=60$ . Erit igitur  $34$ : nam  $26+34=60$ ; quorum differentia  $=8$ . Quod si non jam cum  $y$ ,

sed cum  $x$  operatio instituta fuisset, loco æquationis  $\frac{a-b}{2} = y$  inventum fuisset  $\frac{a+b}{2} = x$ .

110 Corol. Ex problematis solutione theorema deducitur, veritatem his terminis universalioribus enuntians. *Datis summa, et differentia duarum quantitatum, major æqualis est dimidiæ summæ, cum dimidia differentia: minor æqualis dimidiæ summæ, dempta dimidia differentia.* Veritas manifesta est ex formula æquationum: nam major quantitas  $x = \frac{a+b}{2}$ , minor verò  $y = \frac{a-b}{2}$ .

111 Exempl. 2. *Antonius Lepido dixit: Si unum ex aureis, quos penes me repositos habeo tibi darem; æqualem summam haberemus: si tu unum ex tuis mihi traderes, ego duplum haberem. Quot aureos unusquisque habet?* Solut. Fiat summa Antonii  $= x$ ; Lepidi verò  $= y$ . Jam ex prima conditione problematis eruitur,  $x - 1 = y + 1$ .

Atque tiam ex secunda,  $x + 1 = 2y - 2$ .

Ergo transponendo,  $x = y + 1 + 1$ , sive  $x = y + 2$ , et substituendo  $y + 2 + 1 = 2y - 2$ , sive  $y + 3 = 2y - 2$ ;

et transponendo,  $y = 2y - 2 - 3$ , sive  $y = 2y - 5$ , ac demum  $5 = 2y - y$ , sive  $5 = y$ ,

eadem methodo inveniri potest summa Antonii,  $x = 7$ .

112 Exempl. 3. Tres incognitas referens. *Cajus, et Popilius mercatura 1000 aureos acquisierunt: Cajus et Titius 1100: Popilius et Ti-*



*tius ad 900. Quæritur singulorum lucrum. Solut.*

Sit summa Caji =  $x$ : Popilii =  $y$ : Titii verò =  $z$ . 1000 =  $a$ : 1100 =  $b$ : 900 =  $c$ . Jam ex conditionibus problematis hujusmodi æquationes eruuntur

$$x + y = a$$

$$x + z = b$$

$$y + z = c$$

Transposit. ope duæ

1.<sup>ma</sup> reducuntur ad

$$x = a - y$$

$$x = b - z$$

et substitutione.....

$$a - y = b - z$$

et transpositione.....

$$a = y + b - z$$

atque iterum.....

$$y = a - b + z$$

Pariter ex æquatione

3.<sup>a</sup> deducitur.....

$$y = c - z$$

et substitutione.....

$$c - z = a - b + z$$

et transpositione.....

$$c = a - b + z + z$$

sivè reducendo.....

$$c = a - b + 2z$$

deindè.....

$$c - a + b = 2z$$

$$\therefore \text{demum ..... } z = \frac{c - a + b}{2} = \frac{900 - 1000 + 1100}{2}$$

Invento hoc valore  $z = 500$ ; quoniam  $y = c - z = 900 - 500$ , erit  $y = 400$ ; et  $x = a - y = 1000 - 400 = 600$ .

113 Schol. Methodos problemata indeterminata solvendi consultò omittimus; prolixioris enim industriæ, ac provectionis solertia sunt, quam quæ tironibus, vix primum limen matheseos ingressis, proponantur. Porro problemata indeterminata jam diximus plures solutiones admittere: ex. gr. duos numeros invenire, quo-

rum summa = 14: tot enim solutiones in numeris positivis admittit, quot conjunctiones in numeris componentibus summam: in negativis verò aut fractis, innumeras. Universim animadvertere sufficiat, æquationes ita tractandas esse, ut demum in uno membro incognita unica reperiatur, in altero verò incognita cum cognitis. Tum assumpto valore positivo atque integro, huic secundæ applicetur, ut valor primæ determinetur.

## CAPUT QUARTUM.

*De Potentiis, et Radicibus.*

## §. I.

*Prænotiones.*

114 **D**efin. 1. Numerus quicumque in se ductus productum efficit, quod *quadratum* dicitur: numerus autem, qui in se ductus fuit, *radix quadrata*. Ex g.  $2 \times 2 = 4$ . Numerus 4, consideratus ut productus à  $2 \times 2$ , est quadratum, ac 2 ejus radix, quæ et prima potentia dicitur. Pariter in litteris quantitas quæcumque litteris expressa, est prima potentia: in se ipsam ducta efficit quadratum, seu secundam potentiam, veluti de numeris dictum est. Sic  $a$  est prima potentia: productum verò  $a \times a = aa$  quadratum, cujus radix quadrata  $a$  est prima potentia. Universim quilibet numerus considerari potest, ut prima potentia, cujus quadratum est productum numeri in se ipsum ducti.

115 Defin. 2. Quando autem productum

primum iterum in radicem ducitur, jam ad cubum elevatur, qui etiam tertiâ potentia dicitur. Sic  $2 \times 2 \times 2 = 8$  dicitur tertia potentia, seu cubus. Radix autem cubica est ipsamet radix quadrata, prout secundæ multiplicationi subjacens. Ad quantitates litterales similiter hæc applicanda sunt. Nam  $a \times a \times a = aaa$  cubus dicitur, seu tertia potentia. Compendii tamen causa potentiæ per exponentes enuntiantur: ex. g.  $a^2$ ,  $a^3$ , quod indicat quantitatem elevatam ad secundam, tertiam etc. potentiam, quam numerus exponit.

116. Defin. 3. Elevatio ad quartam, quintam, sextam etc. potentias fit perpetua multiplicatione novi producti in radicem  $2 \times 2 \times 2 \times 2 = 4 \times 2 \times 2 = 8 \times 2 = 16$ , et in litteris  $a \times a \times a \times a = a^2 \times a \times a = a^3 \times a = a^4 \times a = a^5$ , etc. Quarta potentia dicitur etiam *quadrato-quadratum*; quinta *quadrato-cubus*, sexta *cubo-cubus*: quibus barbaris nominibus satius erit parcere, quum per quartam, quintam etc. potentiam planius res manifestetur.

117 Defin. 4. Quadratum, cubus aliaque tum dicuntur perfecta, quum oriuntur ex multiplicatione radicum sine ullo residuo, ut in exemplis hactenus adductis. Imperfecta verò, quando, extracta radice, aliquod residuum superest: ut 6, in quo præter quadratum 4, adhuc residuum 2 superest, dicitur quadratum imperfectum.

118 Defin. 5. Elevatio fractionum ope multiplicationis utriusque numeratoris et denominatoris obtinetur: ex. gr.  $\frac{3}{4} \times \frac{3}{4} = \frac{9}{16}$ , quadratum  $\frac{3}{4}$ ;

cubus verò  $\frac{3}{4} \times \frac{9}{16} = \frac{27}{64}$ . Planum est fractiones per elevationem deprimi, per extractionem autem radicum augeri (59). Nam si fractio  $\frac{1}{2}$  elevetur ad quartam potentiam, hoc ordine de-

4

crescit  $\frac{1}{2}, \frac{1}{4}, \frac{1}{8}, \frac{1}{16}$ . Extracta verò  $\sqrt[4]{\frac{1}{16}}$  erit  $\frac{1}{2}$ , cujus valor octuplo major est alterius.

4

119 Schol. Signum  $\sqrt[4]{}$  nuper allatum indicat radicem quartæ potentiae illius quantitatis, cui præfixum est. Universim signum  $\sqrt[4]{}$  denotat

3                      4

radicem quadratam,  $\sqrt[3]{}$  cubicam,  $\sqrt[4]{}$  quartæ

5

potentiae;  $\sqrt[5]{}$  quintæ etc. Hujusmodi autem quantitates tali signo præfixo indicatæ, radicales appellantur.

## §. II.

### *Potentiae et radices monomiae.*

120 Probl. 1. *Quantitatem monomiam ad assignatam potentiam elevare.* Solut. Quantitas monomia potest esse affecta coefficientibus, atque exponentibus: ex g.  $2a^2 b^3$ . Jam 1. coefficientiens elevetur ad potentiam assignatam (116).

1. Exponens multiplicetur per numerum indicantem gradum potentiae, ad quam elevanda est quantitas. Exempl.  $2a^2 b^3$  ad tertiam potentiam evehenda sit: erit  $8a^6 b^9$  ejus cubus. *Dem.* Hac operatione omnes partes monomii ad datam potentiam evehuntur. Nam  $2 \times 2 \times 2 = 8$   $\times 2 = 8$ . Deindè  $a^2 \times a^2 \times a^2 = a^6$  (87):  $b^3 \times b^3 \times b^3 = b^9$ .

121. Probl. 2 *Radice[m] dati gradus ex monomiis extrahere.* Solut. Inverso modo atque in præcedenti probl. operandum est. 1. Ex coefficiente extrahatur radix, methodo mox tradenda. 2. Exponens dividatur per numerum indicantem gradum potentiæ, ad quam evecta est quantitas. Sic in allato exemplo num. præc. radix cubica  $8a^6 b^9$  est  $2a^2 b^3$ . Jam enim demonstratum est ex multiplicatione hujus quantitatis modo indicato, cubum oriri; quapropter per resolutionem subindè restitui debet.

112 Schol. 1. Quando occurrat quantitas, cujus exponens sit fractio, ex. g.  $a^{\frac{2}{3}}$ , illius numerator pro exponente potentiæ, denominator verò pro exponente radice accipi potest: scilicet  $a^{\frac{2}{3}} = \sqrt[3]{a^2}$ .

123 Schol. 2. Duæ quantitates radicales possunt ad eundem exponentem radice trahi sine valoris mutatione. Sit  $\sqrt[2]{a^3}$ , et  $\sqrt[3]{a^5}$ ; exprimantur hac forma:  $a^{\frac{3}{2}}$  et  $a^{\frac{5}{3}}$ ; deinde fractiones reducantur ad eundem denominatorem, erunt  $\frac{4}{6}$  et  $\frac{10}{6}$ : demum  $a^{\frac{4}{6}} = a^{\frac{2}{3}} = \sqrt[3]{a^2}$  et  $a^{\frac{10}{6}} = a^{\frac{5}{3}} = \sqrt[3]{a^5}$ .

124 Corol. 3. In quantitate monomia potest occurrere, ut unus ex factoribus signo radicali afficiatur; alter verò extra signum radicale sit: ut uterque sub eodem signo comprehendatur, potest elevari ad potentiam indicatam in signo



radicali, qui non est affectus, ac tum cum al-

tero collocari: ex g.  $a^3 \sqrt[3]{b} = \sqrt[3]{(a^3 b)}$ . Vi-  
cissim factor comprehensus signo radicali ab  
illo educi potest, extrahendo ab ipso radicem

indicatam, ut in exemplo allato  $\sqrt[3]{(a^3 b)} =$   
 $a^3 \sqrt[3]{b}$ . Quod quidem ad numeros extendi po-  
test: nam  $\sqrt[3]{45} = \sqrt[3]{9 \times 5} = 3 \sqrt[3]{5}$ ; et  $\sqrt[3]{28}$   
 $= \sqrt[3]{4 \times 7} = 2 \sqrt[3]{7}$ .

125 Probl. 3. *Quantitates radicales addere*  
*vel subducere*. Solut. Si exponens signi radica-  
lis est idem, eademque quantitas illi subjecta,  
addantur, vel subducantur factores signum  
radicale præcedentes: ex g.  $a \sqrt{c} + b \sqrt{c}$   
 $= (a + b) \sqrt{c}$ . Pariter  $\sqrt{63} + \sqrt{28} = 3$   
 $\sqrt{7} + 2 \sqrt{7} = 5 \sqrt{7}$ .

126 Probl. 4. *Quantitates radicales multi-*  
*plicare et dividere*. Solut. Reducantur ad eum-  
dem exponentem signi radicalis (123): deinde  
multiplicentur quantitates signum radicale præce-  
dentes inter se: postea quantitates sub signo ra-

dicali comprehensæ: ex g.  $a \sqrt[3]{c} \times b \sqrt[3]{d^2}$ :  
erit primò  $ac^{\frac{1}{3}} \times bd^{\frac{2}{3}}$  (122): deindè ad eum-  
dem denominatorem reductæ fractiones, erunt  
 $ac^{\frac{2}{6}} \times bd^{\frac{4}{6}}$  (123); quod, mutata expressio-

ne, convertitur in  $a \sqrt[6]{c^2} \times b \sqrt[6]{d^4}$ ; ac de-

num facta multiplicatione  $= ab \sqrt[6]{c^2 d^4}$  (124).  
Et quoniam diviso est multiplicationis disolu-  
tio; ut quantitates radicales dividas, pri-

num quantitates extra signum radicale positas, deindè, quæ sub signo continentur, oportet

dividere. Sic  $ab \sqrt[2]{xy}$  per  $-a \sqrt[2]{x}$  divisum,

quotum exhibet  $-b \sqrt[2]{y}$ : et  $a^2 \sqrt[3]{cd}$  divisum

per  $a^2 \sqrt[3]{fg}$ , quotum dabit  $\sqrt[3]{cd}$ : demum per

$n$  quamcumque radicem indicando  $x \sqrt[n]{a}$  di-

visum per  $y \sqrt[n]{b^3}$ , pro quo dabit  $-\sqrt[n]{\frac{a}{b^3}}$   
etc.

127 Schol. 1. Quantitatis negativæ  $a$  omnes potentiaæ pares sunt positivæ, impares verò negativæ. Nam  $-a \times -a = a^2 \times -a = -a^3 \times -a = a^4$  etc. Quapropter in monomio  $a^2$  radix est æquivoca: potest enim esse vel  $-a$ , vel  $+a$ . Jam si in aliqua æquatione extrahenda sit radix quadrata, veluti in  $x^2 = a^2 - b^2$ , radici præfigendum est signum dubium  $x = \pm \sqrt{a^2 - b^2}$ .

128 Schol. 2. Qui radicem quadratam monomii  $-a^2$  requirit, oleum, et operam perdit. Nam  $-a^2$  neque provenit ex  $a \times a$ , neque ex  $-a \times -a$ ; in utroque enim casu productum est positivum. Quum ergo  $-aa$  non possit esse productum quantitatis ullius realis in se ipsam ductæ, quadratum  $-aa$  est chimæricum: hinc  $\sqrt{-a^2}$  dicitur quantitas imaginaria, aut impossibilis.

## §. III.

*Radix quadrata quantitatum complexarum, et numerorum.*

129 Theor. Quadratum binomii constat ex quadrato primi termini, duplo producto primi in secundum, et quadrato secundi. Dem. Quævis quantitas binomia repræsentari potest ab hac formula  $a+b$ . Elevetur ad quadratum  $(a+b)$   $(a+b) = a^2 + ab + ab + b^2$ ; et reducendo  $a^2 + 2ab + b^2$ . Constat ergo quadrato primi termini  $a^2$ , duobus productis  $a \times b$ , et quadrato secundi termini  $b^2$ . Eadem demonstratio in numeris exhiberi potest. Sit  $a = 20$ ,  $b = 5$ ; quadratum  $25 \times 25 = 625$ . Quadratum  $20 \times 20 = 400$ : duplum productum  $20 \times 5 = 200$ : quadratum  $5 \times 5 = 25$ : summa  $400 + 200 + 25 = 625$ .

130 Probl. I. Ex quantitate complexa literis expressa radicem quadratam extrahere.

Solut.

Exemp. Quadr.  $a^2 + 2ab + b^2$ . Radix  $a+b$ .

$$\begin{array}{r}
 -a^2 \\
 \hline
 2ab + b^2 \\
 2a + b \\
 -2ab - b^2 \\
 \hline
 0
 \end{array}$$

I. Extrahatur à primo termino radix, eaque scribatur ad latus, ut in divisione fieri solet: multiplicetur radix per se ipsam, sivè ad quadratum elevetur; deindè subducatur à primo



In hac ultima operationis parte sumitur etiam duplum radice inventæ, nimirum  $2a + 2b$ ; per hanc dividitur residuum; quoties est  $c$ , scriptum prius in radice; subinde adjungitur divisor; ac demum tota quantitas per inventum terminum multiplicatur, ac subtrahitur productum à residuo.

132 Schol. Si aliquis ex terminis esset negativus in radice, duplum productum deberet esse negativum. Duplex verò quadratum utriusque termini positivum. Nam  $(a-b)(a-b)$  dat hujusmodi productum  $a^2 - 2ab + b^2$ . Quadratum igitur cujuscumque termini sive positivi, sive negativi, semper est positivum.

133 Lemma. *Radix numerica ad quadratum elevata non potest plures notas continere, quam duplum earum, quæ in radice inveniuntur: quandoquæ tamen poterit una minus inveniri.* Dem. Numeri inter 1 et 10, non possunt plures notas, quam duas in quadratis habere; quia  $10 \times 10 = 100$  est primus numerus, qui tribus notis constat. Similiter  $100 \times 100 = 10000$ , primus etiam est, qui ex quinque notis componitur, et sic deinceps. Omnes igitur numeri inter 1 et 10 duas tantum: à 10 usque ad 100 quatuor tantum notas exhibere possunt in quadratis: à 100 usque ad 1000 non plures, quam sex continere etc. Quod autem unica tantum nota à duplo possit deficere productum, eadem inductione demonstratur. Nam 10 in quadrato tres habet, 100 quinque, 1000 septem etc. Omnes autem hi numeri sunt primi in serie, qui una nota augeantur.



134 Corol. Facile deducitur ex theoremate præcedente, quot notis constare debeat radix cujuscumque quadrati. Dividatur nimirum numerus, à quo extrahenda est radix per classes à dextra sinistram versus; in qualibet verò classe duo tantum notæ comprehendantur: ultima autem classis unicâ etiam notâ constare potest. Sit numerus 588289, à quo extrahenda sit radix; dividatur in classes modo jam indicato: peracta divisione, membra erunt 58, 82, 89. Tribus igitur notis radix constare debet. In sequenti autem numero unica ad sinistram nota invenitur 6, 42, 27, 39. Quatuor deindè in radice notæ inveniuntur.

135 Schol. In sequenti schemate radices, et quadrata numerorum ab 1 ad 9 exhibentur, ut faciliùs in sequentibus operationibus procedatur:

Radices 1, 2, 3, 4, 5, 6, 7, 8, 9.

Quadrata, 1, 4, 9, 16, 25, 36, 49, 64, 81.

136 Probl. 2. *Ex quantitate numerica radicem quadratam extrahere.* Solut.

Exempl. Quadr. 58, 82, 89. Radix  $a+b+c$

$$\begin{array}{r}
 42 = 49 \\
 \hline
 \begin{array}{r}
 982 \\
 2a + b = 146 \\
 2ab + b^2 = 876 \\
 \hline
 10689 \\
 2a + 2b + c = 1527 \\
 2ac + 2bc + c^2 = 10689 \\
 \hline
 \end{array}
 \end{array}$$

1. Numerus dividendus est in classes (134).  
 2. Incipiendo à primo membro à sinistris, quærenda est radix quadrata dati numeri, aut quadrati proximè inferioris; in exemplo 58 quadratum proximum est 49. Ab hoc radix mutuetur, quæ, loco pro numero radicali assignato, scribenda erit: deindè elevetur ad quadratum, ac subducatur à primo membro. 3. Residuo 9 secunda classis adjungitur, ut secundæ operationi inserviat. Jam duplum radice inventæ accipiendum est, nimirum 14, quod loco divisoris est usurpandum; atque sub penultima nota 8 scribendum: nam ad has tantum extenditur divisio. Quotus inventus 6 radici, et divisi adscribitur, atque per ipsum numerus 146 multiplicatur: deindè productum 876 subducitur à primo residuo 982. Hic operatio secundi membri explicit. 4. Residuo 106 tertiæ classis 89 adjungitur; pro divisore ut supra, duplum totius radice inventæ usurpatur, nimirum 152, quod ad penultimam notam attingere debet. Divisione peracta, quotus 7 scribitur ut supra tam radici, quam divisi, per quem etiam auctus multiplicatur, ac deindè productum à tertio membro subducitur. Nihil remanet. Radix ergo quæsitæ est 767. *Dem.* Quæ hic in numeris peracta sunt, omninò cum his quæ supra (130) in litteris exhibuimus, conveniunt, atque ex numero 129 facillè demonstrantur. Ideo etiam in litteris ad latus eadem operatio indicata est. Ut majori in luce praxis indicata collocetur, juvat schema sequens ob oculos ponere, quo tam synthesis, quam analysis qua-

drati exhibetur. Insimul autem quarè notæ eo, quo jussæ sunt, ordine collocari debeant, ostenditur.

		$a$	$b$	$c$
588289	Radix	700	+60	+7
490000	Quadr.	$a^2 = 490000$		
<hr/>				
98289	dup. prod.	$2ab = 84000$		
14600	Quadr.	$b^2 = 3600$		
87600	dup. prod.	$2ac = 9800$		
<hr/>				
10689	dup.	$2bc = 840$		
1527	Quadr.	$c^2 = 49$		
<hr/>				
0		588289		

137 Probl. 3. *Ex quadrato imperfecto radicem extrahere.* Solut.

Exempl. Quadr. 6, 42, 27, 39. Radix 2534

4
<hr/>
242
45
225
<hr/>
1727
503
1509
<hr/>
21839
5064
20256
<hr/>

Residuum

1583

138 Schol. 1. Quemadmodum in divisione

multiplicatio divisoris in quotum ostendit, num rectè processerit operatio, pariter in extractione radicum multiplicatio radicis inventæ in se ipsam reddere debet quadratum. Quod si residuum aliquod supersit, ejus additione ad inventum productum, integram summam restitui necesse est.

Duc  $2534 \times 2534 = 6421156 + 1583 = 6422739$ .

139 Schol. 2. Ea est proprietas divisionis, ut invento uno ex factoribus dividendi, ac per ipsum facta divisione, alter factor habeatur (25). Quamobrem productum notum per notam radicem dividendo, quotus est altera radix. Jam in operationibus præcedentibus, quotiescumque nova sectio demittitur, per duplum radicis dividitur, sicque altera radix innotescit. Nam jam ostensum est, duplum radicis inventæ esse unum ex factoribus producti, à quo radix extrahitur: adeoque in divisione alterum factorem latentem tradere debet.

140 Schol. 3. Si aliquando occurrat, ut duplum radicis majus sit membro tractando; scripto zero in radice, novum membrum demittitur, atque operatio de more instauratur.

141 Schol. 4. Numerus sumptus in problemate, præter quadratum radicis continet residuum 1583: ideoque quadratum imperfectum dicitur. Nam neque quadratum est numeri 2534 neque 2535 unitate majoris. Major enim est primo 1583 unitatibus. Numeri autem 2535 quadratum est 6426225, quod ipsum 3486 unitatibus superat. Radix ergo prædicti numeri inter utramque radicem 2534, ac 2535 existit.

Erit igitur numerus 2534, auctus parte unitatis, quæ nec numero integro, nec fractione aliqua adamussim exprimi potest. Ad radicem tamen veram semper magis ac magis possumus accedere ope decimalium, ut in sequenti.

142 Prob. 4. *Radicem quadratam per approximationem extrahere.* Solut. Extracta radice quadrati imperfecti, ut in problemate præcedenti, residuo addantur tot cyphrarum paria, quo libuerit; deindè extractio radicis de more instituat. In radice autem inventa tot notæ decimalis à dextris resecari debent, quot cyphrarum paria adjecta sunt. Radix eo erit accuratior, quo plures notæ aggregatæ fuerint. In residuo probl. præc. addantur unum, aut duo cyphrarum paria, atque operatio instauretur, ut in exempl. ubi residuum 1583, addendo unum cyphrarum par, evadit 158300. Radix 2534, 31.

$$\begin{array}{r}
 50683 \\
 152049 \overline{) 158300} \\
 \hline
 625100 \\
 506851 \overline{) 625100} \\
 \hline
 118239 \text{ etc.}
 \end{array}$$

143 Schol. 1. In allato exemplo, quod ulterius protrahi posset in infinitum, nova residua eodem modo tractari deberent, atque in duobus præcentibus peractum est. Hic jam ad  $\frac{1}{10}$  pro vera radice numeri præfati accessimus. Ceterum demonstratio eadem est, ac quæ in fractionibus decimalibus pro simili casu usurpata fuit (66).



144 Schol. 2. Si radix quadrata alicujus numeri major est numero integro, et minor numero integro sequente, exprimi non poterit accuratè, neque per integrum, neque per fractionem propriam integro adjectam. Quocumque enim modo tractetur, numquam ad integra reduci poterit. Sit 6 ex. g. à quo extrahitur radix quadrata: hæc neque 2 neque 3 exprimi adamussim potest. Fac  $= 2\frac{1}{2}$ , hæc inquam radix accurata non est. Nam in fractionem impropriad transformata  $= \frac{5}{2}$ , atque ita ad quadratum elevata  $\frac{25}{4}$ , rursus prodit talis fractio quæ integro æquari non potest. Idem tentando cum quacumque alia fractione notæ 2 adjuncta invenies.

145 Schol. 3. Hujusmodi radices vocantur *irrationales*, *surdæ*, *incommensurabiles*. Contra radices numero quorum valor integris, aut fractionibus exactè exprimi potest, *rationales*, *commensurabiles* dicuntur.

146 Schol. 4. In fractionibus vulgaribus, ut ad quadratum eleventur, aut ut ab ipsis radix quadrata extrahatur, tam numerator, quam denominator tractari debent: ex. g.  $\sqrt{\frac{4}{9}} = \frac{2}{3}$ . Quando autem ambo fuerint quadrata imperfecta, consultius erit easdem in decimales convertere (65), ac postea radicem extrahere. Curandum tamen, ut notæ decimales sint pares: ex. g. si ex 7,329 extrahenda sit radix, adjuncto zero fit par numerus decimalium; commodiorque evadit calculus.

## §. IV.

*Æquationes secundi gradus.*

147 Defin. *Æquationes secundi gradus seu quadratice dicuntur illæ, in quibus æquatio, quum à fractionibus, quæ incognitam in denominatore continent, liberata fuerit, major incognitæ potestas sit secunda, seu quadratum. quod si nulla alia potestas incognitæ admisceatur, æquatio erit quadratica pura; sin verò prima etiam incognitæ potestatem æquatio contineat, erit quadratica affecta.* Ut autem præparetur æquatio ad separationem incognitæ, opus est primum ope transpositionis incognitam à cognitis separare (104): deindè quadratum incognitæ à coefficiente liberare; nisi unitas coefficientis quantitatis sit, seu quod idem est, nullo coefficiente notetur: ac demum si negativum fuerit, ope multiplicationis in positivum convertere; quod multiplicando totam æquationem per  $-1$  obtinetur. His peractis, si æquatio fuerit *quadratica pura*, valor incognitæ statim elicitur, utrinque radicem quadratam extrahendo: quod si æquatio *quadratica affecta* extiterit, oportet primum quadratum in membro incognitæ complere; quod utrique æquationis membro quadratum dimidiæ quantitatis cognitæ, qua prima incognitæ potestas afficitur, adjungendo obtinetur; ut radix deindè utrobique extrahatur, ac per transpositionem valor incognitæ habeatur: ut singillatim in

sequentibus problematis exponemus.

148 Probl. 1. *Æquationem quadraticam puram resolvere.* Solut. Termini æquationis methode pro æquationibus primi gradus præscripta ita tractandi sunt, ut demum incognita in uno membro, in altero autem cognitæ quantitates appareant. Deindè extractio radiceis ex utroque membro instituenda est; ac demum valor investigandus. Animadvertendum tamen, ne quadratum incognitæ sit negativum, tum enim transpositione fieri deberet positivum. Jam sit  $x^2 - a^2 = b^2$ : erit transponendo  $x^2 = a^2 + b^2$ ; atque extracta radice  $x = \pm \sqrt{a^2 + b^2}$ . *Dem.* Si æqualia sunt quadrata, æquales radices habere debent: nam idem factores, eadem producta debent dare. Potest autem eadem radix esse, vel positiva, vel negativa, ut quadrata æquantur (127). Præfigendum igitur est signum dubium.

149 Probl. 2. *Æquationem quadrati imperfecti resolvere.* Solut. Quum incognita ad secundam potentiam elevata, alteri quantitati notæ per multiplicationem mixta est; tunc 1.º complendum est quadratum, dimidium quantitatis notæ incognitam multiplicantis utrique membro adjungendo. 2.º Radix ab utroque membro extrahenda est; ita incognitæ valor faciliè invenietur; debet enim alteri solis cognitis constanti æquari. Sit  $x^2 - ax = b$ . Elevetur  $a$  ad quadratum, dimidium ipsius sumendo, erit  $\frac{a}{2} \times \frac{a}{2} = \frac{a^2}{4}$ . Hoc utrique æquationis membro adjunc-

to, fit  $x^2 - ax + \frac{a^2}{4} = \frac{a^2}{4} + b$ . Extracta radice  
 primi membri erit  $x - \frac{a}{2} = \sqrt{\left(\frac{a^2}{4} + b\right)}$ : ac  
 demum  $x = \frac{a}{2} + \sqrt{\left(\frac{a^2}{4} + b\right)}$ .

150 Exempl. 1. Esto summa duorum nu-  
 merorum  $= 10$ ; eorum productum  $= 16$ . Qui  
 erunt factores? Solut. Summam dico  $a$ , pro-  
 ductum  $b$ . Factores vero unum dico  $x$ , alterum  
 $y$ . Ex conditionibus problematis fit æquatio  $x +$   
 $y = a$ , et  $xy = b$ .

Deinde transp.

$$x = a - y$$

Et substit.

$$(a - y)y = b$$

Et facta multipl.

$$ay - y^2 = b$$

Et mutando signa

$$y^2 - ay = -b$$

Complendo quad.

$$y^2 - ay + \frac{a^2}{4} = \frac{a^2}{4} - b$$

Extracta radice

$$y - \frac{a}{2} = \sqrt{\frac{a^2}{4} - b}$$

Demum

$$y = \frac{a}{2} + a\sqrt{\left(\frac{a^2}{4} - b\right)}$$

Quum incognita segregata sit, atque æquata  
 cum notis, nihil restat nisi ut valor cognitarum  
 nitidè exponatur. Jam  $a = 10$ : quadratum  $a =$   
 $100$ : igitur  $\frac{a^2}{4} = 25$ :  $b = 16$ . Igitur radix  $25 -$

$16 = \sqrt{9} = 3$ . Erit ergo  $y = 5 + 3 = 8$ : contra  
 $x = a - y = 10 - 8 = 2$ . Habes jam omnes pro-  
 blematis conditiones,  $2 + 8 = 10$ ;  $2 \times 8 = 16$ .

151 Schol. Animadvertendum est  $y$  æquè  
 applicari posse valori  $= 2$ , atque alteri  $= 8$ .  
 Nam eodem modo conditiones implentur; sive

$y$  fiat  $=2$ ; vel  $=8$ : unde non minus referri potest ad radicem  $y$  valor 2, quam ad alteram radicem  $x$ : atque quælibet ex incognitis poterit ad maiorem, vel ad minorem numerum prohibito applicari. Quamobrem problemata secundi gradus duplicem solutionem admittunt, ac radices ambiguas habent. Postest enim esse utralibet positiva, aut negativa (127). Parenthesi autem includimus quantitates  $\sqrt{\left(\frac{a^2}{4} - b\right)}$ , quippè radix extrahenda est ab una, alterâ mulctatâ; quod alii hoc modo indicare solent  $\sqrt{\frac{a^2}{4} - b}$ .

152 Exmpl. 2. Esto numerus  $a=8$ , numerus  $b=33$ : quæritur numerus  $x$ , cujus quadratum et productum in numerum  $a$ , det summam æqualem quantitati  $b$ . Solut. Ex conditionibus datis erit  $x^2 + ax = b$ . Compleatur quadratum, ut radix extrahi possit; quemadmodum in exemplo præced. factum est:

$$\text{habebitur Quad. } x^2 + ax + \frac{a^2}{4} = \frac{a^2}{4} + b$$

$$\text{Rad. } x + \frac{a}{2} = \sqrt{\left(\frac{a^2}{4} + b\right)}$$

$$\text{transponendo } x = -\frac{a}{2} \pm \sqrt{\frac{a^2}{4} + b}.$$

Incognita jam separata, valores perpendantur:

$$\frac{a}{2} = 4: \sqrt{\left(\frac{a^2}{4} + b\right)} = \sqrt{\left(\frac{64}{4} + 33\right)} = \sqrt{16 + 33} = \sqrt{49} = 7. \text{ Erit igitur } x = -4 + 7 = 3. \text{ In hac æquatione omnes conditiones inveniuntur.}$$



Nam  $3 \times 3 = 9$ , quadratum 3: deinde  $3 \times 8 = 24 + 9 = 33$ .

153 Exempl. 3. Quæritur numerus  $x$ , à cuius quadrato, si ejus quadruplum dematur, residuum sit  $= 96$ . Solutio. Elevato  $x$  ad quadratum, ab eo subducatur ejus quadruplum consueta subtractionis formula, deinde instituatür æquatio.

$$\text{Erit } x^2 - 4x = 96$$

Completo quad.  $x^2 - 4x + 4 = 96 + 4$

Extracta radice,  $x - 2 = \sqrt{(96 + 4)}$

Transponendo,  $x = 2 + \sqrt{(96 + 4)}$

Ex ultima æquatione resultat  $x = 12$ . Nam  $2 + \sqrt{(96 + 4)} = 2 + 10 = 12$ . Est enim  $\sqrt{(96 + 4)} = \sqrt{100} = 10$ . Animadvertendum in æquatione radicem 2 debere esse negativam, quia factor  $-4$  est negativus, adeoque quadratum provenit ex  $\frac{-4}{2} \times \frac{-4}{2} = \frac{16}{4} = 4$ ; quod brevitatibus gratia in formula omissum est.

154 Exempl. 4. Amici rus concedentes, ut diem læti transigerent, prandium communibus expensis parare jusserunt. Quum jam symbolam conferre deberent, duo ex ipsis solvendo non erant; quapropter 12 aureorum expensa, quæ in omnes justis partibus erat distribuenda, à reliquis est persoluta, uno aureo insuper gravatis, quam si omnes symbolam protulissent. Quæritur amicorum numerus. Solut. Esto  $12 = a$ ; amicorum numerus  $= x$ , solventium  $= x - 2$ . Symbola uniuscujusque, omnibus æquas partes conferentibus, fuisset  $= \frac{a}{x}$ . Duobus vero

non solventibus erit  $\frac{a}{x-2}$ . Alia autem ex con-

ditionibus est, aureum plus singulos solventes insumpsisse; ut igitur prodat æquatio; erit

$$\frac{a}{x} = \frac{a}{x-2}. \text{ Sublatis fractionibus (107),}$$

$$\text{erit Reduc. } ax-2a= ax-x^2+2x$$

$$\text{et transp. } -2a=-ax+ax-x^2+2x$$

$$\text{et reduc. } -2a=-x^2+2x$$

$$\text{et transp. } x^2-2x=2a$$

$$\text{Comp. quad. } x^2-2x+1=2a+1$$

$$\text{Extra. rad. } x-1=\sqrt{(2a+1)}$$

$$\text{ac demum } x=1+\sqrt{(2a+1)}$$

En tibi æquationem, quam ad calculos numerorum translatam, habebis  $1+\sqrt{24}+1=1+\sqrt{25}=6$ . Fuerunt igitur amici rusticantes 6, solventes 4: symbola uniuscujusque fuisset 2.

Quoniam autem duo non solverunt, erit  $\frac{12}{4}$

$=3$ ; uno aureo major quam si omnes sumptus fecissent.

## §. V.

### *Radix cubica.*

155 Theor. *Cubus radice binomiali consurgit ex cubo primi termini, triplo quadrato primi termini ducti in secundum, triplo primi termini ducti in quadratum secundi, ac demum cubo secundi termini. Dem.* Sumatur eadem radix binomia in quadrato usurpata  $a+b$ . Illius quadratum est  $a^2+2ab+b^2$ . Hoc per radicem multiplicato, emergit cubus  $a^2a+2a.ab+ab^2+a^2b+2abb+bb^2$ ; et reducendo  $a^3+3a^2b+$

$3ab^2 + b^3$ , termini in theoremate enuntiati.

156 Schol. Eadem demonstratio ad numeros extendi potest. Sit numerus  $5 = 2 + 3$ . Elevato primum ad quadratum  $(2+3)(2+3) = 4 + 6 + 6 + 9$ , et ducto rursus hoc quadrato in radicem, cubus erit  $8 + 12 + 12 + 18 + 12 + 18 + 18 + 27$ . En cubum primi termini  $2 = 8$ , triplum quadratum 4 in secundum terminum  $3 = 12 + 12 + 12 = 36$ , triplum primi termini  $2 = 6$  in quadratum secundi  $9 = 18 + 18 + 18 = 54$ ; ac demum cubum secundi termini  $3 \times 3 = 9 \times 3 = 27$ . Jam additis  $8 + 36 + 54 + 27 = 125$ .

127 Probl 1. *Radicem cubicam litteris expressam extrahere.* Solut. Sit

Cub.  $a^3 + 3a^2b + 3ab^2 + b^3$ . Radix  $a + b$

$$\begin{array}{r}
 -a^3 \\
 \hline
 3a^2b + 3ab^2 + b^3 \\
 3a^2 \\
 \hline
 3a^2b \\
 \quad + 3ab^2 \\
 \quad \quad + b^3 \\
 \hline
 -3a^2b - 3ab^2 - b^3
 \end{array}$$

Artificium idem est, atque in extrahenda radice quadrata; nisi quod ea varietas, quæ inter cubum et quadratum intercedit in productis, ad methodum etiam extractionis transferenda sit. Jam 1. à primo termino  $a^3$  radix extrahitur; atque scribitur loco radici destinato; ad cubum deindè elevata, subtrahitur à primo membro.

2. Pro divisore assumitur triplum quadratum primæ partes radicis  $3a^2$ , eoque dividitur secundum membrum; quotus  $\frac{3a^2b}{3a^2} = b$ , præbet alteram radicis partem, quæ loco suo scribenda erit.

3. Juxta genesim cubi fiant tria producta, multiplicando  $3a^2$  per  $b$ ; productum  $3a^2b$  præbet triplum quadratum primi termini ducti in secundum. Deindè elevetur ad quadratum secundus terminus radici  $b=b^2$ , et multiplicetur per triplum primi membri radicis  $a$ ; erit  $3a \times b^2 = 3ab^2$ . Demum elevetur ad cubum  $b$ ; erit  $b^3$ . Deindè ad cubum elevata, ac omnia producta subducantur; nihil remanet. Est igitur quantitas data cubus perfectus.

158 Corol. Si quantitas tribus terminis, aut pluribus in radice constaret, eadem methodo extractio radicis procederet. Ex gr. cubus radicis  $a+b+c$  est  $a^3+3a^2b+3ab^2+b^3+3a^2c+3ac^2+3b^2c+3bc^2+6abc+c^3$ . Tertium membrum sic debet tractari, ut radix  $a+b$  habeatur pro prima parte: deindè residuum dividi per  $3(a+b^2) = 3a^2+6ab+3b^2$ , quotus erit  $c$ ; reliqua ut in altero membro prius factum est.

159 Lemma. Numerus cubicus plures notas habere non potest, quam triplum notarum suæ radicis: neque pauciores, quam triplum jam dictum, minus duobus. Dem. 1. Numeri ab 1 ad 9, unam notam tantum habent in radice, in cubo autem non plures quam tres; nam cubus 10, qui duabus notis constat est 1000, primus numerus, qui una augeatur nota in

serie arithmetica: ergo omnes numeri infra 10 tribus tantum notis constare possunt in cubo. Pauciores autem quam tres minus duobus habere non possunt; quia eorum radix una constat nota. 2. Numeri etiam à 10 ad 100 nec plures, nec pauciores quam 1000 et 1000000, cubi numerorum 10, et 100; ut est manifestum: ergo omnes inter 10 et 100; seu duarum notarum in radice, non plures habebunt quam sex in cubo, nec pauciores quam quatuor etc.

160 Corol. Ex theor. præced. facillè deducitur methodus determinandi notas in cujuscumque cubi radici contentas. Dividatur numerus datus in membra trinis notis constantia à dextris sinistram versus: ultimum membrum duas, aut unam habere potest. Quot membra in numero divisa sunt, tot notæ respondent in radice: sic numeri cubici 1, 000, 000, quia tria membra continet, radix 100 tribus notis constat.

161 Schol. Pro faciliori radicis cubicæ extractione, en numerorum simplicium cubos in sequenti schemate comprehensos.

Radices 1, 2, 3, 4, 5, 6, 7, 8, 9.

Cubi 1, 8, 27, 64, 125, 216, 343, 729.

162 Probl. 1. *Ex numero complexo radicem cubicam extrahere.* Solut.



Exempl. Cub. 185, 193. Radix  $a+b$

$$a^2 = 125$$

$$60193$$

$$3a^2 = 75$$

$$3a^2 b = 525$$

$$3ab^2 = 735$$

$$b^3 = 343$$

$$60193$$

o

1. Cubus juxta n. 160 dividitur in membra tribus notis constantia; ac deinde quæritur cubus æqualis, aut proximè minor primo membro, hic erit 125. Nam sequens 216 ipsum superat. Ab invento cubo radix extrahitur, atque scribitur loco radici destinato: hæc radix ad cubum elevata subducitur à primo membro, ac residuum subtus scribitur.

2. Residuo 60 secundum membrum adjungitur 193. Pro divisore assumitur triplum quadratum radicis  $5 = 3 \times 25 = 75$ . Hic divisor scribitur sub residuo 60, uno gradu ad dexteram promotus. Deinde diviso membro, sub quo est scriptus divisor, quotus 7 ad radicem adjungitur; est enim altera radicis pars.

3. Tria producta juxta cubi genesim fieri debent: primum radicis 7 in triplum quadratum  $75 = 7 \times 75 = 525$ , quod sub divisore scribendum est: secundum quadrati radicis 7 in triplum radicis 5 primi membri  $= 15$ : erit  $49 \times 15 = 735$ : quod sub primo producto scriben-

dum etiam est uno gradu ad dexteram promotum: demum cubus quoti  $7 = 343$  subscribendus pariter sub secundo producto uno gradu ad dexteram promotus, ac summa colligenda  $= 60193$ , quæ à secundo membro subducenda est. Nihil remanet, adeoque numerus datus est cubus perfectus radicis 57. Demonstratio ex ipsa cubi genesi deducitur. Si cubus plura membra habeat, residuo membri jam pertracti membrum sequens adjungitur, atque operatio de more iteratur; ut in secundo membro exempli factum est.

163 Schol. I. Methodus tradita algebrica est; eaque cubi jam analysis continetur. Breviorem aliam si cupis, en praxim. Primo membro ut prius tractato, residuo 60 adde primam notam membri secundi, erit  $= 601$ ; hoc divide per triplum quadratum radicis inventæ ut prius; et quotum ad radicem adjuuge. Deinde fac cubum ex hac radice, atque ipsum à membris, ad quæ operatio extenditur, subducito. In præsentī casu cubus radicis 57 est ipsemet à quo radix extrahitur; adeoque nihil debet remanere. Quod si plura membra haberet, residuo subductionis prima nota membri sequenti adjungi deberet, atque operatio iteranda, sumpto pro divisore triplo quadrato radicis hactenus inventæ. Hic esset  $57 \times 57 \times 3 = 9747$ . Quotus adjunctus primæ radici, daret radicem ad cubum formandum ut prius. Alio exemplo res clarior evadet.

Cubus 11, 390, 625. Radix 225.  
8

Resid. cum prima  
nota 33

Tripl. quad. rad.  $2 = 12$

Cubus rad.  $22 = 10648$

Resid. cum 1.<sup>a</sup> nota 7426

Tripl. quad. rad.  $22 = 1452$

Cubus rad.  $225 = 11390625$

o

164 Schol. 2. Quum aliquid remanet, signum est numerum datum non esse cubum perfectum. Radix igitur inventa erit maximi cubi in eo contenti. Residuum autem, si ipsum notare oporteat, ut in divisione fieri solet, exprimitur per fractionem, cujus numerator est ipsum residuum, denominator verò differentia inter cubum proxime minorem, et proximè majorem minus unitate. Sic cubus primi membri 11, quod est cubus imperfectus, haberet in radice  $2 + \frac{3}{18}$ . Nam cubus 8 est proximior numero 11; differentia autem inter ipsum, et sequentem cubum  $27 - 8 = 19$ . Ex dictis autem mulctandus est unitate; igitur residuum erit  $\frac{3}{18}$ .

165 Schol. 3. Obiter notandum ex modò dictis, cubum majorem superare cubum proximè minorem, triplo radicis minoris ducto in radicem majoris plus unitate. In exemplo allato numero superiori, cubus 27 superat cubum

8 triplo radicis  $2=6$ , ducto in radicem  $3=18$   
 $+1=19$ . Idem in ceteris cubis observare licet.  
 In quadratis verò excessus majoris supra mi-  
 norem est duplum radicis minoris plus unita-  
 te. Quadratum 25 superat proximè minus 16  
 duplo radicis  $4=8+1=9$ . Nam  $16+9=25$ .

166. Schol. 3. Quod jam in numeris qua-  
 dratis ostensum est; radicem nimirum, quæ  
 inter duos integros continetur, nec integris,  
 nec fractionibus integris adjectis perfectè ex-  
 primi posse (144), etiam ad numeros cubicos  
 extendendum est. Ex g. radix cubica numeri  
 20, quæ major est numero integro 2, et minor  
 3; neque integro, ut est manifestum, neque  
 integro fractione adjecta, perfectè umquam ex-  
 ponetur. Sit ejus radix  $2\frac{4}{5}=2\frac{14}{5}$ ; hæc ad integra  
 reduci nequit: ergo nec ejus cubus ad inte-  
 gra reduci poterit. Nam  $\frac{2744}{125}$  cubus predictæ  
 fractionis æqualis non est 20; adeoque radix  
 ejus  $2\frac{4}{5}$  non potest esse radix cubica numeri  
 20. Inveniuntur itaque in cubis radices *surdæ*  
 aut irrationales, quarum valorem exprimere  
 perfectis numeris non possumus. Licet tamen  
 per approximationem magis ac magis accedere,  
 ut in sequenti.

167 Probl. 2. *Radix cubicam per approx-  
 imationem extrahere.* Solut. Residuo cubi im-  
 perfecti post extractam radicem tot ternarii  
 notarum decimalium addantur quod libuerit;  
 deindè extractio radicis iteranda, ut in probl.  
 præced. in radice inventa tot notæ pro deci-  
 malibus segregandæ sunt, quod ternarii cyphra-  
 rum additi fuerint.

Exempl. Cubus 35

Radix 3, 2

27

8000

27

54

36

8

5768

2232 etc.

Posset rursus iterari extractio, additis tribus aliis notis decimalibus, ut supra: quod etiam in novo residuo fieri deberet, si approximatio major exigeretur. *Dem.* Quum adduntur tres, aut sex notæ, perindè est ac si numerus duceretur in 1000, aut 1000000; radix autem crescere debet proportionaliter 10es, aut 100es. Separatis deinde notis decimalibus, rursus dividitur per 10, aut 100: adeoque rursus minor evadit. Nihil ergo in radice mutatur, nisi quod ejusmodi partes quæ verè ad radicem pertinent, patefiunt; ac proindè accuratior radix habetur.

168 Schol. 1. Examen operationis fit, elevando radicem inventam ad tertiam potentiam, atque ipsi addendo residuum, siquod fuerit: productum restituere debet numerum datum, ut est manifestum.

169 Schol. 2. In fractionibus vulgaribus extractio radiceis tam in numeratore, quam in denominatore fieri debet. Quando autem deci-



males adhibentur, curandum ut numerus decimalium sit semper ternarius, ut tres, sex, novem; quod, ut dictum est, additione notarum semper obtineri potest: quæ pariter in radice resecari debent juxta numerum ternarium, ita ut tribus adjectis in cubo, una respondeat in radice.

## CAPUT V.

*Proportiones, et series.*

## §. I.

*Prænotiones.*

170 Defin. 1. **P**ROPORTIO sive analogia quantitatum est relatio, quæ inter ipsas intercedit. Quum etiam quantitas admittat magis, et minus; excessus, aut defectus unius respectu alterius, calculo subjici potest, atque comparari.

171 Defin. 2. Modus, quo una quantitas se habet ad alteram, *ratio* stilo mathematico vocatur. Omnes autem quantitates homogeneæ inter se rationem habent, seu relationem. Semper enim altera major, aut minor, aut æqualis est alteri. Hinc omnis ratio duos semper terminos supponit: primus dicitur *antecedens*, secundus *consequens*.

172 Defin. 3. *Proportio* est duarum rationum æqualitas. Hinc in omni proportionem quatuor termini inveniuntur, aut saltem bis idem terminus repeti debet, ubi tres tantum repariantur, ut in proportionem *continua*. Hæc ita

appellatur, quum series quantitatum ita collocatur, ut prima sit ad secundam, ut hæc ad tertiam, tertia ad quartam. *Discreta* vero dicitur ea, in qua ordo interruptitur. Series numerorum cardinalium est proportio continua: si in ipsa serie duo extremi cum primis comparentur interruptis mediis, discreta erit proportio: ex. gr. 3 ad 4 ut 8 ad 9. Proportio continua per longam terminorum seriem continuata, dicitur progressio, aut series.

173 Schol. *Rationes* diversis nominibus donantur pro diversitate excessus, aut defectus antecedentis ad consequentem. Si antecedens sit duplo, triplo, quadruplo major, dicitur ratio dupla, tripla, quadrupla: quod si minor fuerit eodem decremento, ratio dicitur subdupla, subtripla, subquadrupla etc. *Æqualitas* intercedens inter utrumque, ratio *æqualitatis* dicitur. Quum non duplo, sed tantum dimidio major est antecedens, ratio *sexquialtera* dicitur. Hæc etiam ad proportionem extenduntur.

## §. II.

*Ratio, et proportio arithmetica.*

174 Defn. Ratio arithmetica est illa relatio unius quantitatis ad alteram ejusdem generis, in qua consideratur excessus aut defectus primæ quantitatis respectu alterius: qui excessus aut defectus antecedentis respectu consequentis dicitur differentia: eaque positiva erit, si antecedens sit minor consequente, negativa si sit consequente major. Hinc rationes arithmeticae

duæ sunt æquales, quum eandem habent differentiam: positivam quidem in utraque, aut id utraque negativam. Itaque  $a . a+b$  est æqualis  $c . c+b$ , quoniam utriusque differentia est  $+b$ : itemque  $a . a-b$ , et  $c . c-b$ , quarum utriusque differentia est  $-b$ . Proportio arithmetica est duarum rationum arithmeticarum æqualitas: quæ erit continua, si consequens primæ proportionis idem sit ac antecedens secundæ: sit minus, erit discreta. Proportio arithmetica sic scribitur, atque enuntiatur,  $a, b=c, d$  aut  $a:b::c:d$ ;  $a$  est arithmeticè ad  $b$ , uti  $c$  ad  $d$ . Numeris etiam exprimitur  $4:8::12:16$ . Quatuor est arithmeticè ad octo, uti duodecim ad sexdecim: scilicet idem excessus invenitur, sivè differentia inter primos, atque inter secundos numeros. Termini primus, et ultimus dicuntur extrema; secundus, et tertius media.

175 Theor. 1. *In proportionē arithmetica summa extremorum æqualis est summæ mediorum. Dem.* 1.<sup>mo</sup> in numeris. Sumantur quivis numeri arihmeticè proportionales  $2:4::6:8$ . Extremorum summa est  $8+2=10$ ; mediorum verò  $4+6=10$ . Nam si primus terminus binario à secundo exceditur, idem pariter excessus est in quarto supra tertium: alioquin non daretur proportio arithmetica: ergo utrinque excessibus compensatis, summæ æquales evadere debent. 2.<sup>o</sup> in litteris. Quævis proportio arithmetica exprimi potest generali hac formula  $a : a+d :: b : b+d$ ; quæ suffectis numeris quibuscumque exacta invenietur; ut  $2:2+3::6:6+3$ . Jam summa extremorum est

$a + b + d$ , summa mediorum  $a + b + d$ , evidenter æquales.

176 Theor. 2. *Si summa extremorum æqualis est summæ mediorum, termini sunt arithmetice proportionales. Dem.* Esto  $a + d = b + c$ , in quibus  $a, d$  sint extrema,  $b, c$  media: si  $a$  excedit, aut exceditur  $a, b$  quantitate  $= x$ , eadem pariter  $c$  excedere, aut excedi debet à  $d$ ; alioquin summæ non essent æquales, ut supponitur: ergo sunt arithmetice proportionales (174).

177 Corol. In proportionē arithmetica loco mutari possunt termini, intacta proportionē. Hoc tamen ex utraque parte fieri debet, ita ut antecedentes fiant consequentes, et vicissim consequentes ad locum antecedentium transferantur. Adhuc enim summa mediorum æqualis remanet extremorum summæ, ut in numeris luculentius videre licet. Si  $2 : 3 :: 5 : 6$ , etiam erit  $3 : 2 :: 6 : 5$ ; collige utriusque extremi, ac medii summam; æqualis remanebit.

178 Probl. 1. *Datis tribus terminis, invenire quartum arithmetice proportionalem.* Solut. Sint  $a, b, c$  tres termini arithmetice proportionales; quæritur quartus  $x$ . Addantur medii: erit (per 175)  $b + c = a + x$ , et transponendo  $x = b + c - a$ . Determinetur valor formulæ in numeris  $a = 4, b = 8, c = 12$ : jam  $12 + 8 = 20 - 4 = 16$ , quartus arithmetice proportionalis. Nam  $4 : 8 :: 12 : 16$ .

179 Defin. Medium proportionale dicitur, quod est simul consequens primæ rationis et antecedens secundæ. In proportionē arithme-

tica  $5 : 10 :: 10 : 15$ , numerus 10, qui est antecedens secundæ, est consequens primæ.

180 Probl. 2. *Datis duobus terminis, medium arithmetice proportionalem invenire.* Sint termini in proportionem arithmetica continua  $a, x, b$ : erit  $a + b = 2x$ , et  $x = \frac{a+b}{2}$ : sci-

licet semisumma extremorum æqualis est medio proportionali quæsito. Substituatur valor in numeris ad libitum, ex gr.  $5 + 15 = 20$ ; hujus dimidium erit terminus quæsitus  $5 : 10 ::$

$10 : 15$ .

### §. III.

#### *Progressiones arithmeticae.*

181 Defin. Proportio continua per longam terminorum seriem eodem excessu, aut diminutione continuata, dicitur progressio, aut series arithmetica. Si progressio fiat per incrementum terminorum, erit progressio, aut series crescens, seu positiva: si differentia fuerit per decrementum, erit decrescens, et negativa. Quævis progressio arithmetica hac formula generali comprehendi potest:  $a : a + d : a + 2d : a + 3d : a + 4d$  etc. Communis differentia est  $d$ , quæ signo positivo afficitur, si progressio est crescens; negativo, si termini decrescunt.

182 Theor. 1. *In progressionem arithmetica quorumcumque terminorum, summa duorum extremorum æqualis est summæ duorum mediorum ab extremis æquè distantium.* Dem. In formula art. præc. colligatur extremorum summa; ex. gr.  $a + a + 4d$ , et duorum mediorum æquè



distantium  $a+d+a+3d$ , et reducendo  $2a+4d$  in utraque. In numeris 1, 2, 3, 4, 5, 6, etc. addantur duo extremi seriei, et duo medii æquè distantes; summa invenietur par.

183 Theor. 2. *In progressionem numerorum imparium summa extremorum, vel etiam duorum æquè distantium ab extremis, æqualis est duplo termini medii.* Dem. In formula  $a+a+4d=(a+2d)2=2a+4d$ . In numeris series erit 1, 3, 5, 7, 9, 11, 13 etc.  $1+13=14=7\times 2=14$ .

184 Theor. 3. *In omni progressionem arithmetica quilibet terminus continet primum terminum et toties exponentem, seu differentiam, quot sunt termini à primo ad ipsum exclusivè.* In formula  $a:a+d:a+2d:a+3d:a+4d$  termini à primo ad ultimum exclusivè sunt quatuor, exponens seu differentia est  $d$ ; erit igitur ultimus terminus  $=a+4\times d=a+4d$ , ut est manifestum. In numeris 1:3:5:7:9:11:13, termini sunt sex, differentia 2: erit igitur juxta theoriam expositam  $2\times 6=12$ ; at  $12+1=13$ , qui est ultimus terminus; quod adamussim respondet.

185 Corol. 1. Facile deduces maximum quoscunque progressionis terminum, noto exponente seu differentia terminorum, atque ipsorum numero. Si enim excludatur ultimus, seu minuatur unitate terminorum numerus, adducatur in differentiam, productum additur primus terminus; ac summa erit ultimus progressionis, ut in numeris supra allatis factum vides. Formula generali æquatio sic institui

posset. Sit primus terminus  $=a$ ; differentia  $=d$ ; numerus terminorum  $=2$ ; terminus ultimus  $=z$ : erit  $z = (a+d)(2-1)$ .

186 Corol. 2. Habebitur etiam summa cujuscumque progressionis arithmeticæ, datis primo, atque ultimo progressionis termino, ac terminorum numero. Nam si utriusque summa ducatur in dimidium numerum terminorum; productum æquale erit summæ quæsita; tot enim dantur summæ primi, atque ultimi, quot sunt paria terminorum æquè distantium (182). Idem obtineri posset, si dimidium summæ primi atque ultimi duceretur in numerum terminorum: vel summa integra duceretur in numerum terminorum, ac postea per 2 divideretur: aut demum, si termini sint impares, ducendo terminum medium in numerum terminorum imparium. In hac enim serie numerus medius æqualis est semisummæ primi et ultimi, aut duorum quorumcumque ab ipso æquè distantium (183).

187 Schol. Ut brevitati consulamus, reliqua problemata hic innuere sufficiat, quorum solutio ex dictis facilè eruitur. 1. *Datis primo, et ultimo termino seriei, necnon et terminorum numero, differentiam invenire.* Solut. Subtracto primo ab ultimo termino residuum dividatur per numerum terminorum unitate minutum; quotus erit differentia. 2. *Datis primo termino, differentia, et numero terminorum, ultimum terminum seriei invenire.* Solut. Ducatur differentia in numerum terminorum unitate minutum, ac producto primus terminus addatur: summa erit

ultimus terminus. 3. *Primo et ultimo termino datis, necnon et differentia, numerum terminorum invenire.* Solut. Subducatur primus ab ultimo, ac residuum per differentiam dividatur: quotus plus unitate erit numerus terminorum.

## §. IV.

*Ratio et proportio geometrica.*

188 Defin. 1. Duæ quantitates possunt inter se comparari, ita ut in illis quotus consideretur, seu quoties una contineat alteram, aut in illa contineatur. Hujusmodi relatio in ordine ad quotum dicitur *ratio geometrica*. Modus illa scribendi est hujusmodi  $a : b$ , aut  $2 : 4$ . Exponens autem rationis est quotus. Sic rationis  $8 : 4$  exponens est  $= 2$ .

189 Corol. Rationem geometricam hac generali formula comprehendere possumus:  $a : aq$ , in qua  $a$  est antecedens; quotus vero, qui ex divisione consequentis per antecedentem obtinetur per  $q$  significatur. Productum verò ex quotu in antecedentem ducto, est ipse consequens, quia consideratur ut dividendum.

190 Theor. 1. *Valor rationis geometricæ non mutatur dum antecedens, et consequens per eandem quantitatem multiplicantur, aut dividuntur.* Dem. In casu proposito eodem augmento aut decremento crescunt, aut decrescunt antecedens, et consequens: ergo remanet æqualitas in ratione unius ad aliam: quotus enim idem erit. Sit ratio  $a : aq$ ; multiplicentur termini per  $m$ ; productum erit  $am, amq$ ; aut di-

vidantur per  $d$ ; quoti  $\frac{a}{d} : \frac{aq}{d} =$  primæ rationi  $a : aq$ . Si enim consequens per antecedentem dividatur, prodit quotus  $q$ , ut facta divisione patet:  $\frac{amq}{am} = q$ : et  $\frac{adq}{ad} = q$ :  $\frac{aq}{a} = q$ .

191 Corol. Ex theor. præcedenti *praxis italica* vulgo dicta emanavit. In quacumque enim ratione geometrica complicationibus terminis expressa, alia expressio simplicior inveniri potest, quæ loco primæ substituatur. Praxis est hujusmodi, quærat communis utriusque numeri, aut quantitatis mensura maxima (52), per eamque dividatur tam antecedens, quam consequens: quoti dabunt duos alios terminos, qui in eadem erunt ratione geometrica ac dividendi. Sint numeri 168 : 240; per inventam communem maximam mensuram 24 uterque dividatur; quoti erunt in ratione eadem 7 : 10 = 168 : 240.

192 Defin. 2. Si plures sint rationes, atque earum termini antecedentes inter se, et consequentes pariter inter se multiplicentur; horum terminorum producta erunt in *ratione composita* rationum simplicium. Sint tres rationes  $a : b$ ,  $c : d$ ,  $e : f$ ; facta multiplicatione antecedentium inter se, et consequentium itidem inter se, eorum producta  $a c e : b d f$ , erunt in ratione composita primarum trium rationum simplicium. In numeris 2, 6, 3 : 9, 4, 12; producta antecedentium 24, et consequentium 648 erunt in ratione composita priorum rationum simplicium.

193 Defin. 3. Si ex duabus rationibus sim-

plicibus, et æqualibus, ex g.  $a : am$ ,  $b : bm$  fiat quædam alia tertia  $ab : abm^2$  ex duabus primis composita, hæc erit in ratione composita *duplicata* vel quadrata duarum componentium. Quotus enim in hac ultima est quadratum quoti cujusvis rationis simplicis. Quælibet autem ex his simplicibus  $a : am$  erit ad compositam  $ab : abm^2$  in ratione *subduplicata* quia ejus quotus  $m$  est radix quadrata alterius quoti.

194 Corol. Cujusvis rationis simplicis facile obtinetur ratio *duplicata*, elevando utrumque terminum ad secundam potentiam: ex g. ratio *duplicata*  $3 : 9$ , erit  $9 : 81$ ; et vicissim si quæritur ratio *subduplicata* duorum numerorum, radix quadrata ab utroque extracta erit ratio quæsita; ut  $3 : 9$  est ratio *subduplicata*  $9 : 81$ . Similiter  $2 : 3$  est ratio *subduplicata* rationis  $4 : 9$ .

195 Defin. 4. Quod si tres rationes æquales, et simplices inter se multiplicentur, ratio ex illis composita erit triplicata respectu cujusvis simplicis, et hæc ad compositam erit in ratione *subtriplicata*. Sint rationes simplices  $a : am$ ,  $b : mb$ ,  $c : cm$ ; ductis antecedentibus, et consequentibus prodit ratio triplicata  $abc : abcm^3$ . Quælibet autem ex simplicibus erit istius *subtriplicata*. Quod attinet ad numeros, eadem lex esto atque in ratione *duplicata*: eleventur nimirum ad cubos, si quæritur ratio triplicata; aut radix cubica extrahatur, dum illorum ratio *subtriplicata* investigatur. Ratio triplicata  $2 : 3$  erit  $8 : 27$ ; radices autem  $2 : 3$  in ratione *subtriplicata* suorum cuborum erunt.

196 Schol. Dantur etiam rationes *incom-*



*mensurabiles, surdæ, irrationales*, in quibus quotus nullis numeris exacte exprimi potest. Rationes vero in quibus quotus exactus obtinetur, *rationales*, et *commensurabiles* sunt. Ratio  $\sqrt{2}$  est incommensurabilis; nullo enim integro, aut fractione exprimi potest.

197 Defin 5. Proportio geometrica ea dicitur, quæ duas rationes geometricas æquales includit, ita ut antecedens primæ sit ad suum consequentem, ut antecedens alterius ad proprium consequentem est. Nimirum idem quotus in utraque ratione inveniri debet. Termini harum rationum dicuntur *geometricè proportionales*: ex. g.  $2 : 4 :: 3 : 6$ . Quum verò idem terminus est consequens primæ, et antecedens secundæ, proportio geometrica erit continua, ut  $2 : 4 :: 8 : 16$ ; et terminus secundus dicitur medius proportionalis respectu suorum extremorum.

198 Schol. 1. Proportio geometrica frequentius scribitur  $2 : 4 :: 8 : 16$ , et sic enumeratur: *duo sunt geometricè ad quatuor, ut octo ad sexdecim*. Nonnumquam etiam sic scriptum invenies:  $\frac{a}{b} : \frac{c}{d}$  quod idem significat atque  $a : b :: c : d$ ; sive  $a : b = c : d$ .

199 Schol 2. Proportio geometrica hac formula generali includi potest;  $a : aq :: b : bq$ : aut si libuerit  $aq : a :: bq : b$ , quæ eadem est, ac præcedens, terminis loco mutatis. Hæc autem formula proportionem geometricam continet quotus enim in utraque ratione idem est.

200 Theor. 1. In proportionem geometricam pro-

*ductum extremorum, æquale est producto mediorum. Dem.* Adhibeatur formula generalis proportionem quamlibet geometricam repræsentans,  $a : aq :: b : bq$ . Ducantur extrema  $a \times bq = abq$ . Ducantur etiam media  $aq \times b = abq$ , evidenter æqualia. In numeris  $2 : 4 :: 3 : 6$ ,  $2 \times 6 = 12$ ,  $4 \times 3 = 12$ .

201 Corol. 1. Si productum extremorum æquale est facto mediorum, termini erunt geometricè proportionales. Nam quotus idem esse debet in utraque ratione: ex. g. extremorum productum  $abq$  habet exponentem  $q$ ; eoque in altero producto variato jam non erit amplius factum mediorum  $abq$ , sed factum aliud, quod ex alio quoto assumpto consurgeret, ut est manifestum.

202 Corol. 2. Factores æqualium productorum sunt geometricè proportionales, aut quod aliis terminis idem est: ex duobus productis æqualibus semper proportio geometrica erui potest. Sint duo producta æqualia  $ad = bc$ , erit geometricè  $a : b :: c : d$ ; productum enim mediorum æquale est productum extremorum, adeoque habetur proportio geometrica. Deduci etiam posset hæc altera analogia  $a : c :: b : d$ , aut  $b : a :: d : c$ ; quocumque enim modo statuantur termini, adhuc productum extremorum æquale est facto mediorum, ut prius.

203 Theor. 2. Si ponantur quatuor termini proportionales, quocumque modo collocentur, dummodò maneat æqualitas in quotis, adhuc remanet proportio. *Dem.* Æqualitate manente in quotis in utraque ratione, productum extremo-

rum adhuc erit æquale producto mediorum: ergo termini sunt geometricè proportionales. En variationes præcipuas in numeris, ut clarius percipiantur. Sint  $2 : 4 :: 3 : 6$ .

1. Invertantur extrema, intactis mediis,  $6 : 4 :: 3 : 2$ ;  $6 \times 2 = 12$ ;  $4 \times 3 = 12$ .

2. Commutentur media intactis extremis,  $3 :: 4 : 6$ ;  $2 \times 6 = 12$ ;  $3 \times 4 = 12$ . Duplex hæc mutatio, quæ velut unica considerari potest, dicitur *alternando*.

3. Si antecedentes fiant consequentes, et vicissim consequentes antecedentes,  $4 : 2 :: 6 : 3$ ; hæc mutatio dicitur *invertendo*.

4. Si in utraque ratione antecedentibus consequentes, aut hi antecedentibus addantur,  $2 + 4 : 4 :: 3 + 6 : 6$ ; scilicet  $6 : 4 :: 9 : 6$ ; aut  $2 : 4 + 4 :: 3 : 6 + 6$ ; nimirum  $2 : 8 :: 3 : 12$ ; hæc mutatio dicitur *componendo*.

5. Si in utraque ratione consequentes ab antecedentibus, aut hi à consequentibus subtrahantur,  $2 : 4 - 2 :: 3 : 6 - 3$ ; aut  $2 - 4 : 4 :: 3 - 6 : 6$ ; hæc mutatio dicitur *dividendo*.

Manifestum est in litteris easdem mutationes fieri posse, atque eandem obtentum iri productorum æqualitatem. Permutentur quantitates litterales  $a : am :: b : mb$  eo modo, quo numeri in exemplo adducti; æqualitas in factis, et in quotis remanebit. Nam parum interest in productis utrum primus in ultimum, aut ultimus in primum ducantur, factores enim semper idem sunt. In duabus verò permutationibus ultimo loco adductis, proportionaliter augmentur, aut minuuntur extrema, aut media;

adeoque æqualitas in productis perseverat.

204 Probl. 1. *Datis tribus terminis, quartum proportionalem invenire.* Solut. Sint tres termini dati  $a, b, c$ , et  $x$  quartus quæsitus; posita proportionem erit  $a : b :: c : x$ , et productum extremorum  $ax = bc$ , et  $x = \frac{bc}{a}$  nimirum productum mediorum dividi debet per factorem notum, quotus erit alter factor incognitus, et quæsitus (139). Hæc est praxis regulæ aureæ, aut trium, de qua infra.

205 Probl. 2. *Datis duobus terminis, medium geometricè proportionalem invenire.* Solut. Ducantur dati termini inter se, atque à producto radix quadrata extrahatur; hæc erit terminus medius geometricè proportionalis inter duos datos. *Dem.* Sint tres termini  $a, x, c$ , in proportionem geometricam continua: extrema cognita  $a$  et  $c$ : incognitus quesitus  $x$ . Quoniam supponitur proportio continua, hac formula debet exponi,  $a : x :: x : c$ ; ergo  $ac = xx = x^2$ : ergo  $\sqrt{ac} = \sqrt{x^2} = x$ . Erit igitur  $\sqrt{ac}$  medium proportionale quæsitum.

206 Schol. In proportionibus termini antecedentes, et consequentes vocantur *homologi*, sive ejusdem nominis; unde idem est jubere terminos homologos inter se multiplicare, atque antecedentes inter se, et consequentes inter se ducere.

207 Theor. 3. *Si termini homologi duarum proportionum inter se multiplicentur, aut dividantur; producta, aut quoti erunt proportionalia.* *Dem.*

Sit  $a : aq :: b : bq$ .

Et  $c : cm :: d : dm$ .

Multiplicati  $ac : acmq :: bd : bdmq$ .

Divisi  $\frac{a}{c} : \frac{aq}{cm} :: \frac{b}{d} : \frac{bq}{dm}$

In utroque casu productum extremorum æquale est facto mediorum. Quotus etiam in prima ratione est  $mq$ ; in secunda verò est etiam  $mq$ , qui quidem certè sunt æquales. Substituantur numeri, ut clarior res evadat.

1.<sup>a</sup> proport.  $a : aq :: b : bq$

$$4 : 4 \times 2 :: 6 : 6 \times 2$$

$$4 : 8 :: 6 : 12$$

2.<sup>a</sup> proport.  $c : cm :: d : dm$

$$3 : 3 \times 5 :: 7 : 7 \times 5$$

$$3 : 15 :: 7 : 35$$

Multipl.  $12 : 120 :: 42 : 420$  quotus  $\frac{1}{10}$

Divis.  $\frac{4}{3} : \frac{8}{15} :: \frac{6}{7} : \frac{12}{35}$  quotus  $\frac{2}{5}$

Producta tam extremorum quam mediorum in primo = 5040; in secundo verò =  $\frac{48}{105}$ .

208 Theor. 4. Quum in duabus proportionibus consequentes primæ proportionis æquales sunt antecedentibus alterius; antecedentes primæ ad consequentes secundæ proportionis etiam proportionales erunt.

$$a : b :: c : d \quad 8 : 2 :: 12 : 3$$

$$b : e :: d : f \quad 2 : 6 :: 3 : 9$$

erit  $a : e :: c : f \quad 8 : 6 :: 12 : 9$  erit

Nam facta multiplicatione, per theor. 3, erit



$ab : be :: cd : df$  : Et per art. 191 ad simpliciores terminos deducta, erit  $a : e :: c : f$ .

209 Theor. 5. *Quum termini medii unius proportionis æquales sunt terminis extremis alterius, etiam reliqui perturbatè ex æquo proportionales erunt.* Dem. Sint duæ proportiones

$$\begin{array}{rcl} a : b :: c : d & 8 : 2 :: 12 : 3 \\ b : e :: f : c & 2 : 6 :: 4 : 12 \\ \hline \text{erit } a : e :: f : d & 8 : 6 :: 4 : 3. \end{array}$$

Nam multiplicati  $ab : be :: cf : dc$ , et facta reductione,  $a : e :: f : d$ .

210 Theor. 6. *Si termini proportionales sunt, illorum quadrata, cubi, reliquæ potentie, proportionalia erunt.* Dem. Sit  $a : b :: c : d$ , erit  $ad = bc$  (200), et  $a^2 \cdot d^2 = b^2 \cdot c^2$ , et  $a^2 : b^2 :: c^2 : d^2$  (202).

211 Corol. Si quadrata sunt proportionalia, eadem proportio invenietur in radicibus. Nam si  $a^2 : b^2 :: c^2 : d^2$ ,  $a^2 \cdot d^2 = b^2 \cdot c^2$ ; et  $ad = bc$ , et  $a : b : c : d$  (202). En permutationum schema, quæ in quantitatibus, aut loco mutatis, aut aliis quantitatibus auctis, vel minutis occurrere possunt mathematica, aut philosophica consideratione digniores. Sit.

$$a : am :: b : bm.$$

- Erit
1. invertendo  $am : a :: bm : b$
  2. alternando  $a : b :: am : bm$
  3. componendo  $a + am : a :: b + bm : b$   
et  $a + am : am :: b + bm : bm$
  4. dividendo  $a - am : a :: b - bm : b$   
et  $a - am : am :: b - bm : bm$

aut etiam  $am - a : a :: bm - b : b$   
 et  $am - a : am :: bm - b : bm$

5. Ex æquo ordinatè : si  $a : am :: b : bm$   
 et  $am : amn :: bm : bmn$   
 erit  $a : amn :: b : bmn$ .

6. Ex æquo perturbatè : si  $a : am :: b : bm$   
 et  $am : amn :: \frac{b}{n} : b$

erit  $a :: amn :: \frac{b}{n} : bm$

$$7. a^2 : a^2 m^2 :: b^2 : b^2 m^2$$

$$8. a^2 : \frac{a^2}{m^2} :: b^2 : \frac{b^2}{m^2}$$

$$9. a : amc :: b : bmc$$

$$10. a : \frac{am}{c} :: b : \frac{bm}{c}$$

$$11. ac : am :: bc : bm$$

$$12. \frac{a}{c} : am :: \frac{b}{c} : bm$$

$$13. ac : amc :: b : bm$$

$$14. \frac{a}{c} : \frac{am}{c} :: b : bm$$

$$15. ac : amc :: bd : bmd$$

$$16. \frac{a}{c} : \frac{am}{c} :: \frac{b}{d} : \frac{bm}{a}$$

$$17. ac : amd :: bc : bmd$$

$$18. \frac{a}{c} : \frac{am}{d} :: \frac{b}{c} : \frac{bm}{d}$$

$$19. \text{Si } a : am :: b : bm$$

$$\text{et } c : cn :: d : dn$$

$$\text{erit } ac : acmn :: bd : bdmn$$

$$20. \text{Si } a : am :: b : bm$$

$$c : cn :: d : dn$$

$$f : fr :: g : gr$$

$$h : hs :: l : ls$$

etc.

erit  $acfh : acfhnrs :: bdgl : bdglmrs$ .

In his omnibus permutationibus proportionem remanere facile quisque percipiet, quum instituta divisione eundem exponentem ubique repererit; aut multiplicatis mediis, atque extremis inter se, producta æqualia conspexerit.

## §. V.

*Progressiones Geometricæ.*

212 Defin. Series terminorum eodem incremento, aut decremento proportionali crescentes, aut decrescentes, aut quod idem est, eundem quotum habentes, dicitur *progressio geometrica*. Hinc ut in duobus rationibus proportionem geometricam constituentibus, idem quotus obtinetur; idem pariter in progressionem observari debet. Series numerorum 1, 2, 4, 8, 16, 32, 64 etc. progressionem geometricam constituunt, in qua exponens, sive quotus est 2.

213 Corol. Progressio geometrica est proportio continua per plures terminos deducta. Quod si quotus sit numerus integer, progressio erit crescens; si autem pro quoquo fractione habeatur, erit series decrescens, ut  $\frac{1}{2}$ ,

$$\frac{1}{4}, \frac{1}{8}, \frac{1}{16} \text{ etc.}$$

214 Schol. Progressio geometrica hac formula generali exprimi potest;  $a : aq : aq^2 : aq^3 : aq^4$  etc., cui substitui possunt quivis numeri, ut aliquod objectum determinatum menti appareat, ut  $1 : 2 : 4 : 8 : 16$ . Nam assumpto  $a=1$ , et  $q=2$ , erit  $aq=1 \times 2=2$ , et  $aq^2=1 \times 2 \times 2=4$ , etc. Pari methodo in altera progressionem, cujus quotus sit 3, substituere licebit litteris, numeros respondentem  $1 : 3 : 9 : 27 : 81$  etc., ut in altera factum est.

215 Theor. 1. *In quavis progressionem geometrica primus terminus est ad tertium, ut quadratum primi ad quadratum secundi; et primus ad quartum, ut cubus primi ad cubum secundi. Dem.* Sumatur formula quamvis progressionem repræsentans,  $a : aq : aq^2 : aq^3$ , per theor. erit  $a : aq^2 :: a^2 : a^2 q^2$ , nam productum extremorum æquale est facto mediorum. Propter eandem rationem erit  $a : aq^3 :: a^3 : a^3 q^3$ . Productum extremorum in utroque casu æquale est producto mediorum. In numeris est etiam manifestum. Sit progressio  $2 : 4 : 8 : 16$ , (à quocumque enim termino series incipi potest); erit  $2 : 8 :: 4 : 16$ , et  $2 : 16 :: 8 : 64$ .

216 Corol. Hinc deducitur in quavis progressionem geometrica rationem primi ad tertium esse duplicatam rationis primi ad secundum. Et rationem primi ad quartum triplicatam primi ad secundum (195).

217. Theor. 2. *Terminus ultimus cujuscunque progressionis geometricæ æqualis est producto ex primo termino ducto in potentiam quoti, sive in quotum elevatum ad eam potentiam,*

cujus exponens est numerus terminorum, dempto primo. Dem. Sit formula  $a : aq : aq^2 : aq^3 : aq^4$ ; terminus ultimus  $aq^4$  æqualis est producto ex  $a \times q^4$ ; quoto scilicet elevato ad quartam potentiam. Nam termini dempti primo sunt quatuor. In numeris sint  $1 : 2 : 4 : 8 : 16$ ; ultimus terminus  $16$  æqualis est producto  $1 \times 2^4 = 16$ , quod est potentia quarta quoti  $2$ : tot enim sunt termini excepto primo in progressionem.

218 Corol. Si ergo numerus terminorum dicatur, aut repræsentetur per  $n$ , et terminus ultimus per  $z$ , habebitur æquatio  $z = aq^{n-1}$ .

219 Theor. 3 In progressionem geometricam summa omnium terminorum excepto ultimo, est ad summam omnium terminorum, excepto primo, ut unitas ad communem quotum. Dem. Sumantur ex formula quotcumque termini  $a : aq : aq^2 : aq^3$ ; erit  $a + aq + q^2 : aq + aq^2 + aq^3 :: 1 : q$ . Nam productum extremorum est  $= aq + q^2 + aq^3$ , evidenter æquale producto mediorum. Patet etiam in numeris; sit  $1 : 2 : 4 : 8 : 12$ ; summa omnium excepto ultimo  $= 15$ ; summa omnium excepto primo  $= 30$ . Erit  $15 : 30 :: 1 : 2$ , quotus progressionis.

220 Corol. Ex theor. præc. potest reperiri formula ad definiendam summam cujusvis progressionis geometricæ. Dicatur summa  $= s$ ; summa terminorum ultimo excluso  $= s - z$ ; summa terminorum dempto primo  $= s - a$ . Ex theor. præc. oritur æquatio.

$$s - z : s - a :: 1 : q$$



Et per multiplicationem extremorum, et mediorum

$$sq - qz = s - a$$

Et transp.

$$sq - s - zq = -a$$

Et rursus

$$sq - s = zq - a$$

Et resolvendo factores

$$s(q - 1) = zq - a$$

Et separando factorem cognitum

$$s = \frac{zq - a}{q - 1}$$

In numeris sit progressio

$$1 : 3 : 9 : 27 : 81,$$

juxta formulam  $s = \frac{zq - a}{q - 1}$  erit  $z = 81$   $q = 3$ , et

$$\frac{zq - a}{q - 1} = \frac{243 - 1}{3 - 1} = \frac{242}{2} = 121 = 1 + 3 + 9 + 27 + 81.$$

221 Corol. 1. Si æquatio præcedens  $\frac{zq - a}{q - 1} = s$  cum altera (218)  $aq^2 - 1 = z$  conferatur, reliqua progressionis geometricæ problemata resolvi possunt. Nimirum *ex his quinque (termino primo, communi quoto, numero terminorum, termino ultimo, et summa) tribus datis, invenire reliqua.* Verum hæc longiori calamo prosequenda forent, et ad logarithmos recurrendum, de quibus infra.

222 Corol. 2. In quibuslibet rationibus geometricis æqualibus summa omnium antecedentium terminorum est ad summam omnium consequentium, ut unitas ad communem quotum. Sint rationes,  $a : aq : b : bq : c : cq$ , etc.; erit etiam  $a + b + c : aq + bq + cq :: 1 : q$ . In numeris  $2 : 4 :: 3 : 6 :: 4 : 8$ ; summa antecedentium, et consequentium erunt  $2 + 3 + 4 : 4 + 6 + 8 :: 1 : 2$ . Nam  $9 : 18 :: 1 : 2$ .

## CAPUT SEXTUM.

## USUS PROPORTIONUM.

## §. I.

*Regula aurea.*

<sup>223</sup> **D**efin. Regula trium vulgo dicta, à maxima ejus utilitate *aurea* etiam appellata, est proportio geometrica, in qua tres termini sunt cogniti, et quartus incognitus inquiritur: adeòque jam in problem. num. 204 exposita est. At quum plerumque nonnulla occurrant in praxi, quæ negotium facessant, operæ pretium est ea antevertere, atque explanare. Regula trium, vel est *directa*, vel *inversa*.

<sup>224</sup> Defin. 1. Regula trium *directa* illa dicitur, in qua terminus quartus ignotus tanto major, aut minor est tertio, quanto secundus primo major, aut minor fuerit: ex g. 15 : 20 :: 25 :  $x$ . Evidens est quartum terminum  $x$  tantò majorem esse debere tertio 25, quo 20 secundus superat primum 15.

<sup>225</sup> Schol. 1. Pronum etiam est animadvertere, saltem duos terminos in proportionem homogeneos esse debere, ut proportio servetur. Fiat quæstio: in fodina 10 operæ 30 saccos metalli quotidie exportant: 40 operæ quot saccos ejusdem materiæ exportabunt? Operæ in primo, et tertio termino; metallum in secundo, et quarto homogenei sunt. Minimè autem opus est, ut semper eundem ordinem ser-

vent. Quum enim termini servata proportione multimodis variari possint, eò pariter ordine in regula aurea disponi poterunt; ex. g.

10 operæ: 30 sac.: : 40 operæ:  $x$ , numerum sacorum, vel 10 operæ: 40 operas: : 30 sacci:  $x$ , num. sacc. Hæc methodus postrema disponendi terminos quodammodò conformior est; nam in illa termini homogenei inter se comparantur; atque eodem praxis recidit. Multiplicetur  $3 \times 40 = 120$ , et hoc productum per primum terminum 10 dividatur; 320 erit quartus terminus quæsitus.

226 Schol. 2. Quum primo intuitu apparet proportio inter tertium, et quartum terminum, à multiplicatione et divisione supersedere possumus; sic in exemplo adducto, quum 10 sit quarta pars secundi termini 40; etiam 30 erit quarta pars termini  $x$  ignoti: undè multiplicando  $30 \times 4 = 120$ , quartus habebitur.

227 Defin. 2. Regula trium est *inversa*, quum ex terminis in quæstione propositis apparet, quartum terminum ignotum tantò maiorem esse debere tertio, quantò secundus minor est primo; aut contra, tantò minorem quantò secundus major est primo. Hujusmodi est quæstio sequens: 6 operæ 24 horis aliquod opus in fodina expleverunt: quot horis 18 operæ illud explevissent? Dispositis terminis homogeneis inter se collatis, statim apparet num. directæ, aut inversæ sit proportio.

6 operæ: 18 operas: : 24 horæ:  $x$ .

Manifestum est quartum terminum  $x$ , eò minorem esse debere tertio, quo secundus major

est primo. Duodeviginti enim operæ celerius, quam sex opus debent conficere. Hinc ut ad rectam dispositionem deducantur termini, sic collocari deberent.

6 operæ: 18 operas: :  $x$  horæ: 24 horas.

Multiplicatis deindè extremis  $6 \times 24$ , ac producto 144 diviso per terminum secundum 18, quotus 8 erit tertius terminus quæsitus. Si verò disponantur, ut primo loco, multiplicetur primus per tertium, et productum dividatur per secundum.

228 Schol. 1. Quævis proportio inversa facillimè in directam converti potest, mutatis directo ordine terminis. Sic antecedens proportio:

6 operæ: 18 operas: :  $x$  horæ: 24 horas.

18 operæ: 6 operas: : 24 horæ:  $x = 8$  hor.

229 Schol. 2. Quando in proportionibus occurrunt termini mixti speciei superioris, et inferioris, ad infimam reducendi sunt, quod pariter in fractionibus faciendum est: ex. g. 4 ped. 5 pol. 2 ped. 4 pol. prius reduci debent ad pollices 53 pol. (28); deindè ad proportionem inquirendam deveniendum. Sint etiam  $2\frac{1}{2}$ :  $3\frac{4}{5}$ ; prius ad fractiones integri reduci debent  $\frac{5}{2}$ ,  $\frac{19}{5}$  (55); ac postea terminus incognitus investigandus erit.

230 Schol. 3. Quod si non omnibus terminis, sed uni, aut duobus tantum adhæreat fractio, integro cum fractione prius ad unicam fractionem reducto, ceteri more fractionum disponendi sunt, unitate supposita. Ex. g. 5:  $2\frac{1}{2}$ : :  $3\frac{4}{5}$ :  $x$  sic prius disponi debent  $\frac{5}{1}$ :  $\frac{5}{2}$ : :  $\frac{19}{5}$ :  $x = \frac{95}{10}$  (59) =  $1\frac{9}{10}$  (51).

## §. II

*Regula aurea composita.*

231 Defin. Regula aurea est *composita*, quum ad principales terminos alii accessorii adduntur, qui per multiplicationem cum principalibus admiscuntur, ut tandem ad tres reducantur.

232 Probl. 1. Regulam trium compositam ritè adhibere. Solut.

Exemplum. Milites 30, 10 dieb. vallum 20 pedum circumducunt: 50 milit. 4 dieb. quot pedum vallum ducent? Ut prius ad tres principales terminos reducantur, disponantur duæ proportiones

$$\begin{array}{l} 30 \text{ mil.} : 20 \text{ ped.} :: 50 \text{ mil.} : \text{ped. } x \\ 10 \text{ dies} : 20 \text{ ped.} :: 4 \text{ dies} : \text{ped. } x \end{array}$$

Ducatur jam numerus militum in numerum dierum in utraque parte proportionis  $30 \times 10 = 300$ , et  $50 \times 4 = 200$ . Jam ad regulam trium simplicem compositam redacta est, atque ejusdem methodo pertractanda.

$$300 : 20 :: 200 : 13\frac{1}{2}$$

Dem. Manifestum est idem opus 30 operarios 10 dies laborantes confecturos, ac 300 unico die: similiter 50 laborantes per dies quatuor, idem opus perficient, ac 200 una die: ergo duæ proportiones in unam coalescunt, regula communi pertractanda.

233 Schol. Quamvis theoria hæc exacta sit,



atque in quantitativibus abstractis ad calculos deducta optimè respondeat; in praxi tamen nonnumquam fallere potest. Nam si domum ex. g. 100 operæ unius anni spatio à fundamentis ædificiant; malè deduceres 36500 uno die eandem exstructuros. Opus enim erat ad calculos etiam reducere impedimenta, quæ sibi ipsis inducerent tot operæ simul laborantes in constructione ædifici; quæ quidem nullo numero adjuncto superari possunt, nec in supputationem venire. Hoc in mechanica semper præ oculis habendum.

234 Probl. 2. Regulam auream adhibere, quum septem, aut novem termini in quæstione proponuntur. Solut. Eadem est praxis, ac præcedens, quotcunque terminis constet problema. Reducuntur prius termini per multiplicationem ad regulam simplicem, atque hæc de more tractatur: ex. gr. in præcedenti exemplo potest quæstio ita proponi: 30 milites, 10 diebus, 8 horis, 20 ped. vallum duxerunt: 50 milites, 4 diebus, 6 horis quot pedes conficient? Reducantur primum ad infimam speciem horarum dies (35), quæ reductio dabit 248, et 102 horas pro totali producto 10 dierum cum 8 horis, et 4 dierum 6 horarum: deindè prima, et secunda proportio ad unam traducantur, ut in sequenti schemata.

$$\left. \begin{array}{l} 30 \text{ mil.} : 20 \text{ ped.} :: 50 \text{ mil.} \\ 248 \text{ hor} : 20 \text{ ped.} :: 102 \text{ hor.} \end{array} \right\} : x$$

$$7440 : 20 :: 5100 : x$$

$$x = \frac{10200}{\frac{744}{51}} = 13 + \frac{22}{31} = 13 - \frac{2}{3} \text{ circiter.}$$

235 Schol. Regula proportionum compo-

sita est regula simplex repetita: undè etiam in duas simplices resolvi potest hoc modo. In prima ponuntur termini principales, ac de more resolvitur. In secunda primus terminus est ille accessorius, qui primo termino principali adhaerebat; secundus est quartus proportionalis inventus in prima proportionè; tertius est alter accessorius secundæ partis primæ proportionis, ad quos quartus proportionalis inquirendus est. Ex. gr. Tres molæ, 4 horis, 30 modios molunt; 5 molæ, 6 horis, quot modios in farinam convertent? En duplici modo quæstionem resolutam.

$$\begin{array}{lcl} 3 \text{ mol.} : 30 \text{ mod.} :: 5 \text{ mol.} : x \\ 4 \text{ horæ} & & :: 6 \text{ horæ} \\ 12 : 30 & & :: 30 : 75 \end{array}$$

Secundo modo in scholio indicato sic resolvitur:

$$\begin{array}{lcl} 3 \text{ mol.} : 30 \text{ mod.} :: 5 \text{ mol.} : 50 \text{ mod.} \\ 4 \text{ hor.} : 50 \text{ mod.} :: 6 \text{ horæ} : 75 \text{ mod.} \end{array}$$

Idem est quartus terminus utrobique; adeoque praxis eodem recidit. Quod si regula proportionis composita inversa fuerit, ut si proponatur problema: 3 mol. 4 hor. 30 modios in farinam convertunt, quot horis 75 mod. 5 molæ convertent? Disponantur termini principales et accessorii ordine conveniente, ut proportio ritè instituat;  $3 \text{ molæ} : 30 \text{ mod.} : 4 \text{ hor.} ::$

$$5 \text{ molæ} : 75 \text{ mod.} : x$$

Deindè multiplicentur invicem primus princi-

palis, tertius, et quintus terminus, ac productum dividatur per secundum et quartum invicem multiplicatos.

$$3 \times 4 = 12 \times 75 = 900.$$

$$\frac{900}{150} = 6.$$

$$30 \times 5 = 150$$

Potest etiam in tot regulas simplices resolvi, ut art. 235 expositum est.

$$3 \text{ molæ: } 4 \text{ hor.: } 30 \text{ mod.: } 5 \text{ molæ: } 4 \text{ hor.:}$$

$$x = 50$$

$$5 \text{ molæ: } 50 \text{ mod.: } 4 \text{ hor.: } 5 \text{ molæ: } 75 \text{ mod.:}$$

$$\text{hor. } x = 6.$$

### §. III.

*Proponuntur compendia pro regulis proportionum.*

236. Comp. 1. Quum in proportionem, aut regula directa primus terminus continet secundum nullo residuo, aut in ipso continetur; tum reduci potest proportio ad minimos terminos (191), ac regulæ praxis multò facilior evadit: ex. gr. si libræ 4 valent 20 aureos; quid libræ 15? Proportio redacta ad minimos terminos est  $1:5::15$ . Duc igitur  $15 \times 5 = 75$  erit quartus terminus quæsitus, nam unitas non dividit. Si terminos de more tractaveris, eundem numerum pro quarto termino obtinebis. Pro regula inversa, termini etiam invertendi erunt, ut, quum ad minimos terminos redacti fuerint, regula instituat. In exemplo adducto ex directa fiat inversa proportio: si 20 aurei dant

libras 4: ad lib. 15 quot aurei requiruntur? Quia 20: 4 sunt reciprocè, ut 15 ad quartum quæsitum; minimi termini 5: 1 comparandi sunt cum tertio et quarto: ductis igitur  $5 \times 15 = 75$ , habebitur quartus, ut supra.

237 Comp. 2. Plerumquè, maximè quum numeri pluribus notis constant, ad evitandum prolixioris divisionis fastidium; dividatur secundus terminus per primum, et quotus ducatur in tertium, aut tertius per primum, et quotus ducatur in secundum. In exemplo superiori 20 per quatuor dividatur; et quotus 5 ducatur in tertium terminum  $15 = 75$ : aut  $\frac{25}{4} = 3\frac{3}{4} \times 20 = 60 \times \frac{60}{4} = 60 \times 15 = 75$ .

238 Comp. 3. Potest etiam sola divisione res confici. Dividatur primus terminus per secundum, et per quotum inventum dividatur etiam tertius. Insistendo eidem exemplo 4: 20:: 15, divisus primo termino per secundum, nimirum  $\frac{4}{20}$ , quotus  $= \frac{1}{5}$  (52); per hunc dividatur tertius terminus 15, erit  $\frac{25}{1} : \frac{1}{5} = 7\frac{5}{1} = 75$  (60).

239 Com. 4. Si fractiones afficiant primum terminum tantum, ut si dicatur  $12\frac{1}{2}$  dant 4, quid 20? Multiplica per denominatorem 2 tam primum terminum  $12\frac{1}{2}$ , quam tertium 20; producta 25: 40 eandem rationem obtinebunt in secunda proportionem atque in prima; 25: 4:: 40:  $x = 6\frac{2}{5} = 6\frac{4}{5}$ . Si afficiant secundum terminum tantum, veluti si dicatur 12, dant  $22\frac{1}{2}$ , quid 4? Satis est multiplicare per denominatorem 2 tam 12, quam  $22\frac{1}{2}$ ; producta 24: 45:: 4, eandem ac primam proportionem exhibebunt; et quartum dabunt proportionalem  $7\frac{1}{3} = 7\frac{1}{3}$ .

Pariter si fractiones ejusdem nominis adhaereant primo, et tertio termino, ut  $4\frac{1}{4} : 15 :: 7\frac{1}{4} : x$ , multiplicentur ambo per denominatorem 4; producta 17 et 29 erunt in eadem ratione ad suos consequentes  $17 : 15 :: 29 : 25\frac{10}{17}$ . Demum si termini homologi sunt minutiae ejusdem nominis, ut  $\frac{2}{4} : 20 :: \frac{2}{4} : x$ ; deletis denominatoribus, numeratores fractionibus substituantur; erit proportio  $3 : 20 :: 2 : 13\frac{1}{3}$ . *Dem.* In omnibus propositis exemplis termini homologi per eundem numerum multiplicantur, aut valores æquales substituuntur: ergo valor non mutatur (47). *Hujusmodi compendia dicuntur italica, vel quia itali, proprio commodò semper studentes, illa invenerunt, vel quia ipsis sæpius utuntur.*

## §. IV.

*Regula Societatis.*

240 Defin. Totum dividere in partes certa quadam proportionē, vulgò dicitur *Regula societatis*; eo quod homines mercaturæ addicti, inita societate, solent quasdam pecuniæ summas in commune conferre, ut lucrum, aut damnum ex mercatura proveniens inter ipsos pro rata portione dividatur.

241 Probl. 1. Regulam societatis simplicem adhibere. Solut.

Exempl. Tres mercatores Antonius, Bernardus, Consalvus, inita societate 800 aureos lucrati sunt: primus in communem sortem contulit aureos 100; secundus aureos 160; tertius

240. Quæritur uniuscujusque lucrum. Ut hoc



regula proportionum deducatur; comparentur termini sequenti methodo. Pro primo termino colligatur summa omnium pecuniarum = 500: pro secundum lucrum ex negotiatione reportatum; aut si damnum fuisset, summa damni: in casu summa lucri = 800: deinde tres instituantur proportionales, ut uniuscujusque lucrum deducatur.

$$500 : 800 :: 100 : x = 160 \text{ A.}$$

$$500 : 800 :: 160 : x = 256 \text{ B.}$$

$$500 : 800 :: 240 : x = 384 \text{ C.}$$

---

800

242 Probl. 2. Regulam societatis compositam declarare. Solut. Nonnumquam potest evenire, ut societas à diversis mercatoribus inita, non eodem tempore inceperit: tum habenda etiam est ratio temporis, atque hoc in supputationem, ut æquis partibus procedatur, immiscendum.

Exempl. Anton. contulit in communem sortem aureos 50, annis tribus; Bern. aur. 100, annis duobus; Cons. aureos 240, anno 1: commune lucrum, fuit aur. 500. Ad inveniendum singulorum lucrum, ducatur summa uniuscujusque in tempus impensum negotiationi; deinde ex summa trium productorum fiat primus terminus proportionis; secundus erit lucrum, aut damnum, si vice lucri detrimentum contigerit; tertius terminus erit cujusvis summa in tempus ducta; quartus ignotum dabit lucrum, aut damnum ab unoquoque ferendum.

$$600:500::150:125 \quad A.$$

$$600:500::200:166\frac{2}{3} \quad B.$$

$$600:500::250:208\frac{2}{3} \quad C.$$

500

243 Schol. 1. Pari modo operatio procedet; etiamsi pecuniæ summa à sociis collata æqualis fuisset, tempus verò inæquale: ex. g. si omnes 150 aureos contulissent, primus autem ad 6, secundus ad 8, tertius ad 12 menses pecuniam collocassent; primus terminus proportionis erit summa mensium = 26: secundus lucrum, aut damnum ex. g. 500: tertius menses singulorum: quartus dabit lucrum aut damnum uniuscujusque pro rata portione distribuendum.

244 Schol. 2. Ad hanc regulam reduci potest summa distribuenda inter plures secundum datam proportionem, quod in legatis testamentorum frequenter occurrere solet: v. g. si quis testamento legat 1000 aureos inter famulos distribuendos juxta famulitii tempus, ab unoquoque ipsi præstitum, puta 6, 9, 15. annorum: summa omnium annorum erit primus terminus; secundus summa distribuenda; tertius tempus famulatus; quartus portio contingens.

### §. V.

#### *Regula mixtionis, seu alligationis.*

245. Defin. Sæpissimè occurrit, maximè inter artifices et mercatores, res diversi pretii

simul commisceri, ut deindè ex mixtione, aut alligatione merces victuariæ aut artefacta convenientia, emptoribus vendantur. Solet etiam pretium arbitrium statui, sub quo debeant merces divendi, quæ ex mixtione aliarum constantur; tuncque opus est prænoscere, quanta pars ex componentibus debeat admisceri. In utroque casu regulam *alligationis*, seu *mixtionis* dictam adhibemus. Solutione problematum res clarior evadet.

246 Probl. 1. *Datis partibus componentibus, et pretio earumdem, mixtionis pretium invenire.* Solut. Exempl. Sit mixtio vinorum diversi pretii, v. g. quatuor amphorarum vini, quarum singulæ æstimentur 10 obolis, et sex, quæ singulæ 12 obolis æstimentur: quæritur, quo pretio amphora ex utroque vino mixta vendenda sit? Collige summam quantitatum componentium: deindè summam pretiorum; erit summa rerum commixtarum ad summam pretiorum, uti certa quantitas mixti ad pretium ipsi respondens.

Amphor. summa = 10; pretium amphorar. 4 obol.  $10 = 4 \times 10 = 40$ : pretium amphor. 6 obol.  $12 = 6 \times 12 = 72$ : utriusque pretii summa = 112. Jam  $10 : 112 :: 1 : 11 \times \frac{2}{10} = 11 + \frac{1}{5}$  pretium unius amphor. mixtæ.

247 Probl. 2. *Ex quantitibus pretio diversis mixtio facienda est, quæ præfixo pretio vendi debet: quæritur quantitas ex utraque admiscenda.* Solut. Pretia binatim alligentur, his tamen legibus servatis: ut 1. quæ alligantur, unum majus, alterum minus sit pretio arbitra-

rio: 2. excessus majoris pretii dati supra medium adscribatur minori pretio; defectus autem minoris à medio apponatur majori. His servatis perinde est quocumque ordine alligentur inter se data pretia. Nam potest unum alligari sæpius, hoc est cum diversis, modò singula saltem alligentur semel. Undè fit, ut eadem quæstio plures solutiones admittat. Exemplum: 1 libra *caffè* occidentalis stat 24 solidis, orientalis verò 35: ut emptoribus fiat satis, qui 33 tantum volunt emere; quot partes ex utroque debent misceri? Pone alterum pretium sub altero 24 et 35; atque ad sinistram pretium arbitrium 33; ad dexteram verò differentias inter hoc et illa; ita ut differentia minoris applicetur majori, et majoris minori; nimirum 9 ad latus 35, et 2 ad 24, et differentiarum colligatur summa.

En schema.

$$\begin{array}{rcl} & 24 & 2 \\ 33 \left\{ & & \\ & 35 & 9 \end{array}$$


---

Jam instituatur proportio toties, quot erunt differentia; quæ in exemplo duæ reperiuntur; pro primo termino erit summa differentiarum; pro secundo unitas libram, aut mensuram representans; tertio loco una ex differentiis dabit tertium terminum: quartus verò inventus indicat mensuram sumendam ex specie cui adheret tertius: ex. g.

$$11: 1:: 2: \frac{2}{11}$$

$$11: 1:: 9: \frac{9}{11}$$

En jam ex *caffè* occidentali duas undecimas librae partes esse admiscendas, ex orientali autem  $\frac{2}{11}$ : at  $\frac{2}{11} + \frac{2}{11} = \frac{4}{11}$ .

Exemplum 2. Confectio *chocolati* fieri debet, cujus libra 30 solidis veneat: faba *brasiliensis*, *cacao* vulgò dicta, 27 solidis stat, *carachensis* verò 39; saccarum mediocre 26; quota pars ex qualibet specie sumi debet? Solut. Disponantur ut prius termini; postea major terminus cum minoribus alligari debet, et differentiae eodem modo permutentur, atque in exemplo præcedenti; demum ex summa proportio pro quolibet termino instituitur. En typum:

$$\begin{array}{l} 27 \\ 30 \\ 26 \\ 39 \end{array} \left\{ \begin{array}{l} 9 \\ 26 \\ 9 \\ 3+4 \end{array} \right.$$

---


$$25 : 1 :: 9 : \frac{9}{25}$$

$$25 : 1 :: 9 : \frac{9}{25}$$

$$25 : 1 :: 7 : \frac{7}{25}$$

Summa

$$\frac{25}{25}$$

Nimirum comparo 39 cum primo termino, differentias inter utrumque cum pretio medio 30 permutando: ideòque juxta 27 scribo 9, differentia inter 39 et 30, atque ipsi 39 differentiam alteram 3 abscribo. Deindè 39 iterum cum sequenti 26 conféro: eodem modo transferendo differentias: ideòque 9 dextrorsum 26, et 4 ad latus 39 collocandi sunt. Demum collecta summa = 25; nam 3 et 4 addendi prius, atque cum cæteris postea in summam redigendi; reliqua procedunt ut in præcedenti exemplo.

248 Schol. Examen, utrum rectè processerit



operatio, erit summa fractionum, aut partium totum componentium. Sic in exemplo summa est  $\frac{25}{25} = 1$ ; in quo numero libra confectionis exprimitur; in singulis verò fractionibus pars ex qualibet specie sumenda. Eodem modo procedi oporteret, si partes plures, quam tres alligari deberent. *Demonstratio.* Summa differentiarum, quibus pretia discrepant per excessum, aut defectum à pretio medio, eam habent rationem ad totum mixtum, quam habent singulæ differentiæ ad singulas mixti partes: quapropter regula proportionum toties iteratur, quot differentiæ reperiuntur; quarum alterna dispositio pretium deficiens in una compensat excessum alterius pretii; ergo portiones in congeriem miscendæ sunt inter se inversè, ut differentiæ à pretio medio.

## §. VI.

*Regula falsæ positionis seu falsi.*

249 Defin. Regula falsæ positionis ea dicitur, in qua assumitur numerus alius à vero, atque ex proportionem detecta inter ipsum, et alium inventum, nova instituitur, ut verus detegatur. Et quidem numerus, qui videtur aptus ad solvendum quæsitum, sumitur: deindè examinatur, num rectè procedat inventum: demum ex errore verus numerus elicitur. Res exemplis in problematis proponendis fiet manifesta.

250 Probl. 1. *Cæsar testamento legavit 1000 sestertia ea conditione, ut inter tres fa-*

*miliares ita distribuuntur, ut primus habeat partem duplam secundi, secundus triplum tertii. Queritur, quoti pars cuique obtigit?*  
 Solut. Ponamus primum habuisse 300, quum hæc summa supponatur dupla secundi, huic continget 150, ac tertio 50. Summæ autem horum numerorum non adæquant 1000, igitur falsa suppositio est. Instituatur jam regula proportionum, cujus primus terminus est numerus inventus falsus  $300 + 150 + 50 = 500$ ; secundus erit numerus primo assumptus 300; tertius numerus dividendus: quartus ignotus.

$500 : 300 :: 1000 : 600$ .  
 Igitur primus habere debet 600; qua summa comperta, reliquæ inventæ sunt: nam secundus habebit 300, tertius verò 100; partes quæ simul sumptæ adæquant 1000. Algebricè etiam facillimè solvi posset problema. Ponatur unus, qui solum censi debet terminus ignotus  $= x$ , et esto tertius: primus  $= a$ , secundus  $= b$ : erit

$$a + b + x = 1000$$

$$a = 2b$$

$$b = 3x$$

ergo  $a = 6x$

et substit.  $6x + 3x + x = 1000$

et reduc.  $10x = 1000$

et div.  $x = \frac{1000}{10}$

$$x = 100$$

erit igitur  $x = 100$ ,  $b = 300$ ,  $a = 600$ . Summa  $= 1000$ .

251 Probl. 2. Per duplicem falsam positionem numerum verum invenire. Solut. Assuma-

tur quilibet numerus, ut in exemplo præcedenti; postea perpendatur, num quæstioni satisfaciat. Error inventus potest esse per excessum aut per defectum, quod signis + aut — notetur. Deinde alius numerus major, aut minor accipiat, atque eodem modo excessus, aut defectus à vero notetur. Errores erunt *similes*, si ambo sint per excessum aut per defectum, dissimiles vero, quum alter est per excessum, alter per defectum.

Si errores sunt similes, ducatur prima positio in errorem secundæ, et vicissim secunda in errorem primæ. Deinde productorum differentia dividatur per differentiam errorum; quotus erit numerus quæsitus. Quod si dissimiles sint errores, productorum summa dividatur per summam errorum; quotus dabit numerum verum.

Exempl. 1. Tres lusores A, B, C 62 aureos ludo acquisierunt: B obtinuit 6 plusquam A; C 10 plusquam B: inveniendum est singulorum lucrum. Ponatur lucrum  $A=4$ , erit  $B=10$ ,  $C$  verò  $=20$ : summa 34, quæ à vera deficit per defectum — 28. Iterum sit  $A=14$ , erit  $B=20$ ,  $C=30$ : summa 64, quæ per excessum 2 abludit à vera. Quum errores sint dissimiles, addantur duo producta  $4 \times 2 = 8$ , et  $14 \times 28 = 392$ , et  $392 + 8 = 400$ , quæ summa dividatur per summam errorum  $= 30 = \frac{400}{30} = 13\frac{1}{3}$  ut in sequenti schemate.

Prima posit. 4., error  $-28$   
 Secunda posit. 14., error  $+2$  } Summa 30  
 Prim. Prod.  $4 \times 2 = 8$   
 Secund. Prod.  $14 \times 28 = 392$

Summa  $\overline{400}$  }  $13 \frac{1}{3}$

Quotus  $13 \frac{1}{3}$  erit lucrum A:  $19 \frac{1}{3}$  erit lucrum B: et  $29 \frac{1}{3}$  lucrum C: partes quæ simul additæ adæquant numerum datum 62.

Exemplum 2. Esto idem casus sumpta pro secunda positione error per defectum; et sit  $A=8$ ; erit  $B=14$ ;  $C=24$ : summa 46, quæ vera deficit iterum per defectum,  $-16$ . Ea typus:

Prima positio 4, error  $-28$   
 Secunda posit. 8, error  $-16$  } Differ. 12.  
 Primum prod.  $8 \times 16 = 64$   
 Secundum prod.  $8 \times 28 = 224$

Differ.  $\overline{160}$  } quot.  $13 \frac{4}{12} = 13 \frac{1}{3}$

In hoc casu quum errores sint similes, differentia productorum dividitur per differentiam errorum; atque idem est quotus, ut patet in schemate.

252 Schol. Non semper resolvi potest quæstio per unicam positionem. Indicium, quando duplici positione opus sit, est numerus aliquis determinatus, qui afficiat alium. Sic in secundo problemate numeri 6 et 10, qui adduntur numero principali, indicant duplici positione opus esse. Uno verbo: in primo problemate

numerus 1000 tantum exprimitur: ideòque unica positione resolvi potest. In secundo vero adjunguntur 6, et 10, qui indicant duplicem positionem adhibendam esse. Ceterum problemata hujusmodi facilius per algebram solvuntur, ut patet in primo exemplo jam per algebram soluto, et in secundo, cujus typum exhibeo. Sit terminus primus  $=x$ ; secundus  $=b$ ; tertius  $=c$ , erit:

$$x+b+c=62$$

$$b=x+6$$

$$c=b+10$$

Et substit.

$$x+x+6+x+6+10=62$$

Et reduc.

$$3x+22=62$$

Et transp.

$$3x=62-22=40$$

Et divid.

$$x=\frac{40}{3}=13\frac{2}{3}$$

## §. VII.

### *Logarithmorum notio.*

253 Defin. *Logarithmi* sunt numeri arithmetice proportionales, numeris geometricè proportionalibus respondentes. Eorum ope multiplicationes et divisiones transeunt in additiones, et subtractiones; adeòque calculus facilius evadit. Inventum hoc Joannis Neperi, natione Scoti, anno 1620 in lucem prodiit, maximo rei mathematicæ bono; de qua inter primos optimè meritis censendus est. En typum utriusque seriei:

1, 2, 4, 8, 16, 32, 64, 128, 256

1, 2, 3, 4, 5, 6, 7, 8, 9.

Logarithmorum species commodior, et familia-



rior ea est; quæ pro logarithmi unitatis assumpto, et unitatem cum aliquibus cyphris pro logarithmi denarii etc. ut in sequenti schemate.

I	0.0000000
10	1.0000000
100	2.0000000
1000	3.0000000
10000	4.0000000
100000	5.0000000
1000000	6.0000000
10000000	7.0000000
100000000	8.0000000
1000000000	9.0000000
10000000000	10.0000000

Tot autem adduntur cyphræ, ut calculus facilius evadat, quemadmodum de fractionibus decimalibus dictum est.

254 Corol. 1. Assumpto 0 pro unitatis logarithmo, reliquorum numerorum, qui unitati minores sint, ut sunt fractiones, logarithmi erunt defectivi, seu minores 0: itaque nota subductionis — designari debent. Omnes verò numeri ab unitate ad denarium habebunt 0 pro prima nota logar. A denario, seu à 10 ad 100, prima nota erit 1. A 100 ad 1000, erit 2, et sic deinceps, ut in schemate videre licet. Reliqui autem numeri inter 1, et 10, habebunt pro logarith. 0 cum aliquot fractionibus decimalibus. Qui inter 10, et 100 interveniunt, nota *characteristica* (sic enim appellatur) erit unitas cum decimalibus respondentibus. Quod etiam ad sequentes numeros, *characteristica* mutata,

Ordine jam dicto extendendum est.

255 Corol. 2. Characteristica logar. sive numerus, qui in logar. puncto separatur à reliquis decimalibus, indicat, quot notis constat numerus, cujus est logar. Semper enim characteristicæ unitate deficit à numero notarum, quæ reperiuntur in eo, cujus est logarithmus. Hinc dato quovis numero, notisque ejus recensitis, facile deducitur characteristicæ ipsi respondens. Sit 56489; quum hic quinque notis constet, ejus characteristicæ erit 4.

256 Theor. 1. Si logar. unitatis est 0, erit logarithmus cujuscunque numeri æqualis summæ logar. suorum factorum. Dem. Sit numerus 24, ejus logarithmus erit æqualis summæ logarithmicæ numerorum 6 et 4, qui sunt ejusdem factores. Nam ex definit. multiplicationis,  $1:4::6:24$ ; horum autem terminorum logarithmi sunt in proportionem arithmetica (253): ergo extremorum summa erit æqualis summæ mediorum (175): additis igitur logarithmis numerorum 4 et 6, habebitur logar. numeri, cujus sunt factores.

257 Corol. 1. Logarith. numeri cujuscunque plani, aut solidi æqualis est aggregato ex logar. laterum, seu factorum tale planum, vel solidum componentium: ex. g. numerus 72 resultat ex multiplicatione  $3 \times 24$ , aut etiam ex  $3 \times 4 \times 6$ , vel  $2 \times 3 \times 12$ : summa igitur horum logarithmorum dabit logar. numeri 72. Undè obiter nota, methodum inveniendi logarith. alicujus numeri esse, illud resolvere in suos factores; tum eorundem logar. in summam

collectis, numeri logarithmus quæsitus exurget.  
 258 Corol. 2. Logarith. numeri quadrati  
 duplus est logar. suæ radicis, et sic de ceteris  
 potentiis quarta, quinta etc. quadruplus, quin-  
 tuplus etc. Quod enim in potentiis fit per mul-  
 tiplicationem radicis bis, ter, quater in se ip-  
 sam, hic obtinetur ope simplicis additionis:  
 adeoque addendo bis, ter, quater etc. logarith-  
 mum datæ radicis, obtinebitur logarith. datæ  
 potentiæ. Similiter si logarith. cujusvis dignita-  
 tis dividatur per ejus exponentem 2, 3, 4 etc.  
 invenietur logarith. radicis talis potentiæ. Sit  
 cubus 8, cujus logarith. ex tabulis est 0.9030900,  
 exponens tertiæ potentiæ seu cubi est 3, per  
 quem diviso prædicto logarith. dat quotum  
 0.3010300, logarith. numeri 2, qui est radix  
 cubica num. 8. Quod si per eundem expo-  
 nentem 3, iterum multiplicaveris prædictum  
 quotum restituitur 0.9030900, qui est logarith.  
 cubi 8, seu tertiæ potentiæ.

259 Theor. 2. *Supposito ut prius zero pro  
 logarith. unitatis; differential logarith. duorum  
 numerorum æquatur logarith. quoti eorumdem.*  
*Dem.* Summantur quivis numeri ex. g. 24 et 6,  
 subducantur amborum logarithmi, differentia  
 erit 0.6020600: hic erit logarith. eorumdem  
 quoti, seu numeri 4. Nam quum divisor sit  
 ad dividendum, ut unitas ad quotum; erunt  
 $6:24::1:4$ : eorumque logarith. in proportio-  
 ne arithmetica (253): ergo quum in logarith.  
 summa mediorum æqualis sit summæ extre-  
 morum (175): idcirco si à summa mediorum  
 sive à logarith. numeri 24 (nam unitatis loga-

rithmus est 0) subducatur logarithmus numeri 6, residuum erit logarith. numeri 4.

260 Corol. Ex præc. theor. obvium est deducere, summa logarith. divisoris et quoti, æqualem esse logarithmo dividendi. Quod etiam ex num. 257 planum erat inferre. Ceterum inutile ducimus theoriam constructionis logarithmorum hic inserere, quum jam publici juris sint tabulæ, in quibus logarithmi numerorum naturalium inveniuntur, qui in supputationibus occurrere possunt. Tantum innuere sufficiat usum hujusmodi tabulæ logarithmorum.

261 Probl. 1. *Multiplicare duos numeros datos ope logarithmorum.* Solut. Inveniantur in tabulis logarithmicis numerorum datorum logarith. ac inter se addantur; summa logarithmorum dabit logarithmum producti. Ut autem hoc dignoscatur, quærendus est talis logarithmus in tabulis, ad cujus latus numerus producti invenietur. Exemplum. Sint multiplicandi numeri 144, et 64: eorum logarithmi ex tabulis inveniuntur, 2.1583625, et 1.8061800: quibus additis fit 3.9645425: cui in tabulis respondet numerus 9216, factum ex  $144 \times 64$ . Dem. sumitur ex num. 256.

262 Probl. 2. *Numerum per numerum ope logarithmorum dividere.* Solut. Quærantur in tabulis ipsorum logarithmi, ac minor à majore subducatur; residuum erit quotus quæsitus. Insistendo præcedenti exemplo, sit dividendus 9216, divisor 64. Subducatur logarithmus divisoris 1.8061800 à logarith. dividendi 3.9645425;

residuum 2.1583625 dabit numerum quoti, scilicet 144. Dem. eadem est ac num. 259.

263 Probl. 3. *Datis tribus numeris, ope logarith. quartum proportionalem invenire.* Solut. Quærantur in tabulis logarithmi tribus numeris datis respondentēs, ac terminorum mediorum logarithmi in summam colligantur; deinde ab hac summa primus terminus subducatur: residuum erit logarithmus quarti termini. Dem. patet ex num. 253. Hinc deducitur regulam trium per logarithmos confici facilius posse.

264 Probl. 4. *Dati numeri quadratum, cubum, aut aliam dignitatem invenire.* Solut. Inveniatur in tabulis logarithmus dato numero respondens; hic multiplicetur per exponentem potentiae, ad quam evehendus est numerus; productum dabit logarithmum talis potentiae, ac proinde ipsum numerum seu potentiam. Dem. sumitur ex num. 258.

265 Corol. Hinc apparet ad extrahendam radicem cujuscunque potentiae, satis esse ipsius logarithmum per exponentem dividere, aut sumere dimidium, tertiam, quartam etc. partes dati logarithmi juxta radices extrahendas: deinde in tabulis quærerē numerum tali logarithmo respondentem.

266 Probl. 5. *Inter duos datos numeros medium proportionalem ope logarith. invenire.* Solut. In tabulis inveniantur logarith. duorum numerorum; deinde summa colligatur, ac decimum semisumma erit logar. numeri medii proportionalis quæsitī. Dem. deducitur ex num. 205 et 253.



# TRACTATUS III.

## GEOMETRIA.

### PROLEGOMENA.

267 **D**efin. 1. Geometria, seu terræ mensura à γῆα contractè γῆ terra, et μέτρεω metior composito vocabulo, sic dicta fuit quod primum ad possessionum limites dignoscendos inventa sit. Ad sublimiores deinde cognitiones elevata, omnem quantitatem sibi subiecit, ac penè totius corporeæ naturæ dominata, inmensum exercet imperium. Quapropter quæ nunc Geometria vocatur, rectius *quantitatis extensæ scientiam* diceres, quæ definitio ipsi optimè quadrat. Ad omne enim corpus extensum, et continuum applicatur, ejusque magnitudinem extensionem, soliditatem meretur. Quamvis autem nihil sit in rerum corporearum natura, quod tres dimensiones in longum, latum, et profundum non habeat, mente tamen separari, atque una seorsim ab alia considerari potest.

268. Defin. 2. *Solidum* est quantitas tribus dimensionibus constans in longum, latum, et profundum. Omne igitur corpus *solidum* est. Potest enim ejus longitudo definiri, crassities, sive latitudo determinari, et profunditas, sive

altitudo metiri. Solidum sive corpus extrinsecus *superficiebus* terminatur: superficies verò lateribus, sive *lineis* circumscribitur: lineæ autem extremitas *punctum* est. Quamvis autem hæc tria separari numquam possint; benè concipimus, dum iter agimus, lineam quamdam à nobis descriptam à puncto, unde discessimus, ad locum, quò pervenimus; quin ad ejus crassitiem, aut altitudinem cogitemus. Dum panum vestibis parandis videmus, ejus altitudinem et longitudinem præ oculis habemus quin ad crassitiem attendamus. Demum in plerisque corporibus omnia simul attendimus, quantum sursum erigatur, et hæc est *altitudo*, sive *profunditas*: quantum crassum sit, et hæc est *latitudo*: ac demum quod spatium à latere ad latus occupet, et hæc dicitur *longitudo*.

269. Schol. Tres hæc dimensiones à puncto quasi originem ducere concipimus. Punctum enim fluens, sive unum post aliud positum, lineæ ideam nobis præbet. Lineas similiter juxta et extra se positas, sive unam ad latus alterius, superficiem generare concipimus. Superficies demum una supra aliam superpositæ solidi compositionem, seu genesim repræsentant. Non quod lineam è punctis, superficiem lineis, solidum superficiebus componi dicamus: sed lineam è lineolis semper minoribus, superficies aliis minoribus superficiebus solida minusculis solidis compingi debent. Attamen lineæ superficierum, superficies solidorum limites sunt. Hinc *Longimetria* dicta est, pars illa geometriæ, quæ linearum; *Planimetria*, quæ superficierum;

*Stereometria* seu solidometria, quæ solidorum dimensiones pertractat. Et hæc quidem ad inferiorem geometriam, seu elementarem pertinent. Ad superiorem verò seu transcendente[m], sectiones conicæ, atque omnes aliæ curvæ à circulari diversæ; de quibus in tractatu ultimo sermo erit.

## CAPUT PRIMUM.

*Longimetria, sive de lineis.*

## §. I.

*Linearum notio.*

270 **D**efin. 1. Si punctum A (fig. 1. tab. 1.) fluens, et breviori semita procedit ab A in B, *lineam rectam* describit, quæ punctis A et B intercipitur.

271 Corol. 1. *A puncto ad punctum unica recta duci potest.* Quæcumque enim linea à puncto A ad B ducatur nisi puncta omnia supra rectam AB habuerit, extra eandem lineam excurrit, adeoque recta non procedet ab A in B.

272 Corol. 2. *Linea recta est omnium brevissima, quæ à puncto ad punctum duci potest.* Quælibet enim alia ACB dum inflectitur, recedit à directione punctorum A et B; coque magis recedit, quo magis incurvatur. Linea enim ADB brevior est altera ACB. Undè linea recta est mensura distantia, seu ipsa distantia punctorum A et B.

273 Corol. 3. *Directio lineæ rectæ, datis duobus ejus punctis, innotescit.* Quapropter datis punctis AB, directio ejusdem lineæ AB potest utrinque in infinitum produci, ac reliquæ novæ accessiones in eadem positione AB semper remanebunt.

274 Corol. 4. *Duæ rectæ in unico puncto concurrere possunt.* Si enim duo puncta communia haberent, in eadem directione essent, atque unicam rectam efficerent per corol. 1. Hinc inferes, rectam lineam unicam esse in sua specie, quum ceteræ, quæ rectæ non sunt, in infinitum variari possint. Hujusmodi axiomata potius quam corollaria demonstrare, esset oleum, atque operam perdere, quum adeò manifestæ veritatis sint, ut intellectus statim, atque enuntiata percipiat, in ipsorum veritate conquiescat.

275 Defin. 2. Si punctum A (fig. 1) quolibet à directione AB deflectat, ut in D aut C, lineam curvam describet. Curvarum tamen celeberrima est circulus, sivè ejus peripheria (fig. 2). Concipiatur linea ABC, aut potius ipsius dimidium BC, ejus puncto B immobili, circumagi ita, ut ad puncta, undè discessit, redeat: lineam ADCE describet, cujus omnia puncta à puncto B æquè distabunt. Spatium ab hac linea comprehensum dicitur *circulus*. Punctum B *centrum* circuli est: linea circumdescripta dicitur *peripheria*, seu *circumferentia*. Linea ab uno peripheriæ puncto ad aliud ducta per centrum B, vocatur *diameter* circuli, ut AC. Quæ verò à centro B ad quodvis circumferentiæ

punctum, uti E, ducitur, *radius et semidiameter* appellatur.

276 Defin. 3. Quævis peripheriæ pars, quæ duobus radiis intercipi potest, dicitur *arcus* circuli, ut AE, GE (fig. 2). Portio autem superficiei circularis, duobus radiis et arcu comprehensa, *sector circuli* vocatur. Recta, quæ per centrum non transit, et ab uno ad aliud circumferentiæ punctum ducitur, appellatur *chorda*, ut FG: duæ verò inæquales partes, in quas circulus à chorda dividitur, vocantur *segmenta*: major dicitur *segmentum majus*: altera *segmentum minus*: ut FEG est segmentum majus; FDG segmentum minus.

277 Defin. 4. Commodior circuli divisio ea inventa est, quæ ejus peripheriam in partes 360 dividit, quæ dicuntur *gradus*. Gradus in 60 partes dividitur, quæ *minuta prima* vocantur. Rursus minutum in 60 *secunda* minuta, seu, quomodo jam usus invaluit, *secunda* tantum appellantur: secunda in 60 *tertia* dividuntur, et sic deinceps: *Semicirculus* AEC (fig. 2) 180 gradibus constat. Quadrans verò AE 90. Porro gradus sunt pars relativa circuli: totquæ gradus numerat parvus circulus ADCE, atque alius quilibet cœli ambitu comprehensus.

278 Corol. 1. Omnes diametri ejusdem circuli sunt æquales; sunt enim eadem recta circumvoluta centro immobili permanente (275). Similiter omnes radii ejusdem circuli æquales sunt: quum sint dimidium ejusdem diametri. Unde circuli æquales diametros, et radios habebunt æquales.



279 Corol. 2. *Linea recta circuli peripheriam in tribus punctis secare non potest.* Nam omnia puncta lineæ rectæ in eadem directione sunt (273): circuli autem puncta continenter directionem mutant. Hinc duo tantum puncta positionem, aut directionem circuli, seu peripheriæ non determinant: quum secari possint tum à recta, tum à curva qualibet. Tria verò puncta directionem circumferentiæ determinant, quum omnia ipsius puncta eandem habeant curvaturam, ac æquè à centro distent. (Vide infra num. 308). Quarè notis tribus peripheriæ punctis (fig. 2) AFG, reliqua omnia determinantur, quum æquè distent à centro B.

280 Corol. 3. *Omnes diametri velut chordæ maximæ circuli concipi possunt.* Quæcumque enim alia chorda à diametro distincta minor ipsa diametro est. Nam quum circulus à diametri, aut potius semidiametri circumvolutione generetur, quæcumque chorda diametro æqualis, diameter est; ac proindè omnes aliæ minores diametro sunt.

281 Corol. 4. *Diameter circulum et peripheriam bifariam secat.* Nam per centrum transiens, duas æquales partes peripheriæ debet intercipere, quum omnia ipsius puncta æquè à centro distent. Deindè si concipiatur (fig. 2) pars ADC superimponi parti AEC, perfectè congruent; nimirum omnia puncta semiperipheriæ ADC operient puncta alterius semiperipheriæ AEC: sunt igitur æquales, ac proindè quælibet dimidium totius, seu circuli ADCE.

282 Corol. 5. *In eodem circulo æquales*

chordæ æquales peripheriæ partes sivè arcus intercipiunt (fig. 3). Superimponatur pars AB parti DC, supposita æqualitate chordarum AB, DC, perfectè congruent; curvatura enim in circulo ubique eadem est: sunt igitur æquales. Similiter arcus æquales ejusdem circuli, æqualibus chordis insistere debent; quod pariter superimpositione manifestum fiet. Hoc geometrarum more dicitur subtendere arcus, aut chordas æquales.

## §. II.

### *Linearum positio respectiva.*

283 Defin. Linea *perpendicularis*, aut *normalis* ea dicitur, quæ cadens super aliam, in neutram partem inclinatur; seu cujus omne punctum æquè distat utrinque à punctis alterius æquè dissitis ab eo, in quod illa cadit. Linea AB (fig. 4.) est perpendicularis CD.

284 Defin. 2. *Obliqua* linea vocatur, quæ super aliam decidens, in unam magis, quam in aliam partem inclinatur. EF (fig. 5) obliqua est respectu AB, CD.

285 Defin. 3. *Lineæ parallelæ* dicuntur, quæ ita sunt positæ è regione altera alterius, ut omnia unius puncta æquè distent ab altera: undè si in infinitum producerentur, numquam concurrerent, sed ubique æquè distarent. Porro distantia unius puncti ab aliqua recta desumitur à perpendiculari ab eo puncto ad lineam ducta. Lineæ AB, CD (fig. 5) sunt parallelæ.

286 Defin. 4. Lineæ rectæ in aliquo puncto concurrentes, angulum efficiunt. Si perpen-

diculariter altera super alteram cadat, *angulus erit rectus*, ut in B (fig. 4): quod si obliquè cadat, ut EB, aut EF in E (fig. 5), angulos efficient hinc *acutum*, indè *obtusum*: qui minor est recto, *acutus* dicitur; *obtusus* verò, qui major est recto. Anguli tribus litteris designari solent; quæ in medio ponitur, verticem anguli, seu locum anguli indigitat; ut ABD (fig. 4) designat angulum, quem in B faciunt duæ lineæ AB, DB: BDA indicat angulum, quem in D faciunt lineæ BD, AD. Quando verò in punctum duæ tantum lineæ conveniunt, tunc sublato æquivocationis periculo, angulus unica littera designari potest ad anguli verticem apposita. Vertex porrò anguli dicitur, ubi duæ lineæ conjunguntur, ut in A.

287 Theor. 1. *Recta super rectam cadens, aut duos angulos rectos facit, aut duobus rectis æquales. Dem.* Cadat AB (fig. 4) supra CD; si perpendiculariter cadit, tam angulus ABD, quam ABC erunt recti (ex defin. 286); si obliquè cadit, ut in EB; anguli ERC, EBD simul sumpti æquales sunt duobus aliis ABD, ABC, qui recti sunt.

288 Corol. 1. Quoties linea perpendicularis est alteri, hæc vicissim perpendicularis illi est: nam invicem faciunt duos angulos rectos. Similiter nequit linea lineæ obliqua esse, quin hæc quoque ipsi obliqua sit: aliter hinc faceret angulum rectum, illinc acutum, qui simul sumpti minores sunt duobus rectis.

289 Corol. 2. Producta linea AB (fig. 4) in F, simili ratione patet, duos angulos CBF, DBF

duobus rectis æquales esse; ac proindè duæ rectæ se invicem secantes faciunt quatuor rectos, si perpendiculariter cadant: si autem obliquè, quatuor rectis æquales. Pariter si duæ rectæ in idem punctum alterius rectæ concurrentes, hinc illinc faciant cum hac recta duos angulos, quorum summa æqualis sit duobus rectis; erunt in eadem directione, atque in unam rectam coalescent: ut GB, EB supra CD cadentes, concurrunt in puncto B, atque angulos EBD, GBD, aut EBC, GBC efficiunt, quorum summa æqualis est duobus rectis (287), in unam rectam EG coalescunt. Jam si centro B ducatur circulus ADFC, mensura quatuor angulorum erit integra circumferentia circuli; quæ 360 gradibus constat (277); qui, si per 4 dividantur, quod dant 90 pro mensura anguli recti. Reliqui autem singuli in centro facti pro mensura habebunt tot gradus, quot comprehendit arcus ab eorum cruribus interceptus. Omnium enim simul mensura sunt quatuor recti.

290 Corol. 3. Quum recta super alia cadens in unam non coalescant, sed spatium aliquod intercipient, angulos hinc indè efficiunt: ex his dicuntur ad verticem oppositi, qui sibi invicem (fig. 4) verticibus imminet: ut ABE, FBG: atque etiam EBF, ABG. Manifestum est omnes ad verticem oppositos æquales esse. Nam si perpendiculariter cadit, ut in ABF, facit quatuor rectos, qui omnes æquales sunt. Si verò obliquè, ut EBG, angulus acutus EBA cum obtuso EBF facit duos rectos: similiter GBF, qui illi ad verticem opponitur cum eodem EBF

facit duos rectos: ergo hoc ablato reliqua erunt æqualia. Eodem modo ostenditur angulos  $ABG$ ,  $EBF$  ad verticem oppositos-esse æquales.

291 Corol. 4. A puncto ad datam lineam unica perpendicularis duci potest. Nam si à puncto  $A$  (fig. 4) alia esse posset perpendicularis  $CD$ , ad alterutrum latus caderet respectu  $AB$ : ergo jam esset inclinata, neque angulos rectos cum  $CD$  faceret, ac proindè perpendicularis non esset contra suppositionem (283).

292 Theor. 2. *Perpendicularis minor est obliqua ab eodem puncto ad datam rectam ducta.* Dem. Sit (fig. 4)  $AB$  perpendicularis  $CD$ , et  $AD$  ipsi  $CD$  obliqua: producta  $AB$  in  $F$ , atque à  $D$  in  $F$  ducta alia æquali ipsi  $AD$ , erit  $ADF$  major  $ABF$  (272), quum  $ABF$  sit recta,  $ADF$  obliqua: ergo ablati  $BF$ ,  $DF$ , quæ dimidia sunt linearum  $ABF$ ,  $ADF$ , reliqua dimidia erunt in eadem inæqualitate, nimirum  $AD$  major  $AB$ , quum dimidia sint ut tota.

293 Corol. 1. Perpendicularis omnium brevissima est, quæ à puncto ad datam rectam duci possunt: omnibus enim obliquis brevior est. Obliquarum verò ab eodem puncto ad datam rectam ductarum, ea major est, quæ magis à perpendiculari distat, minor quæ ad eam magis accedit. Undè si duæ lineæ ab eodem puncto ductæ æquè distent hinc illinc à perpendiculari, æquales sunt: aut si æquales sunt, æquè distant à perpendiculari.

294 Corol. 2. Recta  $AB$  (fig. 4) ad rectam  $CD$  perpendicularis est, si duo quælibet ipsius puncta, uti  $A$ ,  $B$ , æquè distent à duobus qui-



busvis, sed à concursu perpendicularis æquè dissitis, alterius C, D; quum scilicet  $AC=AD$ . et  $CB=BD$ . Nam quum duo puncta lineæ rectæ positionem determinent (273); si punctum A æquè à punctis C et D, et punctum B ab iisdem punctis æquè distat; directio totius AB etiam infinitè productæ, eadem erit, ac proinde angulos hinc indè æquales efficiet.

295 Probl. 1. *Ad datum in recta punctum perpendicularem elevare.* Solut. Sit datum punctum B in linea CD (fig. 4): circino cape hinc indè æquales partes à punto B; deinde crure circini in quolibet ex punctis æquè distantibus à B, fac decussationes in L; linea à puncto L ad punctum B erit perpendicularis. Nam per constructionem linea LB habet duo puncta æquè distantia à CD: ergo per præcedens corol. erit perpendicularis ipsi CD.

296 Probl. 2. *A dato extra rectam puncto ipsi perpendicularem ducere.* Solut. Sit punctum L (fig. 4), ex quo perpendicularis ad CD duci debeat: circino cape æquales partes à puncto L ad puncta in CD respondentia *a b*; vel duc semicirculum rectam CD secantem in punctis *a b*: deindè ex his punctis fac decussationes in L, H, ducque lineam HL; hæc erit perpendicularis ipsi CD. *Dem.* Duo puncta LB, aut etiam HB æquè distant à punctis *a b* per constructionem: ergo linea ducta est perpendicularis.

297 Probl. 3. *Datam rectam bifariam secare.* Solut. Operatio eadem est ac præcedentis problem. Nam si CD (fig. 4) bifariam secanda sit, à punctis C, D, aut duobus aliis, *a b* æquè

ab ipsis distantibus, fiant decussationes in L, H: recta per hæc duo puncta ducta bifariam dividet CD, ut manifestum est ex ipsa operatione.

298 Defin. Linea sive rectè, sive obliquè cadens super parallelas (fig. 5) ut EF, quam *secantem* appellavimus, plures angulos cum illis efficit. Alii inter parallelas comprehenduntur, atque *interni* appellantur: alii, quia extra ipsas cadunt, *externi* dicuntur. *Alterni* sunt bini et bini inter se comparati, quorum alter supra ad dexteram, alter infra ad sinistram, aut contra positi sunt. Quod tam de internis, quam de externis dictum habe. Anguli G, N, et H, O *alterni interni*: E, L, F, M *alterni externi* sunt.

299 Theor. 3. *Secans cum parallelis facit 1. angulos internos, et externos ad eandem partem appositos æquales. Dem.* Sint parallelæ AB, CD (fig. 5), et secans FE: erunt anguli appositi ad eandem partem internus, et externus G, M; H, E; F, N; L, O. Jam quum secans ad utramque parallelam eandem inclinationem servare debeat, idem erit spatium, sive hiatus in partibus G, M etc. à parallela, et secante comprehensus: ergo æquales sunt anguli G, M etc. Superpositione etiam demonstrari potest. 2. *Omnes angulos alternos æquales. Dem.* per præced. Angulus G æqualis est M: at N, qui est alternus respectu G, æqualis est M, quum ipsi ad verticem opponatur (290): ergo æqualis est ipsi G. Hæc demonstratio cum ceteris alternis iterari potest.

3. *Anguli interni ad eandem partem æquales*

*sunt duobus rectis. Dem.* G et O sunt interni ad eandem partem: at O cum M facit duos rectos (287): ergo etiam cum G, qui ipsi M est æqualis per num. 1 theor.

300. Corol. 1. Si angulus externus M æqualis est interno G: aut alterni G, N æquales sunt: vel interni G, O ad eandem partem æquales duobus rectis; lineæ AB, CD sunt parallelæ. Itaque ex natura parallelismi facile deducitur, tres has proprietates vinculo quodam necessario inter se connexas esse.

301 Corol. 2. Si duæ rectæ eidem lineæ sunt parallelæ, erunt etiam ad invicem parallelæ. Quam enim positionem respectu alterius habuerint, debent et inter se observare, ut est manifestum.

302 Probl. 4. *Ad datam lineam ipsi parallelam statuere, aut quaslibet parallelas ducere.*  
Solut. Sit data recta CD (fig. 5): è puncto N quolibet intervallo, ut NA, duc circino arcum DG; postea centro G duc alium arcum ND, interceptis deindè in quolibet arcu æqualibus partibus AG, ND per puncta intercepta ducatur recta AB, quæ erit parallela CD. Pari modo operandum esset, si plusquam duæ parallelæ ducendæ forent. *Dem.* Ducta secante FE, erunt anguli alterni H, O æquales, quum æqualibus arcubus mensurentur per constructionem; ergo sunt parallelæ (300).

### §. III.

#### *Linearum positio in circulo.*

303 Theor. 1. *Radius BG (fig. 4) perpen-*

*diculariter demissus è centro in chordam FD eam bifariam dividit, et arcum ab ipsa subtensum. Dem.* Punctum B, quum sit in centro, æquè distat à punctis F, D in circumferentia positis (275): deindè quum recta BG sit perpendicularis FD, omnia ejus puncta æquè distabunt à prædictis punctis FD (294): aliter enim aut perpendicularis non esset, aut punctum B in centro positum non æquè distaret à punctis F, D in circumferentia sitis, contra id quod in theor. ponitur; erunt igitur tam linea FD, quam arcus FGD bifariam secti.

304 Corol. 1. Recta quælibet per centrum transiens, et chordam æqualiter dividens, eamdem perpendiculariter secat. Nam omnia ejus puncta æquè utrinque distant ab extremitatibus chordæ; erit itaque ipsi perpendicularis (294). Similiter si recta super chordam perpendiculariter cadens, bifariam dividit, transibit per centrum. Quum enim in æquales partes eam secet, duo illius extrema puncta æquè distabunt à puncto intersectionis; et quum sit ipsi perpendicularis, omnia ejus puncta utrinque ab alterius punctis æquè debent distare: transibit ergo per centrum, quod est unum ex punctis à prædictis circumferentiæ æquè distans.

305 Corol. 2. In eodem, aut æqualibus circulis, chordæ æquales respondent arcubus æqualibus; et viceversa arcus æquales chordas habent æquales: inæquales verò dant tam chordas, quam arcus inæquales. Insuper æquales chordæ æquè distant à centro; inæquales verò inæqualiter.

306 Corol. 3. In eodem, aut æqualibus semicirculis majores chordæ proximiores sunt centro, atque eo majores, vel minores sunt arcus, quo majores, aut minores sunt chordæ, et viceversa.

307 Corol. 4. Chorda diametro parallela interceptit arcus hinc illinc æquales inter ipsam et diametrum comprehensos: hoc ex natura parallelarum, quæ ubique distare debent æqualiter, satis manifestum est. Quod pariter de quacumque circuli portione à parallelis utrinque intercepta dicendum erit.

308 Probl. 1. *Per tria data puncta, non in directum posita, circulum describere.* Solut. Sumantur (fig. 4) tria quælibet puncta A, D, F, quæ duabus rectis AD, FD conjungantur: hæ erunt chordæ circuli describendi. Jam bifariam dividantur (297): et ex puncto B concursus utriusque lineæ BM, BG bifariam chordas dividens, ducatur circulus ACFD; hic transibit per tria puncta data, ut est manifestum.

309 Probl. 2. *Datum arcum bifariam dividere, sive dati arcus centrum invenire.* Solut. Ducatur chorda arcum subtendens, eaque bifariam dividatur per num. 297: recta perpendicularis dividens chordam, bifariam dividet et arcum, ac per centrum circuli, cujus est arcus, transibit. Ut autem in recta punctum centro respondens inveniatur, aliud punctum à duobus diversum sumatur, atque ut in præced. probl. operandum.

310 Defin. Angulus, cujus vertex in centro circuli est, vocatur *angulus ad centrum*: quod



si ad peripheriam vertex anguli jaceat à duabus chordis formatus, dicitur *angulus segmenti*, sive *angulus inscriptus*; nihil tamen vetat quominus *angulus ad peripheriam* vocetur, ut frequentius audit.

311 Theor. 2. *Angulorum segmenti mensura est dimidius arcus, cui insistent. Dem.* Sit diameter FB (fig. 6), cui ducatur chorda parallela ED. Deinde ducatur secans ACE, quæ cum parallela ED faciat angulum ad peripheriam AED: mensura anguli ACB, qui est ad centrum, erit arcus AB (289); sed angulus ACB æqualis est angulo FCE, utpotè ad verticem opposito (290); et angulus FCE æqualis angulo AED, quippè alterno; ergo omnes habent eandem mensuram, arcum scilicet AB. Quot autem AB sit dimidium AD, sic demonstro. ED, FB sunt parallelæ per constructionem; ergo arcus  $BD = FE$  (307): at  $FE = AB$ , quum sit uterque æqualium angulorum mensura, ergo  $AB = BD$ ; et totus AD duplus AB. Mensura igitur anguli AED ad peripheriam est dimidium arcus, cui insistent. 2. Ne tamen demonstratio singularis videatur ad casum, in quo per centrum transeat ducantur aliæ rectæ HE, GE eodem intervallo AB, ita ut faciant angulum HEG duplum præcedentis AED. Jam quum mensura anguli AED sit dimidius arcus AD, ejus dupli mensura erit totus arcus AD: at ex constructione arcus HG est duplus ipsius AD; ergo mensura anguli HEG est dimidius arcus HG.

3. Pari methodo ostendam, anguli DEG mensuram esse dimidium arcum GD; nam per cons-

structionem  $DEG = HEA$ : at hujus mensura est dimidius arcus  $HA$  ex num. 1 hujus theor. quum linea  $ACE$  per centrum transeat; erit itaque dimidius  $DG$  mensura angul.  $DEG$ .

312 Corol. 1. Angulus ad centrum eidem arcui insistens, ac angulus ad peripheriam, hujus duplus est. Nam hujus mensura est dimidius, alterius integer arcus, cui insistit.

313 Corol 2. Angulus diametro insistens rectus est: ejus enim mensura est quarta pars peripheriæ, quæ anguli recti est mensura (289). Angulus verò insistens arcui semiperipheria majori est obtusus; semicircumferentia minori, est acutus; ut ex ipsis terminis est manifestum.

314 Defin. Si diameter  $ACB$  (fig. 7) semper sibi parallelus ascendat ad extremitatem radii  $CF$ , qui ipsi perpendicularissit, evadet *Tangens*  $DE$ ; quod ad quascumque lineas eodem modo supra radium collocatas extendi debet.

315 Corol 1. Tangens extremitati radii perpendicularis est; in neutram enim partem inclinat. Deindè quum  $AB$  sit parallela  $DE$  per constructionem; et  $ACF$ ,  $BCF$  recti sint, etiam  $DFC$ ,  $EFC$  recti erunt.

316. Theor. 3. *Tangens in unico puncto circum-  
lum tangit.* Dem. Ducantur rectæ  $CD$ ,  $CE$ , aut quæcumque alia inter ipsas, donec cum  $FC$  concurrant; reliquæ omnes sunt obliquæ respectu  $FC$ , quæ est perpendicularis; ergo majores ipsa, ac proindè extra circumulum cadunt ergo  $DE$ ,  $FC$  solum in puncto  $F$  concurrunt, ac proindè unum tantum est punctum contactus.

317 Corol. 1. *Tangens* circulum non ingreditur: quum enim in puncto solum concurrant, ac veluti deosculentur, alia extra alium est. Hinc inferre licet, globum perfectè rotundum, qui sphaera dicitur, si supra planum perfectum jaceat ipsum in unico puncto contingere; quod hic insinuare sufficiat, nondum præmissis notionibus plani, et sphaerae.

318. Corol. 2. Inter circulum, sivè sphaeram, et tangentem infinitæ curvæ duci possunt. Hoc quod paradoxum videtur, exemplo ostendi potest. Nam supra tabulam, quæ perfectè plana sit, possunt superponi globi semper majores in infinitum, quin unquam cum plano tabulae confundantur: globi autem impositi, et crescentes in infinitum, tot curvæ sunt inter primum globum et planum, seu tabulam ductæ, quæ veluti tangens, et circulus considerari possunt. Magis adhuc sapit paradoxon, angulum à tangente et peripheria factum, qui angulus contactus dicitur, minorem esse quovis minimo angulo rectilineo. Nulla enim recta duci potest inter circulum, et tangentem, ut est manifestum. Nam recta quæcumque ducta inter utrumque, circulum secaret, adeoque extra angulum esset: hoc autem à singulari natura curvarum repeti debet.

319 Theor. 4. *Anguli à tangente, et chorda effecti mensura est dimidius arcus à chorda interceptus. Dem.* Sit tangens AB (fig. 8) quæ cum chorda CD faciat angulum BCD; dico hujus anguli mensuram esse dimidium arcus CD. Ducatur ED parallela tangenti AB. Angulus BCD

$\text{=CDE}$ , nam alterni sunt: et anguli  $\text{CDE}$  mensura (311) est dimidius arcus  $\text{CE=CD}$ , utpotè à parallelis comprehensi (307): erit igitur dimidius arcus  $\text{CD}$  mensura anguli  $\text{BCD}$ .

2. Si angulus à tangente, et chorda effectus major esset recto, ut  $\text{BCF}$ , etiam ostendo illius mensuram esse dimidium arcum  $\text{CDF}$ . Nam anguli  $\text{BCD}$  mensura est dimidius arcus  $\text{CD}$ , ut prius demonstratum est: anguli etiam  $\text{DCF}$  mensura est dimidius arcus  $\text{DF}$  (311); ergo totius  $\text{BCF}$  mensura erit dimidius arcus  $\text{CDF}$ .

320 Probl. 1. *Ad datum in peripheria punctum tangentem ducere.* Solut. Sit datum punctum  $\text{F}$  (fig. 7.); ducatur radius  $\text{CF}$ ; huic radio ducatur perpendicularis  $\text{DE}$  (295), hæc erit tangens. Demonstratio deducitur ex num. 314.

321 Probl. 2. *A dato extra circulum puncto ipsi tangentem ducere.* Solut. Sit datus circulus  $\text{FG}$  (fig. 9.), cui ducenda sit tangens è puncto  $\text{A}$ . Ducatur à centro  $\text{C}$  ad punctum  $\text{A}$  recta  $\text{AC}$ , quæ bifariam dividatur (297) in  $\text{E}$ . Centro  $\text{E}$  duc alium circulum  $\text{AC}$ ; hic alterum secabit in punctis  $\text{F}$ ,  $\text{G}$ : per hæc puncta ducantur rectæ  $\text{AB}$ ,  $\text{AD}$ ; hæc erunt tangentes circuli,  $\text{FG}$ . *Dem.* Ducantur radii  $\text{CF}$ ,  $\text{GG}$ ; anguli  $\text{AFC}$ ,  $\text{AGC}$  sunt recti, nam insistent diametro  $\text{AC}$  (313): erunt igitur  $\text{AB}$ ,  $\text{AD}$  perpendiculares radiis  $\text{CE}$ ,  $\text{CG}$ : ergo et tangentes (315).

322 Theor. 5. *Anguli  $\text{A}$  (fig. 10.), qui fit extra centrum à duabus chordis  $\text{BE}$ ,  $\text{CD}$  se invicem secantibus, mensura est dimidius arcus  $\text{BC}$ , plus dimidium arcus  $\text{DE}$ .* *Dem.* Ducatur  $\text{EF}$  parallela  $\text{AC}$ . Angulus  $\text{A=E}$  (299), quippè in-

ternus et externus ad eandem partem: at mensura anguli E est semisumma arcus BF; et semisumma hæc æqualis est dimidio arcui BC + CF: et substituendo pro CF æqualem DE (307), erit mensura anguli A,  $\frac{1}{2} BC + \frac{1}{2} DE$ .

323 Theor. 6. *Anguli A (fig. 11.), à duabus chordis extra circulum effecti, mensura est dimidium arcus BC, minus dimidium arcus DF.*  
*Dem.* Ducatur DE parallela BF: angulus EDC = BAC; sunt enim internus, et externus ad eandem partem inter secantem et parallelas (299): at quum anguli EDC mensura sit  $\frac{1}{2}$  arcus EC (311), erit etiam mensura anguli BAC. Rursus  $\frac{1}{2} EC = \frac{1}{2} (BC - BE)$ , et  $BE = FD$  (307) ergo mensura anguli BAC est  $\frac{1}{2} (BC - FD)$ .

#### §. IV.

#### *Linearum conjunctio in figuras.*

324 Defin. 1. Lineæ extremitatibus conjunctæ figuram efficiunt. Hinc *figuram* dicimus spatium undique lineis clausum. Evidens autem est, duas tantum lineas rectas spatium claudere non posse. Undè tres minimum lineæ ad figuram requiruntur, et hæc figura dicitur *triangulum*: quatuor habet *quadrilaterum*, quinque *pentagonum*, sex *hexagonum*, septem *heptagonum* etc. *Polygonum* nomen genericum est, quamvis figuram designans pluribus lateribus compositam. Circulum veluti polygonum infinitis lateribus constantem concipimus. In præsentia triangulum considerabimus, et quidem



rectilineum: hoc enim solum ad longimetriam pertinet.

325 Defin. 2. Basis trianguli frequenter dicitur linea, quæ inferius est. Potest tamen ad libitum quodlibet latus pro basi assumi. Spatium lateribus comprehensum, *area* trianguli appellatur. Angulus basi oppositus *vertex* trianguli est. Linea autem normaliter ducta à vertice ad basim est mensura altitudinis trianguli. Potest etiam extra basim sumi, producta nimirum basi ut è vertice perpendicularis ducatur, quod in triangulis obliquis omninò fieri necesse est.

326 Defin. 3. Triangulum considerari potest vel in lateribus, vel in angulis. Et i. quidem juxta triplicem diversitatem laterum triplex etiam nomen sortitur. Si latera omnia æqualia sint, dicitur *æquilaterum*: duobus tantum lateribus æqualibus constanti *isosceles* nomen inditum est: *scalenum* verò appellant, quod tria latera inæqualia habet. Ab angulis etiam triplex nomen emanavit. *Rectangulum* dicitur triangulum, quod uno recto constat: *obtusangulum*, quod obtuso: *acutangulum*, quod tres angulos acutos habet. Manifestum erit ex seq. theor. triangulum rectilineum unum tantum angulum rectum, aut obtusum habere posse.

327 Theor. 1. *Tres anguli cujuscunque trianguli æquantur duobus rectis: atque inde eorum mensura est semiperipheria circuli. Dem.* Cuilibet triangulo circumcribi potest circulus (308); adeoque omnes anguli erunt inscripti circulo, totamque peripheriam comprehendenti:

at angulorum circulo inscriptorum mensura est dimidium arcus, cui insistent (311), erit itaque dimidium circuli mensura trium angulorum. Semicircumferentia verò est summa duorum rectorum (289): ergo in omni triangulo angulorum summa æquatur duobus rectis.

328 Corol. 1. Datis duobus angulis in triangulo, tertius manifestè deducitur. Uno autem dato, summa duorum reliquorum est differentia inter datum, et duos rectos. Ideo ex 180 gradibus detracto valore dato, residuum erit valor unius, aut duorum simul angulorum, prout duo, aut unicus cogniti fuerint.

329 Corol. 2. Angulus externus (fig. 12.) ABD æqualis est duobus internis oppositis ACB, CAB. Nam ABC cum ABD est duobus rectis æqualis (287): at etiam cum BAC, et ACB simul facit duos rectos: ergo A, et C simul æquantur ABD. Hæc demonstratio iterari potest cum quolibet angulo, producto extra triangulum latere.

330 Theor. 2. In triangulo. 1. Si duo, aut omnia latera sunt æqualia, anguli his oppositi sunt æquales. 2. Si anguli sunt æquales, latera angulis opposita sunt æqualia. 3. Si inæquales anguli, majori angulo majus latus opponitur. Dem. Triangulo ABC (fig. 13) circumscribatur circulus. 1. Si latus  $AB=AC$ , arcus ab ipsis subtensi erunt æquales (305): ergo etiam anguli, qui ipsis insistent erunt æquales, quum eorum mensura sit dimidium arcuum æqualium. 2. Si anguli sunt æquales, æqualibus arcibus insistent: ac proindè latera, quæ sunt

cordæ talium arcuum, erunt æqualia. 3. Major angulus majori arcui, minor minori insistere debent: ac proinde chordæ, seu latera, erunt respectivè majores, aut minores.

331 Corol. In triangulo æquilatero omnes anguli sunt inter se æquales; et viceversa, quum anguli sunt inter se æquales, triangulum est equilaterum. Nam si circulus eidem circumscribatur, æquales erunt arcus, quibus insistent anguli, si chordæ sunt æquales; et contra, si anguli sunt æquales, debent insistere arcubus æqualibus, ac proindè eorum chordæ, seu latera trianguli erunt æqualia. In triangulo autem isoscele anguli lateribus æqualibus respondentes æquales sunt: ac ubi latera æqualia fuerint, anguli ipsis oppositi æquales erunt, et triangulum isoscele.

332 Theor. 3. *Si in duobus triangulis latera æqualia sunt, omninò æqualia erunt. Dem.* Si cuilibet triangulo circumscribatur circulus (fig. 13 et 14), latera æqualia erunt chordæ æquales talium circulorum, ac proindè dividunt circum-  
lum in tria segmenta respectivè æqualia (305): ergo circuli circumscripti erunt æquales, et tota triangula æqualia.

333. Theor. 4. *Si duo triangula habuerint duo latera respectivè æqualia, (quæ homologa dicantur) et angulum ab ipsis lateribus æqualibus comprehensum æqualem, tota triangula erunt æqualia. Dem.* Superimponentur trianguli latera æqualia AB super ab (fig. 13 et 14), ita ut punctum A incidat in a, et B in b. Quoniam anguli A, a sunt æquales, conversis

triangulis ad eandem partem, latus AC incidet in  $ac$ : quum vero hæc duo latera ponantur æqualia, non poterit unum AC incidere in alterum  $ac$ , quin congruente jam puncto A cum  $a$ , etiam C congruat cum  $c$ : ergo tota triangula congruant necesse est; adeoque æqualia sunt.

334 Theor 5. *Si in duobus triangulis (fig. 13 et 14) ABC, abc duo anguli sint respectivè æquales,  $A=a$ ,  $B=b$ , et unum ex lateribus AB angulis respectivè æqualibus comprehensum, lateri alterius ab æquale, omnia pariter erunt æqualia. Dem.* Concipiatur latus AB superimponi lateri  $ab$ : quoniam æquales sunt, et anguli  $A=a$ , et  $B=b$ , alia duo latera AC, BC super  $ac$ ,  $bc$  cadere debent: si enim extra aut intra caderent, jam anguli non essent æquales: ergo in eodem puncto  $c$  sibi occurrent, atque adeo tota triangula debent congruere; sunt igitur æqualia.

335 Defin. Triangula similia (quod ad alias figuras extendi potest) ea dicuntur, quorum anguli homologi æquales sunt; latera verò diversam habent magnitudinem. Manifestum est, quamvis figuram augeri, aut minui posse; magnitudine tantum proportionaliter variata, quin cetera mutantur. Tunc figuræ erunt similes, non tamen æquales.

336 Theor. 6 *In triangulis similibus, si unum angulum æquali imponas, latera, quæ his angulis opponuntur, erunt parallela. Dem.* Sint duo triangula (fig. 15) ABC, abc æquiangula; superimponantur in angulo homologo C: lineæ, seu latera AC,  $aC$ , BC,  $bC$  perfectè congruent;

et angulus  $A = a$ , et  $B = b$ : erit igitur  $AB$  parallela  $ab$  (300) nam anguli  $A$ ,  $a$ ,  $B$ ,  $b$  sunt internus, et externus respectu linearum  $AB$ ,  $ab$ . Eodem modo res procederet, si imponeretur  $a$  super  $A$ ; latera  $BC$ ,  $bC$  essent parallela; quia anguli  $B$ ,  $b$  internus, et externus ad eandem partem, facti à linea  $AB$  cadente super duas alias, essent æquales.

## §. V.

*Ratio Linearum, sive Proportiones.*

337 Defin. 1. Lineæ sunt proportionales quando prima est ad secundam ut tertia ad quartam, quemadmodum art. 188, et seq. de numeris jam explicatum est. Hinc inter lineas proportionales productum extremorum æquale est producto mediorum; et vicissim, quum productum mediorum æquale est producto extremorum, inter ipsas invenitur proportio geometrica. Sic linea unius pedis est ad lineam 100 pedum, ut linea unius milliarii ad 100 miliaria.

338 Theor. 1. Quum duo triângula sunt similia, latera homologa sunt proportionalia.

Dem. 1. Sit triângulum æquilaterum  $ABD$  (fig. 15.); basis  $BC$  bifariam dividatur in  $b$ ; atque à puncto bisectionis ducatur  $ab$  parallela  $AB$ . Triângula  $ABC$ ,  $abC$  sunt æquiangula; nam angulus  $A = a$  et  $B = b$  (299); ac tertius  $C$  utrique communis. Jam quum latus  $BC$  sit duplum  $bC$ , erit pariter  $AC$  duplum  $aC$ : sit  $BC = 10$  pedibus, aut lineis: erit  $bC = 5$ . Quod



pariter tenet in alio latere  $AC$  respectu  $aC$  quum sit triangulum æquilaterum. Ecce in numeris latera expressa  $10:5::10:5$ , valores nimirum laterum  $AC:aC::BC:bC$ . At numeri prædicti sunt evidenter proportionales, quia productum extremorum æquale producto mediorum: ergo etiam latera utriusque trianguli.

2. Fac triangulum non æquilaterum sed scalenum esse, ut in fig. 16; et parallelam  $ac$  secare latera in quacunque ratione, puta  $1:3$ ; ita ut  $Aa$ ,  $Cc$  sint tertia pars suorum laterum. Supponatur latus  $AB=27$ , et latus  $BC=18$ ; (quivis numeri substitui possunt, qui trifariam dividantur): erit  $27:9::18:6$ . At hi numeri sunt in proportionem geometrica: ergo etiam latera parallela divisa sunt in eadem proportionem. In hoc secundo casu proportionem transtulimus ad segmenta laterum, quæ à parallela proportionaliter etiam secantur, ut est demonstratum. Perspicuitati magis, quam rigori geometrico in hac demonstratione studuimus, ut sæpe aliàs, tironum utilitati consulentes. 3. Ceterum hoc etiam modo proportio inter latera homologa potest demonstrari, ne assumere videamur, quod probandum est. Quoniam triangula  $ABC$ ,  $aBc$  pronuntur similia, erit angulus  $C=c$ , et  $A=a$ ; adeoque  $AC$ ,  $ac$  erunt parallelæ (300): ergo  $AB:BC::aB:Bc$ ; quæ proportio etiam in reliquis homologis institui potest.

339 Schol. In demonstrationibus præjactis attulimus dimidiam et tertiam partes, ut proportionem genericè demonstraremus. Manifestum autem est cuicumque naturam mathemati-

carum demonstrationum callenti, eas inniti ratione universali quæ ad casum particularem deducitur, ut minus abstracte, et confusè res percipiatur. Quare ex theor. universim deducendum, in triangulis similibus latera, proportionalia eam. rationem inter se habere, ut si latus unum respectu alterius tot habeat partes aut *aliquotas*, aut *aliquantas*, scilicet quæ sine residuo, aut cum residuo latus dimetiantur; easdem in altero respectu sui consequentis debere reperiri. Sic triangulum à lineis visualibus ab oculo ad lunam, et solem directis formatum, tot habet partes majores in semidiаметris ex g. terrestribus; quot parvulum triangulum, in charta astronomi ad normam alterius descriptum, in punctis minoribus continebit. Pariter in sectionibus à parallelis in eodem triangulo factis; ea ratio inter partes, seu segmenta trianguli invicem comparata reperitur, quæ in partibus proportionalibus totius trianguli invenietur. Exempla adducta satis superque id ostendunt.

340 Theor. 2. *Si triangula latera duo habuerint proportionalia, et angulus à lateribus proportionalibus interceptus æqualis utrobique sit; triangula erunt similia. Dem.* Sint duo triangula ABC, *abC* (fig. 15), ubi latera AB, AC sint proportionalia lateribus *ab*, *aC*, et angulus  $A=a$ ; erunt anguli in C et in *b* æquales, et bases BC, *bC*, proportionales: ac deindè tota triangula similia. Nam anguli in A et *a* ponuntur æquales: erunt igitur AB, *ab* parallelæ (300), quia angulos internum et externum ad eandem

partem faciunt æquales: ergo etiam anguli in  $B$ , et  $b$  sunt æquales; atque adeò tertius tertio  $C$  æqualis utrobique erit (328), ac triangula erunt æquiangula, et similia, et omnia latera homologa proportionalia (338).

341 Corol. Si recta  $AD$  (fig. 17) angulum  $BAC$  in duos angulos æquales dividat; eandem rectam  $BC$ , angulo  $A$  oppositam, dividet in partes  $BD$ ,  $DC$  lateribus  $AB$ ,  $AC$  proportionales: et si dividit in partes proportionales, angulum bifariam dividit. Etenim producta  $A$  in  $E$ , ita ut fiat æqualis  $AC$ , ducatur  $EC$ . Quoniam in triangulo  $ACE$  duo latera sunt æqualia, erit isoscele, et anguli in  $E$  et  $C$  æquales: et angulus  $BAC$ , utpote externus, æquatur duobus  $E$  et  $C$  (329), et supponitur bifariam divisus: sunt igitur anguli  $C=E=DAC=DAB$ : et  $AD$ ,  $EC$  parallelæ (300): ergo  $AB:AE::BD:DC$ : et quum  $AE=AC$ , erit etiam  $AB:AC::BD:DC$ .

2. Si ponitur  $BD:DC::AB:AC$ , quum  $AC=AE$ , erit etiam  $BD:DC::AB:AE$ , atque  $AD$ ,  $EC$  erunt parallelæ (338): erit igitur angulus  $BAD=E=C=CAD$ : ergo angulus  $BAD=CAD$  et totus  $BAC$  bifariam divisus per  $AD$ .

342 Theor. 3. *Duæ chordæ (fig. 18) se mutuo secantes in circulo, habent segmenta reciproce proportionalia.* Claritatis gratia premitendum est, proportionem, tum esse reciprocam seu inversam, quum duæ primæ quantitates, quæ cum aliis duabus comparantur, non sunt antecedens, et consequens primæ rationis, ut in proportionem directa; sed aut extrema aut media proportionis: et similiter quan-

titates secundæ rationis extrema aut media sunt. In casu nostro, ut proportio esset directa, deberet esse  $AB:BC::BD:BE$ ; quum sit  $AB:BD::BE:BC$ , in qua sunt  $BD, BE$  media proportionis, quæ in directa sunt antecedens et consequens secundæ rationis; et  $AB, BC$  extrema, quæ in directa erant antecedens et consequens primæ rationis. *Dem.* Ducatur  $AE$  et  $DC$ : triangula  $ABE, CBD$  sunt similia; nam anguli in  $B$  utpotè ad verticem oppositi æquales sunt (290): in  $C$  et  $E$  sunt etiam æquales, quum insistant arcui  $AD$ , quod pariter contingit in  $D$  et  $A$ , qui insistent arcui  $CE$  (311): latera igitur homologa sunt proportionalia (338): et  $AB:BD::BE:BC$ : et alternando  $AB:BE::BD:BC$ .

343 Corol. 1. In circulo si chorda diametrum perpendiculariter secat, quodlibet segmentum chordæ est media proportionalis inter segmenta diametri. Nam (fig. 18) sit diameter  $AC$ : ducatur  $DE$  ipsi perpendicularis. Per theor. præced.  $AB:BD::BE:BC$ . At quum  $BE=BD$  (303), ipsi substitui potest; ergo  $AB:BD::BD:BC$ . Eadem demonstratio in altero segmento  $BE$  institui posset.

344 Corol. 2. Linea quævis, à peripheria in diametrum perpendiculariter demissa, est media proportionalis inter segmenta diametri. Est enim dimidium chordæ, diametrum perpendiculariter secantis, ut in præcedenti corol. Hæc linea dicitur *ordinata* ad circulum, ut  $BD$  (fig. 18): pars autem  $BC$ , dicitur *abscissa*. Hinc deducitur methodus mediam proportiona-

lem inter duas datas lineas inveniendi. Sint datae lineae AB, BC inter quas media proportionalis quaeritur: jungantur, ut in unam AC coalescant; quae bifariam divisa dabit centrum circuli ADCE; demum erigatur BD perpendicularis in puncto concursus (295) utriusque lineae: haec erit media proportionalis quaesita ex demonstratis.

345. Corol. 3. Quod si à puncto D peripheriae ducantur DA, DC; duo triangula ADB, BDC erunt similia inter se, et majori triangulo ACD. Nam anguli in B et ADC (313), utpotè recti, aequales sunt: angulus CAD=CDE, quum arcus CE, CD, quibus insistunt, aequales sint (311); quod pariter extendi potest ad arcus AD, AE, quibus insistunt reliqui duo anguli: quamvis ex aequalitate aliorum homologorum satis deducatur reliquorum aequalitas. Hinc deducuntur sequentes proportionēs (fig. 23),  $AD:AG::AG:AI$ . Hoc est rectangulum  $AI \times AD$  seu AB, aequale quadrato AFG. Atque etiam  $ID:GD::GD:AD$ ; scilicet rectangulum  $ID \times AD$ , seu  $DC=GD^2$ : productum enim extremorum aequale est facto mediorum. Atque haec est una ex demonstrationibus celeberrimae prop. 47, lib. 1. Euclidis; nimirum in triangulo rectangulo quadratum sub hypotenusa AD, aequale esse quadratis laterum AG, DG. Jam enim ostensum est  $AG^2+DG^2=AI \times AB+DI \times DC=AD^2$ .

346 Theor. 4. Duæ secantes AB, AC (fig. 19) ex puncto A ductæ, sunt reciproce proportionales suis segmentis AG, AD. Dem. Ducan-



tur BD, CG; triangula ABD, ACG sunt æquiangula; nam angulus in A communis, in B et C insistent eidem arcui DG (311); tertius igitur tertio æqualis erit. Hinc laterum homologorum proportio resultat  $AB: AD :: AC: AG$ ; et alternando  $AB: AC :: AD: AG$ .

347 Corol. Si recta AB sit secans, et AE tangens, erit  $AB: AE :: AE: AG$ ; adeoque tangens est media proportionalis inter secantem et ejus segmentum. Etenim ductis BE, EG, triangula ABE, AEG sunt æquiangula quum angulus A communis sit; et anguli in B atque E æquales (311, 319): resultat ergo proportio sequens  $AB: AE :: AE: AG$ . Ex hoc corollario deducitur etiam methodus inveniendi mediam proportionalem inter duas lineas datas, ut est manifestum.

348 Probl. 1. *Datam rectam, aut rectas in partes partibus alterius proportionales dividere* (fig. 20). Solut. Sit FG ad cujus normam aliæ DE, BC dividendæ sint. Solut. Statuantur parallelæ prædictæ rectæ, ac per earum extremitates ducantur AF, AG, ita ut fiat triangulum AFG; deindè à partibus, in quas divisa est FG, ducantur rectæ ad punctum A: dico partes, in quas divisæ sunt DE, BC proportionales esse partibus in FG respondentibus. *Dem.* Triangula AB<sub>1</sub>, AD<sub>1</sub>, AF<sub>1</sub> sunt similia: nam angulus in A est communis; in B, D, F sunt æquales (299): sunt igitur æquiangula, et latera homologa habent proportionalia; bases nimirum B<sub>1</sub>, D<sub>1</sub>, F<sub>1</sub>. Hæc demonstratio ad cetera ejusdem figuræ triangula communis est.

2. Potest etiam ex num. 339 alia methodus deduci. Sint  $AF$ ,  $AG$  (fig. 20) in partes proportionales altera alterius dividendæ, ut  $AC$ ,  $CE$ ,  $EG$ . Statuantur ad angulum quemcumque  $A$ , et ducatur  $FG$ . Ex punctis  $C$ ,  $E$  ducantur  $BC$ ,  $DE$  parallelæ ad  $FG$ . Hæ secabunt partes  $AB$ .  $BD$ ,  $DF$  proportionales partibus sectionis alterius lineæ; ut constat ex cit. num. 339. Ex hoc problem. derivatur scalæ geometricæ construendæ methodus, cujus usus in Geometria practica frequentissimus.

349 Probl. 2. *Datis tribus lineis, quartam proportionalem invenire.* Solut. 1. Invento in numeris earum valore, facile per regulam auream quartus numerus proportionalis invenitur. 2. Sint tres lineæ (fig. 20)  $a$ ,  $b$ ,  $c$  quibus invenienda est quarta proportionalis fiat angulus quicumque  $FAG$ , et in eo accipiantur pars  $AB=a$ , et pars  $AC=b$ , et ducatur  $BC$ . Deinde ad latus  $AB$  accipiaturs pars  $AD=c$ , atque ex hoc puncto ducatur  $DE$  parallela  $BC$ : pars  $AE$  erit quarta proportionalis quæsitæ. Nam  $AB:AC::AD:AE$  (338). Possent etiam intercipi partes ab  $A$  in  $B$ , et in  $C$ ; deinde à  $B$  in  $F$ , atque à  $C$  in  $G$ , eadem enim proportio resultaret.

## CAPUT II.

*Planimetria, seu de Superficiebus.*

## §. I.

*Quadrilatera.*

350 **D**efin. *Quadrilaterum* figura est quatuor lineis rectis terminata. Pro diversitate angulorum, et laterum varia etiam nomina sortitur. Nam 1. *Parallelogrammum* dicitur, quod latera opposita habet parallela. 2. *Quadratum*, quod æquilaterum est, et rectos angulos habet. 3. *Rectangulum*, quod rectos habet angulos, et latera opposita tantum habet æqualia. 4. *Trapezium* neque angulos, neque latera habet æqualia. 5. *Rhombus* latera habens æqualia, angulos tantum oppositos habet æquales. 6 *Rhomboides* habet solum latera opposita; et angulos oppositos æquales. Demum, recta inter angulos oppositos ducta dicitur *diagonalis*.

*Adnotatio historica.* Bonaventura Cavallerius, Mediolanensis, sæculo superiore, ut generis superficierum, ac reliquarum quantitatum geometricarum explicaret, methodum *indivisibilium* induxit. Concepit enim puncta, aut potius lineolas ex quibus lineæ coalescunt, veluti indivisibilia, aut quovis dato minora. Lineas pariter à punctis, seu lineolis tamquam ab elementis compositas, quasi series eorundem punctorum, ac deinde superficies veluti aggregatum linearum; seu parvarum superficierum contiguarum, quæ quasi ex infinitis punctis, et

lineis coalescentes superficiem constituunt. Demum superficies, quasi superimpositæ eadem contiguitate ac puncta et lineæ, solidum componunt. Ex his principiis, quibus etiam *infinitesimalium* calculus innititur, æqualitatem, aut inæqualitatem figurarum investigat. Evidens namque est, eas figuras æquales esse debere, in quibus totidem elementa, aut puncta indivisibilia reperiuntur. Reperientur autem, quum eisdem, aut æqualibus spatiis superficies concluduntur. Nihil enim geometræ diversæ densitatis corporum solliciti, omnia veluti sine poris, atque æquè solida considerant. Jam punctum veluti parvum circulum, aut quadratum, quovis excogitabili minorem considerant, lineam veluti continentia puncta: superficiem continentes lineas in latum extensas: figuras alias, puta circulum, ex infinitis peripheriis concentricis semper minoribus; quadratum ex infinitè minimis quadratis etc. Eamdem hanc methodum usurpasse Archimedes prolixiori exhaustionis, et triangulorum inscriptorum et exscriptorum ambage propositam, consentiunt Cavallerio recentiores geometræ, cum Montucla in historia Matheseos: quod Jacquierius ad infinitesimorum calculum etiam extendit. Sanè hæc recentiorum sors esse videtur, ut si quid inventum ab ipsi sit, uti novitatum auctores refelluntur: quod si ab antiquis quoquo modo usurpatum ostendant, furti arguantur, quod Cavallerio, aliisque contigisse comperimus.

351 Theor. 1. In parallelogrammo latera opposita sunt æqualia; idcirco quadrilaterum,

*lateralia opposita habens æqualia, erit parallelogrammum. Dem.* Sit (fig. 21)  $ABCD$  parallelogrammum; ducatur diagonalis  $BD$ : anguli  $ABD$ ,  $BDC$ , utpotè alterni, æquales sunt (299); quod pariter de angulis  $ABD$ ,  $DBC$  dicendum est: duo igitur triangula sunt æquiangula: porro quum latus  $BD$  sit utrique commune, reliqua etiam latera angulis æqualibus opposita erunt æqualia (334): ergo  $AB=CD$ , et  $AD=BC$ .

2. Quoniam  $AD=BC$ , et  $AB=CD$ , et latus  $BD$  commune, triangula à diagonali facta erunt æqualia (330), et anguli lateribus æqualibus oppositi  $ABD$ ,  $BDC$  æquales: at hi sunt alterni: ergo  $AD$ ,  $BC$  sunt parallelæ (300).

352 Corol. 1. Omnes anguli quadrilateri quatuor rectis æquantur. Nam per diagonalem in duo triangula dividuntur; et valor angulorum cujuscunque trianguli sunt duo recti (327).

353 Corol. 2. Diagonalis parallelogrammum in duo triangula similia, et æqualia partitur. Secans enim parallelas angulos alternos facit æquales (229): et quum diagonalis sit latus commune, cui æquales anguli insistent, tota triangula erunt æquiangula, et æqualia (334).

354 Theor. 2. *Duo parallelogramma  $ABCD$  (fig. 22.)  $BEFC$ , ejusdem basis, et altitudinis; seu inter easdem parallelas constituta, æqualia sunt. Dem.* Triangulum  $BCG$  utrique parallelogrammo commune est: restat igitur, ut duo trapezia  $ABGD$ ,  $CFEG$  ostendantur æqualia. Jam triangula  $ABE$ ,  $CDF$  æqualia sunt; nam latus  $AB=DC$ , latus  $BE=CF$ , et quum pars



DE sit utrique communis, atque  $AD=EF$ ; omnia latera, et triangula erunt æqualia (332). Demum ablato triangulo DEG utrique communi, reliqua erunt æqualia.

355 Corol. 1. Triangula sunt dimidium parallelogrammi ejusdem basis, et altitudinis. Nam si eadem basi et altitudine fiat parallelogrammum ABCD (fig. 21), hoc æquale est duobus triangulis æqualibus (353) ABD, BCD. Quodlibet igitur triangulum erit ejus dimidium.

356 Corol. 2. Ob eandem rationem triangulum parallelogrammo basi æquale, altitudine duplum, aut viceversa, æquale erit ipsi parallelogrammo. Erit enim dimidium alterius parallelogrammi, quod sive basi, sive altitudine sit primi duplum. Altitudo autem in figuris geometricis est perpendicularis è vertice ad basim, sive distantia inter parallelas per verticem, et basim transeuntes. Sic AB, aut DC (fig. 22) mensura est altitudinis utriusque parallelogrammi recti, et obliqui.

## §. II.

### *Superficierum mensura.*

357 Theor. 1. *Superficies parallelogrammi æqualis est producto baseos in altitudinem.*  
*Dem.* Sit cujuscumque parallelogrammi ABCD (fig. 22.) basis BC æqualis sex pedibus, aut hexapedis, et altitudo æqualis octo: manifestum est *aream* totam ABCD haberi, si ducantur  $6 \times 8 = 48$ . Nam tota superficies concipi potest divisa in tot parva quadrata, qualia designata sunt

numeris 1, 2, 3, etc.; et quum pes unus in altitudine producat sex in latitudinem, octo dabunt 48 parva quadrata, seu pedes, ut dicunt *quadratos* in tota superficie. Idem pariter concipi debet, etiamsi basis et altitudo sint incommensurabiles, quod jam num. 339 animadversum est pro triangulis, et ad omnes figuras extendi debet.

358 Corol. 1. Superficies trianguli æqualis est producto basis in dimidiam altitudinem, aut altitudinis in dimidiam basim. Est enim dimidium parallelogrammi ejusdem basis, et altitudinis (355), cujus area æqualis est producto basis in altitudinem, aut viceversa ex num. præced.

359 Corol. 2. Quælibet parallelogramma, adeoque et triangula, super eadem basi, et inter easdem parallelas constituta, æqualem habent superficiem, cujus mensura est productum basis in altitudinem pro parallelogrammis, et dimidium pro triangulis. Quod quidem extendendum est etiam ad parallelogramma, et triangula quorum inclinationes diversæ sint, quum altitudines sumantur à distantia parallelarum, inter quas comprehenduntur.

360 Corol. 3. Ex hoc theor. deducitur vulgaris demonstratio proposit. 47 lib 1. Euclidis, quam faciliiori methodo jam demonstravimus num. 345. Propositio autem euclidæa, est quadratum hypotenuse cathetorum quadratis æquale esse. En demonstrationis compendium. Est triangulum rectangulum AGD (fig. 23): sub hypotenusa AD, et super cathetos AG,

DG quadrata describantur; deindè quadratum ABCD in duo rectangula ABHI, CDIH dividatur ope lineæ GH, per angulum rectum G trianguli rectanguli ductæ ac lateribus AB, DC parallelæ, ac demum ducantur rectæ BG, CG, AE, DF. Jam parallelogrammum ABHI est ejusdem basis, et inter easdem parallelas, ac triangulum ABG: erit igitur ipsius duplum ex num. 355. Quadratum pariter AGF, et triangulum FAD habent eandem basim AF, atque inter parallelas ejusdem quadrati FA jacent; adeoque quadratum FA duplum erit trianguli ejusdem basis et altitudinis AFD. Rursus triangu-  
 gula ABG, ADF æqualia sunt; nam latus  $AB = AD$ : latus  $AG = AF$ ; atque angulus ab his lateribus comprehensus utrobiquè rectus, et angulus GAI communis utrique (333): ergo eorum dupla etiam erunt æqualia; nimirum  $AG^2 = ABHI$ . Eadem demonstratione iterata inter rectangulum CDIH, et quadratum DEG, evidenter deducitur  $AD^2 = AG^2 + DG^2$ ; quum quodlibet quadratum cathetorum æquale sit ei, quod sibi respondet è duobus rectangulis, in quæ hypotenusæ quadratum est divisum. Quod autem tam quadratum FG, quam triangulum ADF sub eisdem lateribus parallelis comprehendantur, patet ex eo quod AG supra lineas G ac D cadens, angulos utrinqùè rectos format, atque adeò ambæ in unam rectam coalescunt (289).

361 Corol. 4. Superficies trapezii cujuscunque habebitur, ducta diagonali, ac superficie in duo triangu-  
 la divisa. Nam si è vertice ad

basim utriusque trianguli demittatur perpendicularis, atque hæc ducatur in basim, dimidium productum erit area trianguli, et duplex dimidium productum dabit integram aream trapezii. Hinc deducta est praxis metiendi agros, provincias etc., divisa superficie in tot triangula, quod opus fuerit, atque eorundem basibus in altitudinem ductis; dimidium productum mensura est areæ dimetiendæ. In praxi verò aliæ cautelæ, atque instrumenta adhiberi debent, quorum descriptio non est hujus loci.

362 Probl. 1. *Invenire quadratum æquale summæ aut differentiæ datorum quadratorum.*

Solut. Latera datorum quadratorum statuuntur ad angulum rectum: deindè ducatur hypothenusa; quadratum hujus erit æquale duobus datis. Quod si non summa duorum, sed differentia unius quadrati ab alio invenienda sit, duæ lineæ datæ ita statuuntur, ut una sit hypothenusa, et altera cum alia ducenda faciat angulum rectum. Porro hujusmodi constructio facilè obtinetur, si ad extremitatem catheti jam notæ perpendicularis ducatur (295); atque ex altera extremitate hypothenusa tamquam radio arcus perpendicularem secans describatur: recta sive radius ab hac extremitate ad punctum intersectionis ductus, dabit hypothenusam hujus trianguli rectanguli, et cathetum ignotam, cujus quadratum erit differentia unius quadrati ab alio; ut ex æqualitate quadrati hypothenusæ cum quadratis laterum manifestum est.

363 Probl. 2. *Invenire geometricè radices*

*quadratas numerorum naturalium 2, 3, 4 etc.*

Solut. Quamvis aliquorum numerorum radices arithmetice inveniri non possint quæ numeris, aut integris, aut fractis exactè exprimentur, geometricè tamen facillimè inveniuntur. Sit linea indefinita AC (fig. 24): ducatur AB normalis, quæ sit æqualis 1: accipiat in parte AC,  $Aa=AB$ , et ducatur hypothenusa Ba: erit  $Ba^2=Aa^2+AB^2=1+1=2$ ; et  $Ba=\sqrt{2}$ . Deindè transferatur Ba in Ab, et ducatur hypothenusa Bb: erit  $Bb^2=AB^2+AB^2=2+1=3$ ; et  $Bb=\sqrt{3}$ . Eadem praxi Bb transferatur in Ac, et ducta Bc, erit hæc  $=\sqrt{4}$ : Bd  $=\sqrt{5}$  etc.

364 Probl. 3. *Quadratum dato parallelogrammo, aut triangulo æquale construere.* Solut. Quum area parallelogrammi æqualis sit producto basis in altitudinem, quærat media proportionalis inter utramque (344); quadratum super hac constructum erit æquale parallelogrammo; quum productum extremorum æquale sit quadrato medii in proportionem continua. Idem agendum occurrit in triangulis, accepta dimidia altitudine, aut dimidia basi inter qua inveniatur, ut supra, media proportionalis, quæ dabit latus quadrati æqualis triangulo dato.

§. III.

*Polygona.*

365 Defn. 1. *Polygona* dicuntur figure pluribus, quam quatuor, rectis circumscriptæ.



Ceterum peculiaria habent nomina pro numero laterum, quibus constant. *Pentagonum*, *Hexagonum*, *Heptagonum*, *Octogonum*, *Enneagonum* etc. figuras 5, 6, 7, 8, 9 lateribus constantes appellant. Polygonum erit *regulare*, si latera, et angulos habeat æquales: alioquin *irregulare* erit. Polygona regularia erunt similia, si et homonima sunt, ut pentagona, chiliogona etc., quantumvis diversæ magnitudinis sint. Circuli verò veluti polygona infinitorum laterum considerantur.

366 Defin. 2. Polygoni *perimeter* vocatur linea ipsum circumscribens, ut peripheria circuli. Undè duo polygona sunt *ipsoperimetra*, seu æqualis perimetri, quum lineæ ipsa circumscribentes sunt æquales. Porro ad perimetrum duci possunt radii, vel perpendiculares, vel obliqui. Recta normalis à centro ad latus perimetri est radius rectus: obliquus verò à centro ad angulum ducitur.

367 Theor. 1. *Valor angulorum cujusvis polygoni juxta duplum numerum laterum deducitur, ita ut tot rectis æquivaleant, quod fuerit duplus numerus laterum demptis quatuor.*  
*Dem.* Sit hexagonum ABCF (fig. 25), cujus duplus numerus laterum est duodecim: dico valorem angulorum hujus figuræ esse æqualem octo rectis. Nam ductis radiis  $cA$ ,  $cB$ ,  $cF$  etc. dividitur in sex triangula, quorum angulorum valor sunt duo recti (327): valor igitur omnium æquabitur 12 rectis, duplus nimirum numerus laterum. At angulorum in centro  $c$  valor, qui quatuor rectis æquatur (289) ad hexagonum

non pertinet: ergo valor hujus hexagoni est  $12 = 4 = 8$ . Eodem modo de quolibet polygono ejus area in tot triangula divisa quot sunt ipsius latera, ostendetur veritas asserta, ut est manifestum.

368 Corol. Ex demonstratis facile deducitur valor cujusvis anguli ad centrum, in quos dividitur per triangula centrum polygoni. Etenim omnium angulorum valor quatuor rectis æquatur: tot autem erunt anguli, quod latera habet polygonum. Diviso igitur 360 per numerum laterum, cujusvis anguli valor habebitur per quotientem expressus. Sic in exemplo adducto, diviso 360 per 6, quotus dat 60 gradus pro mensura anguli c.

369 Theor. 2. *Polygonum similium perimetri sunt inter se, ut ipsorum radii.* Dem. Hexagonum (fig. 25) ABCD, et parvum hexagonum c divisa sunt in totidem triangula æquiangularia, et similia: ergo habent latera proportionalia (338), et singula latera unius ad singula alterius, ut summa omnium laterum unius ad summam alterius (211). At perimenter est summam laterum baseos: sunt igitur inter se ut singula latera, seu radii.

370 Corol. Quum circuli considerentur velut polygona infinitorum laterum, erunt inter se, ut radii. Unde si radius unius est dimidium, aut tertia, quarta, quinta pars alterius; hæc eadem proportio erit inter peripherias. Similiter radii erunt, ut peripheriæ, et ut partes similes peripheriarum, seu ut arcus similes. Eadem etiam proportio cum diametris occurrit. Nam

radii dimidia sunt diametrorum, et quæ proportio radium inter et peripheriam intercedit, inter ipsam et diametrum interveniat, necesse est.

371 Teor. 3. *Hexagoni circulo inscripti latus æquale est radio. Dem.* Sit hexagonum ABC (fig. 25) circulo inscriptum: demittantur radii AC etc. ad angulos hexagoni. Quum latera omnium triangulorum sint radii, erunt isoscelia, et anguli ad basim æquales. Ad angulorum ad verticem mensura sunt gradus 60 (368): ergo duorum ad basim summa est 120: et quoniam æquales sunt, uniuscujusque etiam mensura erit 60. Triangulum igitur est æquilaterum, et basis, quæ est latus hexagoni, æqualis radio.

372 Corol. 1. Hexagoni perimeter sextupla est radii, et tripla diametri. Quum autem peripheria circuli major sit perimetro hexagoni circulo inscripti; luculenter eruitur, peripheriam plus quam ter continere diametrum, adeoque majorem inter ipsas rationem intercedere, quam inter 3: 1.

373 Schol. Hinc celeberrimum problema *quadraturæ* circuli, ut ajunt, natum est; quod diù sublimiorum mathematicorum ingenia tor- sit; in præsentiarum autem illorum tantum conatus exercet, qui delirare non gravantur in miscendo quadrata rotundis, eo quod illorum differentiam minimè percipiant. Ad praxim enim nihil solutio problematis conferret, quum facillimum factu sit, quadratum æquale circulo construere. Ad theoriam quod attinet, adeò jam per approximationem geometræ accesse-

runt, ut intellectui humano nulla spes videatur affulgere propius accedendi. Archimedes rationem  $7:22$ ; seu  $1:3+\frac{1}{7}$  quam proximè statuit. Metius Geometra Batavus  $113:355$  rationem veluti luculentio rem omnibus, quæ numeris integris et non ita magnis continentur, proposuit, atque usu magis à geometris recepta est. In calculis verò qui maiorem approximationem requirunt, Ludolphus Coloniensis, seu Vanculen, invenit, supposita diametro 1 cum triginta duobus cyphris, seu zeris, peripheriam fore minorem 314, 159, 265, 358, 979, 323, 846, 264, 338, 327, 950. Addita verò unitate, jam evasum ire maiorem.

374 Corol. 2. Ex adductis proportionibus facile, data diametro, aut peripheria circuli, ipsius peripheria, aut diameter invenitur. Etenim instituta proportione per regulam auream  $113:355::$  ut data diameter ad ignotam circumferentiam, aut viceversa,  $355:113::$  ut data circumferentia ad ignotam diametrum; quartus terminus per regulam deductus dabit solutionem quæsitam. Idem cum formula Ludolphiana peragi potest, recisis ad dextram tot cyphris, quot opus fuerit in prima ratione, ex. g.  $100,000:314,159::$  ut data diameter ad circumferentiam  $x$ .

375 Theor. 4. *Superficies polygoni regularis æqualis est dimidio producto ex perimetro, et perpendiculari, seu radio recto, in latus polygoni demisso. Dem.* Triangula omnia, in quæ resolvitur polygonum regulate, sunt æqualia; quum æqualibus lateribus homologis, et angu-

lis constant: at superficies cujusque trianguli est dimidium factum ex basi in altitudinem, quæ est radius rectus (358): ergo summa superficierum omnium triangulorum erit dimidium productum ex basibus in altitudinem, seu perimetri in radium.

376 Corol. Superficies circuli æqualis est producto dimidio ex radio in circumferentiam. Jam enim dictum est circulum veluti polygonum infinitorum laterum considerari. Propter eandem rationem sectoris circuli superficies, æqualis est dimidio producto ex radio in arcum sectoris.

#### §. IV.

##### *Ratio superficierum.*

377 Defin. Quemadmodum de lineis dictum est, illarum proportionem esse rationem, qua una aliam continet, aut in illa continetur, sic in superficiebus figurarum similium intelligendum est, eas esse in assignata proportionem, quum una continet, aut continetur in alia. Hæc autem ratio potest esse *composita*, aut *duplicata*. Prima est productum duarum rationum inter se ductarum; secunda est productum alicujus rationis ad quadratum elevatæ, ut fusius num. 193 explicatum est.

378 Corol. Quum superficies sint productum basium et altitudinum, ab his deducenda est ratio seu proportio inter duas superficies invicem comparatas. Quare si superficies unius figuræ dicatur  $S$ , ejusque altitudo  $A$ , ac basis  $B$ ; erit  $S = AB$ . Pariter si alterius superficies



dicatur  $s$ , altitudo  $a$ , et basis  $b$ ; erit  $s = ab$ .

Hinc 1.<sup>o</sup> Si duo rectangula parallelogramma triangula habuerint æquales bases et altitudines, erunt æqualia. Nam  $S = AB$ , et  $s = ab$ ; quare  $S : s :: AB : ab$ ; atqui  $AB = ab$ ; igitur  $S = s$ .

2.<sup>o</sup> Si habuerint æquales bases, altitudines verò diversas, erunt inter se ut altitudines, sive unum eodem modo continebit alterum, quo ejus altitudo continet altitudinem alterius. Quod pariter dicendum erit, si altitudines æquales, bases autem inæquales habuerint; ab his nempe eorum diversitas erit repetenda. Nam  $S : s :: AB : ab$ ; undè ablatis æqualibus  $A = a$ , aut  $B = b$ , remanet  $S : s :: A : a$ ; sive etiam  $S : s :: B : b$ .

3.<sup>o</sup> Quod si fuerint in ratione reciproca, ita ut unius altitudo æqualis sit alterius basi, et hujus altitudo æqualis basi primi, aut eandem servant proportionem, erunt æqualia. Nam si  $A : a :: b : B$ ; erit  $AB = ab$  (200), atque adeò  $S = s$ . 4.<sup>o</sup> Demum altitudinibus et basibus inæqualibus respondet ratio composita baseon et altitudinum: scilicet ducta cujusque basi in altitudinem, quæ ratio inter producta intercedat, hæc eadem existet inter figuras invicem comparatas. Est enim tunc  $S : s :: AB : ab$ .

379 Theor. 1. *Omnia triangula similia, atque adeò omnes figuræ similes, quæ in triangula similia resolvi possunt, sunt in ratione duplicata laterum homologorum. Dem.* Triangula similia latera homologa habent proportionalia (338): ergo  $A : a :: B : b$ ; ergo  $S : s :: A^2 : a^2 :: B^2 : b^2$  (211). Nempè si quadratum unius lateris bis, ter, etc. continet quadratum lateris

homologi, superficies figuræ erit bis, ter, verbo toties major altera, et vicissim.

380 Corol. Circulorum superficies sunt in duplicata ratione, sive ut quadrata radiorum, aut peripheriarum. Sunt enim figuræ similes, et veluti polygona infinitorum laterum considerantur (370). Hæc etiam proportio extenditur ad diametros, et arcus similes, ut ibidem annotatum est.

381 Theor. 2. *Polygonorum circulo inscriptorum majus est, quod plura habet latera minimum triangulum. Dem.* Manifestum est (fig. 25) hexagonum majorem superficiem comprehendere, quam triangulum, aut quadratum, aut pentagonum, quæ eidem circulo inscriberentur: latera enim perimetri horum polygonorum minus accederent ad circumferentiam; adeoque minus spatium occuparent. Deinde si loco hexagoni duodecagonum inscriberetur,  $aFbEdF$ , latera perimetri, quum minora sint, magis ad circumferentiam accedent: triacula enim duo  $Fcb$ ,  $Ecb$  majora sunt, quam triangulum  $EcF$ : illud enim superant toto triangulo  $FbE$ , quod inter alterius basim, et circumferentiam clauditur; ergo tota altitudine hujusce trianguli magis accedunt ad peripheriam, quum basis  $FE$  communis utrique  $EcF$ , et  $FbE$  sit.

2. Eadem demonstratio in triangulo  $ADE$  (fig. 18) institui potest; quodcumque enim polygonum intra eandem peripheriam inscribatur, quum plura latera habere debeat, ejus Perimeter magis ad circumferentiam accedet; adeoque majus spatium circumscribet.

382 Corol. Circulus, qui polygonum est laterum infinitorum, majorem superficiem habebit, quam reliquæ omnes figuræ intra ipsum inscriptæ: ejusque peripheria major est quamcumque perimetro aliorum polygonorum intra ipsius peripheriam inscriptorum.

383 Theor. 3. *Polygonorum circulo circumscriptorum superficies major est illius, quod pauciora, minor, quod plura habet latera.*

*Dem.* Quo plura habet latera polygonum, magis ad peripheriam circuli, cui circumscriptum est, accedit: contra, cui pauciora sunt latera, major est ab eadem recessus; ergo et major superficies seu ambitus inclusus. Major etiam erit ejus perimeter, quippè majorem ambitum complectitur. Et ob eandem rationem minor erit perimeter illius, quod plura habet latera, et minima perimeter seu circumferentia circuli, cui circumscribuntur polygona: triangulum verò omnium circumscriptorum majorem superficiem complectetur, et majorem perimetrum habebit.

§. V. De figuris planis.

*Plana.*

384 Defin. *Planum est superficies, cui aptari potest ubique linea recta.* Talis est superficies speculi plani, saltem ad sensum. Quaquaversus enim illi linea recta accommodari potest, aut norma: quæ vices gerit lineæ rectæ, quæ plana vulgò examinantur. Hinc *planum* est superficies omnium brevissima, quæ intra easdem lineas includi potest.

385 Theor. *Tria puncta plani positionem determinant, dummodò in eadem recta non sint.* Dem. Per tria puncta, quæ in eadem recta non jaceant duci potest planum, ut est manifestum: at planum hoc unicum est; nam quodcumque aliud diversum, non esset omnium brevissimum intra easdem lineas contentum; tria igitur puncta, per quæ planum transire potest, ejus positionem determinant.

386 Corol. 1. Duæ rectæ se invicem secantes, sunt in eodem plano. Nam punctum, in quo intersecantur, et duo alia puncta in quolibet ipsarum sumpta, plani positionem determinant ex præc., undè per hæc tria puncta duci potest planum. Quod si tertia alia linea has duas secet extra punctum communis intersectionis, etiam hæc jacebit in eodem plano ambabus communi: quum duo puncta lineæ positionem determinant; et supponitur duo puncta diversa cum aliis habere communia. Secus esset, si tres lineæ in unico puncto se intersecarent: hoc enim positionem lineæ rectæ determinare non potest.

387 Corol. 2. Duorum planorum intersectio est linea recta. Concipliantur duo plana se invicem ad quemvis angulum secare: evidens est, partem aliquam ipsis fore communem. At nulla pars, nisi linea recta, utrique communis esse potest. Sicut enim lineæ rectæ se invicem secantes unicum punctum commune habere possunt; ita planam unicam lineam, seu seriem punctorum in directum positorum communem habere possunt. Si enim aliud punctum, quod

non foret in directum positum, ipsis commune esse posset, tria puncta plani positionem non determinarent.

388 Corol. 3. Planum, sivè linea, cuius plano perpendiculariter insistens, perpendicularis est omnibus lineis in plano jacentibus, ac sub ipsam transeuntibus: aliter enim, aliqua vel deprimeretur, vel elevaretur, adeòque in eodem plano non esset.

389 Corol. 4. Duo plana, aut lineæ eidem plano perpendicularia aut æqualiter ad eandem partem inclinato, sunt inter se parallela. Distantia enim utriusque ubique eadem est. Præterea planum cui insistunt, considerari potest velut linea utrumque secans: adeòque supposita utrobique æquali inclinatione, facit angulos internum, et externum ad eandem partem æquales: sunt igitur parallela (300).

390 Schol. Quæ de linearum positione respectiva num. 283, et sequentibus tradita sunt, ad plana æquo jure transferenda erunt. Nam 1. Planum supra planum cadens aut duos angulos rectos, aut duobus rectis æquales facit. 2. Quod si plana mutuo secantur, valor angulorum ex utraque parte quatuor rectis æquatur. 3. In hac intersectione anguli ad verticem æquales sunt. 4. A puncto dato intra, vel extra planum, tantum una perpendicularis demitti potest. 5. Distantia à puncto quovis ad planum, est perpendicularis ex puncto dato ad planum ducta. 6. Si duo plana parallela alio plano secantur; angulos alternos, internos, et externos ad eandem partem æquales; et duos internos ad eam-



dem partem æquales duobus rectis habent. 7. Sectiones planorum parallelorum etiam sunt parallelæ. Nimirum quum duo, aut plura plana parallela alio plano secantur, intersectiones parallelæ remanent 8. Quotcumque plana parallela alteri, erunt et parallela inter se, et omnibus aliis illis parallelis.

## CAPUT III.

*Stereometria, sive de Solidis.*

## Solidi ad II. §. I.

*Solidorum genesis.*

391 **D**efin. 1. *Solidum* geometricum est corpus quodvis tribus dimensionibus constans; sive longum, latum, et profundum. Superficies autem corporis solidi est summa linearum, quibus ejus externa facies terminatur in qualibet dimensione. Quemadmodum autem lineam punctum continenter fluens concipimus; superficiem verò linearum aggregatum in eandem directionem jacentium; ita corpus seu solidum continuam superficierum aggregationem imaginamur. Ad rei tamen veritatem magis accerseris, si lineam linearum infinite minimarum congeriem, superficiem ex arcolis linearum, solidum ex parvis arcis solidis conceperis.

392 Defin 2. *Prisma* solidum est pluribus planis terminatum (fig. 26), quæ parallelogramma sunt; æquè latum in tota longitudine, ac

duobus planis, seu basibus parallelis, superiore, et inferiore terminatum. Pro numero laterum basis diversa nomina sortitur prisma; nimirum triangulare, quadrangulare, pentagonum etc. Omnia enim solida concipi possunt à basi generali; in primate, si basis sibi parallela semper ascendat, solidum describet prismaticum triangulare, aut quadrangulare, pro natura baseos: quod etiam ad reliquas figuras extendi potest. Et hoc quidem erit prisma *rectum*, si ejus axis, qui est linea recta ab ejus perimetro æqualiter distans, est basibus perpendicularis. Quod si axis fuerit basibus inclinatus, prisma erit *obliquum*.

393 Defn. 3. Species etiam prismatis sunt *cubus*, et *parallelopipedum*. Cubus est solidum sex planis quadratis terminatum, quales sunt tali lusorii. Parallelopipedum sex etiam planis terminatur, quorum opposita tantum sunt æqualia. Si ad angulos rectos latera formata sint, erit parallelopipedum *rectangulum*; secus *obliquangulum*.

394 Defn. 4. Si planum generans, seu basis circulus sit, solidum erit *cylindrus* (fig. 27). In quo si axis AB sit perpendicularis basi FBC, cylindrus erit rectus: si axis inclinatus sit basi, obliquus. Altitudo, sive prismatis, sive cylindri, sive alterius solidi est perpendicularis à summitate basis superioris ad inferiorem productam, ubi opus sit, ut evenit in obliquis. In rectis verò ipsemet axis mensura est altitudinis.

395 Defn. 5. *Pyramis* est solidum basi polygonæ et puncto terminatum (fig. 28). Juxta

numerus laterum basis diversis nominibus donatur pyramis. *Triangularis*, si basis sit triangularis; *quadrangularis*, ut est sepulchrum Cestii ad portam Ostiensem, quod unicum est antiquitatis monumentum in nativa integritate conservatum, in hoc antiquitatum romanarum nativo solo. Reliqua enim, aut diruta videmus, ut amphiteatrum Flavium, aut in aliam conversa figuram, ut pantheon Agrippæ. Ceterum pyramis erit recta, si axis à vertice ad basim perpendiculariter cadat; secus obliqua erit, cujus obliquitatis mensura est inclinatio axis ad basim.

396 Defin. 6. *Conus* est pyramis basi circulari (fig. 29). Ejus genesis concipi potest triangulo, sivè plano trianguli ABC integra circumvolutione, supra rectam AB immotam, descriptum. Si axis AB perpendiculariter cadat supra basim CD, conus erit rectus; obliquus autem, si in alterutram partem inclinet. Quod si plano aliquo basi parallelo EF conus vertice AEF mulctetur, reliquum CDEF, dicitur *conus truncatus*.

397 Defin 7. Si semicirculus (fig. 30) ACB circa immotam diametrum AB circumducatur, donec ad locum, undè discessit, redeat, *sphæram* describet. Diameter immota, circa quam sphæra circumagitur, est illius axis, cujus extrema puncta AB dicuntur sphære poli. Circulus maximus à polis distans nonaginta gradibus, seu quadrante; dicitur sphære *æquator*. Punctum æquè distans ab omnibus superficie punctis, est centrum sphære: lineæ à centro

ad superficiem ductæ, sunt sphæræ radii. Si aliquo plano  $HI$  per centrum transeunte secetur sphæra, hujusmodi sectio erit circulus maximus; atque adeò omnes circuli maximi per centrum sphæræ transeunt. Reliqui circuli eo minores erunt, quo magis à centro distent.

398 Corol. 1. Duo maximi circuli sphæræ necessario se intersecant; eorumque communis sectio est diameter. Quum enim per centrum transeant, in centro se intersecare debent, et in omni linea, quæ per centrum transeat, qualis est diameter.

399 Corol. 2. Puncta omnia semiperipheriæ, cujus revolutione sphæra generatur, describunt circulos parallelos; eo majores, quo propius ad centrum accedunt; et minores, quo longius ab ipso recedunt. Puncta verò à centro æquè distantia describunt circulos æquales. Jam ex circulis, maximus est, qui per centrum transit; reliqui ab ipso utrinque æquè distantes, æquales sunt. Quarè in sphæra cœlesti, et in globo terrestri tropici, et circuli polares æquales sunt: quod postea in Astronomia physica, et in Geographia usui erit. Demum ultimus circulorum parallelorum in punctum abit.

## §. II.

### *Mensura superficierum in solidis.*

400 Defin. Omnes mensuræ superficierum duplici dimensione coalescunt, latitudine nimirum, et longitudine. Undè, nihil de profunditate cogitantes, externam tantum solidor-

rum faciem hic considerare debemus.

401 Theor. 1. *Superficies prismatis, cujus latera rectilinea sunt basi perpendicularia, est productum ex perimetro basis in altitudinem, seu latus rectum prismatis, addita dupla basis superficiei.* Dem. Singulæ facies prismatis sunt rectangula, quorum mensura est productum basis in altitudinem (357): collecta igitur summa rectangulorum superficiem prismatis componentium, habebitur ejus superficies, demptis basibus. At hæc summa est perimeter basis; ducta in altitudinem, seu latus rectilineum, ut est manifestum: habemus igitur superficiem lateralem prismatis, ducta perimetro in basim. Jam superficies basis, quum sit polygonum regulare, habebitur ex dimidio producto radii recti in perimetro (375): et quum duæ bases superior et inferior prismatis sint æquales, utriusque superficies habebitur ex integro producto radii in perimetrum.

402 Corol. 1. Cylindrus considerari potest tamquam prisma *infinitalaterum*; adeoque ejus superficies æqualis erit producto perimetri, seu circuli in ejus altitudinem; additis superficiebus utriusque basis, seu duorum circulorum (376).

403 Corol. 2. Superficies cubi constat sex quadratis æqualibus; unde ejus superficies æqualis est superficiei unius ex quadratis sexies sumpti. Quum verò parallelopipeda sex superficiebus terminentur, quorum bina æqualia sunt; inveniatur summa trium superficierum inæqualium, et hæc bis sumpta, dabit totam superficiem parallelopipedi.



404 Theor. 2. *Superficies pyramidis rectæ æqualis ex dimidio producto, ex perpendiculari ducta ex vertice ad unum ex lateribus basis, et perimetro basis; addita superficie ejusdem baseos. Dem.* In pyramide tot sunt triangula isoscelia, quot latera seu facies pyramidis: aut superficies trianguli æqualis est dimidio producto ex perpendiculari ducta in basim (358): ergo si summæ horum triangulorum addatur superficies baseos (375), habebitur tota superficies pyramidis.

405 Corol. 1. Conus considerari debet veluti pyramis *infinitalatera*, quemadmodum de cylindro dictum supra est, quum utriusque basis circulus sit. Hinc superficies coni recti habebitur ex dimidio producto perimetri, seu circuli basis ducti in latus coni; addita superficie circuli, cui insistit.

406 Corol. 2. Pyramidis plano basi parallelo truncatæ superficies concipi potest, veluti divisa in tot trapezia æqualia, quot sunt facies pyramidis. Singula autem trapezia dividi possunt in duo triangula inæqualia, quorum bases sunt latus sectionis, et latus basis pyramidis: altitudo verò utriusque distantia. Quare ducta uniuscujusque basi in altitudinem, dimidium productum dabit *aream*, ut ajunt, seu superficiem, cujusque trianguli, atque earundem summa trapeziorum superficiem: quibus additis superficiebus utriusque baseos, propter inæqualitatem seorsim dimetiendis, habebitur tota superficies pyramidis truncatæ.

407 Schol. Brevius, superficies pyramidis

truncatæ æqualis est dimidio producto ex distantia perpendiculari, et utriusque basis perimetro, plus duabus superficiebus utriusque basis.

408 Corol. 3. Si eodem modo tractetur conus, ac dictum est modò de pyramide; quum conus concipiatur velut pyramis *infinitalatera*; conici truncati superficies æqualis erit dimidio producto ex peripheria utraque in latus, seu *apothema* conici truncati; plus duabus utriusque circuli superficiebus, inter quas continetur conus.

409 Schol. Brevius, deducitur superficies lateralis conici truncati, accipiendo peripheriam circuli, æquè distantis ab utraque basi superiori, et inferiori conici truncati, eamque ducendo in latus seu *apothema* conici. Nam quum hæc peripheria sit media arithmetica proportionalis inter superiorem, et inferiorem basis peripheriam, æqualis est semisummæ utriusque circumferentiæ (179). Quod autem circulus GH (fig. 29) seu ejus peripheria, sit media proportionalis inter peripherias EF, DC conici truncati CDEF, sic demonstro. Ducantur perpendiculares Em, Fn; Gr, Hs: triangula EGm, GDr sunt similia: nam anguli in *m* et *r* sunt recti; in G et D, utpotè interni ad eandem partem inter parallelas, sunt etiam æquales (299): ergo Em: Gr :: Gm: Dr (338): at Em=Gr ex suppositione: ergo etiam Gm=Dr. Eadem demonstratio tenet in triangulis FnH, CsH ad alteram partem formatis. Idem igitur excessus est inter diametros EF, et GH; atque inter ipsam GH et DC:

ergo EF, GH: GH, DC (179). In circulis verò peripheriæ sunt in ratione diametrorum (370): sunt igitur peripheriæ in eadem ratione arithmetica, ita ut extendi valeat proportio modò enuntiata ad circumferentias trium circulorum.

410 Corol. 4. Segmentum sphæricum *Ano* (fig. 30) considerari potest velut genitum à revolutione infinitarum minimarum tangentium, quarum singulæ minimum conum truncatum describunt.

411. Corol. 5. Eodem modo concipi potest *zona* sphærica, duobus circulis parallelis *Im*, *no* conclusa, velut genita à revolutione infinitarum minimarum tangentium, quarum singulæ minimum conum truncatum describunt, et composita ex duobus conis truncatis *Hlon*, *HImI* per communem basim *HI* simul conjunctis.

412 Theor. Si sphæra *LH* (fig. 31). aut *AB* (fig. 30) circumscribatur cylindrus *EGIF*, cujus axis *LH* æqualis sit sphære diametro, et basis æqualis circulo maximo ejusdem sphære; hujus superficies æqualis erit superficiei laterali cylindri eidem circumscripti. Dem. 1. Concipiatur particula quævis *ns* circuli genitoris infinitè minima, ita ut cum particula *s* lineæ tangentis *As* hujus puncti confundatur: hæc tangens producta usque ad punctum *A*, et circa axem *III*, productum in *A*, circumvoluta, generabit conum *Ars*, et particula *ns* conum truncatum *murs*. Superficiei hujus coni truncati mensura est, dimidium productum lateris *ns* in peripherias circulorum, quorum radii sunt *q n*, *t s*; seu

in peripheriam radii  $po$  ab utraque æquè distantem (409).

413 2. Ducatur radius  $Co=LF=Dt$ , quum sint radii æqualium circulorum. Triangula omnia  $Agn$ ,  $Apo$ ,  $Ats$ ,  $opC$  sunt similia (335 et 345); et quoniam  $qn$ ,  $ts$  sunt radii paralleli, erit  $qt : ns :: At : As$ ; atque eadem proportio erit inter reliqua latera homologa (338): ergo  $qt : ns :: op : Co$ ; et  $qt \times Co = ns \times op$  (200). Hæc producta æqualia exprimunt superficiem sectionis cylindri  $DKqt$ , et coni truncati  $nqts$ . Nam  $qt=DK$ , et  $Dt=Co$ : at superficies cylindri est productum perimetri in altitudinem: ergo quum circuli sint ut radii (370), eadem est proportio, sivè ducatur in radium, sivè in perimetrum. Demum jam ostensum est aream coni truncati, qualis est  $nqts$ , esse æqualem producto  $ns \times op$  (409). Demonstratum igitur est superficiem segmenti  $nstq=DKqt$ , quæ est segmentum superficiei lateris cylindri.

414 3. Si hæc demonstratio iteretur in quolibet segmento sphaeræ comparato cum reliquis portionibus cylindri, tota superficies sphaeræ æqualis erit superficiei laterali cylindri eidem circumscripti. Tirones animadvertant portionem  $nqts$  in figura satis adspectabilem exhiberi, ut oculis partes in demonstratione assignatæ discerni possint. Mente tamen ad particulas minimas reduci debet ut num. 350 exposuimus.

415 Corol. 1. Superficies sphaeræ æqualis est producto axis, sivè diametri, in circum sphaeræ maximum; adeoque est quadrupla superfi-

ciei ejusdem circuli; quum hæc sit productum ex peripheria in dimidium radium, seu quartam partem diametri (376).

416 Corol. 2. Quum superficies lateralis cylindri æqualis sit superficiei sphæræ, additis duabus basibus, quæ sunt duo circuli maximi, tota superficies cylindri sextupla erit areæ circuli maximi; et cum superficie sphæræ erit, ut 6 : 4, sive ut 3 : 2.

417 Corol. 3. Ad habendam superficiem sphæræ, cujus nota diameter, inveniatur primum peripheria circuli maximi juxta proportionem (n. 373) enuntiata inter diametrum et peripheriam: hac inventa, ducatur in notam diametrum; productum dabit totam superficiem sphæræ. Manifestum est hæc omnia in tot problemata converti posse, quæ brevitatis gratia, contractius exposita sunt.

### §. III.

#### *Ratio superficialium.*

418 Defin. Duo solida similia sunt; quum lateribus numero æqualibus, et similibus constant: ex gr. duo cubi, duo parallelepipeda, quantumvis magnitudine differant. At pyramis, et cylindrus, prisma triangulare, et pentagonum, aut alia, quorum altitudines non essent basibus proportionales, solida similia non sunt.

419 Defin. 2. Factores superficialium sunt latera, ex quibus superficies veluti creari concipitur. Sic factores lateralis superficiei cylindri, et prismatis sunt peripheria et altitudo:



pyramidis dimidium latus perpendiculare ad basim, et ipsa perimeter baseos; quod etiam ad conum extendendum est: sphaeræ factores sunt axis, et circulus maximus.

420 Theor. 1. *In omnibus solidis superficies sunt, ut factorum producta. Dem.* Superficies cujuscumque solidi veluti creari concipitur ex elementis, ex quibus componuntur factores: ex. gr. sint  $A \times B$  factores unius, et  $a \times b$  factores alterius; altitudines nimirum et bases, patet superficies fore ut  $AB : ab$ ; quum hæc producta exprimant facta, sive superficies: ergo  $S : s :: AB : ab$ , sive superficies ut factores (378).

421 Theor. 2. *Superficies, quæ factorem unum habent æqualem, sunt in ratione alterius factoris. Dem.* Sint  $S, s$  duæ superficies comparandæ, quorum factores sunt  $A \times B, a \times b$ ; si  $A = a$ , differentia inter ipsas intercedens erit ea, quæ inter  $B$  et  $b$  reperitur: hoc est  $S : s :: B : b$ . Contra verò si  $B = b$ , erit  $S : s :: A : a$ ; hoc est, ut alter factorum, in quo inæqualitas reperitur; quemadmodum de figuris planis dictum est num. 378. Quare duæ superficies solidorum habentium æquales bases aut perimetros, erunt ut altitudines, seu latera: quod si hæc sint æqualia, erunt ut perimetri: denique si utraque inæqualia sint, erunt in ratione composita, sive ut producta  $AB : ab$ , scilicet altitudinum, et basium.

422 Theor. 3. *Solidorum superficies, quorum factores sunt invicem proportionales, crunt inter se, ut quadrata dimensionum homologa-*

*rum. Dem.* Superficies solidorum regularium reducuntur ad figuras planas rectangulas, quarum factores sunt bases, et altitudines: at figuræ similes, quarum scilicet latera homologa sint proportionalia, sunt in ratione duplicata laterum homologorum (379): ergo etiam superficies factorum proportionalium erunt, ut quadrata dimensionum homologarum.

423 Corol. Sphæræ omnes, cujuscumque magnitudinis, sunt solida similia: quemadmodum omnes circuli sunt figuræ planæ similes (380): ideòque earum superficies erunt in duplicata ratione diametrorum, et peripheriarum, aut radiorum; sive ut quadrata harum dimensionum.

#### §. IV.

##### *Soliditas corporum.*

424 Defin. Ad definiendam soliditatem corporum, opus est aliqua mensura, in qua tres dimensiones reperiantur, quemadmodum ad superficies dimetiendas, mensura duplici dimensione constante opus est. Quapropter uti superficierum dimensio ad quadratum exigitur, ita etiam solidorum ad cubum reducitur. Opus igitur est, ad dimetiendum corpus triplici dimensione donatum, mensura etiam ad triplicem extensionem deducta, puta leucas, milliaria, decempedas, hexapedas, pedes, pollices, lineas, juxta uniuscujusque corporis dimetiendi indolem adhibendas. Mensura verò cubica dicitur, quæ sex lateribus quadratis datæ dimensionis constat. Sic pes cubicus est, cujus sex latera sunt pes quadratus; spatiumque ab

his superficiebus inclusum, est pes cubicus. Rursus si in pede cubico partes componentes considerentur, tot pollices cubici invenientur, quot continet pes quadratus in suum latus, seu radicem ductus; nimirum  $12 \times 12 = 144 \times 12 = 1728$ . Quod pariter ad lineas respectu pollicis applicandum est.

425 Theor. 1. *Soliditas prismatis æqualis est producto basis, seu superficiæ ejusdem, in altitudinem ductæ. Dem.* Juxta dicta de generis solidorum, prisma gignitur à motu parallelo basis per totam altitudinem; ducta ergo basi in altitudinem, habebitur soliditas prismatis. Sit ex. gr. basis = 10, altitudo = 100; erit soliditas tota prismatis = 1000: nempe si ponantur pedes, erunt 1000 pedes cubici soliditas prismatis; et hæc differentia inter mensuram superficierum, et soliditatum intervenit, quod productum in dimensionem superficierum enuntiat pedes quadratos, in solidorum verò mensura dat pedes cubicos.

426 Corol. 1. Soliditas cylindri est etiam productum basis in altitudinem; quum cylindrus tamquam prisma *infinitalaterum* consideretur. Hinc duo prismata, aut duo cylindri ejusdem basis, et altitudines sunt perfectè æqualia.

427 Corol. 2 Cubi soliditas est productum lateris, seu altitudinis in superficiem basis (424). Parallelopipedi etiam soliditas invenitur, ducta altitudine in superficiem basis; concipi enim possunt hæc solida tamquam prismata quadrangularia, et revera, talia sunt; quamvis ad par-

ticulares classes solidorum referantur, ob peculiare in ipsis proprietates, geometrica speculatione dignas.

428 Theor. 2. *Soliditas pyramidis æqualis est producto ex basi in tertiam partem altitudinis: seu tertiæ parti producti ex altitudine in basim. Dem.* Sit (fig. 32) pyramis altitudinis BP, quæ sit dimidium altitudinis cubi AB; et ejusdem basis CDEF cum eodem cubo: manifestum est ex cubo AB sex oriri pyramides ejusdem basis et altitudinis ac BP: erit igitur quælibet illarum sexta pars ejusdem cubi. At mensura soliditatis cubi est productum basis in latus sive altitudinem: ergo illarum pyramidum soliditas erit productum ex basi in sextam partem altitudinis AB; aut in tertiam partem altitudinis BP; seu erit tertia pars cubi ejusdem basis, et altitudinis ac ipsa. Quum verò eadem sit mensura soliditatis prismatis, et cubi; generalior regula statui potest, pyramidis soliditatem esse tertiam partem soliditatis prismatis ejusdem basis, et altitudinis: ut patet etiam ex sequenti.

429 Theor. 3. *Prisma triangulare potest dividi in tres pyramides perfectè æquales. Dem.* Secetur (fig. 26) prisma AB, plano triangulâri ADF, et ACF; habebuntur duæ pyramides ADEF, et AFBC æqualis basis ADE, BCF; atque æqualis altitudinis AB, EF. Residuum erit alia pyramis ADFC; quæ quidem ita collocetur, ut pro basi habeat triangulum ADF communis sectionis cum altera ADFE, pro cujus basi etiam assumi potest idem triangulum ADF. Sic

inversæ pyramides habent easdem bases, ut est manifestum: enimverò altitudines etiam æquales sunt, quum omnia opposita latera sint æqualia in prismatico: sunt igitur tres pyramides inter se æquales; et simul sumptæ æquales toti prismati AB. Mechanica demonstratio hujus theorematis argilla aut cera ob oculos proponi potest.

430 Corol. 1. Omnia prismata quorumcumque laterum dividi possunt in tot prismata triangularia, quot fuerint anguli in prismatico: et quum omnia prismata triangularia sint tripla pyramidis ejusdem basis, et altitudinis, evidenter eruitur, quodcumque prisma esse triplum pyramidis ejusdem ac ipsum basis, et altitudinis; aut quod in idem recidit, pyramidem esse tertiam partem prismatis, ejusdem basis, et altitudinis. Pyramis etiam polygona dividi potest in tot pyramides triangulares, in quot triangula polygonum basis resolvi potest.

431 Corol. 2. Conus est pyramis infinitorum laterum (405): undè erit etiam tertia pars prismatis infinitilateri, qualis est cylindrus, ejusdem ac ipse basis, et altitudinis.

432 Corol. 3. Sphæra considerari potest veluti coalescens ex infinitis pyramidulis, quarum communis vertex est centrum sphæræ, bases autem ejusdem superficies. Mensura vero soliditatis pyramidis est tertia pars producti altitudinis in basim: erit igitur soliditas sphæræ æqualis  $\frac{2}{3}$  producti ex radio in superficiem, seu tertiæ parti radii ducti in superficiem, aut hujus tertiæ parti ductæ in radium. At sphæræ su-



perficies quadrupla est superficiei circuli maximi ejusdem sphæræ (415): soliditas ergo sphæræ habebitur, ducendo tertiam partem radii in superficiem circuli maximi quater sumptam.

### §. V.

#### *Ratio solidorum.*

433 Defin. Quum soliditas sit productum superficierum in altitudines, triplex mensura in soliditate investiganda considerari debet. Nimirum superficies est productum longitudinis in latitudinem; soliditas verò profunditatis in productum harum dimensionum. Undè in comparatione solidorum triplicis hujus mensuræ habenda ratio est.

434 Theor. 1. *Cylindri, et prismata, recta, vel obliqua, ejusdem basis, diversæ tamen altitudinis, sunt inter se ut altitudines. Dem.* Ejusmodi solida æqualis basis, et altitudinis sunt æqualia (426): ergo quum bases sint æquales, altitudines verò differant, illorum differentia ab his est desumenda.

435 Corol. Coni, et pyramides, quæ basis æquales sunt, si altitudine differant, illorum diversitas ab hac desumetur. Sunt enim tertia pars prismatis, aut cylindri ejusdem basis, et altitudinis (430, et seq.).

436 Theor. 2. *Prismata et cylindri (idem etiam dicendum de pyramidibus et conis) quorum altitudines tantum sunt æquales, erunt inter se ut bases. Dem.* eadem est ac theorematis præcedentis. Quod si fuerint in ratione reciproca

basium, et altitudinum; nimirum basis unius, alterius altitudini æqualis, et contra, erunt æqualia. Et viceversa omnia prismata æqualia habent altitudines, et bases reciproce proportionales.

437. Theor. 3. *Solida similia sunt in ratione triplicata laterum homologorum, sive sunt ut cubi prædictorum laterum.* Dem. Solida similia ea dicuntur, quorum latera homologa; tres nimirum dimensiones, ex quibus coalescunt, sunt proportionalia. At soliditas est productum altitudinis, vel axis, in superficiem, quæ ex duabus aliis dimensionibus est productum. Solida igitur sunt in ratione composita trium dimensionum homologarum; ac proindè in ratione triplicata cujuslibet: quemadmodum de superficiibus dictum est (379), esse in ratione duplicata laterum homologorum.

438 Corol. 1. Ut hactenus dicta in præcedentibus articulis generali formula comprehendamus, quæ ad solida invicem comparanda extendatur; eorum soliditates dico  $S, s$ ; et  $A, B, C, a, b, c$ , eorum factores: erunt igitur  $S : s :: ABC : abc$ . Hinc 1.º Si  $A = a$ ,  $S : s :: BC : bc$ ; 2.º Si  $A : a :: bc : BC$ ,  $S = s$  (378 n. 3). 3.º In solidis similibus  $S : s :: A^3 : a^3 :: B^3 : b^3 :: C^3 : c^3$ . Sit ex. g. cubus  $A = 27$ , et cubus  $a = 8$ : quum sint in ratione triplicata dimensionum homologarum, et omnes dimensiones in cubo sint æquales, erit latus  $A^3 = \sqrt[3]{A^3} = A$ ; et latus  $a^3 = \sqrt[3]{a^3} = a$ : et  $A^3 : a^3 = A \times A \times A : a \times a \times a$ : quæ ratio luculentissimè est triplicata laterum homologorum  $A$  et  $a$ , sive 3

et 2; eruntque prædicti cubi in ratione triplicata 3: 2; nimirum  $27: 8 = 3 \times 3 \times 3: 2 \times 2 \times 2$ .

439 Corol. 2. Sphæræ sunt in ratione triplicata diametrorum, aut radiorum, peripheriarum, aut arcuum similium. Nam quum sphæræ sint solida similia, earumque factores seu dimensiones sint diametri, aut radii, et peripheriæ (432), sivè earum partes aliquotæ, erunt inter se ut cubi harum dimensionum. Sint duæ sphæræ S et s, quarum diametri, aut radii sint  $D=3$ , et  $d=2$ ; erit  $S: s :: D^3: d^3$ , sivè  $S: s :: 27: 8$ . Etenim soliditas sphæræ habetur, ducto radio in superficiem circuli maximi (432); adeoque quum superficies circuli sint in ratione duplicata radiorum (379), sphæræ erunt in triplicata eorundem.

440 Theor. 4. *Sphæra æqualis est duobus tertius partibus cylindri eidem circumscripti, seu cujus basis circulus maximus, altitudo verò sphæræ diameter sit.* Dem. Esto (fig. 33) ACD quadrans circuli, qui quadrato ABDC includatur: ducta diagonali BC, et radio CG, concipiat tur volvi circa immotum radium AC; planum est, integra circumvolutione descriptum iri quadrato ABDC cylindrum; radio CD hemisphærium AD, et diagonali BC conum ABC: omnia hæc solida habebunt pro basi circulum maximum sphæræ, pro altitudine ejusdem radium.

Jam ducatur *mr* æqualis, et parallela AB et CD, et perpendicularis lateribus AC, BD: erit  $CA: AB :: Cm: mn$  (338); at  $CA=AB$ ; ergo  $Cm=mn$ . En radios triplices sectionis; nam *mr* est

radius sectionis cylindri;  $mG$  sphæræ, et  $mn$  coni. Rursus in triangulo rectangulo  $CmG$  est  $CG^2 = Cm^2 + mG^2$  (345): at  $CG = CD = mr$ : ergo  $mr^2 = Cm^2 + mG^2$ ; sive substituendo: pro  $Cm^2$ , ejus æqualem  $mn^2$ , erit  $mr^2 = mn^2 + mG^2$ ; nimirum circulus, cujus radius  $CG =$  summæ circulorum, quorum radii  $mn$ , et  $mG$  (370), seu secti cylindri æqualis est summæ sectionum hemisphærii, et coni. Hæc demonstratio iterari potest in aliis sectionibus infinitè parvis, et proximis, ut  $ab$ , usque ad exhaustionem cylindri (350); ubique invenietur  $CG^2$  seu  $mr^2 =$  quadratis sectionum sphæræ et coni; adeoque totus cylindrus  $ABDC$  æqualis hemisphærii  $AD$ , et cono  $ABC$  simul sumptis. At conus est  $\frac{1}{3}$  cylindri ejusdem basis, et altitudinis (431): ergo reliquæ  $\frac{2}{3}$  sunt dimensio hemisphærii  $AD$ . Demum si his omnibus corporibus altitudo  $AF$  dupliciter, evidens est proditura tria solida, nimirum cylindrus, cujus basium radius  $AB$ , et  $FH$ , axis  $AF$ ; sphæra, cui diameter est eadem atque axis cylindri, radius  $AC = AB$  generans circumulum maximum æqualem basi cylindri; et denique conus, cujus basis radius sit eadem  $AB$ , altitudo verò, sive axis, diameter sphæræ, æqualis axi cylindri. Quæ quidem solida etiam erunt in proportionem superius assignata; scilicet conus  $\frac{1}{2}$  sphæra  $\frac{2}{3}$  cylindri eidem circumscripti.

---

# TRACTATUS IV.

## TRIGONOMETRIÆ LINEAMENTA.

---

### CAPUT I.

#### *Notiones Trigonometricæ.*

441 Defin. 1. **T**rigonometria est ars metiendi triangula calculo arithmetico, sivè triangula resolvendi, arithmeticam geometriæ applicando. In triangulo autem tres anguli, et tria latera inveniuntur, ex quibus tota triangulorum resolutio dependet. Quum verò innumera triangula æquiangula fieri possint, lateribus semper majoribus, aut minoribus; planum est, nec tres angulos tantum, nec aliquot latera sine angulis sufficere ad resolutionem trianguli. Porro angulo eodem permanente, latus oppositum decrescere, vel augeri in infinitum potest. Undè nulla ratio geometrica inveniri potest inter angulum, et latus oppositum, ex qua trianguli resolutio erui valeat. Quam tamen rationem non dicunt anguli ad latera habent sectiones parallelæ (338), ad quas reduci possunt sinus, ut mox videbimus: atque ideò *functiones* ab aliquibus auctoribus appellantur, eo quod vices angulorum et laterum fungantur in proportionibus.

442 Schol. Triangula, non solum lineis re-



ctis, verum etiam curvis formari possunt: ex. g. si in sphæra tres arcus se mutuò intersecant, triangulum curvilineum formari debent. Hinc divisio trigonometriæ in *planam*, et *sphæricam* ortum duxit. Primam in hoc tractatu, brevitate nobis præfixa, trademus; alteram tantum delibabimus.

433 Defin. 2. Sit angulus BCT (fig. 34) cui radio CT circumscribatur circulus AT. 1. Perpendicularis BG à puncto B ad radium CT ducta, vocatur *sinus rectus* anguli BCT, seu arcus BT, qui talem angulum metitur: pars verò radii GT, inter signum rectum, et arcum intercepta, dicitur *sinus versus* ejusdem anguli, et arcus. 2. Si ad punctum T radii CT ducatur perpendicularis ST, tangens circulum in puncto T, et producta ex altera parte donec occurrat CB productæ in S; ST dicitur *tangens*, CS secans ejusdem arcus BT, et anguli BCT.

444 Corol. 1. Angulus BCT, vel arcus BT ad complendam semiperipheriam deficit toto angulo obtuso BCt, arcu BA<sub>t</sub>, hic dicitur *supplementum* tam anguli, quam arcus BCT; isque est obtusi supplementum, scilicet ad 180 grad. ex quibus componitur semiperipheria circuli. Hinc idem sinus rectus BG communis est utrique angulo, et arcui BCT, et BCt ex quibus coalescit tota semiperipheria TA<sub>t</sub>. Nam ut habeatur sinus rectus cujuscunque anguli, vel arcus, debet duci perpendicularis ad radium sive diametrum TCt ex puncto concursus lateris anguli, et peripheriæ; et hæc solum potest esse BG; ea igitur communis est utrique angulo obtuso, et

acuto. Rursus tangentes, et secantes eorundem arcuum, et angulorum etiam æquantur inter se. Ducantur enim tangens, et secans ad punctum  $t$ : erunt  $st$ ,  $Cs$  (443): at in triangulis  $CST$ ,  $Cst$  anguli in  $C$ , utpotè ad verticem oppositi, sunt æquales; quod pariter dicendum de angulis  $T$  et  $t$ , qui recti sunt, ac demum latus seu basis  $CT = Ct$ , supra quam æquales anguli jacent: ergo tota triacula æqualia sunt, ac proindè latera homologa  $ST = st$ , et  $CS = Cs$  (334) nimirum tangentes, et secantes utriusque anguli æquales sunt.

445. Corol. 2. Si latus  $BC$  anguli  $BCT$  magis ac magis recedat à latere  $CT$ , angulus in  $C$ , et arcus  $BT$  semper crescent, donec  $BC$  confundatur cum  $AC$ : tunc  $ACT$  erit rectus, sector  $ABTC$  quadrans, et sinus rectus  $BG$  continenter augescens fiet radius  $AC$ . Hic dicitur *sinus totus*, quia major quocumque alio sinu recto. Pariter sinus versus  $GT$  eadem proportionem crescens, æquabitur radio  $CT$ . Demum  $CS$ , antea secans tangentem  $ST$ , evadet ipsi parallela, adeoque numquam concurrent, sed erunt infinitæ.

446 Corol. 3. Omnes circulorum chordæ sunt duplus sinus rectus dimidiæ partis arcus ab ipsis subtensi. Nam sinus  $BG$ , productus usque ad punctum  $D$ , fit integra chorda arcus  $BTD$ ; at radius  $CT$ , quum sit perpendicularis chordæ  $BD$ , eam bifariam secat (303): ergo tota  $BD$  dupla est  $BG$ , seu sinus recti. Deinde in triangulis  $BCG$ ,  $DCG$ ,  $BC = DC$ ; at anguli in  $G$  sunt recti (443); ergo  $BC^2 = BG^2 +$

$CG^2$  et  $CD^2 = DG^2 + CG^2$ ; ergo detracto communi quadrato  $CG^2$ , quæ remanent  $BG^2 = DG^2$ , et  $\sqrt{BG^2} = \sqrt{DG^2} = BG$ , et  $DG$ : et  $BD$  dupla  $BG$ , seu sinus recti (345).

447 Corol. 4. In triangulo rectangulo  $BCG$ , si hypotenusa  $BC$  assumatur pro radio circuli, seu pro sinu toto, cathetus  $BG$  erit sinus rectus anguli sibi oppositi: similiter altera cathetus  $CG$  esset sinus rectus alterius anguli  $B$ ; quod manifestum erit, si centro  $B$  radio  $BC$  describatur circulus alter. Quod si non jam hypotenusa, sed una ex cathetis pro radio circuli describendi assumatur, altera cathetus erit tangens circuli ejus lineæ, quæ sinus rectus est anguli assumpti pro centro, quum sit ad ejus extremitatem perpendicularis: ex. g. si  $CG$  indicetur pro radio,  $BG$  erit tangens anguli  $BCG$ , et hypotenusa  $BC$  secans ejusdem. Idem eveniret in altera catheto  $CG$ ,  $BG$  desumpta pro radio.

448 Defin. 3. Si angulus non est rectus, alter angulus, in quo deficit à recto, vel per defectum, vel per excessum, dicitur ejus *complementum*. Talis est angulus  $ACB$  (fig. 34) respectu utriusque  $BCT$ , et  $BCt$ ; in primo per defectum, in altero per excessum; quia primus deficit à recto parte  $ACB$ , secundus eadem quantitate ipsum superat. Deindè sinus rectus anguli complementi dicitur *cosinus*: tangens anguli complementi dicitur *cotangens*, atque ejusdem secans *cosecans* respectu utriusque anguli tam obtusi, quam acuti, cujus est complementum. Sic perpendicularis  $Bb$  ad radium  $AC$

est cosinus angulorum  $BCT$ , et  $BCt$ ; quia sinus est rectus anguli complementi  $ACB$ , atque ejusdem anguli tangens, et secans est cotangens, et cosecans prædictorum angulorum.

449 Corol. 1. Pars radii  $CG$  à sinu recto  $BG$  divisa, est æqualis cosinui angulorum, quorum est sinus  $BG$ . Nam anguli  $ACG$ , et  $BGC$  sunt recti, quum  $ACT$  sit quadrans circuli, et  $BG$  sinus rectus; at etiam in  $b$ , et  $B$  anguli sunt recti; sunt enim  $Bb$ , et  $CG$  perpendiculares  $AC$ , et  $BG$ : est igitur  $BbCG$  parallelogrammum, cujus latera opposita sunt æqualia (351); ergo  $CG = Bb$ .

450 Corol. 2. Si in triangulo rectangulo  $BCG$  hypotenusam  $BC$  sumatur pro radio, cathetus  $BG$  erit sinus rectus, atque altera cathetus  $CG$  erit cosinus ejusdem anguli  $BCG$ : et contra centro  $B$  descripto circulo,  $CG$  erit sinus rectus, atque alterum perpendiculum  $BG$  cosinus anguli  $B$ .

451 Schol. Frequentius sinus rectus simpliciter nomine sinus innuitur. Brevitatis gratia sic scribi solent  $\sin.$  pro sinu:  $r.$  pro radio:  $\tan.$  pro tangente:  $\sin. v.$  pro sinu verso:  $\cot.$  et  $\cos.$  pro cotangente, et cosecante.

## CAPUT II.

### *Trigonometriæ fundamenta.*

452 Theor. 1. *Retento eodem angulo, lineæ trigonometricæ, quas functiones vocant, sunt radiis proportionales.* Nimirum quæ pars respectu sui radii fuerint sinus, cosinus, tangens, cotan-

gens, secans, cosecans etc. in circulo majori eadem etiam erit in circulo minori respectu ejusdem radii minoris. *Dem.* Describantur (fig. 35) omnes lineæ trigonometricæ arcuum similium AF, Gl sub angulo ABF: AT sit tangens arcus AF; BS secans; FE sinus rectus; BE cosinus; CS cotangens. Ft similiter in arcu Gl lineæ respondentes Gt, Bs, el, e; B, Ds. Triangula omnia ABS, EBF, GBs, eBl sunt similia: nam angulus in B communis, in A, E, G, e rectus: ergo omnia triangula sunt similia, et latera homologa proportionalia (338). En proportionibus laterum.

$$BF : Bl :: EF : el :: EB : eB$$

$$BA : BG :: AS : Gs :: BT : Bt$$

$$BC : BD :: CS : Ds :: BS : Bs$$

In quibus proportionibus continetur ratio linearum trigonometricarum cum proprio radio, ut attentè eas inspicienti manifestum erit.

453 Corol. Ex dictis patet linearum trigonometricarum absolutas magnitudines, à magnitudinibus radiorum, non angulorum pendere: augeri enim possunt vel minui, angulis intactis, ut in exemplo aducto factum est. Angulo namque in B eodem semper manente, sinus, et reliquæ functiones crescere infinitè possunt, radiis continenter adauctis. Magnitudines verò *respectivæ* seu *comparativæ* ab augmento radiorum minimè desumuntur. Etenim quæ pars est sinus EF (fig. 35), etiam est et sinus el in calculo trigonometrico; quum uterque sinus sit anguli  $45^\circ$ , seu dimidii quadrantis.



Atque hæc quidem relativa magnitudo ea est quæ spectari debet in functionibus; ita ut major, aut minor sinus, ille dicatur, qui major, vel minor fuerit in graduum enumeratione. In casu figurato uterque sinus æqualis erit; est enim sinus  $45^\circ$ , tam in majori, quam in minori arcu. Contra verò sinus totus BD in minori quadrante dimidio graduum numero major est altero EF; qui est sinus  $45^\circ$ ; quantumvis hic attenta magnitudine absoluta alterum duplo, excedat.

454 Theor. 2. *In triangulo latera sunt ut sinus angulorum, qui ipsis opponuntur. Dem.* Sit (fig. 13) triangulum ABC: per angulorum vertices circumscribatur circulus; erit latus AB ad AC, ut sin. ang. C ad sin. ang. B. Nam chordæ circulorum sunt duplus sinus angulorum, sive arcuum ab ipsis subtensorum (446); ergo chorda AB est duplus sinus anguli C; et altera AC etiam duplus sinus anguli B. Est igitur  $AB:AC::2 \sin. \text{ang. } C:2 \sin. \text{ang. } B$ . Et quum dimidia etiam sint ut tota, erit  $AB:AC::\sin. \text{ang. } C:\sin. \text{ang. } B$ . nimirum latera ut situs angulorum, qui ipsis è regione sunt.

455 Corol. Quum in triangulo, majori angulo opponatur majus latus, minori minus, æqualibus æqualia (330); tum etiam sinus majoris anguli major, minoris minor æqualium æquales erunt. Neque tamen indè arguere licet, angulos esse in ratione sinuum: jam enim ostensum est (441) angulos minimè rationem laterum sequi; et quum sinus laterum rationem sequantur, ut theor. præced. demonstratum est,

horum non angulorum sinus rationem servabunt. Verum tamen est, angulo descrecente, sinum etiam minui; evanescente, evanescere: at nulla constans ratio invenitur inter ipsos et sinus, quemadmodum nec inter angulos et latera.

456 Theor. 3. *In quovis quadrilatero circulo inscripto duo rectangula ex lateribus oppositis, æquantur rectangulo ex duobus diagonalibus ejusdem.* Dem. Sit quadrilaterum ADCE (fig. 18) circulo inscriptum; dico rectangulum  $AD \times CE + AE \times CD = AC \times DE$ . Fiat angulus  $m = n$ . Triangula AEF, CDE angulos habent in  $m$  et  $n$  æquales per constructionem; in A et D etiam æquales, quippe eidem arcui CE insistentes: sunt ergo similia, atque adeo  $AE : DE :: AF : DC$ . Est igitur  $AE \times DC = AF \times DE$  (200): nimirum rectangulum sub DE et parte AF alterius diagonalis, æquale rectangulo sub AE et DC. *Lemma. In quadrilatero*

Deinde triangula ADE, CEF sunt similia: nam angulus  $AED = CEF$ : quum pars  $m = n$ , et altera utrique communis: angulus  $ADE = ECF$ : insistent enim eidem arcui AE (311); ergo  $AD : CF :: DE : CE$ ; et  $AD \times CE = CF \times DE$ ; scilicet aliud rectangulum  $AD \times CE$  æquale est rectangulo sub eadem DE et parte altera FC: et reducendo DE  $(AF \times CF) = DE \times AC = AE \times DC + AD \times CE$ ; rectangulum nempè sub diagonalibus æquale est duobus rectangulis laterum oppositorum quadrilateri.

457 Schol. Ex hoc theoremate deductæ sunt tabulæ sinuum, cujus usus in trigonometria frequentissimus. Chorda enim 60 graduum æ-

qualis est radio: eo igitur diviso in quot placuerit partes, ad normam hujus divisionis reliquæ chordæ deducuntur; et dimidium chordæ dat sinum quæsitum. Inutile esset singillatim omnia tradere problemata, quæ ad constructionem tabularum inventa sunt: jam enim in plerisque libris mathematicis tabulæ confectæ reperiuntur, undè labor iste prorsus inutilis foret. Nobis satis est ea tradere, quæ tironi philosopho maximè conducunt ad physicas veritates condiscendas.

### CAPUT III.

#### *Usus sinuum in calculo trigonometrico.*

458 Schol. **P**lerumque sinus ope tabularum habentur, in quibus gradus, et minuta prima, deindè sinus inveniuntur. Animadvertendum tamen, non omnes eadem methodo procedere. Sunt qui gradus, minuta, sinus tantum proponunt, quum ex his deduci possint reliqua. Alii sinibus sinus logarithmicos substituunt, ut facilitate et brevitati consulant. Prolixiores alii opus singulare excuderunt, in quo omnia in columnis separatis, et sibi respondentibus, concinnata sunt. Novissimè Gardiner Anglus, et Toaldus Venetus hujusmodi tabulas absolutissimas evulgarunt, in quibus omnia, quæ ad calculos trigonometricos necessaria sunt, collecta invenies. Tabularum usus ex resolutione problematum manifestus fiet. Animadvertendum tamen radium = 10, 000, 000, 000 usurpatum

fuisse in constructione tabularum: nunc verò tres ultimæ cyphræ omittuntur: quoniam hæc omissio nullum errorem sensibilem inducit.

459 Problema 1. *Anguli, aut arcus quadrante minoris functiones in tabulis invenire.* Resol. Sint ex. g. inveniendæ lineæ trigonometricæ anguli  $30^\circ$ ,  $10'$ : invento in tabularum prima columna numero graduum, et minutorum  $30^\circ$ ,  $10'$ , aut alterius dati, in secunda columna, linea ipsa currente, invenietur sinus=50251. 70: in tertia tangens=58123, 53: in quarta secans=115664. 80. Quod si adsint logarithmi in tabulis, ut nonnumquam solet, in columna quinta et sexta eosdem reperiēs: qui quidem unicè apponuntur, ut si aliqua ex lineis trigonometricis per aliam multiplicanda, aut dividenda sit, logarithmi præsto sint. In aliis verò logarithmos, omissis sinibus, reperiēs; quod nullam ad praxim difficultatem addit.

460 Probl. 2. *Anguli, aut arcus quadrante majoris sinum atque alia invenire.* Solut. Quum jam præmonitum sit angulo obtuso, atque acuto ejusdem supplemento, communes sinus, atque alias fructiones esse (444); dato angulo obtuso, nil aliud quærendum restat, quam ejusdem supplementi numerum graduum, et minutorum; quibus inventis, hujus anguli functiones erunt, et alterius. Sit datus angulus, aut arcus  $149^\circ$ ,  $50'$ , cui inveniendus sit sinus: subtrahe à  $180^\circ$ ,  $149^\circ$ ,  $50'$ , residuum erit  $30^\circ$ ,  $10'$ : hujus angulis sinus est etiam alterius  $149^\circ$ ,  $50'$ , ut et reliquæ lineæ trigonometricæ, quæ pro illo acuto designatæ sunt.

461 Probl. 3. *Cosinum, cotangentem, et cosecantem dati anguli invenire.* Solut. Quæraturs ejusdem anguli complementum (448); hujus sinus, tangens, et secans erit alterius cosinus, cotangens, et cosecans. Inveniendæ sint anguli  $30^{\circ}$ ,  $10'$ , reliquæ functiones: dic  $90^{\circ} - (30^{\circ} + 10') = 59 + 50'$ ; hujus anguli sinus tangens, et secans erunt et lineæ alterius quæsitæ sinus, tangens, et secans. Quod ut facilius, et brevius obtineretur in tabulis, ita artificiosè dispositi sunt gradus, ut minoribus è regione eorum complementa respondeant; atque adeò omnes functiones præ oculis semper habeantur: uti in exemplo adducto gradui 30 completo immediatè respondet gradus 60: minuto verò adaucto, respondet gradus  $59^{\circ}$ ,  $59'$ , et sic deinceps, altero crescente, altero minuente eadem proportione.

462 Probl. 4. *Dato sinu, aut aliqua ex cæteris functionibus, invenire angulum ipsi respondentem.* Solut. Facilis negotiæ res erit, si datus sinus reperiatur in tabulis; inibi enim et angulus, sive gradus ipsi conveniens invenietur. Quod si datus sinus non sit notatus in tabulis, signum est ad minuta secunda pertinere. Jam verò notetur differentia, quæ inter duos sinus proximè majorem, et proximè minorem, ex his qui in tabulis reperiuntur, intercedit: deinde inter datum, ex proximè minorem: demum instituaturs proportio inter duas inventas differentias, 60, et numerum  $x$  invenendum. En exemplar: sit datus sinus logarithmicus 9.9030900: quæsito in tabulis proximè majore



sinu logarithmico 9.9031084, et proximè minore 9.9030136; eorumdem differentia est =948. Differentia verò inter 9.9030900, ac 9.9030136=764. Jam instituaturs sequens analogia: 948:764:: 60":  $x=48''$ , neglecta minutia  $\frac{336}{948}$ , quæ vix tertiam partem minuti secundi adæquat. Quum verò sinus logarithmici prædicti respondeant, major 53°, 8', minor 53°, 7'; datus erit 53°, 7', 48".

463 Schol. In tabulis vulgaribus minuta secunda non reperiuntur; quippè ad calculos geometricos minus necessaria. Ad supputationes verò astronomicas omninò secundorum habenda est ratio; quandoquè etiam minutorum tertiorum. Ex dictis numero superiore facile eruitur methodus supputandi minuta secunda, inveniendi nimirum sinum, aut logarithmum ipsi respondentem. Sit datus angulus 36°, 52' 12". Subducatur differentia inter sinus logarithmicos angulorum 36°, 53', et 52": deindè instituaturs sequens analogia 60: 10:: ut differentia inventa ad  $x$ . En typum

$$\text{Sin. log. } 36^\circ. 53' = 9.7782870$$

$$\text{Sin. log. } 36^\circ. 52' = 9.7781186$$

---


$$\text{Differ.} = 1684$$

Jam 60: 12:: 1684:  $x=336+\frac{48}{10}$ ; quod ad 337 quam proximè accedit: itaque hic numerus addatur (67) sinui logarithmico

$$\text{gradus } 36^\circ. 52' = 9.7781186$$

---


$$237$$

habebitur sinus 36°, 52', 12' = 9.7781523.

Eadem est praxis, si loco logarithmorum, sinus inveniatur, aut sinus, et logarithmi, ut in tab. Ulacuii, Gardineri, et Toaldi.

## CAPUT QUARTUM.

### RESOLUTIO TRIANGULORUM.

#### §. I.

#### *Resolutio trianguli rectanguli.*

464 Defin. **R**esolutio trianguli est, ejus partes incognitas medio cognitarum deducere. Jam præmonitum fuit tres angulos ad resolutionem trianguli non sufficere; undè opus est aut aliquot latera, et angulos; aut unum angulum, atque aliquot latera cognoscere, ut cetera deducantur. In triangulo rectangulo notus est angulus rectus, cujus sinus æqualis est radio: hinc sufficit ad ejus resolutionem, duas alias ex partibus præcognoscere; nimirum latus, et angulum.

465 Probl. 1. *Datis cathetis, invenire reliquas partes trianguli rectanguli.* Solut. Sit triangulum (fig. 36) ABC rectangulum in B, cujus perpendicula AB, BC cognita sunt: ex. gr. in proportionem 2 : 3. 1. Hypothenusa AC etiam sine trigonometria inveniri potest; etenim  $AC^2 = AB^2 + BC^2$ ; ergo  $AC = \sqrt{AC^2} = \sqrt{AB^2 + BC^2}$ . 2. Ut inveniatur angulus C, assumpto BC in radium, AB erit tangens (447): ergo BC : AB :: sin. tot. : ad tang. ang. C (452). At BC : AB :: 3 : 2 :: 1000000 :  $x = 666666$  neglecta minutia; cui res-

pondet in tabulis gradus  $41^{\circ}, 48'$  proximè. 3.  
Cognitio angulo  $C = 41^{\circ}, 48'$ ; angulus A ejus  
complementum facillè innotescit  $= 90 - 41^{\circ}, 48'$   
 $= 48^{\circ}, 12'$ . 4. Hypotenusa etiam hac analo-  
gia deducitur:

$$\text{Sin. A} : \text{BC} :: \text{sin. tot.} : \text{AC.}$$

466 Probl. 2. *Latere, et angulo datis in triangulo rectangulo, invenire reliqua.* Solut. Inveniatur alter angulus methodo supra enuntiata; deindè sinus hac proportionem deducen-  
tur; alterutrius anguli sinus ad datum latus; ut sinus totus ad latus inveniendum. Sic ex gr. datus angulus A, et latus AB, angulus C erit complementum ad  $90^{\circ}$ . Deindè ut inveniatur latus AC, fiat

$$\text{Sin. ang. C} : \text{AB} :: \text{sin. tot.} : \text{AC.}$$

Demum cathetus altera BC hac proportionem deducetur:

$$\text{Sin. ang. C} : \text{AB} :: \text{sin. ang. A} : \text{BC.}$$

467 Probl. 3. *Hypothenusam, et angulo acuto cognitis, reliqua ignota investigare.* Solut. Altero acuto, ut supra invento; latus angulo dato oppositum hac analogia deducitur: radius ad sinum dati anguli, ut hypothenusam ad latus quæsitum. Sit datus angulus C (fig. 36), præter hypothenusam AC; analogia erit:

$$\text{R} : \text{sin. ang. C} :: \text{AC} : \text{AB.}$$

Quod si datus sit angulus A, fiat.

$$\text{R} : \text{sin. ang. A} :: \text{AC} : \text{BC.}$$

468 Schol. Ex methodo hactenus tradita facillè deduces, ad resolutionem triangulorum, prius inveniendos esse angulos, deindè latera investiganda. A sinibus enim angulo-

rum pendet proportio inquirenda: laterum, et sinuum, ut his cognitis, latera innotescant.

## §. II.

### *Resolutio trianguli non rectanguli.*

469 Probl. 1. *In quocumque triangulo non rectangulo cognitis duobus lateribus, atque uno ex angulis oppositis, invenire reliqua.* Solut. Sint cognita latera AB, BC (fig. 13), et angulus quicumque oppositus alterutri ex duobus lateribus, ut A. Primum anguli; deinde latus ignotum debet inquire. Quod ad angulos attinet, sequenti analogia invenientur:

$$BC : \sin. \text{ ang. } A :: AB : \sin. \text{ ang. } C.$$

Ex hac proportionem innotescit sinus anguli C; quo cognito, et angulus C, et tertius statim apparet. Demum latus ignotum hac proportionem eruetur:

$$\sin. \text{ ang. } A : BC :: \sin. \text{ ang. } B : AC.$$

470 Probl. 2. *Datis duobus lateribus, et angulo acuto ab ipsis intercepto, invenire reliqua.* Solut. Hujus problematis solutionem plerumque methodo nimis tironibus implicata tradunt auctores, per semisummas et semidifferentias tangentium angulorum ignotorum. Ut faciliore via incedamus, quæ etiam pro resolutione cujuscumque trianguli sive acuti, sive obtusi indicari potest, en compendium resolutionis. Sit cognitus angulus C (fig. 12), et latera AC, BC illum intercipientia: reliqua investiganda sunt. Ducatur perpendicularis BE ab uno ex angulis ignotis ad latus oppositum; remanebit triangu-

lum, quod resolvi debet, in duo triangula rectangula divisum; methodo superius indicata tractandum. Ut latus BE cognoscatur, hac analogia utendum erit, in qua tres primi termini noti sunt:

$$\text{Sin. ang. E: BC::sin. ang. C: BE.}$$

Latus deinde CE hac etiam instituta proportionē eruetur.

$$\text{Sin. ang. E: BC::sin. ang. B: CE.}$$

Angulus enim B, complementum C, supponitur notus ex methodo num. 466. Rursus quum hypotenusa BC data sit, latus  $BC = \sqrt{CB^2} = \sqrt{BE^2 + CE^2}$ ; atque adeò  $CE = \sqrt{BC^2 - BE^2}$ .

2. Deveniēdo ad alterum triangulum, latus AE faciliè invenietur, subtrahendo partem CE cognitā à tota AC etiā cognita. Sunt igitur notæ catheti hujus trianguli; ipsarum autem quadratorum summa æqualis est quadrato hypotenusæ; et radix æqualis lateri AB: adeoque triangulum totum resolutum manet. Præterea deduci etiā possent sinus angulorum A, et B sequenti analogia.

$$AE: BE:: \text{sin. tot.: tang. ang. A.}$$

$$BE: AE:: \text{sin. tot.: tang. ang. ABE}$$

(447, et 464).

471 Probl. 3. *Datis duobus lateribus et angulo obtuso ab ipsis comprehenso, reliqua invenire.* Solut. Sit ABC (fig. 37) angulus obtusus interceptus à lateribus cognitis AB, BC: demittatur perpendicularis AD in latus BC productum in D. Angulus ABD cognitus est in novo triangulo, utpotè supplementum ad duos rectos



anguli dati B; adeòque et tertius DAB, quum D sit rectus: latus etiam AB datum est: quare per num. 466 reliqua nota erunt. Rursus latus BD addatur BC; utrumque jam notum; subinde et AC innotescet, quæ hypotenusæ est respectu totius trianguli ADC; adeòque  $AC = \sqrt{AD^2 + DC^2}$ , quoniam  $AC^2 = AD^2 + DC^2$ .

472 Probl. 4. *In triangulo non rectangulo datis duobus angulis, et latere, reliqua invenire.* Solut. Ex dictis tertius angulus manifestus est, duobus præcognitis. Ut duo latera detegantur, hæc proportio instituenda est. Sint dati anguli A, C (fig. 37), et latus BC, erit

$$\text{Sin. ang. A} : \text{BC} :: \text{sin. ang. C} : \text{AB.}$$

$$\text{Sin. ang. A} : \text{BC} :: \text{sin. ang. B} : \text{AC.}$$

473 Schol. Cognitis tribus angulis, cognoscuntur sinus angulorum, adeòque et ratio laterum, quæ est ipsa sinuum. Hæc est magnitudo comparativa, quæ omninò ab absoluta diversa est (453): eisdem enim angulis, atque adeò sinibus, ad infinitum variari potest magnitudo trianguli. Undè nisi unum saltem latus innotuerit, reliqua determinari non poterunt. Datis vero tribus lateribus tantum, anguli cognosci poterunt, si prius triangulum ad rectangulum revocetur: ut articulis 470 et 471 indicavimus; deindè resolutio procedet uti supra 465.

474 Schol. 2. Quum idem sinus communis sit angulo acuto, et ejus supplemento; dato sinu, angulus cognosci determinatè non poterit. Hinc aliundè notum esse debet genus anguli, cujus sinus inventus est: quod etiam

ad reliquas lineas trigonometricas extendi debet (444).

## CAPUT QUINTUM.

*Notiones Trigonometriæ sphaericæ.*

475 Defin. 1. **P**ræter ea, quæ numero 404 de sphaera tradita sunt, hic recolenda, sequentes definitiones addimus. Trigonometria sphaerica est scientia, quæ triangula in sphaeræ superficie à circulis maximis se mutuo intersecantibus formata, metiri docet. Dixi ab circulis maximis, reliqua enim triangula à minoribus circulis designata, trigonometria non considerat. Porro in hac circulorum maximorum intersectione tria genera triangulorum cognoscenda occurrunt: *rectilinea* à duobus radiis, et chorda circuli maximi effecta: *mixtilinea* à duobus radiis et arcu, lineis partim rectis, partim curva formata: ac demum *curvilinea* à tribus arcubus se mutuo intersecantibus descripta. De rectilineis nihil addendum ad ea, quæ superius tradita sunt; easdem enim proprietates intra sphaeram habent; atque in reliquis superficiebus. Anguli mixtilinei mensura est arcus à duobus radiis interceptus.

476 Defin. 2. *Angulus sphaericus rectus* est, quem duo arcus circulorum maximorum, ad angulos rectos se dividendum, formant: *acutus*, qui recto minor; *obtusus*, qui recto major ab iisdem arcubus conformatur; quæ notiones cum angulis rectilineis ipsis communes sunt, sicut

et reliquæ triangulorum divisiones.

477 Defin. 3. Triangulum sphæricum erit æquilaterum, si tres arcus ipsum componentes æquales sunt: isoscele, si duo arcus, seu latera æqualia: scalenum, quolibet arcu diversæ magnitudinis existente. Similiter triangulum sphæricum rectangulum erit, si aliquem angulum rectum contineat; obtusangulum, si obtusum; acutangulum, si omnes acutos habeat.

478 Defin. 4. Arcus metientes angulos trianguli sphærici plerumquæ non sunt, qui ipsis opponuntur; sed produci debent crura arcuum angulum formantium ad nonaginta gradus: pars circuli ab ipsis intercepta, atque ab angulo nonaginta gradibus distante, erit mensura anguli. Hinc inferes, circulum, cujus arcus dat mensuram anguli sphærici, polos habere in ipso anguli vertice. Poli enim sunt extrema axis in sphæra, atque ab ipsius æquatore 90 gradibus distantes (397). Hinc si angulus fuerit rectus, ejus arcus erit quadrans; si obtusus, quadrante major; si acutus quadrante minor.

479 Corol. 1. Si duo maximi sphæaræ circuli sunt invicem perpendiculares, axis unius est diameter alterius. Nam duo plana circulorum se secabunt ad angulos rectos, atque inde duæ lineæ per centrum transeuntes talium circulorum, distabunt invicem nonaginta gradibus; adeoque quæ est diameter in uno, erit polus alterius, et viceversa (397). Undè etiam deducitur inversa propositio antecedentis; nimirum si in duobus circulis axis unius est dia-

meter alterius, erunt perpendiculares, ac poli eorundem quadrante distabunt.

480 Corol. 2. Quum duo circuli maximi sunt invicem inclinati, inclinationis dimensio est arcus circuli maximi  $90^\circ$  distantis ab eorundem intersectione. Nam mensura talis inclinationis est angulus, cujus dimensio in triangulis sphæricis desumitur ab arcu circuli  $90^\circ$  remoti ab angulo (478). Præterea anguli sphærici crura magis ac magis continenter divari-cantur, donec ad  $90^\circ$  deveniant; deindè inversa inclinatione magis semper accedunt, eo usque post alterum quadrantem denuò ad angulum conjungantur; quod simplici cujuscumque sphære inspectione, circulis maximis distinctæ, videre licet. Hinc circulus mensurans angulum duorum circulorum se invicem secantium debet per utriusque polos transire.

481 Corol. 3. In sphæra cœlesti, et terrestri omnes meridiani sunt æquatori perpendiculares; transeunt enim per ejusdem polos, qui et poli mundi vocantur. At sunt obliqui *eclipticæ*, quæ ad angulum  $23^\circ\frac{1}{2}$  æquatori inclinata est; nisi duos meridianos nonaginta gradibus à punctis intersectionis *eclipticæ*, et æquatoris distantes excipias. Nam hæc linea, communis utrique plano *eclipticæ*, et æquatoris, est diameter utriusque circuli, atque adeò axis respectu meridiani.

482 Corol. 4. Spatium quodvis duobus circulis parallelis in sphæra interceptum, dicitur *zona*. Hujus latitudo est arcus circuli ipsis perpendicularis: hic enim eorundem minimam

distantiā metitur. Atque hæc pauca de trigonometria sphærica dicta sufficiant, quatenus ad tractatus astronomiæ, et geographiæ physicæ conducentia: reliqua nimis implexa, et tironi philosopho parum necessaria, quæ ad resolutionem triangulorum sphæricorum pertinent, illustrium auctorum vestigia sequuti libenter dimittimus.



---

# TRACTATUS V.

## ELEMENTA SECTIONUM CONICARUM.

---

### CAPUT PRIMUM.

#### *Notiones præliminares.*

483 Defin. 1. **S**ECTIONES CONICÆ ita appellatæ sunt, quod à plano conum secante diversis directionibus formentur. Si planum à vertice A (fig. 38) perpendiculariter aut obliquè ad basim secat conum ADC, hujusmodi sectio erit triangulum; nimirum duæ internæ facies coni ita divisi triangulum repræsentabunt. Quod si planum secans basi sit parallelum, ut EH, FI, sectio erit circulus. De his duobus sectionibus nihil addendum occurrit ad ea, quæ in inferiori geometria tradita sunt, tironi philosopho necessaria.

484 Defin. 2. Sectiones, quæ antonomastice *conicæ* vocantur, sunt sequentes. Applicetur planum directione ad quodvis coni latus parallela, ut in *ab* ad latus AC. Sectio hæc erit *Parabola*, sic dicta, quod græcis, quæis dedit ore rotundo musa loqui *παράβολη* idem sonet, quod latinis æqualitas, similitudo; optimè desumpto nomine ex genuina parabola proprietate, quam postea dabimus. Jam si planum

directione qualibet utrumque latus attingente, ac secante dividat conum, ut in EG; sectio hoc modo facta dicitur *ellipsis*, quod latinè *defectio* redderetur: idem enim est græcis ἐλλειπω, quod latinis *deficio*. Nimirum sectio hæc, contra hac parabola, ab æqualitate deficit, uti infra videbimus. Producta autem sectione extra planum eadem directione EG, basim coni DC, sive planum basis similiter productum attinget, ac secabit in K. Demum si sectio extra verticem A, quacumque alia directione fiat, quæ alterutri laterum AC, AD parallela non sita; ac basim DC intra conum secet, *hyperbola* dicitur hujusmodi sectio, ut in Hh. Crura videlicet hyperbolæ excedunt, atque ampliora sunt parabolæ cruribus: undè nomen factum huic sectioni, eo quod ὑπερβαλλω excedere significet: excusus verò in ejus æquatione parabolam fiet. Brevius, *parabola* oritur, quando unum tantum latus in cono assignari potest, cui planum secans sit parallelum: *ellipsis*, quum nullum ex lateribus assignari potest, cui parallelum sit planum secans, quoniam omnia secat: demum *hyperbola* nascitur, quando duplex invenitur latus, quibus planum secans sit parallelum.

485 Defin. 3. Ad indolem curvæ investigandam, aut in plano describendam, ducantur rectæ MM, mm (fig. 40), quæ *ordinate*, sive ordinatim applicatæ ad diametrum dicuntur. Diameter vero VX *axis* vocatur, atque ab ordinatis perpendiculariter dividitur: ac vicissim axis ordinatas perpendiculariter, atque in-

super bifariam patitur. Reliquæ diametri extra axim jacent, eique sunt parallelæ. Pars inter verticem seu supremum curvæ punctum, et ordinatas intercepta, dicitur *abscissa*: partes verò, in quas axis dividit ordinatas, *semiordinatæ* dicuntur, aut brevitatis gratia etiam *ordinatæ* à nonnullis solent nominari. Algebricè abscissa littera  $x$ , semiordinata verò  $y$  solet denotari; nisi plures occurrant abscissæ atque ordinatæ in eodem calculo, quæ tunc litteris aliis confusionis vitandæ gratia notantur.

486 Schol. Quum circulus una ex curvis sit, quæ tironibus familiarior est, non abs re fuerit prædictas notiones ad eundem transferre. Sit AMB (fig. 39) semicirculus insistens diametro AB: perpendicularis PM erit semiordinata; AP abscissa; vertex A; axis AB. Jam verò ex geometria notum est, MP perpendicularem ad diametrum esse mediam proportionalem inter ejusdem segmenta (344): scilicet MP est media proportionalis inter segmenta AP, BP; atque adeò  $MP^2 = AP \times BP$ . Fiat  $AB = a$ ;  $AP = x$ ;  $MP = y$ ; quum sit  $AP = x$ , erit  $BP = a - x$ ; adeòque  $x : y :: y : a - x$ , et  $ax - x^2 = y^2$ . En æquationem ad circulum, per quam hujusmodi curva circularis à cuacumque alia discerni potest. Omnia enim puncta peripheriæ circularis, quæ hanc curvam perficiunt, eandem rationem ad diametrum dicunt. Nam à quovis peripheriæ puncto ductis diametro et abscissis, ratio constans erit  $ax - x^2 = y^2$ . Undè circulus est *curva, in qua rectangulum sub abscissa, atque altera diametri parte; aut quo d*

*idem valet, sub abscissa et diametra abscissa mulcato, æqualis est semiordinatæ quadrato:* quæ definitio traderetur, si circulus tamquam sectio conica deberet explicari; atque adeo inter ellipses computandus foret.

487 Defin. 4. *Quantitates constantes* in curva dicuntur, quæ semper manent invariata, crescentibus, aut decrescentibus aliis. In circulo diameter, et radius erunt ejusdem mensuræ, quacumque varietate occurrente inter abscissas, et ordinatas; quæ idcirco quantitates variables vocantur, quod augmenti, aut decrementi capaces sint. Augetur enim quantitas AP (fig. 39), crescente ordinata MP; eaque minuente à centro ad circumferentiam minuitur, ita ut, in puncto A concurrentibus, utraque deveniat = 0, sive evanescat. Hoc itidem in aliis curvis evenit respectu abscissarum atque ordinatarum.

488 Defin. 5. Inter quantitates constantes recensetur *parameter*. Hæc est recta quædam invariabilis, ad quam referuntur abscissarum augmenta, vel decrementsa in ordine ad æquationem cum semiordinatis. Parameter æquatur ordinatæ per focus transeunti. *Focus* verò est punctum constans in axe sumptum, ad quod refertur curvæ cujuscumque ductus. Curvæ MVM (fig. 40) parameter æquatur rectæ MFM: punctum verò F focus est, unde deflectio curvæ MVM definitur.

## CAPUT SECUNDUM.

*Parabola.*

489 **D**efin. Parabola est curva, in qua semiordinatarum PM, PM (fig. 40) quadrata aequalia sunt rectangulo ex parametro et abscissa. Hæc proprietas modò demonstranda, characteristicæ est parabolæ notio. Apollonius Pergæus, celebre inter antiquos mathematicos nomen, hanc curvam maximè illustravit, unde *Apolloniana* à nonnullis solet appellari.

490 **Problema.** *Parabolam in plano describere.* Solut. Sumatur extra curvam quædam recta ED (fig. 40), quæ *directrix* appellatur, eo quod ad conformationem curvæ dirigat. In recta ED sumatur quodvis punctum G, ad quod ducatur perpendicularis VX: hæc erit axis parabolæ. In hoc axe punctum sit quoddam F, ad placitum sumendum: pars axis inter FG intercepta bifariam dividatur in V: hic erit vertex parabolæ, atque in F focus ipsius. Per punctum F ducatur perpendicularis MFM ad axem VX, atque utrinquè æqualis rectæ FG, seu dupla ejusdem FG: hæc erit æqualis parametro curvæ describendæ (488). Ducantur deindè aliæ perpendiculares MM, mm ad axem VX, et parallelæ MFM, quæ erunt ordinatæ parabolæ: sicut et VF, VP etc. ejusdem abscissæ, à quibus curvæ ductus determinari debet (488). Ut vero punctum semiordinatæ, per quod curvam describere oportet, inveniat;



intervalum cujusvis abscissæ PV à directrice ED, sivè distantia PG circino transferatur à puncto F ad semiordinatam, in qua punctum P abscissæ sumptum est; uti in Fm factum vides: puncta omnia in semiordinatis hoc modo inventa designabunt parabolæ ductum à curva VMmM utrinquè describendum. Demonstratio ex dictis numero superiore, et sequenti patebit.

491 Theor. 1. *In parabola modò descripta, quadrata semiordinatarum æquantur rectangulo ex abscissa in parametrum. Dem.* Semiordinatam Pm voco  $y$ : ejus abscissa dicatur  $x$ : GV=FV dico  $a$ . Quum GV+FV=FM, erit  $GV=\frac{1}{4}MFM$ , quæ dupla est FM (per præced). Jam in triangulo rectangulo Fpm,  $Fm^2=FP^2+Pm^2$  (345); et  $Pm^2=Fm^2-FP^2$ ; ac  $FP^2=Fm^2-Pm^2$ . Traducantur valores ad formulas algebricas;  $Fm=GP=a+x$ ; adeoque  $Fm^2=(a+x)(a+x)=a^2+2ax+x^2$  (129):  $Pm^2=y \times y=y^2$ .  $FP=x-a$ ; ac proindè  $FP^2=(x-a)(x-a)=x^2-2ax+a^2$  (132). Comparando igitur valores erit:

$$a^2+2ax+x^2=y^2+x^2-2ax+a^2$$

Et transp.  $y^2=a^2+2ax+x^2-x^2+2ax-a^2$

Et reducen.  $y^2=4ax$ .

At  $4a=MFM$ : nam  $GV=a$ , et  $GF=2a=FM$ ; adeoque tota  $MFM=4a$ , quæ est parameter curvæ descriptæ. Rectangulum itaquè  $4ax$  ex abscissa in parametrum, æquale est semiordinatæ quadrato. Hæc demonstratio in qualibet ex semiordinatis iterari potest.

491 Corol. 1. In parabola, quadrata ordinatarum sunt ut abscissæ. Nam parameter est

semper quantitas invariata in eadem parabola; adeoque, quum ordinatæ crescant, aut decrescant juxta proximiorē, aut remotiorē à foco distantiam, atque æquatio  $y^2 = 4ax$  constans sit; uno ex factoribus eodem semper manente, scilicet  $4a$ , alter nempe  $x$  debet variari; ad eumque referri incrementa, aut decrementa ordinarum, seu quadratorum earundem.

492 Corol. 2. Quoniam crescente axe, abscissæ pariter concrescunt, eodem proportionali incremento quadrata ordinarum augebuntur; atque adeo eorumdem radices. Parabola igitur non est curva in se rediens, ut circulus atque ellipsis: promotō enim axe, parabolæ crura, quæ ab ordinatis determinantur, juxta earum incrementa divaricabuntur, ac semper recedent.

493 Corol. 3. Axis parabolæ  $VX$  ordinatas bifariam secat: est enim utrinquē  $y^2 = 4ax$ ; sivè dicta parametro  $p$ ,  $y^2 = px$ ; ergo  $\sqrt{y^2} = y = \sqrt{px}$ : semiordinatæ æquales eidem radici  $\sqrt{px}$ .

494 Corol. 4. Parameter est tertia proportionalis ad abscissam, et semiordinatam. Etenim deducta ex æquatione  $y^2 = px$  proportionē, erit  $x:y::y:p$  (402). Nam  $\frac{y^2}{x} = p$ . Quod si per alterum factorem dividas  $\frac{y^2}{p} = x$ , proportio erit;  $p:y::y:x$ ; abscissa videlicet est tertia proportionalis ad parametrum, et semiordinatam, atque hæc ubiquē media proportionalis inter utramque.

495 Corol. 5. Si in parabola  $x=p$ ; erit  $y^2=p^2$ ; atque  $y=p$ . In puncto nimirum, in quo abscissa est æqualis parametro; semiordinata, parameter, atque abscissa æquales sunt.

496 Corol. 6. Assumpta  $x=\frac{1}{2}p$ , erit  $y^2=\frac{1}{2}pp=\frac{1}{2}p^2$ ; et  $y=\sqrt{\frac{1}{2}p^2}$ ; ac deducendo proportionem (202),  $\frac{1}{2}p:y::y:p$ . Quamdiu abscissa fuerit dimidium parametri, semiordinata erit media proportionalis inter semiparametrum, et parametrum. Quid si non jam abscissa, at semiordinata æqualis sit semiparametro? Respondeo, tunc fore abscissam quartam partem parametri. Nam  $y=\frac{1}{2}p$ ; et  $y^2=\frac{1}{4}p^2=\frac{1}{4}pp=px$ , ergo  $x=\frac{1}{4}p$ . Quum verò in foco semiordinata semiparametro æqualis sit, abscissa erit quarta pars parametri; et hæc tertia proportionalis ad parametrum, ac semiordinatam in foco sumptam (494).

497 Theor. 2. *Quadratum semiordinatæ cujuscunque quadruplum est rectanguli ex abscissa illi respondente in distantiam foci à vertice. Dem.* Sit abscissa VP (fig. 40), et semiordinata Pm: dico  $Pm^2$  quadruplum fore  $VP \times VF$ . Nam  $VF=\frac{1}{4}p$  (496), et  $PV=x$ ; quare  $PV \times VF=\frac{1}{4}px$ . At  $Pm^2 y^2=px$ : ergo  $Pm^2$  quadruplum rectanguli ex abscissa in distantiam verticis à foco.

498 Corol. Distantia foci à vertice est tertia proportionalis ad abscissam, et dimidiam semiordinatam. Quoniam  $y^2=px$ ; erit  $\frac{1}{4}y^2=\frac{1}{4}px$ : et  $\frac{1}{4}\frac{y^2}{x}=\frac{1}{4}p$ : deductaque proportionem  $x:\frac{1}{2}y::\frac{1}{2}y:\frac{1}{4}p$ . Abscissa ad dimidiam semi-

ordinatam, ut hæc ad distantiam foci à vertice.

499 Theor. 3. *Recta ex foco parabolæ ad extremitatem semiordinatæ cujuscumque, æqualis est abscissæ illi respondententi, plus distantia foci à vertice. Dem.* Sit VP (fig. 40) abscissa cui respondet semiordinata Pm: dico  $Fm = PV + FV$ . Etenim  $VF = \frac{1}{4}p$  (496), et  $PV = x$ ; idcirco  $FP = x - \frac{1}{4}p$ . Jam verò.

$$Fm^2 = Pm^2 + FP^2 \quad (345) = y^2 + x^2 - \frac{1}{2}px + \frac{x^2}{16}p^2.$$

Et substituendo  $y^2 = px$ , erit  $Fm^2 = px + x^2 - \frac{1}{2}px + \frac{1}{16}p^2$ .

Et reducendo  $Fm^2 = x^2 + \frac{1}{2}px + \frac{1}{16}p^2$ .

Et extracta utrinquè radice:  $Fm = x + \frac{1}{4}p$ .

Recta ex foco ad extremitatem semiordinatæ æqualis abscissæ, plus distantia foci à vertice.

500 Corol. Quum distantia foci à directricem sit dupla distantia foci à vertice, intervallum inter directricem, et verticem æquale erit distantia foci à vertice; atque adeò æquale rectæ ductæ à foco ad punctum concursus semiordinatæ cum parabola. En quomodò inventa sit methodus parabolam in plano describendi.

501 Probl. 2. *Ad quodlibet parabolæ punctum tangentem ducere.* Solut. Sit datum punctum  $m$  semiordinatæ  $Fm$ , ad quod ducenda sit tangens (fig. 40). E foco  $F$  ad datum punctum ducatur recta  $Fm$ ; atque ex eodem puncto altera  $Dm = Fm$ , et ad directricem  $AD$  perpendicularis, E foco  $F$  ad punctum  $D$  ducatur recta  $FD$ , eaque bisariam secetur in  $n$ ; per duo puncta  $nm$  ducatur recta  $Am$ ; hæc erit tangens parabolam in puncto dato  $m$ . *Dem.* Linea

*Ann* curvam tangit in puncto *m*; reliqua ejusdem puncta extra curvam sunt. Primum ex constructione manifestum est, alterum oportet demonstrare. Triangulum *DFm* est isoscele: nam  $Dm = GP = Fm$  (500): quumque basis *DF* bifariam divisa sit in *n*; triangula *Fmn*, *Dmn* æqualia erunt, et rectangula ad *n* (294). Ducantur *DM*, *FM*: triangula *FMn*, *DMn*, erunt etiam æqualia, ob  $Fn = Dn$ , latus *Mn* utrique commune, et angulos ad *n* rectos (333). Quapropter si ducatur *LM* ad directricem perpendicularis, *DM* erit hypotenusa trianguli *DLM*, atque idcirco major *LM*, cujus quadratum superat, toto quadrato *DL* (345). At  $FM = DM$ ; ergo *FM* major *LM*: et punctum *M* extra parabolam: quum *LM* mensura sit distantiae à foco ad punctum in linea *FM* à parabola interceptum (499). Clarius; curva parabolica debet transire per punctum, in quo linea *FM* æqualis sit *LM* (500); quumque *FM* major sit *LM*, ejus extremitas extra parabolam est.

502 Corol. Linea, seu diameter *Bm* axi parallela, concurrens in punto contactus *m* cum *Fm*, facit angulum  $BmM = Fmn$ . Est enim ad verticem oppositus  $Dmn = Fmn$  (501); atque adeò  $Fmn$  æqualis (290). Ex hac proprietate parabolæ deducitur phenomenon speculorum parabolicorum, in quibus omnes radii paralleli, uti *Bm*, *Km*, ad focum *F* reflectuntur facientes angulum reflexionis, angulo incidentiæ parem, uti constanti lege in physicis observatur.



## CAPUT TERTIUM.

*Ellipsis.*

503 **D**efin. 1. Ellipsis est *curva*, in qua *semiordinatarum quadrata eam inter se rationem dicunt, quam habent rectangula partium abscissarum, sive segmentorum axis*. Nimirum in ellipsi EG (fig. 41 et 42),  $my^2 : MY^2 :: Ey \times Gy, EY \times GY$ . Hoc discrimen circulum inter atque ellipsim intercedit, quod in circulo quadrata semiordinatarum æqualia sunt rectangulis respondentium abscissarum: in ellipsi verò proportio tantum reperitur. Quod si ellipsis curvatura adeò inflecteretur, ut quadrata semiordinatarum non jam proportionalia, verum æqualia segmentis axis in rectangulum erectis forent; ellipsis abiret in circulum.

504 Defin. 2. Quum verò inæquatis sit ellipseos curvatura, ut maxima à minima inflexione discerneretur, duo axes inventi sunt, qui se ad angulos rectos invicem secantes, alter *axis major*, vel *transversus*, secundus verò et *minor*, et *conjugatus* audit. Major quidem AB (fig. 42) per centrum ellipseos transiens, ejus longitudinem metitur: conjugatus autem DE, alterum perpendiculariter ad centrum secans, latitudinem seu minimam inflexionem designat. Unde ab utroque axe in quatuor partes æquales, atque similes ellipsis dividitur.

505 Defin. 3. Diameter ellipseos est quæcunque recta ab una in alteram perimetri par-

*Ann* curvam tangit in puncto *m*; reliqua ejusdem puncta extra curvam sunt. Primum ex constructione manifestum est, alterum oportet demonstrare. Triangulum *DFm* est isoscele: nam  $Dm = GP = Fm$  (500): quumque basis *DF* bifariam divisa sit in *n*; triangula *Fmn*, *Dmn* æqualia erunt, et rectangula ad *n* (294). Ducantur *DM*, *FM*: triangula *FMn*, *DMn*, erunt etiam æqualia, ob  $Fn = Dn$ , latus *Mn* utrique commune, et angulos ad *n* rectos (333). Quapropter si ducatur *LM* ad directricem perpendicularis, *DM* erit hypotenusa trianguli *DLM*, atque idcirco major *LM*, cujus quadratum superat, toto quadrato *DL* (345). At  $FM = DM$ ; ergo *FM* major *LM*: et punctum *M* extra parabolam: quum *LM* mensura sit distantia à foco ad punctum in linea *FM* à parabola intercipiendum (499). Clarius; curva parabolica debet transire per punctum, in quo linea *FM* æqualis sit *LM* (500); quumque *FM* major sit *LM*, ejus extremitas extra parabolam est.

502 Corol. Linea, seu diameter *Bm* axi parallela, concurrens in puncto contactus *m* cum *Fm*, facit angulum  $BmM = Fmn$ . Est enim ad verticem oppositus  $Dmn = Fmn$  (501); atque adeo *Fmn* æqualis (295). Ex hac proprietate parabolæ deducitur phænomenon speculorum parabolicorum, in quibus omnes radii paralleli, uti *Bm*, *Km*, ad focum *F* reflectuntur facientes angulum reflexionis, angulo incidentiæ parem, uti constanti lege in physicis observatur.

## CAPUT TERTIUM.

*Ellipsis.*

503 **D**efin. 1. Ellipsis est *curva*, in qua *semiordinatarum quadrata eam inter se rationem dicunt, quam habent rectangula partium abscissarum, sive segmentorum axis*. Nimirum in ellipsi EG (fig. 41 et 42),  $my^2 : MY^2 :: EY \times Gy, EY \times GY$ . Hoc discrimen circulum inter atque ellipsim intercedit, quod in circulo quadrata semiordinatarum æqualiasunt rectangulis respondentium abscissarum: in ellipsi verò proportio tantum reperitur. Quod si ellipsis curvatura adeò inflecteretur, ut quadrata semiordinatarum non jam proportionalia, verum æqualia segmentis axis in rectangulum erectis forent; ellipsis abiret in circulum.

504 Defin. 2. Quum verò inæqualis sit ellipseos curvatura, ut maxima à minima inflexione discerneretur, duo axes inventi sunt, qui se ad angulos rectos invicem secantes, alter *axis major*, vel *transversus*, secundus verò et *minor*, et *conjugatus* audit. Major quidem AB (fig. 42) per centrum ellipseos transiens, ejus longitudinem metitur: conjugatus autem DE, alterum perpendiculariter ad centrum secans, latitudinem seu minimam inflexionem designat. Unde ab utroque axe in quatuor partes æquales, atque similes ellipsis dividitur.

505 Defin. 3. Diameter ellipseos est quæcunque recta ab una in alteram perimetri par-

tem per centrum ducta: undè diametri in ellipsi plures; axes verò duo tantum assignari possunt. Quod si ita diameter una super aliam cadat, ut parallelas altera alterius bifariam dividat; diametri conjugatæ vulgò dicuntur.

506 Defin. 4. Duo sunt in ellipsi axe majore puncta, quæ focorum vice funguntur. Peculiaris eorumdem proprietas est, ut ductis rectis è duobus prædictis focus ad quodlibet perimetri punctum, harum rectarum summa æqualis sit axi majori, veluti infra demonstrabitur. Hinc facile est invenire ellipsis focos; diviso nimirum bifariam axe majore AB (fig. 42), ductoque minore DE, atque intervallo AC, aut BC è punctis D, aut E, rectis FE, E *f* designatis; puncta F, *f* ellipseos focos indicabunt.

507 Defin. 5. Parameter in ellipsi est tertia proportionalis ad utrumque axem: undè quum duo sint axes in ellipsi, et duæ parametri in eadem inveniuntur. Si axem majorem in primum proportionis terminum assumpseris, tertia proportionalis erit ejusdem parameter: quod si primum terminum posueris axem conjugatum, parameter ipsi repondens est tertia proportionalis ad axes minorem et majorem.

508 Theor. 1. *In ellipsi quadrata semior-  
dinatarum sunt, ut rectangula sub segmentis  
axis ipsis respondentibus. Dem.* Sint in cono  
ACD (fig. 41) FH, BL circuli paralleli; EG ellip-  
sis; MY, *my* applicatæ tam circulo, quam ellipsi  
comunis in triangulis EH $\gamma$ , EBY, H $\gamma$ : BY ::  
E $\gamma$ : EY (338): atque ob eandem rationem in  
triangulis GLY, GF $\gamma$ , F $\gamma$ : LY :: G $\gamma$ : GX. In

circulis vero  $my^2 : MY^2 :: Fy \times Hy : LY + BY$   
(376, 486).

2. Si ducantur invicem duæ primæ proportionēs, producta adhuc erunt proportionalia (207) en proportionēs, et producta:

$$Hy : BY :: Ey : EY$$

$$Fy : LY :: Gy : GY$$

$$Fy \times Hy : LY \times BY :: Gy \times Ey : GY \times EY.$$

$$\text{At } my^2 : My^2 :: Fy \times Hy : LY \times BY$$

$$\text{Ergo etiam } my^2 : MY^2 :: Gy \times Ey : GY \times EY. (209).$$

Quadrata nimirum semiordinatarum, ut rectangula sub analogis axis partibus, quæ semiordinatis respondent.

509 Corol. 1. Quadratum dimidii axis minoris est ad quadratum dimidii axis majoris, ut quadratum cujuscunque semiordinatæ ad rectangulum ex abscissis analogis illi respondentibus. Nam (fig. 42)  $MP^2 : DC^2 :: AP \times BP : AC \times BC$ ; at  $AC = BC$ ; ergo  $MP^2 : DC^2 :: AP \times BP : AC^2$ ; et invertendo  $DC^2 : MP^2 :: AC^2 : AP \times BP$ ; et alternando  $DC^2 : AC^2 :: MP^2 : AP \times BP$ ; in qua proportionē continentur quadratum dimidii axis minoris, majoris, semiordinatæ, ac rectangulum abscissarum ipsi respondentium. Quum verò dimidia sint ut tota, eadem proportio erui potest inter quadrata integrorum axium: ergo  $DE^2 : AB^2 :: MP^2 : AP \times BP$ .

510 Corol. 2. Proportionem inventam ad formulas algebricas translaturis, esto axis major  $AB = 2a$ ; minor  $DE = 2b$ ; semiordinata de more  $= y$ ; abscissa à vertice computata  $AP$ , aut  $BP = x$ : idcirco  $AC = a$ ;  $DC = b$ ;  $AB - BP = 2a$



$+x$ , et rectangulum  $AP \times BP = 2ax - x^2$ . Erit igitur  $MP^2 : AP \times BP :: DC^2 : AC^2$ , facta denominatione.

$$y^2 : 2ax - x^2 :: b^2 : a^2;$$

et mediis, atque extremis ductis;  $a^2 y^2 = 2ab^2 x - b^2 x^2$

et dividendo per  $a^2$ ;  $y^2 = \frac{2ab^2 x - b^2 x^2}{a^2}$

Habes æquationem ellipsis, referentem proportionem ordinatas inter atque abscissas à vertice computatas.

§ 11 Corol. 3. Deducta ex æquatione  $y^2 = \frac{2ab^2 x - b^2 x^2}{a^2}$  proportionem (202), erit  $a^2 : b^2 ::$

$2ax - x^2 : y^2$ ; sivè multiplicando primos terminos per 4:  $4a^2 : 4b^2 :: 2ax - x^2 : y^2$ . Atque extracta radice  $2a : 2b :: \sqrt{(2ax - x^2)} : y$ . Nimirum semiordinata in ellipsi est quarta proportionalis ad axem majorem, conjugatum, et semiordinatam circuli descripti in axe majore, cui etiam inscripta sit ellipsis, habeantque communes abscissas (486). En igitur ex præsentì corollario unam ex methodis ellipsis describendæ. Esto diameter circuli axis major ellipsis: datus sit, aut eligatur ad placitum axis conjugatus, qui in circulo perpendiculariter ad axem majorem ipsum bifariam dividens, atque ab ipso pari æqualitate divisus designetur: ducantur deinde semiordinatæ ad circulum, ad quas inquiratur singillatim quarta proportionalis (349) assumptis pro tribus terminis proportionis dimidio axe majore, minore, atque semiordinata circuli; quartus terminus in qualibet ana-

logia erit semiordinata ellipsis, præter cujus extremitatem perimeter ellipseos inflecti debet.

§ 12 Corol. 4. Ponamus  $a=b$ : erit  $a^2=b^2$ ; factaque divisione præcedentis æquationis  $y = \frac{2ab^2x - b^2x^2}{b^2}$ , emergit  $y^2=2ax - x^2$ , quæ est

æquatio ad circulum. Undè eruere licet, circulum speciem ellipseos esse, in qua axis conjugatus axi transverso æqualis est. Atque eidem axium comparationi insistendo; quo magis axis minor ad maiorem accesserit, eo minor erit differentia circulum inter, atque ellipsim. Contra verò decrescente axe conjugato, prolixior ellipsis evadet, atque ab æqualitate cum circulo plus recedet.

§ 13 Schol. Ex hac diversitate in figura elliptica, quæ à differentia minima inter ipsam, et circulum, ad confusionem ferè cum linea recta potest deduci; orta est *excentricitas* ellipseos, quæ est differentia inter focos, et centrum ejusdem. Excentricitas littera  $c$  solet designari. Hæc autem propter rationem nuper allatam in ellipsis valdè compressis ad perimeter maximè accedere debet; quo verò plus ad similitudinem cum circulo accesserint, excentricitatem minui necesse est.

§ 14 Theor. 2. *Quadratum excentricitatis ellipseos, æquatur differentie quadratorum semiaxis majoris, et conjugati: videlicet  $c^2=a^2-b^2$ .* Dem. In triangulo rectangulo  $ECf$  (fig. 42)  $Ef^2=EC^2+Cf^2$  (345); et  $fC^2=Ef^2-EC^2$ . Enimverò  $Ef=BC$  (506): ergo  $fC^2=BC^2-EC^2$ ; nimirum  $c^2=a^2-b^2$ .

§ 15 Corol. 1. Excentricitas, sivè differentia foci à centro est media proportionalis inter semiaxium summam, eorumque differentiam. Nam si ducatur  $(a+b)(a-b)$ , productum est  $a^2 - b^2$ , et quum  $c^2 = a^2 - b^2$  erit  $c^2 = (a+b)(a-b)$ ; et deducta proportione,  $a+b : c :: c : a-b$  (202).

§ 16 Corol. 2. Axis minor est media proportionalis inter segmenta axis majoris in alterutro foco secti; sivè inter alterutrius foci distantiam ab utroque vertice. Est enim  $c^2 = a^2 - b^2$ ; ergo  $a^2 = b^2 + c^2$ ; et  $b^2 = a^2 - c^2 = (a+c)(a-c)$ . Deducta igitur proportione (202),  $a+c : b :: b : a-c$ . Enimverò  $a+c = AC + Cf = Af$  (fig. 42); et  $b = EC$ ; atque  $a-c = Bf$ ; ergo  $Af : EC :: EC : Bf$ ; segmenta videlicet axeos in foco sunt extrema proportionis, axis minor utrumque medium.

§ 17 Theor. 3. *Ordinata MfmC* (fig. 42) *per focos ellipsis transiens, æquatur ipsius parametro. Dem.*  $Mf^2 : EC^2 :: Af \times Bf : AC \times BC$  (508); at  $Af \times Bf = EC^2$  (§ 16); ergo  $Mf^2 : EC^2 :: EC^2 : AC \times BC$ . Rursus  $AC = BC$ ; igitur  $Mf^2 : EC^2 :: EC^2 : AC^2$ ; et permutando extrema  $AC^2 : EC^2 :: EC^2 : Mf^2$ ; et multiplicando per 4;  $4AC^2 : 4EC^2 :: 4EC^2 : 4Mf^2$ . Ac demum extrahendo radicem  $2AC : 2EC :: 2EC : 2Mf$ , sivè  $Mfm$ ; ordinata scilicet per focos transiens tertia proportionalis ad axem majorem et minorem, quæ est parametri definitio (507).

§ 18 Corol. 1. Ex dictis facillè est, datis axibus, invenire parametrum. Nam instituta proportione axis majoris et minoris, tertia propor-

tionalis erit parameter axis majoris: nimirum  
 $2a: 2b :: 2b: p$ , littera  $p$  designante parame-  
 trum; sivè divisa per 2 prima ratione, adhuc  
 erit,  $a: b :: 2b: p$ ; ac  $p = \frac{2b^2}{a}$ .

§ 19 Corol. 2. Quum axes in ellipsi constan-  
 tes sint, nec augmentum, aut decrementum pa-  
 tiantur, uti abscissæ, atque ordinatæ, parame-  
 ter etiam quantitas constans erit in ellipsi.

§ 20 Schol. Abscissæ in ellipsi possunt etiam  
 à centro computari. Esto CP (fig. 42) abscissa  
 ab centro computata, quam assumis cum reli-  
 quis ellipsis lineis comparandam; erit  $AP =$   
 $a - x$ ,  $BP = a + x$ ;  $AP \times BP (a - x)(a + x)$ : et  
 multip. ac reductione facta  $a^2 - x^2$ . Quamo-  
 brem superius (§ 10) inventa proportio  $MP^2$ :  
 $AP \times BP :: DC^2: AC^2$  in hanc abibit:

$$y^2 : a^2 - x^2 :: b^2 : a^2;$$

ductisque extremis et mediis,  $a^2 y^2 = a^2 b^2 - b^2 x^2$

et transp.  $y^2 = \frac{a^2 b^2 - b^2 x^2}{a^2}$

En alteram æquationem inter semiordinatas at-  
 que abscissas à centro computatas.

§ 21 Probl. 1. *Ellipsim motu continuo descri-  
 bere.* Solut. Esto datus, vel ad libitum assump-  
 tus axis AB (fig. 42), in quo foci F, f, sivè  
 dati, sivè delecti sint: filum longitudinis AB in  
 duobus punctis F, f, ab extremitatibus ritè af-  
 figatur, ut possit stilo probè tenso utrinquè  
 circumduci; linea sivè perimeter ADEB sic des-  
 cripta erit ellipsis. *Dem.* Si ostendero in curva

modò designata æquationem ad ellipsim inveniri, extra dubium erit, ellipsim descriptam fuisse: quod sic præstabo. 1. Positio fili tensi curvam describentis in quocumque puncto designetur, ex gr. FM, Mf: quum verò filum sit æquale AB, erit  $FM + Mf = 2a$ ; differentia autem inter FM, et Mf dicatur  $2d$ ; adeoque

$$FM = \frac{2a - 2d}{2} = a - d; \text{ et } Mf = \frac{2a + 2d}{2} =$$

$a + d$  (110). Ducatur semiordinata  $MP = y$ , dividens FMf in duo triangula rectangula FMP, MPf recta Pf = PC + Cf erit  $= c + x$ ; et FP =  $c - x$  (515, 520).

2. In triangulis prædictis  $Mf^2 = MP^2 + fP^2 = MP^2 + (PC + Cf)^2$ : et  $FM^2 = MP^2 + FP^2 = MP^2 + (FC - CP)^2$  (345). Valoribus algebricis linearibus substitutis, erunt

$$Mf^2 = a^2 + 2ad + d^2 = MP^2 + (PC + Cf)^2 = y^2 + c^2 + 2cx + x^2$$

$$FM^2 = a^2 - 2ad + d^2 = MP^2 + (FC - CP)^2 = y^2 + c^2 - 2cx + x^2$$

Subtracta utrinquè inferiore ab superiore æquatione, factaque reductione; quas operationes brevitatis gratia sedulitatis studiosi perficiendas committimus;

$$\text{deducitur } 4ad = 4cx; \text{ et } d = \frac{cx}{a} \text{ et } d^2 = \frac{c^2 x^2}{a^2}.$$

Substituatur hic valor in prima æquatione; emerget  $a^2 + 2a \frac{cx}{a} + \frac{c^2 x^2}{a^2} = y^2 + c^2 + 2cx + x^2$  (104).

sive deleto  $a$ ;  $a^2 + \frac{c^2 x^2}{a^2} + 2cx = y^2 + c^2 + 2cx + x^2$ ;



et delendo utrinque  $2cx$ ;  $a^2 + \frac{c^2 x^2}{a^2} = y^2 + c^2 + x^2$  (104, 2):

ac tollendo fraction.  $a^4 + c^2 x^2 = a^2 y^2 + a^2 c^2 + a^2 x^2$  (104, 3):

et transp.  $a^2 y^2 = a^4 + c^2 x^2 - a^2 c^2 - a^2 x^2$

et divid. utrinquè per  $a^2 - c^2$ ;  $\frac{a^2 y^2}{a^2 - c^2} = \frac{a^4 - a^2 c^2 + c^2 x^2 - a^2 x^2}{a^2 - c^2}$  (ibid. 4.)

Rursus  $a^2 - c^2 = b^2 = EC^2$  (516): adeòque si

substituatur  $b^2 = a^2 - c^2$ ; erit  $\frac{a^2 y^2}{b^2} = a^2 - x^2$ ;

exterminata fract.  $a^2 y^2 = a^2 b^2 - b^2 x^2$ .

Demum transp.  $y^2 = \frac{a^2 b^2 - b^2 x^2}{a^2}$

Habes æquationem ad ellipsim superius traditam in curva modò circumducta.

522 Corol. Summa rectarum ductarum à duobus focus ad idem perimetri punctum æqualis est axi majori: adeòque tam  $FM + Mf$ , quam  $FE + Ef$ , aut quæcumque aliæ similiter ducendæ, æquales erunt  $AB$ . Et vicissim si summa prædictarum linearum æqualis est axi majori, punctum concursus erit in perimetro.

523 Prob. 2. *Ad ellipsim tangentem ducere.* Solut. Esto punctum  $M$ , ad quod ducenda sit tangens: producat  $fM$  ultra  $M$  in  $S$ , donec sit  $MS = MF$ , et ducta  $FS$ , bifariam dividatur; punctum bisectionis, et  $M$  directionem dabit lineæ  $TMr$ , quæ erit tangens ellipsis ad punctum  $M$ . *Dem.* Quoniam omnia latera homologa triangulorum  $FMT$ ,  $SMT$  æqualia sunt cons-

tracta, erunt æqualia (332): ergo et rectangula ad T (294): quapropter omnia puncta  $Tr$  æquè distant utrinque à S, F. Ducatur  $Sr=Fr$ ; latera  $Sr, fr$ , in triangulo  $Sfr$  majora sunt quam  $Sf$  (272): at  $fS=Mf+MF=AB$  (522): ac demum  $fr+Sr$ , sive æquale  $Fr$  majora sunt  $fS=FM+Mf=AB$ : ergo punctum  $r$  extra ellipsim est (521, 522). Omnia igitur puncta lineæ  $Tr$  extra ellipsim sunt, præter assignatum M, in quo ellipsim tangit.

524 Corol. Recta FM ab uno ex focus ad punctum contactus M. ducta, facit angulum  $FMT=fMr$ , quem altera recta, ab respondente foco ducta ad idem M, punctum contactus format cum eadem tangente  $Tr$ . Nam ex praxi superius assignata ad tangentem cuilibet puncto (M) ducendam  $SMT=FMT$ ; at  $fMr$  est ad verticem oppositus  $SMT=FMT$ : ergo et  $fMr$  æqualis erit (290).

## CAPUT QUARTUM.

### *Hyperbola.*

525 Defin. 1. **Q**uum hyperbola sit *sectio conii plano axi parallelo, aut alia directione, quæ alterutri laterum parallela non sit, ac basin intra conum secet* (484); concipiamus conos duos verticibus oppositos CBV, EDV (fig. 43) ita ut recta AVF communis axis utriusque sit. Enimverò si planum GL directione ad hyperbolam composita latus utrumque conorum se-

cuerit, evidens est duas hyperbolas utrinque factum iri; quæ hyperbolæ conjugatæ apud geometras audiunt.

526 Defn. 2. Axis hyperbolæ extra curvam sumitur; estque illa distantia, quæ inter ejusdem, atque alterius conjugatæ verticem intercedit MN axis hyperbolæ GM erit; alterius vero LN idem intervallum ab N in M sumptum: atque hic quidem primus axis dicitur. Secundus autem est linea VO alteri perpendicularis, ipsum bifariam dividens, atque itidem ab eodem bisectus. Ordinatæ perinde atque in aliis curvis computantur: abscissæ etiam sunt partes interceptæ inter verticem et analogam ordinatam. Et hæc quidem intra curvam: alias verò abscissas et ordinatas infra dabimus.

527 Defn. 3. Si triangulum EVD, in quod conum derivetur directione à vertice ad basem perpendiculari bisectum, ita constituatur, ut hyperbolam MG intra crura intercipiat, ambo sub eodem plano respondentia; latera duo trianguli VE, VD, hyperbolæ asymptoti dicuntur.

528 Corol. Quum ED sit basis trianguli EVD, cujus latera sunt asymptoti hyperbolæ; atque etiam diameter sit circuli EFD; major erit quam chorda *ab*, quæ basim, ut ita dicam, hyperbolæ metitur (280). Concipiamus conum in infinitum produci: procul dubio asymptoti, atque hyperbola continenti proportionem crescent, manente tamen eadem ratione inter diametrum ED, et chordam *ab*. Intervallum nimirum asymptotorum ED pari casu

crescet, quo chorda *ab* distendetur: ergo semper invicem accedent, quin umquam coincident; quod asymptotis nomen præbuit; perinde quasi non *coincidentes* dicerentur. Hinc ortum est theorema paradoxo simile; quod nimirum hyperbolæ crura semper propius ad asymptotos accedunt, quin umquam possint cum iisdem concurrere.

529 Defin. 4. Ordinatæ, atque abscissæ hyperbolæ in asymptotis pariter sumi possunt. Sumpto AB, AE (fig. 44) asymptoti descriptæ, aut describendæ hyperbolæ: in his sumantur AD, AF æquales, compleaturque parallelogrammum ADVF: deinde in asymptotis accipiantur ad libitum partes, uti AC, AE, AG, AB ea lege, ut latus  $AD = DV$  parallelogrammi sit semper media proportionalis inter partem in asymptoto abscissam, atque aliam parallelam alteri asymptoto ducendam: ex gr.

$$AC : DV :: DV : CL$$

$$AG : FV :: FV : GK$$

$$AE : DV :: DV : EN \text{ etc.}$$

linea per puncta NLVKM transiens, erit hyperbola: ejus abscissæ in asymptotis, erunt AD, AC, AG etc.: ordinatæ autem EN, CL, GK etc.

530 Corol. 1. Esto abscissa de more  $= x$ , ordinata  $= y$ , latus DV aut FV vocetur  $d$ ; quum sit  $x : d :: d : y$ ; erit  $xy = d^2$ ; ergo quæcumque denum sit abscissa in asymptoto capta, semper rectangulum ex ipsa in respondentem, ordinatam æquale erit quadrato DV, aut FV, sive

parallelogrammo ADVF eidem æquali (354).

531 Corol. 2. Comparando abscissas abscissis, atque ordinatas ordinatis, esto AC, aut AG =  $x$ ; CL, aut GK =  $y$ ; AE = X; EN = Y; quum sit  $xy = d^2$ ; XY =  $d^2$ ; erit XY =  $xy$ ; et X:  $x :: y$ : Y (202). Nempè abscissæ sunt in ratione inversa, aut reciproca ordinatarum, et viceversa.

532 Corol. 3. Considerando rectam AD veluti abscissam in asymptoto AE, erit AD: DV :: DV:  $y$ . Verum AD = AF (530): et quum AD, VF sint parallelæ, AF = DV (351): ergo etiam  $y$  æqualis AD: sivè ordinata huic abscissæ respondens, est ipsum potentiaæ latus AD: atque idcirco punctum V est in hyperbola. Sumendo aliam abscissam AF huic æqualem in asymptoto AB, eadem methodo demonstratur, ordinatam illi respondentem fore ipsum latus potentiaæ AF: ergo crura hyperbolæ in puncto V concurrere debent; ipsumque est vertex prædictæ curvæ, è quo ejusdem crura divergere incipiunt.

533 Corol. 4. Quoniam reliquæ ordinatæ oK, pM ulterioribus abscissis Ao, Ap respondentibus supra verticem V in asymptoto AE æquales sunt respondentibus abscissis alterius asymptoti AB (354): eadem proportio, quæ inter abscissas, latus constans hyperbolæ, atque ordinatas illic invenitur; hic etiam ordine permutato reperietur: nempè quæ hic ordinata illic abscissa, et viceversa vocabitur. Est igitur Ao: DV :: DV: oK, sivè  $x: d :: d: y$ ; ac rursus Ap: DV :: DV: pM; seu X:  $d :: d$ : Y, et



$xy = XY$ ; deductaque proportionem  $x: X :: Y: y$ .  
En iterum inversam rationem inter abscissas,  
atque ordinatas supra verticem positas.

534 Corol. 5. Ordinatae asymptoti AE perpetuò decrescunt, recedendo à vertice V versus E: nam crescentibus abscissis, eodem medio remanente, opus est ordinatas decrescere, ut constans sit proportio assignata num. 530. Quum verò datis duabus lineis, tertia proportionalis semper reperiri queat (344); evidenter deducitur, asymptotorum latera, atque hyperbolæ crura continenter accedere, quin unquam ad contactum deveniant. Habes alteram demonstrationem theor. num. 528 indicati.

535 Corol. 6. Contra atque de ordinatis infra verticem ostensum est, evenit in aliis ordinatis supra verticem sumptis: hæ videlicet jugiter increscunt juxta majorem accessum à D versus A, ea lege ut nulla ordinata assignanda sit, cujuscumque demum magnitudinis supponatur, qua major inveniri non possit. Etenim crura hyperbolæ ad contactum asymptotorum devenire non valent (528, 534): poterit igitur inter utrumque duci linea finitè in infinitum, uti vulgò ajunt, quin assignari possint punctum *non plus ultra* ordinatis definiens: sive è quo duci non possit aliqua ordinata. Hoc item est alterum paradoxo simile in hyperbola. Quod: in uno latere ostendimus, dictum habet de altero hyperbolæ crure cum sibi respondente asymptoto: in qua adamussim comprobantur omnia, quæ ad unum tantum latus demonstravimus. In adducta vero hyperbola asymp-

toti angulum rectum formando, rectum pariter faciunt angulum cum sibi respondentibus ordinatis; atque adeò perpendiculares ipsis sunt. Manifestum autem est, quemcumque angulum in asymptotis supposueris; eundem et in ordinatis ad asymptotos comparatas reperi- tum iri: quum ordinatæ unius asymptoti, alteri asymptoto sint parallelæ (299).

536 Schol. Hyperbola hactenus descripta, quæ et apolloniana audit, est curva secundi gradus, quippè æquationem  $xy = d^2$  tantum continens. Quod si alteram hyperbolam descripseris, in qua  $x^2 : d^2 :: d : y$ , hæc erit tertii gradus; quoniam  $x^2 y = d^3$ , sive tertiam potentiam includens. Exempla tamen clariss. auctorum, qui philosophicas institutiones tradiderunt, à prolixiori curvarum investigatione libenter supersedemus; quum hactenus tradita, satis superque sint ad ea, quæ in physicis exponuntur, dilucidanda.




















# INDEX CAPITUM.

<b>P</b>	<b>RÆFATIO.....</b>	<b>Pág. 3</b>
	<i>De Philosophiæ vicissitudinibus brevis</i>	
	<i>narratio.....</i>	<b>13</b>
	<i>Matheseos prolegomena.....</i>	<b>72</b>
<b>T</b>	<b>RACTATUS I. Arithmetica numeralis....</b>	<b>75</b>
	<i>Caput I. De natura numerorum.....</i>	<b>75</b>
	<i>Caput II. Operationes arithmeticiæ in</i>	
	<i>numeris arabicis.....</i>	<b>78</b>
	§. 1. <i>Additio.....</i>	<b>78</b>
	§. 2. <i>Subtractio.....</i>	<b>80</b>
	§. 3. <i>Multiplicatio.....</i>	<b>82</b>
	§. 4. <i>Divisio.....</i>	<b>87</b>
	§. 5. <i>Numeri complexi.....</i>	<b>92</b>
	<i>Caput III. Fractiones.....</i>	<b>96</b>
	§. 1. <i>Fractionum notio.....</i>	<b>96</b>
	§. 2. <i>Fractionum valor.....</i>	<b>98</b>
	§. 3. <i>Transformatio fractionum.....</i>	<b>100</b>
	§. 4. <i>Quatuor operationes in fractio-</i>	
	<i>nibus.....</i>	<b>104</b>
	§. 5. <i>Fractiones decimales.....</i>	<b>107</b>
<b>T</b>	<b>RACTATUS II. Arithmetica speciosa, si-</b>	
	<i>ve literalis.....</i>	<b>112</b>
	<i>Caput I. Notiones præviæ.....</i>	<b>112</b>
	<i>Caput II. Operationes arithmeticiæ in</i>	
	<i>litteris.....</i>	<b>115</b>
	§. 1. <i>Additio, et subductio.....</i>	<b>115</b>
	§. 2. <i>Multiplicatio.....</i>	<b>117</b>
	§. 3. <i>Divisio.....</i>	<b>119</b>
	§. 4. <i>Fractiones litteris expressæ.....</i>	<b>121</b>















	323
Caput III. <i>Æquationes primi gradus.</i>	123
§. 1. <i>Prænotiones</i> .....	123
§. 2. <i>Æquationum formatio, et re-</i> <i>solutio.</i> .....	125
§. 3. <i>Problemata</i> .....	127
Caput IV. <i>De potentiis, ac radicibus.</i>	133
§. 1. <i>Prænotiones</i> .....	133
§. 2. <i>Potentia ac radices monomiæ</i> ....	135
§. 3. <i>Radix quadrata quantitatum</i> <i>complexarum, et numerorum</i> .....	139
§. 4. <i>Æquationes secundi gradus</i> ....	148
§. 5. <i>Radix cubica</i> .....	153
Caput V. <i>Proportiones, et series</i> .....	162
§. 1. <i>Prænotiones</i> .....	162
§. 2. <i>Ratio et proportio arithmetica</i> ..	163
§. 3. <i>Progressiones arithmetica</i> .....	166
§. 4. <i>Ratio et proportio geometrica</i> ...	169
§. 5. <i>Progressiones geometrica</i> .....	179
Caput VI. <i>Usus proportionum</i> .....	183
§. 1. <i>Regula aurea</i> .....	183
§. 2. <i>Regula aurea composita</i> .....	186
§. 3. <i>Compendia pro regulis propor-</i> <i>tionum</i> .....	189
§. 4. <i>Regula societatis</i> .....	191
§. 5. <i>Regula mixtionis, seu alligatio-</i> <i>nis.</i> .....	193
§. 6. <i>Regula falsæ positionis, seu falsi.</i>	197
§. 7. <i>Logarithmorum notio</i> .....	201
TRACTATUS III. <i>Geometria, prolegomena.</i>	207
Caput I. <i>Longimetria</i> .....	209
§. 1. <i>Linearum notio</i> .....	209
§. 2. <i>Linearum positio respectiva</i> ....	213
§. 3. <i>Linearum positio in circulo</i> .....	219

§. 4. <i>Linearum conjunctio in figuras.</i>	226
§. 5. <i>Ratio linearum, sive proportiones.</i>	231
Caput II. <i>Planimetria, seu de superficibus.</i>	239
§. 1. <i>Quadrilatera</i>	239
§. 2. <i>Superficierum mensura</i>	242
§. 3. <i>Polygona</i>	246
§. 4. <i>Ratio superficierum</i>	251
§. 5. <i>Plana</i>	254
Caput III. <i>Stereometria, sive de solidis.</i>	257
§. 1. <i>Solidorum genesis</i>	257
§. 2. <i>Mensura superficierum in solidis.</i>	260
§. 3. <i>Ratio superficierum</i>	266
§. 4. <i>Soliditas corporum</i>	268
§. 5. <i>Ratio solidorum</i>	272
TRACTATUS IV. <i>Trigonometria</i>	276
Caput I. <i>Notiones trigonometricæ</i>	276
Caput II. <i>Trigonometriæ fundamenta.</i>	280
Caput III. <i>Usus sinuum in calculo trigonometrico.</i>	284
Caput IV. <i>Resolutio triangulorum.</i>	288
§. 1. <i>Resolutio trianguli rectanguli.</i>	288
§. 2. <i>Resolutio trianguli non rectanguli.</i>	290
Caput V. <i>Notiones trigonometriæ sphaericæ</i>	293
TRACTATUS V. <i>Elementa sectionum conicarum.</i>	297
Caput I. <i>Notiones preliminares.</i>	297
Caput II. <i>Parabola</i>	301
Caput III. <i>Ellipsis</i>	307
Caput IV. <i>Hyperbola</i>	316











<p>  </p>	<p>  </p>	<p>  </p>	<p>  </p>
<p>  </p>	<p>  </p>	<p>  </p>	<p>  </p>
<p>  </p>	<p>  </p>	<p>  </p>	<p>  </p>











A FD/1696



UNIVERSIDAD DE SEVILLA



600714109





528203598







colorchecker CLASSIC



calibrite